



Sc. sup. 6. Pl. 11.






D.D

3

24





LEMONNIER
CURSUS
PHILOSOPHICUS.
LOGICA.



THE UNIVERSITY

OF CHICAGO

PHOTOGRAPHIC

LOGIC



CURSUS PHILOSOPHICUS *AD SCHOLARUM USUM* ACCOMMODATUS.

Authore PETRO LEMONNIER,
Philosophia Professore Emerito, in Univer-
sitate Studii Parisiensis, in Collegio Har-
curiano., cum figuris.

TOMUS PRIMUS.



PARISIIS,
LUDOVICUM GENNEAU, sub signo
Sancti Petri.
Apud } JACOBUM ROLLIN, Filium, sub signo
Sancti Athanasii, ad ripam
Augustinianorum.

M. D C C. L.
Cum Approbatione & Privilegio Regis.

10. 11. 1914

500000

1000000

1000000

1000000

1000000

1000000

1000000

1000000

1000000

1000000

1000000

1000000

1000000

1000000

1000000

1000000

1000000

1000000



FREDERICO-HIERONIMO

DE ROYE

DE LA ROCHEFOUCAULD,

CARDINALI PRESBYTERO,
Tituli Sanctæ Agnetis extra mu-
ros Sanctæ Romanæ Ecclesiæ,
Patriarchæ, Archiepiscopo Bitu-
ricensi, Aquitaniarum Primate,
Abbati, Capiti, Superiori Generali,
& Administratori perpetuo Sacræ
Abbatix & totius Ordinis Clu-
niacensis, Regii Ordinis Sancti
Spiritûs Commendatori, nec-non
Abbati Sancti Martini Athana-
tensis, Sancti Mauricii de Bello-
loco, in Argonnâ, &c.

Illud more & usu receptum est,

EMINENTISSIME CARDINALIS,

a ij

ut qui studiorum laborumque suorum
monumenta, in lucem proferunt, ea
Viris Clarissimis inscribant, quo
suis operibus commendationem & au-
thoritatem addant majorem, seque
suaque adversus malevolentiae & in-
vidiae tela, illustri Patrocinio, for-
tissimo quasi scuto, præmuniant:
quod facilius, si concessum est vel
illis, qui de rebus disserunt, ad eos
nihil pertinentibus, quos sibi Patro-
nos advocant; quanto potiori jure,
id mihi assumere posse videor, qui
ea Tibi nuncupo, quibus plurimum
delectaris & excellis? Opus enim hoc
meum, quod tuo precor nomine
ac præsidio tegi atque ornari velis,
universæ Philosophiæ curriculum est,
ubi multâ cum laude & voluptate

*olim versatus es , ubi infitas mentis
& ingenii vires tantâ alacritate exer-
cuiſti , ut , eo ſtadio vix emenſo ,
ad res maximè arduas , immaturâ
licet ætate , prudentiâ tamen & con-
ſilio benè maturus acceſſeris : quod
quidem ingens erit , opinor , Ado-
leſcentibus omnibus ad Philoſophiam
incitamentum : quem enim benè cor-
datum juvenem pigeret , præcipuam
curam & operam in ſis exercitatio-
nibus collocare , quas , exemplo tuo
monitus , ad naturæ adjumenta per-
ficienda & promovenda , honoresque
adipiſcendos , non mediocriter pro-
deſſe intelliget ?*

*In laudes tuas hîc excurrere geſti-
ret animus , niſi laudanda facere ,
Te , quàm laudâri , malle comper-*

*tum haberem ; sufficiat igitur , pu-
blico hoc ac solemni Monumento ,
palam & apertè omnibus testari ,
quantâ observantiâ & veneratione
Tibi sim ,*

EMINENTISSIME CARNIATIS!

Addictissimus &
obsequentissimus,
P. LEMONNIER.



P R Æ F A T I O.

EX quo Philosophiam publice docendi , gravissimam suscepi provinciam , duo potissimum vitanda mihi visa sunt ; nempe Mathematicarum disciplinarum neglectus , & earundem prolixior tractatus. Enimverò si principia generalia Matheseos omittantur, Physicæ phænomena nec intelligi nec explicari possunt ; unde , postquam illius scientiæ elementa cum Physicâ conjungi cœperunt , plures , per unum sæculum , detectæ fuerunt veritates Physicæ , quàm antea , per duodecim sæcula. Deinde

verò, si *Mathesis* proluxius tractetur; cæteræ *Philosophiæ* partes neglegantur, necesse est. Quemadmodum enim, si *Astronomia*, *Mechanica*, *Chymia*, *Botanica* & *Anatomia*, quæ, sicut *Mathesis*, sunt totidem *Physicæ* partes, eâ prolixitate traderentur, quâ hodie à nonnullis evolvuntur disciplinæ *Mathematicæ*; nequidem per multos annos absolvi posset cursus *Philosophicus*. In eo autem præsertim invigilandum fuit, ut brevitati simul & perspicuitati consulerem.



A P P R O B A T I O.

ILLUSTRISSIMI Cancellarii, ac Sigillorum
Custodis jussu, *Cursum hunc Philosophicum ad usum Scholarum accommodatum*,
legi. Lutetiæ, die sextâ mensis Januarii,
1748.

MONTCARVILLE.

P R I V I L E G E D U R O I.

LOUIS, PAR LA GRACE DE DIEU,
ROI DE FRANCE ET DE NAVARRE :
A nos amés & féaux Conseillers, les Gens
tenant nos Cours de Parlemens, Maîtres
des Requêtes ordinaires de notre Hôtel,
Grand-Conseil, Prevôt de Paris, Baillifs,
Sénéchaux, leurs Lieutenans Civils, &
autres nos Justiciers qu'il appartiendra ;
SALUT : Notre amé JACQUES ROLLIN,
Fils, Libraire à Paris, Nous a fait ex-
poser qu'il desireroit faire imprimer &
donner au Public un Ouvrage qui a pour
titre, *Cursus Philosophicus ad usum Schola-
rum accommodatus*, par M. le Monnier ; s'il
Nous plaisoit lui accorder nos Lettres de
Privilege pour ce nécessaires. A ces causes
Voulant favorablement traiter l'exposant,
Nous lui avons permis & permettons par
ces présentes de faire imprimer ledit Ou-

vrage en un ou plusieurs volumes , & autant de fois que bon lui semblera , & de le vendre , faire vendre & débiter par tout notre Royaume pendant le tems de neuf années consécutives , à compter du jour de la datte desdites présentes. Faisons défense à toutes personnes , de quelque qualité & condition qu'elles soient , d'en introduire d'impression étrangere dans aucun lieu de notre obéissance , comme aussi à tous Libraires , & Imprimeurs , d'imprimer ou faire imprimer , vendre , faire vendre , débiter ni contrefaire ledit Ouvrage , ni d'en faire aucun extrait , sous quelque prétexte que ce soit d'augmentation , correction , changement ou autres sans la permission expresse ou par écrit dudit Exposant , ou de ceux qui auront droit de lui , à peine de confiscation des exemplaires contrefaits , de trois mille livres d'amende contre chacun des contrevenans , dont un tiers à Nous , un tiers à l'Hôtel-Dieu de Paris , & l'autre tiers audit Exposant , ou à celui qui aura droit de lui , & de tous dépens dommages & intérêts : à la charge que ces Présentes seront enregistrées tout au long sur le Registre de la Communauté des Libraires & Imprimeurs de Paris , dans trois mois de la date d'icelles ; que l'impression dudit Ouvrage sera faite dans notre Royaume ,

& non ailleurs, en bon papier & beaux caractères, conformément à la feuille imprimée attachée pour modèle sous le contrescel desdites Présentes; que l'impétrant se conformera en tout aux Réglemens de la Librairie, & notamment à celui du 10 Avril 1725; qu'avant de l'exposer en vente, le manuscrit qui aura servi de copie à l'impression dudit Ouvrage, sera remis dans le même état où l'approbation y aura été donnée, ès mains de notre très cher & féal Chevalier le Sr Daguesseau, Chancelier de France, Commandeur de nos Ordres; & qu'il en fera ensuite remis deux exemplaires dans notre Bibliothèque publique, un dans celle de notre Château du Louvre, & un dans celle de notre très cher & féal Chevalier, le Sr Daguesseau, Chancelier de France; le tout à peine de nullité des Présentes: du contenu desquelles vous mandons & enjoignons de faire jouir ledit Expofant & ses ayans cause pleinement & paisiblement, sans souffrir qu'il leur soit fait aucun trouble ou empêchement. Voulons que la copie desdites présentes, qui sera imprimée tout au long au commencement ou à la fin dudit Ouvrage, soit tenue pour dûment signifiée, & qu'aux copies collationnées par l'un de nos amés, féaux Conseillers & Secretaires, foi soit ajoutée comme à l'O-

riginal. Commandons au premier notre
Huissier ou Sergent sur ce requis , de
faire pour l'exécution d'icelles tous actes
requis & nécessaires , sans demander autre
permission , & nonobstant clameur de Ha-
ro , Charte , Normande & Lettres à ce
contraires. CAR tel est notre plaisir. Don-
né à Paris , le sixième jour du mois de
Décembre , l'an de grace mil sept cent
quarante-huit , & de notre Regne le tren-
te-quatrième. Par le Roi en son Conseil.

SAINSON.

*Registré sur le Régistre XII. de la Cham-
bre Royale des Libraires & Imprimeurs de
Paris, N°. 69. fol. 55. conformément aux
anciens Réglemens confirmés par celui du 28
Fevrier 1723. A Paris ce 14 Janvier 1749.
G. CAVELIER, Syndic.*

CURSUS



CURSUS
PHILOSOPHICUS
AD USUM SCHOLARUM
ACCOMMODATUS.

P R Æ F A T I O.

PRIVSQUAM singulas Philo-
phiæ partes exponamus & evol-
vamus, perutile mihi visum fuit,
primò explicare methodum quæ so-
let in Scholis adhiberi, dùm agitur
de aliquâ materiâ subjectâ; secundò
artem discurrendi tradere; tertio &
methodum philosophandi, & artem
discurrendi ad praxim revocare,
tùm circà Philosophiam universim,
tùm circà Logicam generatim.

Tomus I.

A



D E PHILOSOPHANDI M E T H O D O.



QUINQUE quæstiones ut plurimum instituere solent Philosophi, dùm aliquâ de re differunt. Prima est quid sit illud de quo agitur; secunda, an existat aut existere possit; tertia, cur sit; quarta, quale sit; quinta, quotuplex sit: verbi gratiâ, si Philosophi differant de beatitudine, inquirunt, quid sit; an existat aut existere possit; cur sit; qualis sit, & quotuplex sit beatitudo.

Ut has quæstiones intelligatis, de singulis dicendum.

De quæstione quid sit.

Ad intelligentiam hujus quæstionis quædam sunt annotanda.

Notandum igitur primò, nomine entis significari quidquid est possibile, nomine verò *possibilis*, id omne quod habet partes sociabiles, seu quæ mutuo sese non

destruunt; sic *figura rotunda* est ens, quia figura & rotunditas simul sociari possunt, id est, totum aliquod componere possunt. Ex opposito, *quadratum rotundum* non est ens, sed impossibile quoddam; quia quadratura & rotunditas non possunt idem totum componere; exinde sequitur ens quodlibet esse totum quoddam, si quidem coalescit ex partibus sociabilibus.

Notandum 2°. ex partibus totum quoddam, seu quodvis ens componentibus, alias vocari *communes*; alias autem *proprias*: partes illæ dicuntur communes, quæ pertinent ad tota diversa; sic *figura* vocatur pars communis, quia pertinet ad circulum, triangulum, quadratum, &c.

Partes propriæ sunt illæ, quæ vel uni tantum enti, verbi gratiâ, soli Deo, vel multis quidem entibus, sed similibus, verbi gratiâ, multis circulis, conveniunt.

Notandum 3°. ex partibus ejusdem totius, sive communibus, sive propriis, alias vocari *essentiales*, alias verò *contingentes*.

Partes essentielles vocantur illæ, sine quibus totum nec existere, nec concipi potest: sic corpus & anima sunt partes essentielles hominis; quia homo nec existere, nec concipi potest sine corpore & animâ: partes contingentes dicuntur illæ, sine qui-

bus totum & existere, & concipi potest: sic scientia & virtus sunt partes contingentes hominis, quia homo & existere & concipi potest sine scientiâ & virtute.

Notandum denique quodlibet ens, seu totum esse vel substantiam* vel modificationem.

Substantia est ens per se subsistens, seu non requirens aliud cui insit vel inhæreat: sic *Deus*, *homo*, *lapis*, &c. sunt substantiæ, quia per se subsistunt, seu non inhærent aliis entibus. Modificatio est ens inhærens alteri; sic *scientia*, *virtus*, *rotunditas*, &c. sunt modificationes, quia inhærent aliis entibus.

His notatis, per quæstionem *quid sit ens*, inquiritur ejus essentia seu natura: essentia autem seu natura est complexio generis & differentiæ.

Genus est pars essentialis & communis,

Differentia verò est pars essentialis & propria: sic *figura* est genus circuli, & *rotunditas* est ejus differentia. Quando igitur quæritur quid sit aliquod ens, duæ partes essentielles afferendæ sunt in responsione, ita ut una sit communis, quæ dicitur genus, & altera propria quæ vocatur differentia: indicabitur autem in Logicâ quænam ex partibus *essentialibus* & *communi-*
bus; quænam verò ex *essentialibus* & *pro-*

priis sint eligendæ, ut aptè respondeatur quæstionibus *quid sint entia*.

Responsio facta quæstioni quid sit ens, vocatur *definitio*. Definitio autem est oratio quidpiam explicans; & duplex est nominis & entis.

Definitio nominis est oratio, per quam explicatur quænam sit significatio vocis alicujus, aut equivocæ, aut insolitæ, aut scientiæ cuidam propriæ.

Definitio entis est oratio naturam ejus explicans per partes ejus essentielles: & rursus duplex est, propriè dicta & impropriè dicta. Propriè dicta dicitur, quando natura entis explicatur per genus & differentiam ipsius; impropriè dicta verò, quæ vocatur aliter *descriptio*, est oratio naturam entis explicans per multas partes, quæ fecerunt ens illud, ab alio quovis.

Substantia quævis definiri debet definitione propriè dictâ; at modificatio definiri tantum potest definitione impropriè dictâ, quia ignoramus genuinas modificationum differentias, quarum loco assumuntur ordines quidam essentielles, quas dicunt aut ad sua subiecta, aut ad sua objecta. Quoniam verò hæ voces *subiectum* & *objectum* frequenter usurpantur à Philosophis; idèd juvat eas hîc explicare.

De subjecto.

Subjectum generatim est quidquid recipit modificationem : & triplex est *quod* , *quo* & *denominationis*.

Subjectum *quod* est substantia prout recipiens modificationem ; sic Deus est subjectum *quod* omnipotentiae , quia Deus est substantia recipiens omnipotentiam , quae est modificatio.

Subjectum *quo* est una modificatio prout aliam modificationem recipiens : sic *actio* vocatur subjectum *quo* bonitatis , quando recipit bonitatem , quae est alia modificatio.

Subjectum *denominationis* est vel substantia , vel modificatio , quatenus denominatur à modificationibus receptis ; sic Deus est subjectum denominationis omnipotentiae , quatenus ab ipsâ denominatur omnipotens ; sic pariter *actio* est subjectum denominationis bonitatis , quatenus ab ipsâ denominatur.

Aliud à veteribus Philosophis admittebatur subjectum , quod vocabant *informationis* , quando nimirum una substantia recipiebat aliam substantiam à quâ denominabatur : sic inquebant , corpus humanum est subjectum informationis animae , quia corpus humanum recipit animam , quae est

alia substantia, à quâ denominatur animatum. Non admittimus hujus modi subjectum : quemadmodum enim anima non dicitur recipere corpus ; sic corpus dici non debet recipere animam.

De objecto.

Objectum est id omne quod objicitur alicui facultati seu potentiae, habitui & actui, hoc est id omne circa quod versari possunt facultates, habitus & actus ; sic *Deus amandus*, vocatur objectum ; quia objicitur potentiae amandi, habitui, & actui amandi.

Facultas seu potentia est capacitas ad aliquid ; & duplex est, activa & passiva.

Potentia activa est capacitas aliquid producendi, ut capacitas producendi actum amoris.

Potentia passiva est capacitas modificationem aliquam recipiendi, ut potentia recipiendi sensationem doloris.

Habitus est facilitas aliquid producendi, ut facilitas ratiocinandi.

Actus est exercitium potentiae activae : sic exercitium ratiocinandi vocatur *actus*.

Objectum igitur alicujus scientiae est id quod objicitur considerandum in hac scientia, & triplex est, materiale, formale & adequatum seu totale.

3 DE PHILOSOPHANDI

Objectum materiale scientiæ est id omne quod propter se consideratur in scientiâ : sic *corpus humanum* est objectum materiale artis Medicæ , quia propter se consideratur in hac arte. Dixi autem *propter se* , quia si propter aliud consideraretur , jam non esset de objecto materiali scientiæ ; hinc *metalla* , *planta* , &c. non sunt de objecto materiali artis Medicæ ; considerantur enim propter corpus humanum sanandum.

Objectum formale scientiæ est modus specialis & proprius sub quo objectum materiale consideratur in scientiâ : sic *sanabilitas* est objectum formale artis Medicæ , quia est modus specialis sub quo corpus humanum consideratur in illâ scientiâ.

Objectum adæquatum seu totale scientiæ , est complexio objecti materialis & objecti formalis : sic *corpus humanum quantum sanabile* , est objectum adæquatum artis Medicæ.

Observandum porro vocem hanc , *materiale* , apud Philosophos idem significare ac *commune* ; hanc verò , *formale* , idem significare ac *proprium*.

De questione an sit.

Sensus hujus quæstionis est , an ens de quo agitur existat , seu positum sit extrâ nihil , id est , extrâ statum meræ possibili-

tatis. Vox autem ista *nihil*, æquivocatione laborat; sumitur enim quandoque pro impossibili, ut cum dicitur circulus quadratus est *nihil*; sumitur etiam pro merè possibili, ut ubi dicitur: mundus ante decem annorum millia *nihil* erat.

De quæstione cur sit.

In hac quæstione examinantur entis principia.

Principium generatim est id unde aliquid; & triplex est, cognitionis, productionis & compositionis.

De principiis cognitionis.

Principia cognitionis sunt ea omnia quæ nos ducunt in cognitionem aliquorum entium, & duplicis sunt generis, simplicia & complexa.

De simplicibus.

Principia cognitionis simplicia sunt entia quædam, quæ cognita nos ducunt in notitiam aliorum entium: sic fumus quem è camino videmus erumpentem, est principium cognitionis simplex; quod nos ducit in notitiam ignis, vocatur aliter *signum*.

Signum universim est, quidquid ex impressione sui, excitat in nobis impressionem.

alterius ; & triplex est, arbitratium , naturale & essentialiale.

Signum arbitratium dicitur illud cujus significatio pendet à libero hominum instituto : sic voces omnium idiomatum sunt signa arbitraria, quia vocum illarum significatio fuit dependens à libero hominum instituto.

Signum naturale dicitur illud cujus significatio sic pendet à liberâ Dei voluntate, ut nullatenus pendeat à libertate creatâ : sic fumus è camino erumpens est signum naturale ignis ; quia solus Deus liberè instituit ut fumus sic erumpens è camino significaret ignem.

Signum essentialiale vocatur illud cujus significatio necessaria est, & independens à libertate quâvis : sic amor cognitus, essentialiter significat substantiam spirituales.

De complexis.

Principia cognitionis complexa, sunt propositiones quædam, quæ postquam nobis innotuerunt, nos postea ducunt in aliarum propositionum notitiam.

Principium cognitionis complexum duplex est, probans & movens.

Principium cognitionis probans, est propositio generalis, quæ nos ducit in cognitionem aliarum minùs generalium in ipsâ

contentarum : sic hæc propositio , *omne totum majus est suâ parte* , est principium cognitionis probans , quia nos ducit in notitiam harum , verbi gratiâ , propositio-
num minùs generalium corpus huma-
num majus est solo ipsius capite . . . arbor
major est unico ipsius ramo. Quomodo au-
tem una propositio minùs generalis con-
tineatur in aliâ generaliori , exponetur
postea.

Principium cognitionis movens, est pro-
positio quæ exprimit motivum quo impel-
limur ad assentiendum aliis propositioni-
bus : sic hæc propositio . . . *Quidquid fuit à
Deo revelatum est certissimum* , dici potest
principium movens , quia exprimit moti-
vum quo impellimur ad assentiendum his
propositionibus . . . Tres sunt Personæ in
Naturâ divinâ Verbum caro factum
est , &c.

De principiis productionis.

Principium productionis est id omne
quod confert adtribuendam existentiam
effectui , & vocatur uno nomine *causa* ,
quæ duplex est , Physica & Moralis.

Causa physica (quæ sola causæ nomen
meretur) est illud agens quod existentiam
dat effectui ; sic Deus est causa physica
nostrarum animarum , quia Deus dedit

12 DE PHILOSOPHANDI
existentiam nostris animabus.

Causa moralis, est id omne quod vel allicit, vel dirigit causam physicam, dum existentiam tribuit effectui; hinc duplex vulgò distinguitur, finalis quæ allicit, & exemplaris quæ dirigit.

Effectus est illud ens, quod existentiam recipit à causâ physicâ.

De Principiis compositionis.

Prin' ipia compositionis sunt partes quælibet totum componentes: hinc totumplex est principium compositionis diversum, quotuplex est totum diversum: porro duplex est universum totum diversum, physicum scilicet & metaphysicum.

Totum physicum dicitur illud quod coalescit ex partibus, quarum aliæ sunt totidem substantiæ; aliæ verò sunt totidem modificationes. Hinc partes physicae sunt illæ quæ sunt vel totidem substantiæ, vel totidem modificationes, sed quarum quædam (nempe propriæ) præsupponunt partes substantiales.

Totum metaphysicum vocatur illud quod coalescit ex partibus quæ sunt solummodò modificationes, ita ut quædam ex his (nempe propriæ) sint insociabiles, cum partibus quæ sint substantiæ; hinc partes metaphysicae sunt modificationes.

quarum quædam excludunt partes substantiales.

De questione quale sit.

In hac quæstione inquiruntur entis proprietates. Proprietates autem sunt partes essentielles & propriæ quæ fluunt, seu sequuntur ex entis differentiâ: sic *æternitas* est Dei proprietas, quia est pars essentialis & propria Dei, quæ sequitur ex differentiâ Dei, seu *ex necessitate existendi*.

Ex proprietatibus aliæ vocantur *primaria*, aliæ verò *secundaria*.

Primariæ sunt illæ, quæ fluunt immediate ex differentiâ: sic *bonitas* est primaria Dei proprietas, quia sequitur immediate ex necessitate existendi.

Secundariæ dicuntur illæ, quæ mediatè, seu mediante aliâ proprietate, fluunt ex differentiâ: sic *amabilitas* est proprietas secundaria Dei, quia mediante bonitate fluit ab existendi necessitate.

Tres numerantur primariæ cujuslibet entis proprietates; scilicet unitas, veritas & bonitas.

Unitas entis est modificatio seu forma, per quam totum constituitur in ratione totius, seu est ipsa *totalitas*.

Veritas entis est connexio partium ipsius componentium...

Bonitas entis est complexio omnium ejus partium essentialium.

De quæstione quotuplex sit.

In hâc quæstione quæritur quomodo distribuendum sit illud de quo agitur, hoc est, quibusnam entibus, tum diversis, tum similibus conveniat.

Hujus distributionis exemplum desumo ab ipso ente generatim sumpto, quod sic distribui potest.

Ens convenit substantiæ & modificationi; dici namque potest, substantia est ens, modificatio est ens.


Substantia distribuitur in spiritualem & corpoream, seu convenit spiritui & corpori.

Spiritus autem est substantia capax agendi, & excludens à se partes substantiales; corpus verò est substantia merè iners, & passiva, quæ necessariò habet partes substantiales.

Spiritus convenit Deo, Angelis & animæ rationali, ita ut Deus, Angeli & anima rationalis non possint ulterius subdividui, quia non conveniunt totis diversis. Corpus non potest pariter ulterius subdividui, quia nulla sunt corpora essentialiter à se invicem discrepantia.

Modificatio subdividuitur in spiritua-

lem & corpoream , & utraque in communem & propriam, in essentialem & contingentem.



DE ARTE RATIOCINANDI.

ANtequàm discurrendi artem tradamus , sciendum est 1^o. duas esse generales agendi potentias in animâ nostrâ , intellectum scilicet & voluntatem.

Intellectus est facultas seu potentia animæ versantis circâ objecta ut vèra ; voluntas autem, est facultas animæ versantis circâ objecta ut bona.

Sciendum est 2^o. quatuor vulgò numerari diversas operationes intellectûs , scilicet apprehensionem , iudicium , discursum & methodum.

Apprehensio est actus quo intellectus attendit ad varia objecta , ut si attendamus ad Deum , animas , corpora , &c.

Judicium est actus intellectûs dicentis habitudinem attributi ad subjectum : oratio autem quæ hunc actum significat , vocatur propositio.

In omni propositione quatuor sunt distinguenda , subjectum , attributum , verbum & habitudo.

Subjectum propositionis est illud ens de quo intellectus aliquid dicit ; sic in hac

propositione, *Deus est omnipotens*, Deus est subjectum, quia est id de quo aliquid dicitur.

Attributum, vel alio nomine *prædicatum*, est illud quod enunciatum vel cum subjecto conjunctum, vel ab ipso separatum: sic in allatâ propositione, *omnipotens* est attributum aut prædicatum propositionis.

Verbum est vocula significans actum intellectûs dicentis: talis est in allatâ propositione vocula *est*.

Habitudo est relatio, seu ordo prædicati ad subjectum, & duplex est, conjunctio & separatio; hinc duplex tantum est propositio, affirmans quæ conjunctionem enuntiat, & negans quæ separationem significat.

Discursus est actus quo intellectus unum judicium ex alio, vel ex aliis infert seu deducit.

Methodus est actus quo intellectus multas apprehensiones, multa judicia, multosque discursus ita disponit & ordinat, ut, aut veritates à se delectas aliis manifestet, aut veritatem aliquam sibi ignoram detegat.

Sciendum est denique hîc agi duntaxat de discursu, quia ars ratiocinandi est modus ritè discurrendi. Sit itaque.

De discursu.

Discursus, ut modò dictum fuit, est actus intellectûs quo unum iudicium, vel ex aliò, vel ex aliis deducitur; vocatur aliter *illatio*, *ratiocinatio*, *argumentatio*.

In omni discursu tria sunt distinguenda; antecedens, consequens & consequentia.

Antecedens est ea propositio ex quâ deducitur altera: quòd si ex duabus propositionibus inferatur tertia, tunc duæ priores vocantur *præmissæ*.

Consequens est propositio deducta, vel ex antecedente, vel ex præmissis: vocatur aliter *conclusio*.

Consequentia est connexio consequentis cum antecedente, vel cum præmissis: designari solet per has aut similes voces, *ergo*, *quamobrem*, *itaque*, &c.

Sit in exemplum hæc argumentatio:

Deus justus:

Ergo Deus remunerabit virtutem.

Prima propositio vocatur *antecedens*; altera verò *consequens*, & connexio quæ reperitur remunerationem virtutis inter & iustitiam, vocatur *consequentia*.

Multæ numerantur argumentationis species, sed quoniam eatenus tantum sunt efficaces, quatenus ad sillogismum revocari

possunt; ideò de solo sillogismo, tanquam de perfectissimâ discursûs specie hîc agemus.

De sillogismo.

Sillogismus duplex distingui potest; simplex & compositus.

De simplici.

In sillogismo quovis simplici duo sunt considerata, materia nimirum & forma.

Materia sillogismi est id ex quo componitur sillogismus, & duplex est, remota & proxima. Remota nihil aliud est, præter terminos seu voces, ex quibus coalescunt singulæ propositiones; proxima verò nihil aliud est, præter tres propositiones sillogismum componentes.

Tres tantum termini reperiri debent in sillogismo quovis simplici, & vocantur *majus extremum*, *minus extremum* & *medium*, seu *terminus medius*. Hoc autem modo secernuntur à se invicem... majus extremum semper est prædicatum conclusionis... minus extremum semper est subiectum conclusionis, & terminus medius est ille qui nunquam ingreditur conclusionem.

Ideò autem tres sunt tantum termini in sillogismo simplici, quamvis tres sint propo-

siones, & unaquæque duos contineat : quia quisque terminus bis repetitur, sicut intelligetur ex mox dicendis.

Tres tantum sunt propositiones in sillogismo simplici, scilicet *major*, *minor* & *consequens* seu *conclusio*. Propositio major est ea, quæ continet majus extremum cum medio. Propositio minor est ea, quæ continet minus extremum cum medio. Consequens seu conclusio, est propositio quæ erat dubia, & proinde probanda.

Forma sillogismi est artificiosa materiæ dispositio apta ad concludendum; & duplex est, figura & modus. Figura sillogismi est artificiosa terminorum dispositio apta ad concludendum.

Modus verò est artificiosa propositionum dispositio, pariter apta ad concludendum.

Variae leges traduntur à Philosophis ut legitimi conficiantur sillogismi : quia verò nimis intricatæ, nec satis generales mihi visæ fuerunt, imò parum utiles in praxi ; idcirco earum loco quasdam alias breviores & generaliores trademus ; in Logicâ tamen vulgares Philosophorum regulas exponemus & perpendemus.

Leges argumentationis.

Ut intelligantur hæ leges, quatuor sunt prænotanda.

Notandum igitur 1°. mentem humanam tunc tantum indigere discursu, quando ex intuitu idæarum subjecti & prædicati propositionis alicujus, non apprehendit qualis sit inter has idæas habitudo, hoc est, quando ignorat an hæ idææ sint inter se conjunctæ, an autem à se invicem separatæ. Hoc autem in casu mens convertit se ad idæam tertiam notiore, cujus ope detegere valeat habitudinem illam ignotam:

Notandum 2°. habitudinem illam detegi non posse ope tertiæ idææ, nisi duæ idææ in quæstione positæ conferantur alternatim cum idæâ tertiâ notiore. Atque hinc est quod in syllogismo quovis simplici adhibeantur duæ præmissæ, in quarum unâ, majus extremum comparatur cum medio, & ideò vocatur *major*; in alterâ verò, minus extremum comparatur cum eodem medio, & ideò vocatur *minor*.

Notandum 3°. tres casus contingere posse, dum instituitur comparatio extremorum cum eodem medio: vel enim mens nostra apprehendit unum quodque extremum esse cum medio conjunctum; vel unum esse cum medio conjunctum, & alterum ab ipso separatum; vel tandem utrumque extremum esse separatum à medio..

Notandum denique tertiam idæam sæpe non sufficere ad detegendam habitudinem duarum idæarum in quæstione positarum; ex eo nempe quod dum extrema comparantur cum medio, ignoretur plerumque eorum habitudo cum hoc medio; unde ut detegatur habitudo vel majoris extremi cum medio, vel minoris extremi cum eodem medio, assumendæ sunt aliæ idææ notiores, seu alia media; & sic consequenter donec affulgeat evidentia. Atque hinc est quod in probationibus philosophicis, quoties vel propositio major, vel propositio minor alicujus sillogismi, non satis est evidens, afferatur ejus probatio, antequam fiat transitus ad conclusionem.

His notatis, regulæ sequentes memoriæ tenaciter mendantur.

Prima Regula.

Propositio dubia seu probanda menti sit semper præsens, sive dum ipsam probare tentas, sive dum ab aliis impugnatam propugnas.

Secunda Regula.

Quoties duo extrema conclusionis deprehenduntur cum eodem medio conjuncta, toties concludendum est affirmati-



vè; dicendo nimirum hæc extrema esse inter se conjuncta. Ratio est quia duo entia non possunt esse cum eodem tertio conjuncta, quin sint inter se conjuncta.

Tertia Regula.

Quoties unum conclusionis extremumprehenditur cum medio conjunctum, & alterum ab eodem medio separatum; toties concludendum erit negativè, dicendo, hæc extrema esse à se invicem separata. Ratio est, quia quando ex duobus unum est cum tertio conjunctum, & alterum ab eodem tertio separatum; necessariò sunt à se invicem separata.

Quarta Regula.

Quoties duo conclusionis extrema deprehenduntur ab eodem medio separata; toties nihil ritè concludi poterit. Ratio est, quia ex eo quod duo entia sint ab eodem tertio separata; nec necessariò sequitur quod sint à se invicem separata, quia possunt esse inter se conjuncta; nec etiam necessariò sequitur quod sint inter se conjuncta, quia possunt à se invicem esse separata.

Corollarium.

Ex dictis sequitur inter disputandum &c

respondendum, ad duo tantum esse attendendum, scilicet ad propositionem in quaestione positam, & ad casum qui occurrit, dum conclusionis extrema cum eodem medio comparantur; dico autem *cum eodem medio*, quia terminus medius debet esse omnino idem in maiore & in minore, non tantum quoad vocem, sed etiam quantum ad sensum seu significationem.

Ex regulis & principiis superius expositis facile deducuntur in Logica rationes legum omnium, tum generalium, tum specialium, quæ proponi solent à Philosophis circa sillogismum.

Quæres autem, undenam desumenda sint media, seu idææ notiores, cum quibus comparari possint duo propositionis dubiæ extrema.

Respondeo media illa desumenda esse, quantum id fieri potest, ex definitione vel maioris extremi, vel minoris extremi; ita ut si definitio maioris extremi assumatur pro medio, sillogismus semper incipiat à maiori propositione; si verò definitio minoris extremi sumatur pro medio, sillogismus semper incipiat à minori propositione.

De Sillogismo composito.

Sillogismus dicitur compositus, quando

una ex ejus præmissis est composita, id est, quando coalescit ex duabus propositionibus : ideò autem non nunquam adhibetur sillogismus compositus quia ope definitionis, sive majoris extremi, sive minoris extremi, detegi non potuit habitudo prædicati ad subjectum propositionis dubiæ ; unde recurrere cogimur ad propositionem integram, tanquam ad aliquod medium. Ut autem propositio per modum medii possit inservire ad detegendam habitudinem ignotam, debet habere connexionem necessariam cum propositione dubiâ, seu in quæstione positâ : quo in casu propositio major sillogismi conficiendi coalescere debet, & ex propositione quæ est medium, & ex totâ conclusione ; minor verò propositio, erit sola propositio quæ fuit assumpta pro medio : verbi gratiâ, si probare vellem hanc propositionem, *Divitiæ sunt periculosa*, sic conficerem sillogismum compositum :

Si divitiæ plerùmque nos avertant à summo bono, sunt periculosa :


Aiqui divitiæ plerùmque nos avertunt à summo bono ;

Ergo divitiæ sunt periculosa.

In Logicâ fusiùs agemus de sillogismis compositis. Author operis inscripti, *L'art de*

DISCURRENDI.

de penser ; hanc generalem proponit regulam circa discursum : *Una præmissa enuntiet conclusionem in alterâ præmissâ contineri*. Ejusmodi regula certissima quidem est, sed non satis explicat naturam discursûs.



CONCERTATIONES

circa Philosophiam universim.

Quid sit Philosophia.

IN hâc quæstione præcipuas Philosophiæ definitiones referemus , easque vel refellemus , vel emendabimus.

Philosophia , quæ juxtâ etimologiam est amor sapientiæ , definitur à Platonîcis . . . Scientia rerum divinarum & humanarum , causarumque quibus hæ res continentur. Per *res divinas* intelligunt Deum , attributa , seu perfectiones Dei , & ea Dei opera , quæ fuerint ab ipso solo producta ; per *res humanas* , intelligunt actiones intellectûs , & voluntatis hominum ; hinc juxtâ ipsos Metaphysica , Mathesis , & Physica versantur circa res divinas ; Logica verò , & Moralis occupantur circa res humanas.

Tomus I.

B

Philosophia definitur à Peripatheticis, seu à Sectatoribus Aristotelis. . . . Cognitio vera, certa, & evidens rerum naturalium per causas. Ut intelligatur hæc definitio, sequentes alias subijcio.

Cognitio, est quilibet actus intellectûs, seu facultatis animæ versantis circa objecta ut vera,

Cognitio vera dicitur ea, quæ attingit objectum ut in se est: sic ubi dicitur, Deus est omnipotens, hæc cognitio vera est, quia Deum attingit, ut in se est.

Ex opposito cognitio dicitur falsa, quæ attingit objectum aliter ac in se est. Verbi gratiâ. Si quis diceret, Deus est crudelis; ejus cognitio foret falsa, quia Deus re ipsâ non est crudelis.

Cognitio certa dici debet ea, quæ nititur motivo firmo & inconcusso; sic ubi dico, *Verbum caro factum est*; mea cognitio certa est, quatenus nititur autoritate Dei revelantis. Ex opposito cognitio dicitur incerta, quæ nititur motivo caduco & fallibili: sic ubi dico, *Petrus cras morietur*; mea cognitio est incerta, quatenus nititur autoritate Medici mortem illam prænuntiantis.

Cognitio evidens est ea, quæ nititur idæarum nostrarum intuitu: sic ubi dico, *totum majus est sua parte*; mea cognitio est

evidens, quatenus nititur intuitu idæarum totius & partis. Ex opposito cognitio dicitur, *inevidens*, quæ nititur alio quovis motivo, quàm idæarum nostrarum intuitu.

Res naturales sunt ea omnia, quæ sine revelatione divinâ possunt à nobis cognosci. Ex opposito res supernaturales sunt ea omnia, quæ per revelationem divinâ nobis innotescunt.

Cognoscere per causas, inquiunt, est reddere rationem suarum cognitionum: sic ille dicitur ecclipsim lunæ per causas cognoscere, qui reddere potest rationem cur luna patiatur ecclipsim.

His præmissis, sic ratiocinantur Peripatetici. 1°. Philosophia est cognitio, quia est actus intellectûs. 2°. Est cognitio vera, quia attingit entia, ut in se sunt: unde differt ab errore, qui est cognitio falsa. 3°. Est cognitio certa, quia nititur motivo firmo & inconcusso, scilicet evidentiâ, seu idæarum intuitu; unde differt à cognitionibus quæ nituntur motivis caducis & fallibilibus. 4°. Dicitur cognitio evidens, quia nititur idæarum intuitu; unde differt à fide divinâ, quæ est quidem cognitio certissima, sed inevidens. 5°. Est cognitio entium naturalium, quia est cognitio eorum quæ sine revelatione divinâ

possunt ab hominibus cognosci ; unde differt à Theologiâ quæ , saltem ex parte , est cognitio supernaturalium. 6°. Denique est cognitio per causas , quia Philosophus reddere potest rationem suarum cognitionum ; unde differt à cognitione merè experimentalì , qualis est in rusticis , qui non possunt reddere rationem suarum cognitionum.

Ut quæstionem propositam solvamus , notandum est Philosophiam accipi posse , vel prout est actus seu exercitium , vel prout est habitus seu facilitas. Tunc accipitur pro actu , quando sumitur pro philosophandi exercitio , qualis est in Philosopho vel disputante , vel respondente ; tunc autem accipitur pro habitu , quando sumitur pro facilitate philosophandi , qualis est in Philosopho dormiente. Hoc notato ,

Prima Conclusio.

Definitio Philosophiæ , Platonica dicta , non est legitima. Illa namque definitio legitima non est , quæ non convenit definito : atqui definitio , Platonica dicta , non convenit definito. Definitio enim quæ non convenit habitui discursivo , non convenit Philosophiæ ; Philosophia namque est habitus discursivus , seu facilitas

procedendi à magis noto ad minùs notum. Atqui definitio Platonica non convenit habitui discursivo. Illa namque definitio non convenit, &c. quæ convenit scientiæ divinæ; nec enim scientia Dei dici potest discursiva: atqui definitio Platonica convenit scientiæ divinæ; scientia quippe Dei, est cognitio rerum divinarum & humanarum, causarumque quibus hæ res continentur: ergo definitio Platonica non convenit habitui discursivo: ergo non convenit Philosophiæ: ergo non est legitima.

In eo igitur potissimùm peccat definitio Platonica, quòd Philosophia dicatur scientia causarum, cùm dicenda sit scientia per causas, aut potiùs per principia: nimirùm aliud est entia, eorumque principia cognoscere; aliud verò, entia cognoscere per principia; si quidem entia eorumque principia cognoscere, est ista omnia simul & simili modo cognoscere; at *entia* cognoscere per principia, est primum cognoscere principia; deindè est horum ope, devenire in notitiam entium.

Definitio Platonica potest adhuc aliter ostendi vitiosa, hoc modo... Illa definitio Philosophiæ legitima non est, quæ non convenit singulis Philosophiæ partibus; definitio enim alicujus universalis legiti-

ma non est, quando non convenit singulis
ejus inferioribus : atqui definitio Plato-
nica non convenit singulis Philosophiæ
partibus, sicut fatentur ejus propugnato-
res ; ergo non est legitima.

Conclusio secunda.

Philosophia actualis definiri debet co-
gnitio evidens entium naturalium, per
principia... Philosophia namque actualis
definiri debet eâ definitione, quæ com-
plectatur ejus genus & differentiam : atqui
definitio mox allata, complectitur genus
& differentiam Philosophiæ actualis. Ubi
namque dicitur *cognitio evidens*, adest ejus
genus ; dum autem additur *entium natura-
lium per principia*, adest ejus differentia,
ergo definitio mox allata legitima est.

Objectiones.

Objicies. 1°. Illa definitio non est le-
gitima, quæ continet vocem æquivocam :
atqui nostra definitio, &c. hanc nempe
cognitio : cognitionis enim nomine qui-
dam intelligunt idæam, alii verò intelli-
gunt judicium ; ergo nostra definitio non
est legitima.

Respondeo. Distinguo majorem pro-
positionem. Illa definitio non est legitima,
quæ continet vocem æquivocam antea mi-

nimè determinatam & explicatam, concedo. Antea determinatam & explicatam, nego. Distingue pariter minorem, & nega consequentiam. Reverâ illa definitio non est legitima, quæ continet vocem æquivocam indeterminatam, & minimè explicatam, quia tunc obscura est ejusmodi definitio: at legitima est definitio, quæ continet vocem æquivocam antea determinatam & explicatam, quia tunc sublata fuit obscuritas: porro vox ista *cognitio* laborat quidem æquivocatione apud Philosophos; sed à nobis determinata fuit ad significandum quemlibet actum intellectûs; quamobrem ex hac parte non peccat nostra definitio.

Objicies. 2°. Cognitiones nostræ circa Deum philosophicæ sunt; nec tamen dici possunt *per principia*: ergo non omnis cognitio philosophica dici potest, per principia.

Distinguo secundam antecedentis partem: nec tamen dici possunt per principia productionis, seu per causas, concedo. Per principia sive cognitionis, sive compositionis, nego; & nego consequentiam. Reverâ non cognoscimus philosophicè Deum per principia productionis, seu per causas: quia Deus nullas habere potest causas; sed Deum philosophicè cognoscere possu-

mus, tum per principia cognitionis, quia multa nos ducunt in cognitionem Dei; tum per principia compositionis, quia cognoscuntur quædam attributa, quæ probantur soli Deo convenire posse; qualia sunt *immensitas*, *duratio necessaria*, *potentia movendi*, &c.

Objicies denique. Cognitio evidens est solummodò de entibus naturalibus; ergo hæ voces, *entium naturalium*, sunt inutiles in nostrâ definitione.

Nego consequentiam. Quamvis enim cognitio evidens attingat tantum entia naturalia; quoniam tamen in definitione scientiæ, fieri debet mentio objecti materialis hujus scientiæ; idèd voces allatæ non sunt inutiles in nostrâ definitione.

Corollaria.

Primò. Hæ voces, *vera*, *certa*, quæ apponuntur in definitione vulgari, sunt inutiles; quia ex eo quòd cognitio quædam sit evidens, utique vera, & certa. 2º. Loco harum vocum, *per causas*, apponendæ sunt istæ, *per principia*, quia nulla entia philosophicè cognoscuntur per causas; sed solummodò per principia, vel cognitionis, vel compositionis; sicut ostenderetur postea. 3º. Philosophia habitualis definiri debet, facilitas evidenter cognoscendi entia naturalia per principia.

Monitum.

Quoniam modificatio definitur vel per ordinem ad subjectum, vel per ordinem ad objectum; idè ad pleniorè definitionis Philosophiæ intelligentiam, agemus de ejus subjecto & objecto.

Quod attinet ad subjectum Philosophiæ. Dico primò, intellectum humanum esse subjectum *quo* Philosophiæ; quia intellectus humanus est modificatio recipiens Philosophiam, quæ est alia modificatio. Dico secundò, animam rationalem esse subjectum ejus, *quod*; quia est substantia recipiens Philosophiam, mediante intellectu. Dico 3º. homines quosdam esse subjectum denominationis Philosophiæ; quia homines quidam denominantur Philosophi, à Philosophiâ.

Quod attinet ad objectum Philosophiæ, sic statuimus.

Conclusio prima.

Entia naturalia sunt objectum materiale Philosophiæ. Objectum enim materiale scientiæ, est id omne quod propter se consideratur in scientiâ: atqui entia naturalia propter se considerantur in Philosophiâ; ut constare debet ex eo quòd, nihil propter se consideretur in Philosophiâ, præter entia naturalia: ergo, &c.

B. v

At, inquires, ex hâc conclusione sequeretur Philosophiam esse complexionem scientiarum omnium humanarum: atqui falsum consequens; ergo & antecedens.

Nego minorem. Philosophia namque est complexio scientiarum omnium humanarum; ut patet ex eo quod singulæ scientiæ humanæ nihil aliud sint, quàm partes quædam Philosophiæ paulò fusiùs evolutæ; sicut manifestum fiet in hoc toto cursu philosophico.

Conclusio secunda.

Cognoscibilitas evidens per principia, est objectum formale Philosophiæ. Illud enim est objectum formale Philosophiæ, quod est modus specialis, sub quo Philosophia considerat objectum suum materiale: atqui cognoscibilitas evidens per principia, est modus ille specialis; quandoquidem per modum hunc Philosophia distinguitur tum à scientiâ Divinâ; tum à cognitione morè experimentalì; ergo, &c.

Conclusio tertia.

Entia naturalia, quatenùs evidenter cognoscibilia per principia, sunt objectum adæquatum, ceu totale Philosophiæ. Illud enim est objectum totale scientiæ, quod complectitur objectum materiale, & ob-

jectum formale hujus scientiæ : atqui , ut constat ex superioribus conclusionibus , entia naturalia quatenus evidenter cognoscibilia per principia , complectuntur objectum materiale , & objectum formale Philosophiæ : ergo , &c.

Et certè illud est objectum totale scientiæ , quod habet conditiones omnes ad objecti totalitatem requisitas : atqui entia naturalia , quatenus evidenter cognoscibilia per principia , habent conditiones omnes ad objecti totalitatem requisitas.

Quatuor enim sunt conditiones ad objecti totalitatem requisitæ , nimirum *unitas* , *relatio* , *commensuratio* , & *distinctio* : atqui entia naturalia , &c. habent quatuor has conditiones.

1°. Quidem habent *unitatem*. Quæcumque enim sunt in quibusdam similia , habent unitatem quæ dicitur similitudinis , & quæ , sicut ostendetur in Logicâ , sufficit ad objectum scientiæ : atqui entia naturalia quatenus , &c. sunt in multis similia.
1°. In eo quòd habeant attributa sociabilia.
2°. In eo quòd sint naturalia. 3°. In eo quòd sint evidenter cognoscibilia. 4°. In eo quòd sint cognoscibilia per principia ; ergo habent unitatem.

2°. Habent *relationem*. Illud enim dicitur habere relationem , in præsentî casu ,

ad quod referuntur quæcumque tractantur in scientiâ: atqui quæcumque tractantur in Philosophiâ, referuntur ad entia naturalia, quatenus, &c. ergo habent relationem.

3°. Habent *commensurationem*. Illud enim dicitur habere commensurationem, respectu scientiæ, quod nec latius, seu generalius, nec strictius, seu minus generaliter patet istâ scientiâ: atqui entia naturalia quatenus, &c. nec latius, nec strictius patent ipsâ Philosophiâ: non latius; quia nulla alia scientia præter Philosophiam, considerat entia naturalia, ut evidenter cognoscibilia per principia: non etiam strictius; quia Philosophia de nullâ aliâ re agit propter se: ergo habent commensurationem.

4°. Denique habent *distinctionem*. Illud enim distinctionem habere dicitur, quod scientiam distinguit ab aliâ quâvis: atqui entia naturalia quatenus, &c. Philosophiam distinguunt ab aliâ quâvis scientiâ, verbi gratiâ, à scientiâ Divinâ: ergo habent distinctionem; cum igitur habeant omnes conditiones ad objecti totalitatem requisitas, sunt objectum totale Philosophiæ.

Dices. Philosophia agit de quibusdam entibus supernaturalibus, verbi gratiâ,

de immutabilitate Dei; ergo entia naturalia strictius patent ipsâ Philosophiâ.

Distinguo antecedens. Philosophia agit de quibusdam entibus *per accidens* supernaturalibus, concedo. *Per se supernaturalibus*, nego, & nego consequentiam. Entia dicuntur *per se* supernaturalia, quæ eitrâ revelationem divinam nunquam possunt à nobis cognosci, qualia sunt Trinitas Personarum divinarum, Incarnatio Verbi divini, &c. Illa dicuntur *per accidens* supernaturalia, quæ per revelationem quidem divinam nobis innotescunt; sed quæ, sublatâ hâc revelatione, possent à nobis cognosci, quales sunt multæ Dei perfectiones. Revera, &c.

An sit Philosophia.

Ad solvendam hanc quæstionem, notandum 1°. Cognitiones nostras duplicis esse generis, scilicet de entibus, ut in se sunt; & de entibus, ut nobis apparent: sic hæc propositio, *circulus est rotundus*, est cognitio de entibus, ut in se sunt; hæc autem, *turris mihi videtur rotunda*, est de entibus, ut nobis apparent.

Notandum 2°. entia naturalia duplicis etiam esse generis; alia nimirum intrâ nos posita, seu quæ sunt animæ nostræ modificationes, ut *cognitio*, *amor*, *dolor*, &c.

38 CONCERTATIONES

alia verò , extrà nos posita : qualia sunt
Deus , corpora , &c.

Notandum 3°. in entibus extrà nos po-
sitis , partes duplicis esse generis, essentia-
les & contingentes , de quibus dictum
fuit.

Notandum denique cognitiones nostras,
tùm de entibus,ut nobis apparent : tum de
entibus intrà nos positis , prout per sensum
innotescunt : tum de entibus ut in se sunt,
quatenùs per aliud motivum , quàm per
idæarum nostrarum intuitum cognoscun-
tur , nullatenùs esse philosophicas ; hinc
solæ cognitiones , quæ per idæarum intui-
tum acquirantur , possunt esse philoso-
phicæ.

His notatis, sensus quæstionis est utrùm
existant cognitiones evidentes per prin-
cipia?

Conclusio.

Philosophia actualis existit. Philosophiæ
namque actualis , est cognitio evidens en-
tium naturalium per principia : atqui exis-
tit multiplex cognitio evidens , &c. Ju-
dicia namque ritè deducta , ex principiis
evidentibus , sunt cognitiones evidentes
per principia : atqui existunt multa judicia
ritè deducta , ex principiis evidentibus.
Nam , verbi gratiâ , conscius sum me idèd

judicare, Deum existere : quia existentia à me deprehenditur inclusa in idæa Dei ; corpora esse divisibilia : quia divisibilitas à me deprehenditur inclusa in idæa corporum ; & sic de multis aliis : ergo existunt eognitiones evidentes per principia : ergo existit Philosophia actualis.

Existit etiam Philosophia habitualis. Quoties enim exercentur multi actus similes, toties acquiritur facilitas alios similes postea producendi, sicut quotidiana docet experientia : atqui multi homines conscii sunt, multas cognitiones evidentes per principia à se fuisse productas ; ergo conscii sunt se habere facilitatem alias similes producendi : ergo existit Philosophia habitualis.

Colliges Philosophiam tum actualem, tum habitualement, esse possibilem. Quod enim existit, est possibile : atqui utraque Philosophia illa existit, sicut mox fuit probatum : ergo utraque est possibilis.

Objectiones.

Objicies. 1°. Ut existeret Philosophia, dari deberet certissimum veritatis criterium seu signum, cujus ope verum à falso, certum ab incerto, & evidens ab inevidenti fecernerentur : atqui nullum datur ejusmodi criterium seu signum : ergo, &c.

Nego minorem, & dico idæarum intuitum, seu uno nomine *evidentiam*, esse certissimum ejusmodi cryterium, seu signum. Vel enim agitur de cognitionibus in materiâ necessariâ, hoc est, quæ versentur circâ objecta necessaria & immutabilia; vel agitur de cognitionibus in materiâ contingenti, seu quæ versentur circâ objecta contingentia, & mutabilia. Sic primùm; tunc cognitio vera est certa, & evidens, quando ex idæarum intuitu deprehendimus, objecta aliter esse non posse ac cognoscuntur. Sic secundùm; tunc cognitio vera, certa est & evidens, quando ex idæarum intuitu, deprehendimus, motivum ab idæis diversum, & per sensum intimum cognitum, habere connexionem necessariam, cum objectis cognitis.

Instabis. 2°. Quod dum absens est, judicatur præsens; & quod dum præsens est, judicatur absens; non est certissimum veritatis cryterium: atqui dum absens est evidentia, judicatur præsens; & dum præsens est, judicatur absens; ergo evidentia non est certissimum veritatis cryterium.

1°. Nego priorem majoris partem. Dum enim abest id, per quod solum evidenter cognoscere possumus; mirum non est, si tunc erremus: porro, dum abest eviden-

tia, abest id, per quod solum evidenter cognoscere possumus, ut per se manifestum est; quamobrem licet, dum abest evidentia, falsò judicemus eam adesse; nihilominus ipsa certissimum est veritatis cœterium.

2°. Nego posteriorem minoris partem. Sicut enim, ubi dolore quodam acuto percellitur anima nostra, judicare non possumus, dolorem abesse, quia tunc per sensum intimum conscii sumus de ejus præsentiâ; sic quando præsens est evidentia, per sensum intimum ira conscii sumus de ejus præsentiâ, ut judicare non possumus ipsam abesse.

Instabis 2°. probando posteriorem minoris partem. Quod distinguere non potest à præjudiciis, judicari potest absens, licet reipsâ sit præsens: atqui evidentia distinguere non potest à præjudiciis: ergo dum præsens est evidentia, judicari potest absens.

Ut intelligatur responsio, notandum est præjudiciorum nomine, hîc intelligi judicia falsa, quæ fuerunt à nobis lata, vel ante perfectum rationis usum, vel absque sufficienti attentione & reflexione. Hoc notato,

1°. Nego majorem, quia licet evidentia discerni non posset à præjudiciis; non id-

anima nostra determinatur ad attendendum ad has, aut illas idæas; sed sensus nullatenus sunt motivum cognitionum nostrarum philosophicarum; quamobrem supra dictum effatum verum quidem est, si intelligatur, eo sensu, quod ad nullum attendamus objectum, nisi quid sensibile dederit occasionem attentioni nostræ; sed falsum est, si intelligatur eo sensu, quod ad nullum attendamus objectum, nisi prius fuerit sensibile. Sed de his in Metaphysicâ.

Observandum porro, organa corporea nobis adeo fuisse concessa, ut judicemus de entibus extrâ nos positis, prout hæc objecta nobis apparent; unde si iis in hunc tantum finem utamur, nunquam nos decipiunt.

Objicies. 3^e. Ut existeret Philosophia, dari deberet objectum certò cognoscibile: atqui (Deo tamen excepto) nullum est objectum certò cognoscibile. Quod enim est contingens, non est certò cognoscibile: atqui quodlibet objectum, præter Deum, est contingens; ergo, &c.

Nego minorem prioris sillogismi. Illud enim est certò cognoscibile, quod habet attributa necessariam inter se connexionem habentia: at objectum quodlibet habet attributa necessariam inter se connexionem habentia; nimirum attributa es-

sentia; proindeque quodlibet objectum est certò cognoscibile.

Quòd attinet ad posteriorem sillogismum, seu ad probationem minoris sillogismi. 1°. Nego majorem : ostendetur enim postea, dari posse scientiam de contingentibus.

2°. Distinguo minorem. Quodlibet ens, præter Deum, est contingens, quantum ad existentiam, concedo.... Quantum ad connexionem partium essentialium, nego. Distingue pariter minorem. Solutio facilis.

Objicies. 4°. Ut existeret Philosophia; deberet esse in nobis facultas certò cognoscens : atqui nulla est in nobis facultas certò cognoscens. Facultas enim errori obnoxia; non est certò cognoscens : atqui facultas nostra cognoscendi, quæ dicitur *intellectus*, est errori obnoxia, sicut quotidiana constat experientia : ergo, &c.

Nego minorem prioris sillogismi, & ad ejus probationem distingo minorem. Intellectus noster est errori obnoxius, quando judicat, aut discurrit ex motivo caduco & fallibili, concedo; ex motivo firmo & inconcusso, nego. Distingue pariter consequens. Itaque intellectus noster duobus modis considerari potest universim scilicet, & speciatim. Consideratur

universim, quando consideratur independenter à motivis. Speciatim verò, quando spectatur relativè ad motiva. Quòd si spectetur universim, nec dici potest certò cognoscens, nec errori obnoxius, quia neutram ex his qualitatibus includit in idæâ suâ. Si spectetur prout nititur motivo caduco & fallibili, tunc est errori obnoxius; si tandem spectetur prout innixus motivo firmo & inconcusso, tunc est facultas certò cognoscens; alioquin motivum non esset reipsâ firmum & inconcussum. Si igitur quærat quænam sit in nobis facultas certò cognoscens, respondendum est, intellectum nostrum, prout innixum motivo firmo & infallibili, esse facultatem certò cognoscitivam.

Objicies denique. Nulla existit Philosophia, si quilibet homo dubitare debeat de omnibus entibus, ut in se sunt: atqui res sic se habet; dubium namque generale est via veritatis inveniendæ certissima: ergo, &c.

Distinguo majorem.. Si quilibet homo dubitare debeat effectivè de omnibus entibus, ut in se sunt, concedo... Methodicè tantum, nego. Distingue pariter minorem, & nega consequentiam. Itaque mens nostra duplici modo dubitare potest, effectivè & methodicè. Tunc dubitat effectivè,

quando reipsâ vacillat inter affirmationem & negationem. Tunc autem methodicè dubitat, quando revocat ad examen, connexionem motivorum, quibus adducta fuit ad judicandum; cum objectis de quibus tulit judicia. Reverâ potest quis dubitare methodicè de entibus, ut in se sunt, ut nempè firmiorem ascensum præbeat propositionibus antea receptis, ut veris; & hoc sensu generale dubium est via veritatis inveniendæ certissima: at nemo sanæ mentis potest dubitare effectivè de omnibus entibus, ut in se sunt. Verbi gratiâ, nemo potest effectivè dubitare, num totum majus sit suâ parte; & hoc sensu, nedum generale dubium sit via veritatis inveniendæ certissima, est potiùs insuperabile veritatis detegendæ impedimentum; quia tunc nihil esset, per quod ex hoc generali dubio possemus emergere.

Cur sit Philosophia.

Quod attinet ad principia cognitionis Philosophiæ, nulla hîc specialis occurrit difficultas: evidentia quippè, simplex est ipsius principium cognitionis; & varia axiomata, seu propositiones per se evidentes, sunt ejus principia cognitionis complexa. Inquiremus autem in Metaphysicâ, quænam propositio sit primum cognitio-

nis philosophicæ principium complexum.

Quod spectat ad principia compositionis Philosophiæ, nulla pariter est difficultas; nam ipsius genus, differentia, & proprietates dici debent ipsius principia compositionis essentialia: præterea partes in quas distribuitur; vocari solent ejus principia integrantia, ex eo quod requirantur ad ejus integritatem.

Circà causas Philosophiæ sic breviter statuo. Primò, entia naturalia per idæas nostras repræsentata sunt ejus causa exemplaris; quia nos dirigunt in ferendis judiciis nostris philosophicis.

2°. Cognitio veritatis est causa finalis proxima Philosophiæ habitualis: omnis enim habitus habet pro causâ suâ finali proximâ, actus similes iis per quos fuit acquisitus: at Philosophia habitualis producta fuit per cognitiones veritatis, ut per se patet; proindeque, &c.

3°. Veritas ipsa dici debet causa finalis proxima Philosophiæ actualis; quia Philosophia actualis, proximè refertur ad veritatem.

4°. Deus est causa finalis ultima Philosophiæ tùm habitualis, tùm actualis; quia Deus est bonum quoddam, ad quod omnia sic referuntur, ut ipse non referatur ad aliud bonum.

5°. Solus

5°. Solus Deus est causa efficiens, seu physica Philosophiæ habitualis : quia probabitur in Morali, solum Deum esse causam physicam nostrorum habituum.

6°. Deus est causa efficiens prima Philosophiæ actualis, & quidam homines sunt ejus causæ effectrices secundæ.

Occasione causæ efficientis Philosophiæ, hîc inquiri solet à Philosophis, an & quomodò Adamus habuerit Philosophiam ? has quæstiones sic solvimus.

Prima Conclusio.

Adamus habuit Philosophiam habitua-
lem congenitam, seu, ut aiunt nonnulli,
infusam. Ille namque habuit Philosophiam
habitualement, &c. cujus anima producta fuit,
iis omnibus dotibus instructa, quæ requi-
rebantur ad eum vitæ statum, in quo fuerat
constitutus ; Philosophia namque habitua-
lis, est ea animæ perfectio, sine quâ, homo
sui statûs officia vix adimplere potest : at-
qui anima Adami producta fuit à Deo, in-
structa iis omnibus dotibus, quæ, &c.
sicut constare debet, tum ex eo quòd Deus
intelligentiâ, potentiâ & bonitate pol-
leat ; tum ex eo quòd anima Adami pro-
ducta fuerit, ab omni labe, seu peccato im-
munis ; adeoque nullum fuit, ex ipsius
parte, impedimentum, quominus produce-

Objectiones.

Objicies. 1°. Omnis habitus comparatur per actus similes frequenter productos ; atqui Adamus, statim à nativitate suâ, nullos produxerat actus Philosophiæ ; ergo non statim à nativitate suâ, habuit Philosophiam habitualement.

Distinguo majorem. Omnis habitus, juxtâ leges ordinarias acquisitus, concedo, Præter leges ordinarias comparatus, nego. Concessâ minore, distingue pariter consequens. Itaque habitus duplici modo potest acquiri, juxtâ leges ordinarias, & præter leges ordinarias. Tunc acquiritur juxtâ leges ordinarias, quando eâ tantum proportionem producit, & intenditur facilitas, quâ producuntur actus similes. Tunc verò comparatur præter leges ordinarias, quando sine præviis actibus, facilitas in mente nostrâ producit.

Instabis. Habitus naturalis non potest esse infusus, seu præter leges ordinarias acquisitus : atqui habitus Philosophiæ naturalis est : ergo habitus Philosophiæ non potest esse infusus.

Distinguo majorem. Habitus naturalis non potest esse infusus per se, concedo. Infusus per accidens, nego. Concessâ mi-

nore, distingue pariter consequens. Itaque habitus potest esse infusus vel per se, quando sic à Deo producitur, ut juxta leges ordinarias, seu occasione similium actuum, nunquam compararetur. Tales sunt habitus fidei, spei & charitatis, per baptismum infusi; habitus dicitur infusus, per accidens, quando producitur quidem à Deo sine præviis actibus ab animâ productis; sed successivè produci potuisset occasione similium actuum ab animâ productorum. Reverâ, &c.

Objicies. 2^o. Qui habuit Philosophiam habitualement nostræ similem, eam non habuit infusam seu congenitam: atqui Adamus habuit Philosophiam nostræ similem; ergo eam non habuit infusam.

Distinguo majorem. Qui habuit Philosophiam habitualement nostræ similem, quantum ad illius obrinendæ modum, eam non habuit congenitam, concedo. Nostræ similem, quantum ad ipsius essentiam, seu naturam, nego. Reverâ Philosophia habitualis Adami fuit nostræ similis, quantum ad essentiam, quia fuit facilitas evidenter cognoscendi entia naturalia per principia; sed non fuit nostræ similis, quantum ad modum eam comparandi: Adamus enim eam obtinuit sine labore & exercitio; nos autem, similium actuum

52 C O N C E R T A T I O N E S
repetitione, habitum illum successivè comparamus.

Objicies denique. Actus vitæ, seu actio substantiæ viventis, non potest infundi : atqui Philosophia est actus vitæ ; ergo non potuit infundi.

Distinguo minorem. Philosophia actualis est actus vitæ, concedo. Philosophia habitualis est actus vitæ, nego. Distingue pariter consequens. Reverâ actus vitæ non potest infundi : verbi gratiâ, actus amoris non potest infundi, quia tunc non esset actus amantis ; sed habitus infundi potest, quia est mera passio ex parte animæ nostræ, sicut ostendetur in morali.

Secunda conclusio.

Verissimile est Adamum habuisse Philosophiam actualem. Qui enim habuit Philosophiam habitualement congenitam, qui constitutus fuit Dux & Legislatores hominum successu temporis nascentium, qui Deum diligere tenebatur, quique nondum laborabat concupiscentiâ rationi rebeli, probabiliter habuit Philosophiam actualem ; debuit enim esse doctus ut doceret, & prudens ut leges ferret ; debuit pariter Deum, ejusque mandata cognoscere, alioquin ad impossibilia fuisset adstrictus : atqui Adamus habuit Philoso-

phiam habitualement congenitam (per conclusionem præcedentem); aliundè verò sic fuit constitutus , ut colligitur ex Scripturâ Sacrà ; proindeque , &c.

Nota porro secundam hanc conclusionem nullatenus esse philosophicam ; quia nec est , nec esse potest evidens.

Objectiones.

Objicies. 1°. Qui Deum non cognovit , non habuit Philosophiam actualem : atqui Adamus Deum non cognovit. Qui enim credidit Deum non esse ubique , ipsum non cognovit : atqui Adamus credidit Deum non esse ubique , ut constat ex eo quòd , ejus conspectum effugere voluerit , postquam comedit de fructu vetito : ergo , &c.

1°. Nego majorem. Licet enim quis ignoret ens aliquod , fieri tamen potest , ut alia cognoscat evidenter per principia ; quamobrem licet Adamus Deum non cognovisset ; exindè non sequitur ipsum caruisse Philosophiâ actuali : imò ad Philosophiam actualem requiritur entium quorundam ignorantia ; siquidem philosophari , est procedere à magis noto , ad minus notum.

2°. Nego minorem. Qui enim tenebatur Deum diligere , & ipsi soli servire ,

debit ipsum cognoscere; nemo quippe potest objectum ignotum amore prosequi: porrò Adamus ad id tenebatur, sicut dicitur lex ipsa naturalis.

Ad probationem autem distingo majorem. Qui credidit Deum non esse ubique, secundum suam essentiam, ipsum non cognovit, esto. Qui credidit Deum sub humanâ formâ latitantem, ubique non esse, ipsum non cognovit, nego. Distingue pariter minorem, & nega consequentiam. Cum igitur Deus multoties apparuisset Adamo, sub formâ humanâ, Adamus post peccatum abscondere se voluit à conspectu Dei, sub hâc formâ latitantis; sed noluit se abscondere à conspectu Dei, secundum essentiam considerati. Dixi autem *esto*, quia licet Deus non cognoscatur secundum aliquod suum attributum, verbi gratiâ, secundum immensitatem; exindè non sequitur, ipsum ignorari quantum ad alia attributa, verbi gratiâ, quantum ad bonitatem, justitiam, &c.

Objicies. 2°. Qui non cognovit naturam serpentis & pomi, non habuit Philosophiam actualem: atqui Adamus non cognovit naturas serpentis & pomi. Qui enim credidit serpentem esse loquendi capacem, & pomum parere posse scientiam boni & mali, non cognovit horum

entium naturas; atqui Adamus id credit; ergo, &c.

1°. Nego maiorem prioris fillogismi. Quamvis enim Adamus non cognoverit naturas serpentis & pomi; exindè non sequitur, ipsum caruisse Philosophiâ actuali, ut constat ex suprâ dictis. Hinc ut efficaciter evinceretur, Adamum caruisse Philosophiâ actuali, probari deberet, nulla omninò entia naturalia ipsi fuisse evidenter nota per principia; quod probari nunquam potest.

2°. Nego minorem ejusdem fillogismi. Verissimile enim est quæcumque erant in Paradiso terrestri, Adamo fuisse nota. Ad probationem autem distinguo maiorem. Qui credidit serpentem esse loquendî capaxem, & pomum parere posse scientiam boni & mali, virtute sibi propriâ & naturali, concedo. Virtute supernaturali & alienâ, nego. Reverâ; &c.

Objicies denique. Ille non habuit Philosophiam actualem, cui omnia entia naturalia erant evidenter nota: atqui omnia entia naturalia erant Adamo, &c. Illi enim, &c. qui habuit entium omnium naturalium idæas sibi impressas in primo creationis instanti: atqui Adamus in primo creationis suæ momento, habuit idæas entium omnium naturalium impressas, si-

quidem ejus natura producta fuit perfecta: ergo, &c.

Nego minorem. Illi enim non omnia entia naturalia fuerunt evidenter nota; qui non potuit ad illa omnia simul attendere: atqui Adamus attendere non potuit ad omnia simul entia naturalia; quia intellectus ejus erat finitus, & entia naturalia sunt numero infinita, sicut constabit ex dicendis; proindeque, &c. Ad probationem autem nego majorem. Ut enim homo cognoscat objectum aliquod, non sufficit, si habeat ejus idæam; sed requiritur insuper, ut adsint causæ occasionales, ad eam attendendi, sicut intelligetur ex dicendis.

Quæres autem, utrùm habitus philosophandi in Adamo fuerit perfectus?

Respondeo, habitum illum fuisse perfectum. Ille namque habitus dicitur perfectus, qui nullis retardatur impedimentis: atqui habitus philosophandi in Adamo nullis retardabatur impedimentis. Tunc enim habitus intellectualis nullis retardatur impedimentis, quando intellectus immunis est à præjudiciis, & præcipitatione: atqui intellectus Adami fuit immunis à præjudiciis, & præcipitatione: à præjudiciis quidem, quia Adamus statim à suâ nativitate perfectum habuit rationis usum;

à præcipitatione pariter, quia in Adamo innocente nulla fuit concupiscentia rationi rebellis, & attentionem ejus detorquens; proindeque, &c.

Dices. Qui non habuit facilitatem evidenter cognoscendi quælibet entia naturalia, non habuit Philosophiam habitualement perfectam: atqui Adamus non habuit facilitatem, &c. Hæc enim entia sunt numero infinita, & intellectus Adami fuit essentialiter finitus: ergo, &c.

Distinguo majorem. Qui non habuit facilitatem evidenter cognoscendi quælibet entia naturalia distributivè sumpta, concedo. Collectivè sumpta, nego. Distingue pariter minorem, & nega consequentiam. Reverâ Adamus non habuit facilitatem evidenter cognoscendi quælibet entia naturalia collectivè sumpta, id est, non habuit facilitatem attendendi ad omnia simul entia naturalia; sed habuit facilitatem cognoscendi omnia entia naturalia distributivè sumpta, hoc est; nullum fuit ens naturale determinatum, cujus evidenter cognoscendi, non habuerit perfectam facilitatem.

Qualis sit Philosophia.

Missis variis proprietatibus & titulis;

quibus ab Oratoribus & Philosophis decorari solet Philosophia, hîc examinabimus solummodò ipsius perfectionem & necessitatem.

Quod attinet ad Philosophiæ perfectionem, notandum est aliquid dici posse perfectum duobus modis, essentialiter, & integraliter. Illud dicitur perfectum essentialiter, quod habet omnia sua attributa essentialia; illud verò dicitur integraliter perfectum, quod habet ea omnia, quæ possunt ipsum perficere. Hoc notato,

Dico 1°. Philosophiam tùm habitua-lem, tùm actua-lem, essentialiter esse perfectam; quia nullum ens carere potest suis attributis essentialibus.

Dico 2°. Philosophiam habitua-lem in Adamo fuisse integraliter perfectam; sicut probatum fuit; eandem autem in nobis non esse perfectam integraliter; quia facilitas philosophandi in nobis, semper est conjuncta cum præjudiciis & præcipitatione; nec enim in hâc vitâ caremus concupiscentiâ rationi rebeli.

Dico denique Philosophiam actua-lem in nullo homine reperiri posse integraliter perfectam. Cùm enim Philosophia actualis sit cognitio evidens entium naturalium per principia, hæc cognitio potest extendi ad entia naturalia plura, & plura

in infinitum , adeoque magis , & magis in infinitum perfici potest.

Quod attinet ad Philosophiæ necessitatem , notandum est 1°. *necessarium* sumi posse , vel per oppositionem ad *contingens* , vel per oppositionem ad *inutile*. Notandum 2°. *necessarium* sumptum pro *utili* , duplex rursus subdistingui , secundum *quid* , & *simpliciter*. *Necessarium* secundum *quid* , dicitur illud , sine quo aliquid potest esse tale ; sed non tam facile : sic equus est necessarius , secundum *quid* , ad iter longum conficiendum. *Necessarium simpliciter* dicitur illud , sine quo aliquid absolute non potest esse tale : sic gratia Salvatoris necessaria est simpliciter , ad felicitatem æternam obtinendam. Notandum denique homines sumi posse , vel distributive , vel collective ; sumuntur distributive , quando sumuntur pro unoquoque singulari , nempe pro Petro , Paulo , &c. Sumuntur autem collective , quando omnes simul considerantur. His notatis ,

Dico 1°. Philosophiam non esse necessariam , prout necessarium opponitur contingenti ; quia Philosophia non existit necessario.

Dico 2°. Philosophiam esse necessariam secundum *quid* , ut homines , distributive sumpti , bene beatèque vivant. Ratio est ,

quia quilibet homo potest quidem benè beatèque vivere absque Philosophiâ, sed non tam facilè; ut constare debet ex eo quod inter agendum, frequens occurrat dubitandi ratio, vixque verum à falso, commodum à noxio, scerni possunt.

Dico 3°. Philosophiam non esse simpliciter & absolutè necessariam, ut homines, distributivè sumpti, benè beatèque vivant: quia sufficit, siquidam ex his in arte discurrendi sint ita versati, ut eorum consilio, cæteri vitam regere possint.

Dito denique Philosophiam esse simpliciter & absolutè necessariam, ut homines, collectivè sumpti, benè beatèque vivant. Ratio est, quia tota hominum collectio non potest benè beatèque vivere, absque notitiâ eorum, quæ hominem bonum, beatumque reddere possunt: at ejusmodi notitia est Philosophia; proindeque, &c.

Quotuplex sit Philosophia.

Philosophia distribuitur 1°. in habitua-lem & actua-lem, quarum definitiones traditæ sunt. 2°. In speculativam & practi- cam. Philosophia speculativa dicitur ea, cujus objectum non est producibile, median- tibus Philosophiæ legibus; practica

verò, cujus objectum est producibile, mediantibus Philosophiæ legibus.

Philosophia speculativa duas habet partes, Metaphysicam & Matheſim. Metaphysica, est ea Philosophiæ pars, quæ considerat ens universum, & species ejus insensiles, quatenus hæc omnia sunt insensilia. Matheſis, est ea Philosophiæ pars, quæ versatur circa quantitatem quamlibet finitam, ut finitam, hoc est, circa ea omnia quæ possunt vel augeri, vel minui.

Philosophia practica tres habet partes, Logicam, Physicam & Moralem. Logica versatur circa quoslibet actus intellectus, quatenus ad veritatem formalem dirigibiles. Physica versatur circa corpora naturalia, prout sunt naturalia, seu prout secundum certas leges fuerunt compacta. Moralis occupatur circa actus humanos, prout ad honestatem dirigibiles.

Circà postremam Philosophiæ distributionem, tria hîc inquiruntur à Philosophis. 1°. An scientia speculativa nobilior sit practica? 2°. Quænam è speculativis sit nobilior? 3°. Quænam è practicis nobilitate cæteris præstet? Ut his quæstionibus fiat satis, nota, nobilitatem, seu excellentiam scientiæ desumi posse ex duplici capite, ex objecto scilicet, & ex motivo. Tunc una scientia dicitur alterâ nobilior,

62 CONCERTATIONES

ratione objecti, quando ipsius objectum excellentius seu perfectius est objecto alterius. Tunc scientiâ dicitur alterâ nobilior, ratione motivi, quando motivum, quo nititur, certius est motivo, quo nititur altera. Hoc notato,

Dico 1°. omnes Philosophiæ partes eandem habere nobilitatem, ex parte motivi; quia ipsarum omnium idem est aut esse debet motivum, nimirum *evidentia*.

Dico 2°. Metaphysicam particularem cæteris omnibus esse nobiliorem; ratione objecti: quia ejus objectum, nempe substantiæ spirituales, cæteris omnibus objectis est excellentius.

Dico 3°. Metaphysicam generalem cæteris omnibus esse ignobiliorem, ratione objecti; quia ejus objectum, scilicet ens universum, minus perfectum est, quam aliud quodvis objectum; sicut intelligitur ex postea dicendis.

Dico 4°. Moralem esse Logicâ nobiliorem, ratione objecti; quia Moralis versatur circa actus humanos, qui, ut potè liberi, præstantiores sunt cæteris animæ nostræ actibus.

Dico denique Physicam dici non posse nobiliorem, aut ignobiliorem, sive Morali, sive Logica, ratione objecti; quia objectum Physicæ nullatenus comparari

A P P E N D I X

De præcipuis Philosophorum Sectis.

Secta describi potest hominum multitudo, quæ à cæteris quasi secta seu divisa, aliquod doctrinæ genus, sub aliquo Principe, seu Duce, sectatur & amplectitur. Hinc Secta fuit, sic dicta vel à secando, vel à sectando. Per tempus non licet veteres Philosophorum Sectas, hinc enumerare; sufficiat observare, solam Aristotelis Philosophiam per decem & amplius sæcula floruisse in Europâ; eosque, qui Philosophiam hanc amplectebantur, dictos fuisse *Peripateticos*. Secta Peripateticorum distributa fuit in tres alias per celebres. Prima, dicitur *Thomistarum*, quæ Ducem agnoscit divum Thomam Aquinatem, sub titulo, *Doctores Angelici*. Secunda, vocatur *Scotistarum*, quæ Principem agnoscit Joannem aut Huns, aut Duns, Scotum, Ordinis Fratrum Minorum sub titulo, *Doctores subtilis*. Tertia, dicitur modò *Okamistarum*, modò *Nominalium*, quæ Ducem sequitur Okamum Anglum, Ordinis pariter Fratrum Minorum, sub titulo, *Doctores singularis*. Præter has Sectas quæ vigent adhuc, exortæ sunt tres aliæ. Pri-

ma, vocatur Gassendistarum, quæ Ducem agnoscit Perrum Gassendum, Regium in Academiâ Parisiensi Mathæseos Professore, qui obiit anno 1656. Secunda, dicitur Cartesianorum, quæ Ducem sequitur Renatum Descartes, Dominum du Perron Gallum, qui obiit apud Suevos anno 1650. Tertia, est Neutonianorum, cujus Dux fuit Isaacus Neutonus Anglus, celeberrimus Geometra, qui obiit anno 1727. Hos omnes Philosophos, quantum fas est, veneramur: nullius tamen Sectæ tenaces erimus, arbitantes Philosophiam non hominum autoritate, sed firmis rationibus esse stabiliendam: Philosophia namque non est fides humana, sed scientia.



CONCERTATIONES

circà Logicam universim.

QUatuor tantum instituemus quæstiones, circà Logicam universim; *quid sit; an sit; qualis & quomplex sit.* Quæstio namque, *cur sit*, solvenda erit, proportionem servatâ, sicut soluta fuit quæstio, *Cur sit Philosophia universim.*

Quid sit Logica.

Duo hîc inquiruntur à Philosophis ; quodnam sit genus Logicæ ; deinde quænam sit ejus differentia ?

De genere Logicæ.

Ut detegatur Logicæ genus , notandum 1^o. tres habitus diversos reperiri posse in intellectu humano , scilicet errorem , opinionem , & scientiam. Error , est facilitas assentiendi propositionibus reipsâ falsis , ex motivo falso. Opinio , est facilitas assentiendi propositionibus quibuscumque , sive veris , sive falsis , ex motivo solummodò probabili. Scientia , seu virtus intellectualis , est facilitas assentiendi propositionibus veris , ex motivo firmo , & inconcusso.

Notandum 2^o. quatuor esse scientiæ species ; *intelligentiam* , *sapientiam* , *prudentiam* , & *artem*. Intelligentia , est facilitas assentiendi propositionibus evidentibus , absque discursu. Sapientia , est facilitas eruendi conclusiones generales , ex propositionibus universalissimis. Prudentia , est facilitas dirigendorum actuum humanorum , ad honestatem. Ars , est facilitas aliquid producendi , secundum certas leges ; ita tamen ut id quod est produci-

bile, diversum sit à moribus. His notatis,

Certum est primò, Logicam esse habitum intellectualem; quia versatur circa veritatem. Certum est secundò, Logicam, ut potè Philosophiæ partem, niti debere motivo philosophico; unde non potest esse error. Quoniam autem nonnulli putant Logicam esse, saltem ex parte, opinionem; & quoniam aliundè dubitatur, an speculativa sit, an practica; & ex hypothesis quòd sit practica, an sit ars? ideo ut solvantur hæc dubia, sint,

Prima conclusio.

Logica est ex omni parte scientia. Facilitas enim semper assentiendi veritati, ex motivo firmo & inconcusso, dicitur ab omnibus, scientia: atqui Logica, secundum omnes suas partes, est facilitas assentiendi veritati, ex motivo firmo & inconcusso. Facilitas enim assentiendi, ex præceptis certis & immutabilibus, est facilitas assentiendi, ex motivo firmo, & inconcusso: atqui Logica est ejusmodi facilitas, in omnibus suis partibus. Idem enim sit judicium de cæteris Logicæ præceptis, ac de sequentibus... Definitio substantiæ constare debet genere proximo, & differentiâ specificâ... Sillogismus, cujus duæ

præmissæ sunt negantes, non ritè concludit. . . Qui voluerit in aliquâ scientiâ methodicè procedere, debet à facilioribus, ad difficiliora gradum facere, &c. Atqui hæc præcepta certa sunt, & inconcussa; ostendentur enim innixa nostrarum idæarum intuitu; ergo Logica est facilitas semper assentiendi veritati, ex motivo firmo, & inconcussio; ergo Logica est ex omni parte scientia.

Objectiones.

Objiçes. 1°. Ille habitus intellectualis, non est ex omni parte scientia, qui mentem nonnunquam inclinat ad falsum: atqui Logica mentem nostram nonnunquam inclinat ad falsum. Ille namque habitus mentem nonnunquam inclinat ad falsum, qui ipsam inclinat ad conclusionem sequentis sillogismi:

Omnis homo est marmor:

Atqui Petrus est homo:

Ergo Petrus est marmor.

Atqui Logica mentem inclinat ad conclusionem hujus sillogismi; confectus enim est secundum omnes Logicæ regulas; ergo Logica mentem nonnunquam inclinat ad falsum: ergo Logica non est ex omni parte scientia.

Nego minorem prioris sillogismi, ob

rationes allatas in probatione; & distinguo majorem posterioris. Ille habitus mentem nonnunquam inclinatur ad falsum, qui ipsam inclinatur ad conclusionem allati syllogismi, spectatam ratione materiæ, concedo. Spectatam ratione formæ, nego. Distingue pariter minorem, & nega consequentiam. Tunc conclusio consideratur ratione materiæ, quando spectatur, prout enuntiat habitudinem attributi, ad subiectum; tunc autem consideratur ratione formæ, quando spectatur prout ex præmissis deducta, seu prout est connexa cum præmissis: porro Logica mentem quidem inclinatur ad assentiendum conclusioni syllogismi mox allati, ratione formæ spectatæ; quia conclusio ritè deducta fuit ex præmissis, seu necessariam habet cum præmissis connexionem; sed Logica mentem non inclinatur ad conclusionem supradicti syllogismi, ratione materiæ spectatam; quia Logicæ non est, sed aliarum scientiarum, examinare materiam propositionum.

Atqui Logica mentem nonnunquam inclinatur ad assentiendum conclusioni, quæ falsa sit, ratione formæ; ergo nulla solutio.

Nego subsumptum. Logica namque tradit ea præcepta de syllogismo conficiendo, quæ si ritè servantur, mentem semper

impellunt ad conclusiones ex præmissis ritè deducendas.

Probo subsumptum. Logica mentem inclinât ad assentiendum conclusioni alterius hujus sillogismi.

Qui non colit Deum , non erit salvus :

Atqui impius non colit Deum ;

Ergo impius non erit salvus.

Attamen , ejusmodi conclusio falsa est ; ratione formæ. Illa namque conclusio falsa est, ratione formæ, quæ deducitur ex duabus præmissis negantibus : atqui conclusio sillogismi mox allati , deducitur ex duabus præmissis negantibus ; ergo , &c.

Nego secundam antecedentis partem. Conclusio namque sillogismi mox allati deducitur ex præmissis , secundum regulas inconcussas. Ad probationem autem nego minorem, & dico propositionem minorem illius sillogismi esse reipsâ affirmantem ; sensus enim est impius , est de numero eorum , qui non colunt Deum.

Instabis 1^o. probando minorem. Illa propositio dici debet negans , in quâ reperitur particula, *non* ; atqui in allati sillogismi minore reperitur particula, *non* : ergo , &c.

Distinguo majorem. Si propositio sit simplex , concedo. Si propositio sit complexa , subdistinguo. Quando particula *non* , cadit in verbum , concedo. Quando

cadit in complexionem vel subjecti, vel prædicati, nego. Itaque propositio aliqua, simplex est, vel complexa: dicitur simplex, quando nihil additur, aut subauditur additum, vel subjecto, vel prædicato. Tunc autem dicitur complexa, quando aliquid vel additur, vel subauditur additum, aut ejus subjecto, aut ejus prædicato. Reverâ si propositio sit simplex, semper est negativa, quando continet particulam, *non*, qualis est ista, Deus non est crudelis; at si propositio sit complexa, tunc vel illa particula cadit in verbum, & consequenter enuntiat separationem prædicati à subjecto; quo in casu, negativa est; vel illa particula cadit in complexionem sive expressam, sive subauditam, vel subjecti, vel prædicati; quo in casu, non idcirco negativa est; hinc sequentes propositiones complexæ, negativæ sunt. . . . Deus non creavit substantias omnipotentes. . . . Deus summè justus non redimet damnatos; sequentes verò nullatenus sunt negantes. . . . Deus qui non est crudelis, punit peccatores. . . . Deus creavit substantias, quæ non sunt divisibiles.

Instabis 2^o. ex concessis. Quoties reperitur particula *non*, in propositione simplici, toties hæc propositio dici debet negans: atqui minor allati syllogismi, simplex

est. Tam enim minor allata, dici debet simplex, quàm ista, *Petrus non studet*: at hæc propositio simplex est; ergo & prior.

Nego minorem prioris sillogismi, & distingo majorem posterioris. Tam allata minor, simplex est, quantum ad voces, concedo. Quantum ad sensum, seu significationem, nego. Concessâ minore, distingue pariter consequens. Itaque propositio potest esse simplex, quantum ad voces, quæ complexa sit, quantum ad sensum: quod ut dignoscas, habenda est ratio circumstantiarum omnium, ex quibus detegi potest, num subaudiatur aliqua complexio; sicut clariùs intelligetur ex dicendis in Logicâ: quoniam igitur ex majori propositione prædicti sillogismi, facilè colligitur prædicatum allatæ minoris esse debere complexum; in quantum subjectum majoris propositionis, quod est terminus medius, complexum est, & fieri debet prædicatum in allatâ minore, ut sit idem terminus medius in majore, & in minore; exindè colligitur propositionem illam minorem debere esse complexam de prædicato, proindèque non est simplex.

Objicies. 2°. Habitus, cujus objectum non est necessarium, dici non potest scientia; atqui objectum Logicæ non est ne-

cessarium, sed contingens; ergo Logica non est scientia.

Distinguo majorem. Habitus, cujus ob-
jectum non est necessarium, quantum ad
essentiam; concedo. Quantum ad exis-
tentiam; nego. Solutio intelligetur ex
dictis, de existentia Philosophiæ.

Duobus modis contra solutionem hanc
subsumi potest: priore modo sic: atqui
objectum Logicæ necessarium non est,
quantum ad essentiam; posteriore modo
sic: atqui si objectum Logicæ necessarium
non est, quantum ad essentiam, Logica
non est scientia.

Instabis igitur 1°. probando prius sub-
sumptum, illud non esse necessarium: quan-
tum ad essentiam, de cujus essentia tra-
duntur præcepta: atqui de essentia objecti
Logicæ traduntur præcepta; ergo, &c.

Distinguo majorem propositionem: de
cujus essentia, traduntur præcepta mutabi-
lia, transeat... immutabilia, nego. Dis-
tingue pariter minorem, & nega conse-
quentiam. Præcepta mutabilia dicuntur
ea, quæ pendent à libero hominum arbi-
trio; quales sunt variae leges humanæ.
Præcepta immutabilia sunt ea, quæ nul-
latenus pendent à libertate; quale est
istud: reddendum unicuique, quod
suum est. Dixi autem, *transeat*; quia
quævis

quævis essentiæ, sunt invariabiles.

At, inquires, inutile est tradere præcepta vel immutabilia de necessariis, & immutabilibus, quantum ad essentiam; ergo, &c.

Distinguo antecedens. Inutile est tradere præcepta, de necessariis & immutabilibus, ut sint talia, concedo. Ut sciamus ipsa esse talia, nego: & nego consequentiam.

Instabis 2^o. probando posterius subsumptum. Nisi objectum scientiæ necessarium esset, quantum ad existentiam; artes omnes dici possent scientiæ: falsum consequens; ergo & antecedens.

Distinguo sequelam. Artes omnes essent scientiæ, quando earum objecta cognoscuntur per præcepta certa, & immutabilia, concedo. Quando earum objecta producibilia sunt, absque præceptis certis & immutabilibus, nego. Distingue pariter minorem, & nega consequentiam. Reverâ, &c.

Objicies denique. Habitus, qui tractat de fallaciis, seu de sillogismis deceptoriiis, non est scientia: atqui Logica tractat de fallaciis: ergo, &c.

Distinguo majorem. Ut fiant, & sint in usu, concedo. Ut deregantur & vitentur, nego. Distingue pariter minorem,

Conclusio secunda.

Logica est scientia practica. Illa namque scientia dicitur practica, cujus objectum est producibile secundum hujus scientiæ præcepta: atqui objectum Logicæ producibile est, &c. Cognitiones enim, seu actus intellectûs, sunt objectum Logicæ, ut postea probabitur: atqui cognitiones producibiles sunt, secundum Logicæ præcepta, verbi gratiâ, sillogismi producuntur secundum Logicæ regulas; proindèque, &c.

Objectiones.

Objiçies. 1^o. Illa scientia non est practica, quæ versatur circâ speculationes; atqui Logica versatur circâ, &c. Scientia enim, quæ versatur circâ definitiones, & argumentationes metaphysicas, versatur circâ speculationes; Metaphysica namque totaliter est speculativa; atqui Logica versatur circâ definitiones, & argumentationes metaphysicas: quia sunt totidem actus intellectûs; ergo, &c.

Nego minorem prioris sillogismi, ob rationes allatas in probatione; & distinguo majorem posterioris. Scientia, quæ

versatur circa definitiones, & argumentationes metaphysicas, ratione materiæ spectatas, concedo. Ratione formæ consideratas, nego. Distingue pariter minorem, &c. Itaque definitiones metaphysicæ (idem dicendum de argumentationibus) spectari possunt, vel ratione materiæ, vel ratione formæ. Tunc spectantur ratione materiæ, quando considerantur per ordinem, ad objecta quæ definiuntur; tunc autem spectantur, ratione formæ, quando considerantur, per ordinem ad leges, secundum quas conficiuntur. Reverâ, &c.

Objicies. 2^o. Illa scientia non est practica, cujus objectum est immutabile: atqui objectum Logicæ est immutabile: ergo, &c.

Distinguo majorem. . . Cujus objectum est immutabile, quantum ad existentiam, concedo. Quantum ad essentiam, nego. Distingue pariter minorem, & nega, &c. Reverâ, &c.

Objicies denique. Illa scientia non est practica, quæ non relinquit post se opus sensile; praxis enim ab Aristotele dicitur pertinere ad facultatem corpoream, quæ relinquit post se opus sensile: verbi gratiâ, domum, tabellam, &c. atqui Logica non relinquit post se, opus sensile, quando-

quidem pertinet ad facultatem spiritua-
lem : ergo , &c.

Nego majorem. Ut enim scientia dica-
tur practica , sufficit , si ejus objectum pro-
ducibile sit , secundum hujus scientiæ le-
ges ; scientia quippè , juxtà ipsum Aristo-
telem , specificatur ab objecto , hoc est ,
speculativa est , aut practica , prout ejus
objectum est , vel improducibile , vel pro-
ducibile , secundum hujus scientiæ regu-
las : porro objectum Logicæ , licet insen-
sibile , producibile est , secundum Logicæ
præcepta ; proindeque , &c. Ubi notabis
Aristotelem & Peripateticos dixisse qui-
dem , at non probasse , praxim pertinere
ad facultatem corpoream ; unde hæc au-
thoritas nullius est momenti ; imò poten-
tia activa probabitur insociabilis cum cor-
pore.

Conclusio tertia,

Logica est ars. Habitus enim verâ cum
ratione effectivus , dicitur ab omnibus ars :
atqui Logica est habitus verâ cum ratione ,
effectivus. Habitus enim practicus , qui
non versatur circâ mores ad honestatem
dirigendos , vocatur effectivus ; atqui Lo-
gica est habitus practicus (per conclusio-
nem præcedentem) ; aliundè verò versa-
tur circâ aliquid à moribus diversum ,

nempè circa actus intellectûs ; ergo , &c.

Et certè scientia , quæ dirigit functiones , quarum prærium positum est in industriâ & peritiâ , dicitur ars : atqui prærium Logicæ positum est in , &c. Ille quippè dicitur peritus Logicus , qui sua judicia , suosque omnes discursus , secundum Logicæ leges conficit ; proindeque , &c.

Dices. Si Logica esset ars , Logici dici possent *Artifices* : atqui Logici dici non possunt , &c. ergo , &c.

Distinguo majorem. Si Logica foret ars mechanica , concedo. Ars liberalis , nego. Concessâ minore , distingue pariter consequens , & nega consequentiam. Ars mechanica dicitur ea , quæ majorem requirit vim , ex parte corporis , quàm ex parte ingenii ; qualis est ars sutoria : ars liberalis est ea , quæ majorem requirit vim , ex parte ingenii , quàm ex parte corporis , qualis est ars pictoria. Usus autem invaluit , ut ii tantùm dicerentur *Artifices* , qui mechanicas artes exercent. Reverâ , &c.

De differentiâ Logicæ.

Objectum adæquatum , seu totale scientiæ , solet afferri , pro ipsius differentiâ. Cùm enim scientia , sive habitualis , sive actualis , dicat ordinem essentialem ad

objectum suum totale ; ideò definiri solent per hunc ordinem. Hinc inquirendum est objectum totale Logicæ, & consequenter, inquirenda sunt ejus objectum materiale, & ejus objectum formale,

Tria considerari possunt circà cognitiones humanas, nimirum actus ipsi intellectus ; objecta circà quæ versantur hi actus ; & voces quibus cognitiones, & objecta significantur. Hinc Philosophi quidam, ut Thomistæ, assignant pro objecto materiali Logicæ, cognitionum nostrarum objecta ; Okamistæ, voces ipsas assignant, pro objecto illo, undè dicti sunt Nominales. Alii denique ipsos actus intellectuales assignant pro objecto materiali Logicæ. Ex his autem, alii contendunt sola judicia ; alii, solam demonstrationem ; alii denique, judicia, simul & discursus, esse objectum materiali Logicæ. Ut solvantur hæc dubia, sint,

Conclusio prima.

Objecta cognitionum nostrarum, non sunt objectum materiale Logicæ. Illud enim non est objectum materiale scientiæ practicæ, quod non est producibile, secundum hujus scientiæ leges : atqui Logica est scientia practica ; ut fuit probatum ; aliundè verò ; objecta cognitionum nostra-

rum producibilia non sunt , secundum Logicæ regulas ; sicut manifestum est , de Deo , animâ rationali & corporibus , &c. ergo , &c.

Et certè objectum materiale unius tantum Philosophiæ partis , non debet esse idem , ac objectum totius Philosophiæ ; alioqui non haberet commensurationem : atqui objecta cognitionum nostrarum , seu *entia naturalia* , sunt objectum Philosophiæ ; ergo , &c.

Dices cum Thomistis , illud omne dici debet objectum materiale Logicæ , in quo reperitur veritas : atqui in omnibus entibus naturalibus , reperitur veritas ; ens enim quodlibet est *verum* ; ergo , &c.

Distinguo maiorem. In quo reperitur veritas formalis , transeat ; veritas materialis , seu objectiva , nego. Distingue pariter minorem , & nega consequentiam. Veritas formalis , est connexio operis cum præceptis scientiæ practicæ. Veritas materialis , seu objectiva , est connexio partium , ex quibus entia componuntur. Reverâ , &c. Dixi autem , *transeat* ; quia non sola Logica est scientia practica.

Conclusio secunda.

Voces non sunt objectum materiale Logicæ. Quod enim non consideratur propter

se in Logicâ , non est ejus objectum materiale : atqui voces non sic considerantur in Logica ; sed in gratiam actuum intellectualium , aut explicandorum , aut manifestandorum ; ut patet , tùm ex eo quòd essent inutiles , si nulli actus intellectûs essent , vel manifestandi , vel explicandi ; tùm ex eo quòd voces sint diversæ , apud diversos populos , quamvis apud ipsos Logica sit eadem ; proindequè , &c.

Notandum autem est , has denominationes , *majus extremum* , *minus extremum* , *medium* , *subjectum* , *predicatum* , &c. à Peripateticis vocari , *entia rationis Logica* , & à nonnullis eorum assignari pro objecto materiali Logicæ : at immeritò ; quia non considerantur propter se in Logicâ.

Conclusio tertia.

Non sola demonstratio est objectum materiale Logicæ. Non enim illud solum est objectum materiale Logicæ , præter quod , aliud propter se consideratur in Logicâ : atqui , præter demonstrationem , aliud propter se , consideratur in Logicâ. Illud enim propter se , consideratur in Logicâ , præter demonstrationem , quod , sublatâ demonstratione , dirigibile foret per Logicæ præcepta : atqui , sublatâ demonstratione , aliud esset dirigibile per Logicæ

præcepta ; nimirum definitiones , distributiones , & argumentationes , à demonstratione diversæ ; ut constare debet ex eo quod præcepta de his operationibus tradita , diversa sint à præceptis , quæ traduntur de demonstratione ; ergo , &c.

Objectiones.

Objicies. 1°. Illud solum est objectum materiale Logicæ , ad quod referuntur quæcumque tractantur in Logicâ : atqui quæcumque tractantur in Logicâ , referuntur ad demonstrationem. Partes enim demonstrationis , ad ipsam referuntur : atqui quæcumque tractantur in Logicâ , scilicet apprehensiones , & judicia , sunt partes demonstrationis ; ergo , &c.

Nego minorem prioris syllogismi : quia , sublatâ demonstratione , apprehensiones , & judicia per Logicam dirigerentur. Ad probationem autem , nego etiam minorem. Apprehensiones enim & judicia prærequiruntur quidem ad demonstrationem ; sed dici non possunt partes demonstrationis : unus enim actus specialis , qualis est demonstratio , non componitur ex aliis actibus specialibus.

Instabis. Ea sunt partes demonstrationis , sine quibus non potest esse demonstratio : atqui , sine apprehensionibus &

judiciis, non potest esse demonstratio; ergo, &c.

Distinguo majorem. Sine quibus componentibus, concedo. Sine quibus prærequiritis, Nego. Solutio facilis.

Objicies. 2^o. Illud solum est objectum materiale Logicæ, quod solum est modus cognoscendi per principia: atqui sola demonstratio, est modus cognoscendi per principia; ergo, &c.

Distinguo majorem. Quod solum est modus cognoscendi per principia universim, sive cognitionis, sive compositionis, concedo. Per principia cognitionis complexa tantum, nego. Distingue pariter minorem, & nega consequentiam. Reverâ, illud solum est objectum Logicæ, quod solum est modus cognoscendi per principia universim, sive cognitionis, sive compositionis; non autem per sola principia cognitionis complexa: quia modò per evidentiam, modò per propositiones evidentes, modò per partes componentes, ducimur in notitiam entium naturalium.

Conclusio quarta.

Omnes cognitiones, seu actus intellectus, sunt objectum materiale Logicæ. Illud enim est objectum materiale Logicæ, quod est producibile, secundum præcepta

Logicæ : atqui omnes actus intellectûs producibiles sunt , secundum Logicæ præcepta. Quæ enim , sublatis Logicæ præceptis , aut nullatenus , aut cum erroris formidine producerentur , dici debent producibilia , secundum Logicæ præcepta : atqui , sublatis Logicæ præceptis , actus intellectuales , aut nullatenus , aut cum erroris formidine producerentur ; sicut constat experientiâ , & ut attendenti patebit ; ergo , &c.

Objectiones.

Objicies. 1^o. Quod consideratur in Logicâ , propter aliud , non est de ipsius objecto : atqui apprehensiones in Logicâ considerantur propter judicia , & varios discursus ; ergo , &c.

Nego minorem. Ea namque non considerantur in Logicâ , propter judicia , & varios discursus , de quibus producendis , specialia traduntur præcepta : atqui de apprehensionibus producendis , specialia traduntur præcepta ; sicut constabit ex dicendis ; proindèque , &c.

Instabis. Quæ non possunt existere in animâ , sine judicio , considerantur in Logicâ , propter judicium : atqui apprehensiones non possunt existere in animâ , sine judiciis ; nunquam enim contingit , nulla

esse in animâ judicia , dum attendit ad objecta quædam ; sicut per experientiam unusquisque potest deprehendere ; ergo , &c.

1°. Nego majorem. Quamvis enim duœ entia sint à se invicem inseparabilia , non idcirco unum consideratur propter aliud : verbi gratiâ , licet intellectus & voluntas , sint facultates à se invicem inseparabiles ; non ideò voluntas consideratur , propter intellectum ; aut vice versâ.

2°. Nego minorem propositionem. Dum enim mens attendit ad suas idæas , sæpè dubitat de earum habitudinibus : porro dum mens sic dubitat , non judicat ; proindeque , &c. Ad id autem quod additur , respondeo , semper quidem adesse judicia quædam , dum mens attendit ad idæas ; sed contendo judicia illa non semper enunciare habitudinem idæarum , ad quas tunc fit attentio.

Objicies. 2°. Quod non est falsitatis capax , non est de objecto materiali Logicæ ; atqui apprehensiones non sunt falsitatis capaces , sicut probabitur in Logicâ ; ergo , &c.

Nego majorem. Ut enim aliquid sit de objecto Logicæ , sufficit quòd sit producibile , secundum Logicæ præcepta : at , quod est falsitatis incapax , nihilominus est producibile , secundum Logicæ præcepta ; proindeque , &c.

Instabis. Quod non est dirigibile ad verum , non est de objecto Logicæ ; dirigibilitas enim ad verum , est objectum formale Logicæ , sicut conclusione sequenti probabitur : atqui , quod non est falsitatis capax , non est dirigibile ad verum ; ergo , &c.

Distinguo maiorem. Quod non est dirigibile ad verum formale , concedo. Quod non est dirigibile ad verum materiale , nego. Distingue pariter minorem , & nega consequentiam , &c. Porro apprehensiones non sunt quidem dirigibiles , ad verum materiale , quasi scilicet , opus sit præceptis , ut attingant objecta , prout in se sunt ; sed dirigibiles sunt , ad verum formale , hoc est , producibiles sunt , juxta Logicæ præcepta ; ut patet ex eo quòd , sublati Logicæ præceptis , aut nullatenus , aut cum erroris formidine producerentur. Uno verbo , apprehensiones non sunt dirigibiles per ordinem ad objecta , sed per ordinem ad præcepta.

Objicies denique. Quod consideratur in Logicâ propter judicium , non est de objecto Logicæ : atqui discursus consideratur in Logicâ propter judicium. In tantum enim adhibetur discursus , in quantum mens dubitat de habitudine prædicati ad subjectum alicujus propositionis ; ergo , &c.

Distinguo majorem. Quod consideratur in Logicâ propter judicium, tanquam propter solum objectum Logicæ, concedo. Tanquam propter finem intentum à Philosopho, nego. Distingue pariter minorem, & nega consequentiam. Reverâ, discursus adhibetur à Philosopho, ut alicujus judicii veritatem detegat; sed quoniam discursus, nec est pars judicii, nec producitur secundum præcepta de judicio tradita; ideò discursus est de objecto materiali Logicæ.

Conclusio quinta...

Dirigibilitas actuum intellectualium, ad veritatem formalem, est objectum formale Logicæ. Illud enim est objectum formale Logicæ, quod est modus specialis, sub quo consideratur objectum materiale Logicæ: atqui dirigibilitas actuum intellectualium, ad veritatem formalem, est modus ille specialis. Logica namque tota est in tradendis regulis & præceptis de producendis actibus intellectualibus, & nulla alia scientia considerat actus intellectuales, sub hoc respectu; proindèque, &c.

Objectiones...

Objicies. 1°. Dirigibilitas non est objectum formale Logicæ, si actus intellec-

tuales nullatenus sint dirigibiles : atqui actus intellectuales nullatenus sunt dirigibiles. Si enim actus intellectuales essent dirigibiles ; vel antequam producerentur ; vel dum producuntur ; vel postquam fuerunt producti : atqui nullum horum dici potest.

Nego minorem prioris sillogismi. Experiētiā namque constat , actus intellectuales reipsā produci , secundum Logicæ præcepta. Ad probationem autem nego etiam minorem , præsertim quantum ad duas priores partes. 1°. Namque actus intellectuales dirigibiles sunt , antequam producantur : quia tunc sunt producibiles , secundum Logicæ præcepta. 2°. Sunt dirigibiles , dum producuntur : quia tunc per Logicæ præcepta diriguntur. Addo , ipsos utcumque dirigibiles esse , postquam fuerunt producti ; non quidem , eo sensu , quod vitiosi mutari possint in legitimos ; sed eo sensu , quod mens alios substituat , si sint vitiosi ; vel iis adhæreat , si sint ritè confecti.

Instabis. Probando minoris partem primam. Quod nihil est , non est dirigibile ad verum ; nihili namque nullæ sunt proprietates : atqui actus intellectus , antequam producantur , nihil sunt ; ergo , &c.

Distinguo majorem. Quod nihil est ,

id est, quod est impossibile, concedo. Quod nihil est, seu quod est merè possibile, & nondum existens, nego. Distingue pariter minorem, & nega consequentiam. Solutio jam fuit explicata. Ad id autem quod additur, respondeo, nihili, seu impossibilis, nullas esse proprietates: pariter nihili, seu merè possibilis, nullas esse proprietates existentes; sed contendo merè possibilis multas esse proprietates merè possibles; est enim intelligibile, producibile, &c.

Objicies. 2°. Objectum formale scientiæ debet esse ipsius proprium: atqui dirigibilitas actuum intellectualium, ad veritatem, non est Logicæ propria: convenit enim cæteris Philosophiæ partibus; ergo, &c.

Distinguo minorem. Dirigibilitas actuum intellectualium, ad veritatem materiale, seu objectivam, concedo. Ad veritatem formalem, nego. Distingue pariter consequens.

Instabis. Metaphysicæ est, considerare proprietates entium insensilium: atqui dirigibilitas actuum intellectualium, ad veritatem formalem, est proprietas insensilis horum actuum; ergo, &c.

Distinguo majorem. Metaphysicæ est, considerare proprietates insensiles entium,

quatenus sunt entia insensibilia , concedo. Quatenus sunt entia producibilia , secundum certa præcepta , nego. Concessâ minore , distingue pariter consequens. Re-
verâ , &c.

Conclusio sexta.

Actus intellectuales , quatenus ad veritatem formalem dirigibiles , sunt objectum totale Logicæ. Illud enim est objectum totale Logicæ , quod complectitur ejus objectum materiale , & ejus objectum formale : atqui actus intellectuales , quatenus ad veritatem formalem dirigibiles , sic se habent ; ut constat ex probatis ; ergo , &c.

Et certè illud est objectum totale scientiæ , quod habet unitatem , relationem , commensurationem , & distinctionem : atqui , &c. ergo , &c.

Dices. Quod consideratur in Logicâ , propter alias scientias , non est objectum adæquatum Logicæ ; atqui cognitiones , quatenus ad veritatem formalem dirigibiles , considerantur in Logicâ , propter alias scientias ; quandoquidem hæ cognitiones vocantur cæterarum scientiarum instrumenta ; ergo , &c.

Distinguo majorem. Quod consideratur in Logicâ , propter alias scientias , tanquam

90 CONCERTATIONES

propter objectum Logicæ, concedo. Tanquam propter finem intentum à Philosopho, nego. Distingue pariter minorem, &c. &c.

At, inquires, finis & objectum, sunt quid idem: atqui, ex concessis, cognitiones, quatenus ad veritatem formalem dirigibiles, considerantur propter alias scientias, tanquam propter finem; ergo, & propter objectum.

Distinguo majorem. Finis internus & objectum, sunt quid idem, concedo. Finis externus & objectum, sunt quid idem, nego. Distingue pariter minorem, & nega consequentiam. Finis internus scientiæ, est id, ad quod quæcumque tractantur in hac scientiâ, referuntur. Finis externus scientiæ, est id, quod sciens sibi proponit. Reverâ, &c.

Corollarium.

Ex dictis sequitur, Logicam esse definiendam, artem directivam actuum intellectualium, ad veritatem formalem; hinc ab Authore Gallico malè definitur; *ars cogitandi*:

An sit Logica..

Logica est, vel naturalis, vel artificiosa. Logica naturalis, est facilitas producendi.

actus intellectuales, absque regulis & præceptis. Logica artificiosa, est facilitas eodem actus producendi, secundum præcepta certa, & inconcussa.

Certum est Logicam naturalem existere: experienciâ quippè constat, ex hominibus illiteratis, alios aliis faciliùs ratiocinari. Difficultas igitur superest, circà existentiam: Logicæ artificiosæ, quæ ut solvatur, sit,

Conclusio.

Existit Logica artificiosa. Logica namque artificiosa, est facilitas producendorum actuum intellectualium, secundum præcepta certa, & immutabilia: atqui existit ejusmodi facilitas. Experienciâ quippè compertum est, frequenti similibus actuum repetitione, facilitatem quandam agendi comparari: porro multi homines, similes actus intellectuales, secundum præcepta certa & immutabilia produxerunt; proindèque, &c.

Et certè, quotiesprehenditur error in quibusdam actibus intellectualibus, ita ut hic error, post varias observationes, emendetur; toties dari debet facilitas errorem hunc emendandi: atqui, in quibusdam actibus intellectualibus deprehensus fuit error, & hic error, post varias observationes, fuit tandem emendatus; sicut:

92 CONCERTATIONES

homines quidam, per sensum intimum, sunt conscii; ergo datur facilitas errorem illum emendandi. Quoniam igitur hæc facilitas, vocatur Logica artificiosa; consequens est, Logicam artificiosam existere.

Dices. Illud non existit, quod est inutile: atqui Logica artificiosa est inutilis. Ille namque habitus inutilis est, in intellectu humano, quo sublato, homo certiùs exercet actus intellectuales: atqui, sublata Logica artificiosa, homo certiùs, &c. operatur nimirum solius Logicæ naturalis. Natura enim, inquiunt Philosophi, certior est arte; ergo, &c.

Nego minorem utriusque sillogismi, ob rationes superiùs allatas. Quod attinet ad effatum mox laudatum, quæro ab Adversariis, quid intelligant nomine naturæ? Si intelligant ipsam agendi facultatem, ridiculum est effatum, quia potentia comparari non debet cum habitu; si verò intelligant ipsum habitum nullis præceptis innixum, apertè falsum est effatum.

Qualis sit Logica.

Unica hîc movetur quæstio, utrùm scilicet Logica artificiosa, necessaria sit ad alias scientias comparandas? Ut solvatur,

Nota 1^o. vocem hanc *necessaria*, hîc sumi pro utili; undè sensus quæstionis est, utrùm Logica artificiosa sit necessaria, *secundùm quid*; an necessaria, *simpliciter*?

Nota 2^o. scientiam comparari posse, vel in statu perfectò, vel in statu imperfectò. Tunc quis dicitur habere scientiam in statu perfectò, non ubi cognoscit evidenter, quæcumque pertinent ad illam scientiam, quia hoc est impossibile; sed quando quædam entia sic evidenter cognoscit per principia, ut sit imperturbabilis in suis cognitionibus, tùm ratione materiæ, tùm ratione formæ spectatis, & quando paratus est solvere difficultates, quæ contrà cognitiones illas proponi possunt. Tunc autem aliquis dicitur habere scientiam in statu imperfectò, quando multa quidem evidenter cognoscit; sed non est imperturbabilis in suis cognitionibus, aut ex eo quòd cognitionum illarum formam ignoret, aut ex eo quòd de regere non possit sophismata, quæ contrà cognitiones suas proponuntur. His notatis,

Certum est 1^o. Logicam artificiosam non esse simpliciter necessariam, ad cæteras scientias in statu imperfectò comparandas: quia sine Logicâ artificiosâ, potest quis esse imperturbabilis in suis cogni-

tionibus ratione materiæ, seu ratione ob-
jectorum spectatis.

Certum est 2^o. Logicam artificiosam
esse necessariam, *secundum quid*, ad alias
scientias comparandas: quia, fatentibus
omnibus Philosophis, qui Logicæ præ-
ceptis sunt imbuti, cæteras scientias fa-
ciliùs acquirunt.

Superest igitur difficultas, utrùm Lo-
gica artificiosa sit simpliciter & absolute
necessaria, ad cæteras scientias in statu
perfecto comparandas?

Conclusio.

Logica artificiosa est simpliciter & ab-
solute necessaria, ad alias scientias in statu
perfecto comparandas. Illud enim est ab-
solute necessarium, sine quo, nemo po-
test esse imperturbabilis in suis cognitio-
nibus, ratione formæ spectatis; impertur-
babilitas enim, ratione formæ, requiritur
ad scientiæ perfectionem: atqui sine Lo-
gicâ artificiosâ, nemo potest esse imper-
turbabilis in suis cognitionibus, ratione
formæ spectatis. Ut enim quis sit imper-
turbabilis in cognitionibus suis, ratione
formæ spectatis, scire debet regulas &
præcepta; de disponendis & ordinandis
ejusmodi cognitionibus; forma quippè
cognitionum, est earum artificiosa dispo-

fitio : atqui sine Logicâ artificiosâ , sciri non possunt illæ regulæ ; Logica namque artificiosa nihil aliud est , quàm regularum illarum cognitio ; ergo , &c.

Objectiones.

Objicies. 1^o. Logica non est absolute necessaria , ad comparandum id , quod fuit ante ipsam acquisitum , vel in statu perfecto : atqui ante Logicam artificiosam , cæteræ scientiæ comparatæ fuerunt in statu perfecto. Nimirum , ante Aristotelem , scientiæ comparatæ fuerunt in statu perfecto ; & tamen ante ipsum non erat Logica artificiosa , quandoquidem dicitur Inventor Logicæ * ergo , &c.

Nego minorem prioris sillogismi. Scientiæ namque comparatæ non fuerunt in statu perfecto , antequàm mens humana , per attentionem & reflexionem , certè novit , num ritè procederet in suis cognitionibus. Ad probationem autem , distinguo secundam antecedentis partem , & tamen ante Aristotelem , non erat Logica artificiosa , à cæteris scientiis separata . concedo. Cum iis permixta , nego. Distingue pariter consequens. Tunc Logica dicitur ab aliis scientiis separata , quando omnia præcepta , de disponendis & ordinandis actibus intellectualibus , traduntur

seorsim ab aliis scientiis ; tunc autem consideratur , prout cum aliis scientiis permixta , quando simul cum aliis scientiis , ea traduntur Logicæ præcepta , quæ requiruntur ad scientiarum illarum perfectionem. Reverâ , &c. Aristoteles igitur , eatenus tantum dicitur Inventor Logicæ , quatenus præcepta Logicæ , per varias scientias respersa , in unum volumen collegerit.

Instabis. 1^o. Cognitiones directæ comparari possunt in statu perfecto , sine cognitionibus reflexis , etiam permixtis : atqui cæteræ scientiæ sunt cognitiones directæ ; Logica verò , est cognitio reflexa , ergo , &c.

Nego majorem. Cognitiones enim directæ comparari non possunt in statu perfecto , nisi adsit certitudo tum ratione materiæ , tum ratione formæ. Porro , sine cognitionibus reflexis , adesse non potest illa utraque certitudo ; proindeque , &c. Prætereà contendo cæteras scientias , non minus esse cognitiones reflexas , quàm ipsam Logicam. Non minus enim ad cognitiones scientificas requiritur mentis reflexio , quàm ad cognitionem regularum Logicæ. Nomine cognitionum directarum intelligunt Adversarii actus intellectus per ordinem ad objecta , nomine verò cognitionum

nam reflexarum, intelligunt actus intellectuales per ordinem ad præcepta, secundum quæ producuntur.

Instabis. 2°. Ut quis dicatur habere scientiam in statu perfecto, sufficit quòd sit imperturbabilis in suis cognitionibus: atqui, sine Logicâ artificiosâ, potest quis esse imperturbabilis in suis cognitionibus. Omnes enim scientiæ ex naturâ suâ pariunt imperturbabilitatem; ergo, &c.

Distinguo majorem. Sufficit quòd sit imperturbabilis, tùm ratione materiæ, tùm ratione formæ, concedo. Ratione solius materiæ, nego. Distingue pariter minorem, & nega consequentiam. Solutio intelligitur ex notato.

Atqui potest quis esse imperturbabilis, etiam ratione formæ, sine Logicâ artificiosâ. Ad hoc enim satis est, si quis post varias observationes, tandem deprehendat suas cognitiones esse ritè dispositas & ordinatas: atqui, sine Logicâ artificiosâ, potest quis illud deprehendere; ergo, &c.

Nego subsumptum, & ad probationem, nego minorem. Illud enim deprehendere, est habere Logicam artificiosam: hæc enim nihil aliud est, quàm multiplex observatio facta in errores, qui possuat occurrere circà cognitionum nostrarum dis-

positiones. Hinc siue quis studeat Logicæ artificiosæ ab aliis inventæ, siue ipsam proprio labore excogitet; semper manifestum est, ipsam esse simpliciter necessariam, ad cæteras scientias in statu perfecto comparandas.

Objicies. 2^o. Ars organica non est absolutè necessaria iis, qui utuntur organis: verbi gratia ars, frænefactoria necessaria non est iis, qui frænis utuntur: atqui Logicæ est ars organica, seu est ars construendorum instrumentorum; aliundè verò qui cæteras acquirunt scientias, utuntur organis Logicæ, nempè definitionibus, argumentationibus, &c. ergo, &c.

Distinguo maiorem. Si organis uti, non sit ea conficere, concedo. Si organis uti, sit ipsa conficere, nego. Itaque qui utuntur organis, seu instrumentis, vel possunt iis uti, absque eo quòd ipsa conficiant: verbi gratia, potest quis uti malleo, absque eo quòd ipsum conficiat; vel uti non potest organis, quin ipsa conficiat: verbi gratia, nemo potest uti sillogismo, quin ipsum conficiat. Reverâ, &c.

Objicies. 3^o. Si Logica esset absolutè necessaria, ad alias scientias in statu perfecto comparandas; esset quoque necessaria ad seipsam comparandam, quandoquidem ipsa est scientia: atqui absurdum est Lo-

gicam esse necessariam, ad seipsam comparandam; ergo, &c.

- Nego sequelam. Quia nempe Logica non est de numero cæterarum scientiarum. Præterea, quamvis notitia regularum de disponendis & ordinandis cognitionibus prærequiratur, ut cæteræ scientiæ in statu perfecto comparentur; exindè non sequitur, ad regularum illarum notitiam, prærequiri ipsarum cognitionem. Addo tamen primam Logicæ partem inservire, ad comparandam secundam; deindè primam & secundam inservire, ad obtinendam tertiam.

Objicies denique. Scientiæ comparari possunt, vel in statu perfecto, absque eo quòd dat tantum, *facilius posse*: atqui Logica artificiosa dat, tantum *facilius posse*, quia est solummodò facilitas; ergo, &c.

Distinguo majorem. Si aliundè suppleri possit hoc *facilius posse*, concedo. Si non possit aliundè suppleri, nego. Distingue pariter minorem, & nega consequentiam. Ut igitur cæteræ scientiæ possint absolute comparari in statu perfecto, sine Logicâ artificiosâ, deberet aliundè suppleri posse facilitas illa, quam dat Logica de disponendis, & ordinandis nostris cognitionibus; hoc est, absque notitiâ regularum Logicæ, cognosci deberent illæ re-

gulæ: quod manifestam involvit contradictionem; proindèque, &c.

Quotuplex sit Logica.

Logica, ut jam dictum fuit, distribuitur in naturalem & artificiosam; deindè Logica artificiosa subdividui debet in docentem & utentem. Logica docens, si sit habitualis, est facilitas cognoscendi Logicæ præcepta; si verò sit actualis, est præceptorum illorum cognitio. Logica utens, si sit habitualis, est facilitas applicandi Logicæ præcepta; si verò sit actualis, est præceptorum applicatio, seu usus.

Circà hanc distributionem, inquirunt hîc Philosophi, an Logica docens & utens, sine se invicem existere possint?

Certum autem est Logicam docentem, tùm habitualement, tùm actualiter existere posse sine Logicâ utente, tùm habituali, tùm actuali; dummodò versentur circà præcepta diversarum operationum intellectualium: nam, verbi gratiâ, potest quis habere Logicam docentem circa præcepta definitionis, absque eo quòd habeant Logicam, utentem circà sillogismorum præcepta. Difficultas igitur est, an sine se invicem existere possint, dùm versantur circà eadem præcepta?

Conclusio prima.

Logica docens actualis existere potest ; sine Logicâ actuali utente. Si enim præcepta Logicæ cognosci possint absque eorum applicatione ; Logica docens actualis ; existere potest sine Logica utente actuali ; atqui res sic se habet : verbi gratiâ , regulæ in discurrendi methodo traditæ , cognosci possunt absque ullâ eorum applicatione ; quandoquidem nulla tunc supponitur materia philosophicè cognita , suprâ quam fiat hæc applicatio ; ergo , &c.

Dices. Regulæ definitionis cognosci non possunt , quin applicentur , seu quin conficiantur definitiones ; ergo , &c.

Distinguo antecedens. Quin applicentur ope Logicæ naturalis , concedo. Ope Logicæ artificiosæ , nego. Distingue pariter consequens. Revera cognosci non possunt præcepta definitionis , quin per Logicam naturalem applicentur , quia tunc definitur ipsa definitio : at ubi primùm conficitur ista definitio , nondum adest Logica utens artificiosa , seu scientifica præceptorum applicatio.

Corollaria.

Primum. Logica docens actualis existere potest , sine Logicâ utente habituali.

Secundum. Logica docens habitualis

existere potest, sine Logicâ utente, tum habituali, tum actuali.

Conclusio secunda.

Logica utens actualis, existere non potest sine Logicâ docente actuali. Logica namque utens actualis, est scientifica præceptorum Logicorum applicatio; Logica verò docens actualis, est eorundem præceptorum Logicorum cognitio: atqui scientifica præceptorum Logicorum applicatio, non potest existere sine eorundem cognitione; hoc est, nemo potest scientificè applicare præcepta, quin hæc cognoscat; sicut per se manifestum est.

Corollaria.

Primum. Logica utens actualis, existere non potest sine Logicâ docente habituali, saltem inchoatâ.

Secundum. Logica utens habitualis, existere non potest sine habitu Logicæ docentis.

Tertium. Logica utens habitualis existere potest sine Logicâ docente actuali. Ad hoc enim sufficit, quòd habitus sint modificationes in animâ nostrâ permanentes, actus verò non sint modificationes permanentes: atqui res sic se habet, ut experienciâ constat; proindèque, &c.



LOGICA.

LOGICA, ut probatum fuit, est ars directrix actuum intellectualium, ad veritatem formalem. Distribui solet in quatuor partes, pro quatuor diversis actibus intellectualibus.

Primam hanc Philosophiæ partem, hoc ordine pertractabimus. 1°. Agemus de apprehensione, tùm varias circà ipsam concertationes dirimere conabimur. 2°. Dicemus de iudicio, & circà ipsum quædam subjungentur concertationes. 3°. Agemus de discursu, variasque circà ipsum proponemus, solvemusque quæstiones. 4°. Denique dicemus de methodo, & quæremus, an sit actus intellectûs, à cæteris diversus?

PRIMA PARS.

De apprehensione.

Apprehensio definiri debet, actus intellectûs attendentis, & reflectentis in objecta quæ sunt, tùm intrâ, tùm extrâ

nostram animam posita ; & insuper in varia signa , quibus utuntur homines , ut objecta manifestent , & explicent. Hoc autem est discrimen apprehensionem inter & comprehensionem , quòd apprehensio sit attentio ad aliquas tantum partes alicujus objecti ; comprehensio verò sit attentio ad ea omnia , quæ sunt in objecto quovis. Apprehensio convenit spiritibus creatis ; comprehensio verò , soli Deo , sicut constabit ex dicendis.

Primam hanc Logicæ partem sic ordinabimus. 1°. Fiet enumeratio præcipuorum entium , quæ sunt intrà nostram animam posita. 2°. Enumerabimus præcipua entia , quæ vel existunt , vel existere possunt extrà nostram animam , & examinabimus præcipuas eorum partes , tum absolutas , tum relativas. 3°. Nonnulla subjungemus circà varia signa. 4°. Regulas generales circà primam hanc intellectûs operationem , proponemus. 5°. Denique varias instituemus concertationes , circà apprehensionem.

*De entibus intrà nostram animam
positis.*

Præter ipsam animæ nostræ substantiam , quæ per sensum intimum innòtescit , &

de quâ dicetur in Metaphysicâ; tres occurrunt in hâc substantiâ diversæ modificationis species, scilicet facultates, seu potentia, actus, & passiones.

De facultatibus.

Facultates, ut diximus, sunt capacitates ad aliquid: & duplicis sunt generis, activæ & passivæ, quarum definitiones traditæ sunt.

Potentia dicuntur ordines essentialis, ad objecta sua, nec aliter à nobis definiti possunt, quàm per hos ordines; hinc tot agnoscendæ sunt potentia diversæ, quot sunt harum potentiarum objecta diversa: quoniam igitur infinita sunt objecta diversa, circa quæ versari potest anima nostra, sive agendo, sive patiando, sicut probabitur; ideò sunt infinita numero in animâ potentia, tùm activæ, tùm passivæ.

Potentia activæ revocari solent à Philosophis, ad quatuor generales, nimirum intellectum, imaginationem, voluntatem, & appetitum sensitivum.

Intellectus, est facultas generalis animæ, versantis circa entia insensibilia, prout sunt vera.

Imaginatio, est facultas generalis animæ, versantis circa entia sensibilia, prout vera.

Voluntas, est facultas generalis animæ, versantis circà entia insensilia, prout bona, bonitate relativâ, seu prout nobis convenientia.

Appetitus sensitivus, est facultas generalis animæ, versantis circà entia sensilia, prout nobis bona.

Duplicem tantùm admitteremus in animâ nostrâ generalem agendi facultatem, intellectum scilicet, & voluntatem; ita ut intellectus definiendus sit, facultas generalis animæ, versantis circà objecta, ut vera, sive hæc entia sint insensilia, sive sint sensilia; voluntas verò, facultas generalis animæ, versantis circà objecta, ut nobis convenientia, sive pariter sint insensilia, sive sint sensilia.

Facile colligi poterit ex dicendis de passionibus, ad quor generales revocari possint, infinitæ numero potentia passivæ.

De actibus.

Actus universim, est exercitium potentia activæ: & totuplex est, quoruplex est agendi facultas activa; undè quia facultates agendi revocatæ fuerunt à Philosophis ad quatuor generales; ideò quadruplicem admittunt actûs speciem generalem; nempe cognitionem, imaginationem, volitionem, & motum appetitûs

sensitivi. Cognitio, est actus intellectûs, versantis circâ veritatem objectorum insensilium; & subdistribuitur in apprehensionem, iudicium, discursum, & methodum; de quibus, tanquam de objecto suo, tractat Logica.

Imaginatio, ut est actus, definitur exercitium facultatis animæ, versantis circâ veritatem objectorum sensilium. Ubi notabis facultatem & ejus actum, ob vocum penuriam, eodem nomine donari.

Volitio, est exercitium facultatis animæ, versantis circâ bonitatem relativam objectorum insensilium; & subdistribuitur in actum moraliter bonum, & actum moraliter malum.

Motus appetitûs sensitivi, est exercitium facultatis animæ, versantis circâ bonitatem relativam objectorum sensilium.

Nomine cognitionis, significabimus in posterum, quemlibet actum intellectûs & imaginationis indiscriminatim: & nomine volitionis, significabimus quemlibet actum, siue voluntatis, siue appetitûs sensitivi.

De passionibus.

Passio latissimè hîc accipitur, nempe pro modificationis cujuslibet receptione. Omnes modificationes in animâ receptæ;

& ab ipsâ minimè productæ ; revocari possunt ad quatuor classes generales , scilicet , ad idæas , habitus , sensationes , & sensus intimos ; unde quatuor sunt generales potentiæ passivæ , potentia recipiendarum idæarum , potentia recipiendorum habituum , potentia recipiendarum sensationum , & potentia recipiendorum sensuum intimorum.

Idææ , sunt impressiones , seu passionēs in animabus nostris , à Deo productæ , quæ sunt objectorum extrâ nos vel existentium , vel possibilium , repræsentationes , & quasi tabellæ , quibus mediantibus cognoscere possimus illa objecta. Duplex distinguitur idæa , formalis & objectiva. Idæa formalis , est illa animæ modificatio , quæ est repræsentatio ; objectiva verò , est objectum per idæam formalem repræsentatum.

Naturam , existentiam , causas , proprietates , & species idæarum , examinabimus in Metaphysicâ ; sufficiat hîc observare , 1°. quamlibet idæam formalem , essentialiter esse conformem objecto , per ipsam repræsentato ; unde si erremus circa nostras idæas , error nascitur tantum ex eo quod idæas nostras referamus ad objecta , quæ per ipsas creduntur repræsentata ; & reipsâ non sunt repræsentata. 2°. Sola at-

tributa essentialia objectorum per idæas formales repræsentari ; hinc non datur idæa , *hominis docti* , quia doctrina non est essentialis homini. 3°. Idæas objectivas esse, vel totales, vel partiales. Idæa totalis est ea, quæ repræsentat partes omnes essentielles alicujus totius ; partialis verò , quæ partem tantum essentialem exhibet : verbi gratiâ , idæa Dei totalis est ; idæa verò omnipotentia divina , partialis est. 4°. Denique , quæcumque dicturi sumus de entibus naturalibus , intelligenda esse de objectis per idæas nostras repræsentatis.

Habitus definiri debent , facultates aliquid producendi ; unde pertinent ad solas potentias activas ;) & consequenter , alii sunt intellectuales , & alii voluntatis.

Habitus intellectuales possunt esse triplicis generis , error , opinio , & scientia ; ita ut scientia subdistribuatur in intelligentiam , sapientiam , prudentiam , & artem , quarum omnium specierum definitiones traditæ sunt.

Habitus voluntatis , sunt facultates , aut ad bonum , aut ad malum morale : hinc duplicis tantum sunt generis , *virtutes & vitia* , de quibus dicetur in Morali.

Habitus tum intellectus , tum voluntatis , subdistribuuntur in totales & partiales.

Habitus totalis, est complexio multorum habituum singularium, in aliquâ ratione convenientium, seu similium: sic habitus Logicæ dicitur, *totalis*, quia complectitur omnes habitus apprehendendi, judicandi, discurrendi, & ordinandi.

Habitus partialis, est singularis quædam facilitas; qualis est habitus definiendi, consideratus per ordinem, ad habitum totalem Logicæ.

Sensationes, sunt impressiones occasione objectorum sensibilium, in animabus nostris excitatæ, quæ à nobis referuntur, tum ad partes organicas nostri corporis, tum ad objecta extrâ nos posita, quasi foret aliquid in his objectis, impressionibus illis simile; tales sunt impressiones colorum, sonorum, caloris, frigoris, &c.

Sensus intimi, sunt impressiones, seu modificationes in animâ, à Deo productæ, quæ referuntur quidem ad partes organicas nostri corporis; sed nihil simile refertur ad objecta, extrâ nos posita: tales sunt impressiones doloris, famis, sitis, &c. Ubi notabis, ea omnia per sensum intimum innotescere, quæ sunt animæ nostræ modificationes, ad quas vel mens attendit, vel à quibus immediatè percellitur, quamvis non illa omnia sint sensus intimi: hinc discrimen est, inter sensus

intimos, & ea quæ per sensum intimum constant.

De entibus extrà nos positis.

Entia extrà nos posita, generatim loquendo, sunt substantiæ & modificationes, quarum definitiones & distributiones traditæ sunt, in quæstione, quotuplex sit ens; superest igitur, ut varias substantiarum & modificationum partes indicemus. Ex his autem partibus, aliæ sunt relativæ; aliæ verò absolutæ. Partes relativæ dicuntur illæ, per quas tota referuntur ad alia tota: sic *paternitas* & *filiatio* sunt partes relativæ; quia per paternitatem homo refertur ad filium, & per filiationem homo refertur ad patrem. Partes absolutæ vocantur illæ, per quas tota nullatenus referuntur ad alia tota; quales sunt, *unitas*, *æternitas*, &c. Quamobrem agemus 1.^o de relationibus universim, 2.^o de præcipuis entium partibus relativis, 3.^o de præcipuis entium partibus absolutis.

De relationibus.

Relatio universim, est ordo unius, ad aliud: sic *paternitas*, est relatio; quia est ordo patris, ad liberos.

Circà relationem tria sunt consideran-

da, subjectum, terminus, & fundamentum.

Subjectum relationis, est illud totum quod recipit relationem, seu quod refertur ad aliud: sic Pater est subjectum paternitatis, & Filius est subjectum filiationis.

Terminus relationis, est illud ens, ad quod subjectum refertur: sic Filius est terminus paternitatis, & Pater est terminus filiationis.

Fundamentum relationis, est ratio, propter quam unum refertur ad aliud: sic *receptio existentia*, est fundamentum dependentiæ rerum creatarum; quia est ratio, propter quam res creatæ pendent à Deo.

Fundamentum relationis duplex est, remotum & proximum. Remotum, est potentia, vel activa, vel passiva, ob quam unum refertur, aut referri potest ad alterum; proximum verò, est, vel actio, vel passio, seu receptio, propter quam unum refertur ad aliud.

Relatio duplex est, essentialis & contingens. Relatio essentialis, est ordo, sine quo, subjectum nec esse, nec concipi potest: sic relatio potentiæ activæ, ad objectum suum, est essentialis: quia potentia activa nec esse, nec concipi potest

sine ordine, ad suum objectum. Relatio contingens, est ordo, sine quo, subjectum & esse, & concipi potest: sic paternitas in homine, est relatio contingens; quia homo & esse, & concipi potest, sine paternitate.

In relationibus essentialibus, quærenda non sunt fundamenta: quia, cùm subjecta necessariò, seu ex naturâ suâ, sint relativa, quærenda non est ratio, cur sint talia; at in relationibus contingentibus, quærenda sunt illa fundamenta: cùm enim subjecta sint indifferentia, ut habeant, aut non habeant relationes; inquirendum est, per quid determinantur, ut eas habeant.

De præcipuis entium partibus relativis.

Præcipuæ partes entium relativæ, hæ sunt; distinctio, similitudo, diversitas, universalitas, separabilitas, divisio, veritas, prioritas, posterioritas, & simultaneitas.

De distinctione.

Distinctio, est modificatio, ens aliquod determinatum ita constituens, ut per eam fecernatur ab alioquovis: & triplex est, *realis*, *modalis*, & *formalis*.

Distinctio realis, est ea, quæ occurrit

inter rem & rem, seu inter substantiam & substantiam; qualis est inter animam & corpus.

Distinctio modalis, est ea, quæ reperitur substantiam inter & modificationem, qualis est, animam inter & scientiam.

Distinctio formalis, est ea, quæ occurrit inter duas modificationes; qualis est, scientiam inter & virtutem.

De similitudine & diversitate.

Similitudo entium, est eorum convenientia in attributis, seu partibus componentibus; diversitas autem, est eorum discrepantia, in illis attributis.

Similitudo duplex est, essentialis, & contingens. Similitudo essentialis, est entium convenientia in attributis essentialibus: & duplex subdistinguitur, *generica* & *specifica*: generica, est convenientia in attributis genericis, seu communibus; specifica verò, est convenientia in attributis propriis, quæ vocantur specifica. Similitudo contingens est entium convenientia in attributis contingentibus; sic duo homines docti, similes sunt contingenter, quatenus conveniunt in doctrinâ, quæ est ipsis contingens.

Ex opposito, diversitas duplex est, essentialis & contingens; ita ut essentialis sub-

distribui possit in *genericam* & *specificam*.
 Notandum autem est, vocem hanc *idem*,
 æquivocatione laborare : modò namque
 significat, *simile*, ut ubi dicitur unus num-
 mus aureus, *idem* est cum alio nummo
 aureo; modò significat, quid indistinctum;
 ut ubi dicitur, Alexander magnus, & fi-
 lius Philippi, Regis Macedonum, sunt
idem homo; hinc identitas sumitur modò
 pro similitudine, modò pro indistinctione.

De universalitate.

Universale, est unum dicens ordinem, ad
 multa : & quintuplex distinguitur, in *cau-
 sando*, in *significando*, in *repræsentando*, in
essendo, & in *prædicando*.

Universale in *causando*, est una causa;
 multos produciens effectus : sic Deus est
 universalis in *causando*, quia multos pro-
 duxit effectus, ad quos varios dicit ordi-
 nes.

Universale in *significando*, est unum
 multa significans : sic campanæ sonus,
 dici potest universalis in *significando*.

Universale in *repræsentando*, est unum
 multa repræsentans : sic quælibet idæa, di-
 ci potest universalis in *repræsentando*;
 quia varias objecti sui partes essentielles
 repræsentat.

Universale in *essendo*, est una natura.

apta multis inesse univocè , seu secundum eandem vocis significationem ; & duplex est , increatum , & creatum.

Universale in essendo increatum , est natura apta multis inesse univocè , & indivisum , seu sine sui multiplicatione : talis est sola natura Divina , quæ apta est inesse tribus personis Divinis , absque sui multiplicatione.

Universale in essendo creatum , est una natura apta multis inesse univocè , & divisum , seu cum sui multiplicatione : tales sunt , natura humana , natura corporea , &c.

Universale in prædicando , est unum aptum prædicari de multis univocè : & duplex pariter distinguitur , increatum & creatum. Increatum , est unum aptum prædicari de multis univocè & indivisum : qualia sunt hæc attributa *omnipotens , summè intelligens , &c.* Creatum autem , est unum aptum prædicari de multis univocè , & divisum : qualia sunt hæc prædicata , *homo , corpus , &c.*

Hoc autem est discrimen inter universale in essendo , & universale in prædicando , quòd illud exprimitur termino abstracto , hoc est , voce solam modificationem significante ; hoc verò , termino concreto , seu voce significante subiectum , simul & formam. Sic *spiritualitas* , est universalis in

essendo ; *spiritus* autem , est universalis in prædicando.

Ubi notabis universale in essendo, vocari *Methaphisicum* , ex eo quòd Methaphisicæ sit , examinare naturas , quæ multis insunt ; universale autem in prædicando , vocari *Logicum* , ex eo quòd Logicæ sit , examinare prædicata.

Universalia, tùm in essendo, tùm in prædicando , distribui solent , in *genus* , *differentiam* , *speciem* , *proprium* & *accidens* , de quibus singulis est dicendum.

De Genere.

Genus est unum aptum , vel inesse multis , vel prædicari de multis univocè , tanquam pars communior eorum essentiæ communis : sic *spiritualitas* , est genus in essendo ; & *spiritus* , est genus in prædicando.

Genus distribuitur , 1^o. in supremum , subalternum , & infimum : 2^o. in remotum , & proximum.

Genus supremum , est illud quod convenit omnibus , & proindè , quo nihil est universalius : tale est in rei veritate , *ens* : genus supremum vocatur à nonnullis , modò *transcendens* , modò *transcendentiale*.

Genus subalternum dicitur , quod & supra , & infra se habet alia genera , hoc est , quo datur genus aliud universalius , &

aliud minùs universale: sic, *substantia*, est genus subalternum: quia datur aliud genus universalius, nempe *ens*; & aliud minùs universale, nempe *spiritus*.

Ubi notabis ea omnia vocari *superiora*, quæ sunt generaliora, seu pluribus totis diversis conveniunt; ea verò dici *inferiora*, quæ sunt minùs generalia.

Genus infimum, dicitur illud, quod habet suprà se genus; sed non habet infrà: sic ubi *substantia* prædicatur de corpore, dici debet ipsius genus infimum: quia tunc nullum habet aliud genus infrà se.

Genus remotum, dicitur illud, quod prædicatur de aliquo suo inferiore, mediatè, seu mediante alio genere minùs universali: sic *substantia*, est genus remotum, respectu Dei, quia prædicatur de Deo, mediante *spiritu*.

Genus proximum, dicitur illud, quod prædicatur de aliquo suo inferiore, immediatè, seu nullo alio mediante genere: sic *substantia*, est genus proximum corporis.

In genere quovis occurrunt attributa, seu partes, quorum alia dicuntur, *extensiva*; alia verò *intensiva*. Attributa extensiva: sunt ea, quæ pertinent ad ejus universalitatem; intensiva verò, quæ pertinent ad ejus essentiam; verbi gratiâ, in *substan-*

idâ, hæc sunt attributa extensiva, quòd magis pateat, quàm quodlibet ejus inferiorius; quod abstrahat à suis inferioribus, &c. Hæc autem ipsius sunt attributa intensiva, quòd sit possibilis, quòd non requirat subjectum, cui inhæreat, &c.

Notandum igitur est, genus quodlibet *abstrahere* ab omnibus suis inferioribus. Unum autem, dicitur *abstrahens* ab alio; seu, ut aiunt nonnulli, *præscindens* ab alio, quando & est inseparabile ab ipso, nec includit in *idâ* suâ id, à quo dicitur abstrahens. Hinc 1°. Homo dici non potest præscindens à scientiâ; quia non est inseparabilis à scientiâ. Hinc 2°. Deus non abstrahit ab omnipotentia; quia includit in *idâ* suâ omnipotentiam. Hinc 3°. *spiritus*, prout est genus Dei, præscindit à necessitate existendi: tùm quia prout est genus Dei, est inseparabilis à necessitate existendi: tùm quia non includit in *idâ* suâ, necessitatem existendi.

De Differentiâ.

Differentia, est unum aptum, vel inesse multis, vel prædicari de multis univocè, tamquam pars strictior, seu magis propria eorum essentia communis.

Differentia distribuitur: 1°. in genericam, & specificam: 2°. in positivam, &

negativam : 3^o. in essentialem , & contingentem.

Differentia generica , est attributum multis quidem entibus diversis commune , sed per quod hæc entia discrepant à quibusdam aliis : sic spiritualitas, est differentia generica ; quia communis quidem est multis entibus diversis , scilicet Deo , Angelis & animæ rationali ; sed tamen hæc entia per ipsam discrepant à corporibus.

Differentia specifica , est attributum , quod convenit , vel soli cuidam enti , vel multis entibus similibus ; ita ut hæc entia, per attributum hoc discrepent à cæteris entibus diversis ; & ita ut hoc attributum sit , velut fons & radix omnium proprietatum eorum entium , quibus convenit : sic necessitas existendi , est differentia specifica Dei : & quia per ipsam , Deus discrepat ab omnibus entibus , extrà ipsum positis ; & quia necessitas existendi , est veluti fons & radix omnium Dei proprietatum.

Notandum autem est , differentiam genericam vocari à Philosophis , *superiorem* ; differentiam autem specificam , vocari *inferiorem*.

Differentia positiva , est modificatio , per quam ipsius subjectum differt ab alio subjecto , sive modificatio illa sit essentialis ,

tialis, five sit contingens: sic doctrina, est differentia positiva, per quam quidam homines differunt ab ignaris.

Differentia negativa, est absentia modificationis, ob quam unum subjectum discrepat ab alio: sic ignorantia, seu absentia scientiæ, vocatur differentia negativa, quia per hanc absentiam homines ignari differunt à doctis.

Differentia essentialis, est modificatio, sine quâ, subjectum nec esse, nec concipi potest, & per quam hoc subjectum differt ab alio quovis: hæc differentia vocatur specifica, si sit fons & radix omnium subjecti proprietatum; & tunc est secundum universale, in essendo & in prædicando.

Differentia contingens, est modificatio, sine quâ subjectum & esse, & concipi potest; per quam tamen, dum adest, subjectum differt ab alio: sic virtus, est differentia contingens hominis, in quo reperitur; quia homo potest concipi sine virtute, & tamen per ipsam differt ab impio.

De specie.

Species, est unum aptum, vel inesse multis, vel prædicari de multis univocè, tanquam tota communis eorum essentia; hinc nihil aliud est, quàm complexio generis proximi, & differentiæ specificæ.

Tomus I.

F

Species distribuitur, 1°. in subalternam, & infimam. 2°. In species propriè dictas, & species impropriè dictas.

Species subalterna, vocatur ea, quæ sub uno respectu, species est, & sub altero genus; hoc est, quæ per ordinem ad superiora species est, & per ordinem ad inferiora genus est: sic *substantia*, vocatur species, respectu entis; & genus est, respectu spirituum & corporum.

Species infima, dicitur ea, quæ nunquam potest esse genus: sic *circulus*, est species infima, quia non possunt esse diversæ species circuli.

Species propriè dictæ, sunt illæ, quæ non possunt fieri similes; ex eo nempe quòd habeant differentias sibi essentielles: sic *spiritus* & *corpus*, sunt species propriè dictæ, quia non possunt fieri entia similia.

Species impropriè dictæ, quæ possunt fieri similes: sic *aurum* & *ferrum*, sunt species impropriè dictæ, quia fieri possunt corpora similia; sicut constabit ex dicendis in *Physicâ*.

De proprio.

Proprium, est unum aptum, vel inesse multis, vel prædicari de multis univocè, tanquam attributum fluens à differentiâ specificâ: sic *omnipotentia*, est Dei proprie.

tas; quia potest inesse, & reipsâ inest tribus personis Divinis, tanquam attributum fluens à differentiâ Dei specificâ, seu à necessitate existendi. Unum autem dicitur ab alio *fluere*, quando ex ipso, tanquam ex antecedente, potest inferri, per modum consequentis.

Proprietas distribuitur in primariam & secundariam, quarum definitiones traditæ sunt. Rursus distribui potest in genericam, quæ fluit à differentiâ generis; & specificam, quæ fluit à differentiâ speciei.

Proprium, quatuor modis accipitur à Peripateticis. Primo modo, pro eo quod convenit soli alicui speciei, sed non omnibus ejus individuis, seu singularibus, ut, *esse Philosophum*, respectu hominis. Secundo modo, pro eo quod convenit omnibus individuis alicujus speciei, sed non soli huic speciei: ut, *esse bipes*, respectu hominis; aves namque sunt etiam *bipedes*. Tertio modo, pro eo quod convenit soli alicui speciei, omnibusque ejus individuis, sed non semper: ut, *canescere præ senectute*, respectu hominis. Quarto modo, pro eo, quod convenit soli alicui speciei, singulisque ejus individuis, & semper: ut, *esse risivum*, respectu hominis.

Hæc omnia parùm accuratè dicta sunt à Peripateticis, ut constare debet, ex eo

quòd exempla defumant à modificationibus contingentibus. Hinc solum proprium, prout fuit à nobis definitum, admitti debet, ut quartum universale, in essendo & in prædicando.

De accidente.

Accidens, est vox æquivoca: accipitur enim, modò pro qualibet modificatione, sive essentiali, sive contingente; modò, pro solâ modificatione contingente: hoc postremo sensu, est quintum universale, & definiri debet, unum aptum, vel inesse multis, vel prædicari de multis univocè, tanquam attributum ipsis contingens.

Accidens, ut quintum universale distribui potest in commune, & proprium. Commune, dicitur illud, quod multis specie diversis convenit: sic *existentia*, est accidens commune, respectu omnium entium contingentium: accidens proprium vocatur illud, quod soli alicui speciei convenit.

Accidens à nonnullis rursus distribuitur in metaphysicum & physicum. Accidens metaphysicum vocant illud, quod ne divinitus quidem existere potest, sine subjecto: ut *scientia*, *virtus*, &c. Accidens physicum dicunt illud, quod saltem divinitus, seu per miraculum, existere potest.

sine subjecto : sic , inquiunt , factâ consecratione panis & vini , in mysterio altaris , remanent harum substantiarum accidentia.

Ostendemus in Physicâ generali , nullam esse necessitatem admittendorum accidentium physicorum.

A P P E N D I X

De individuo.

Individuum consideratur , tanquam aliquid oppositum universali ; hinc postquam dictum fuit de universalibus , agendum est de individuo.

Individuum duobus modis accipitur. 1°. Pro eo , quod multis est incommunicabile ; & hoc sensu , opponitur universali. 2°. Pro eo omni , quod est immultiplicabile , sive multis sit incommunicabile , sive sit multis communicabile.

Individuum , priore modo sumptum , duplex à Philosophis distinguitur , *materiale & formale.*

Individuum , materialiter sumptum , est illud ipsum , quod multis est incommunicabile ; & rursus duobus modis accipitur ; *primò-intentionaliter* , & *secundò-intentionaliter*. Primò - intentionaliter sumitur , quando consideratur , prout habens

hanc numero individuationem , seu singularitatem ; accipitur autem secundò-intentionaliter , quando sumitur , prout habens individuationem universim. .

Individuum , formaliter sumptum , est ipsa individuatio , seu singularitas , quæ est forma individui constitutiva ; & duobus etiam modis accipitur : *primò-intentionaliter* , quando agitur de hâc numero individuatione ; *secundò-intentionaliter* autem , quando agitur de individuatione , generatim sumptâ.

Notandum autem est , *individuationem* , *attributa specifica* , & *attributa generica* , vocari à Philosophis , *gradus metaphysicos*. Idèò autem vocantur gradus , quia à minùs generalibus , ad generaliora , quasi per gradus ascenditur ; & idèò vocantur *metaphysici* , quia cùm sint attributa essentialia & insensilia , pertinent ad Metaphysicam.

De separabilitate & divisione.

Unum dicitur ab alio separabile , quando potest , sine ipso , existere , aut saltem concipi ; hinc separabilitas , est capacitas in uno ente , ut vel existat , vel saltem concipiatur , sine alio : & duplex est improprie dicta , seu minimè reciproca ; & proprie dicta , seu reciproca.

Tunc duo dicuntur separabilia improprie, & minimè reciproce; quando unum potest quidem existere, vel concipi sine alio; sed non vice versâ: sic homo, separabilis est à scientiâ, separabilitate impropriâ; quia homo potest existere & concipi, sine scientiâ; sed scientia, quæ conjuncta erat cum homine, non potest existere, sine homine: hinc separabilitas, improprie dicta, reperitur inter substantiam, & ipsius modificationem contingentem.

Tunc duo dicuntur separabilia proprie & reciproce, quando hæc entia, antea conjuncta, possunt, sine se, invicem existere & concipi; sic corpus & anima separabilia sunt proprie & reciproce; hinc ad separabilitatem reciprocam prærequiritur, ut entia sint totidem substantiæ; & consequenter separabilitas, proprie dicta, fluit à multitudine substantiarum, non autem à multitudine partium universi, ut vulgò creditur.

Divisio, generatim sumpta, definiri debet, totius in partes distributio; unde totuplex est divisio, quotuplex est totum diversum: porrò quadruplex distingui solet totum, essentialiale, integrale, accidentale, & potentiale.

De divisione essentiali.

Divisio essentialis, est totius distributio in partes suas essentielles: & duplex est, Physica, quæ fit in partes essentielles, quæ sunt substantiæ; ut si divides hominem in animam & corpus. Metaphysica, quæ fit in partes essentielles, quæ sunt modificationes, quarum quædam excludunt multitudinem partium substantialium; ut si distribuas animam in potentias activas, & potentias passivas.

Circà divisionem essentialem, sequentes servandæ sunt leges.

Prima. Divisio totius essentialis physici, si agatur de ipso homine, fieri debet in animam & corpus; si autem agatur de corpore, fieri debet in materiam & formas; quia nihil aliud est essenziale corpori, præter materiam & formas universim.

Secunda. Divisio speciei fieri debet, in genus, differentiam, & proprietates; quia hæc solæ partes sunt essentielles speciei.

Tertia. Divisio individui fieri debet, in genus, differentiam, speciem, proprietates, & gradum numericum; quia partes mox enumeratæ, conveniunt essentialiter individuo.

Quarta. Genus, differentia, species, proprium & individuum, subdistribui possunt, prout fuerunt à nobis superius subdistributa.

Quinta. Partitio totius essentialis metaphysici, in omnes & singulas partes suas essentielles, est impossibilis; quia infinitæ sunt numero partes essentielles, in quolibet toto metaphysico.

Sexta. Legitima erit partitio totius essentialis, in membra, quæ non poterunt de se invicem affirmari; quamvis unum membrum includatur in altero; hinc legitima est extensionis partitio, in punctum, lineam, superficiem & soliditatem.

De divisione integrali.

Divisio integralis, est distributio totius in partes suas integrantes, hoc est, in partes, quæ non requiruntur quidem ad essentiam totius, sed ad ejus perfectionem & integritatem: ut si divides Philosophiam, in Logicam, Metaphysicam, Mathematicam, &c. Circà divisionem integram, sequentes servandæ sunt leges.

Prima. Nulla potest esse pars integrans Dei, quia nihil contingens prærequiri potest, ad perfectionem & integritatem Dei.

Secunda. Divisio integralis, nunquam

potest esse adæquata ; quia infinita sunt attributa contingentia , quæ perficere possunt entia creata.

Tertia. Unum divisionis integralis membrum contineri non debet in altero ; quia pertinet ad subdistributionem partis continentis.

De divisione accidentali.

Divisio accidentalis , duplex est , alia scilicet subjecti , in sua accidentia ; ut si distribuas homines , in doctos & ignaros , in pios & impios , &c. alia verò accidentis , in alia sua accidentia ; ut si virtutem distribuas , in intensiorem & remissiorem , in nobiliorem & ignobiliorem , &c.

Circà divisionem accidentalem , duæ sequentes leges sunt servandæ.

Prima. Distributio subjecti in sua accidentia , fieri debet in communia , & minimè communia ; ita ut eorum fieri non possit accurata enumeratio.

Secunda. Distributio accidentis , in alia sua accidentia , fieri pariter debet in communia , & minimè communia.

De divisione potentiali.

Divisio potentialis , est universalis aliqujus distributio in sua inferiora ; qualis est distributio *substantie* , in spiritum &

corpus : hæc distributio vocatur à Philosophis , *cathegorica* ; hinc cathegoricam instituere , est universale , in inferiora sua distribuere.

Circà distributionem universalium , in inferiora , sequentes servandæ sunt leges.

Prima. Quodlibet universale distribui debet , in inferiora immediatè sibi subjecta : tùm hæc inferiora in alia sibi immediatè subjecta ; & sic consequenter.

Secunda. Ut accurata sit universalis alicujus distributio , deveniendum est ad ipsius individua , seu ad inferiora , quæ non possunt rursus subdividui.

Tertia. In universalis alicujus distributione , non assignetur pro uno inferiore , aliquid , quod de cæteris inferioribus sit prædicabile : quia tunc esset æquè universale , ac ipsum totum potentiale , quod distribuitur.

Ideò autem unum universale , per ordinem ad sua inferiora , vocatur *totum potentiale* ; quia dum est subjectum propositionis generalis , & sumitur universaliter , tantùm potest , quantum omnia ipsius inferiora simul sumpta : verbi gratiâ , si dicatur , *omnis substantia per se subsistit* ; hæc propositio tantùm potest , quantum possunt duæ sequentes. Omnis spiritus per se subsistit. . . Omne corpus per se

subsistit : hinc universalis alicujus inferiora , vocari possunt , *partes potentiales* , aut *potestativæ*.

De veritate.

Veritas universum , est multorum connexio : & triplex est , veritas signi , veritas idææ , & veritas entis.

Veritas signi , est ipsius connexio cum significato ; unde hæc veritas est , vel arbitraria , vel naturalis , vel essentialis.

Veritas idææ , est connexio repræsentationis cum repræsentato ; unde cum repræsentatio necessariam habeat connexionem cum objecto repræsentato , quælibet idæa est essentialiter vera.

Veritas entis , est connexio , quæ reperitur , tum inter totum , & partes ipsum componentes ; tum inter partes ipsas componentes : hinc quoniam ex partibus componentibus : aliæ sunt essentielles , & aliæ contingentes ; ideò duplex est veritas entis , essentialis nimirum , & contingens.

De prioritare , posterioritate , & simultaneitate.

Unum dicitur altero , *prius* , multis modis. 1°. *Duratione* , quando scilicet existit antequàm existat alterum ; sic Adamus fuit

duratione prior Abrahamo. 2°. *Naturâ*, ubi nimirum unum est alterius causa : sic Deus est naturâ prior decretis suis liberis : quia est causa decretorum suorum liberorum. 3°. *Origine*, ubi scilicet unum est, vel principium, vel fons, & origo alterius, non autem ipsius causa : sic differentia specifica, prior est origine proprietatibus : quia fons est, & origo proprietatum, non autem earum causa : sic etiam Pater Æternus, est prior origine, Verbo Divino ; quia est principium Verbi Divini, non autem ejus causa. 4°. *Ordine* : sic in oratione, exordium prius est narratione. 5°. *Dignitate* : hocque dupliciter, vel ex lege naturali, ut ubi homo dicitur prior Bruto ; vel ex lege humanâ, ut ubi nobiles dicuntur priores plebeis. 6°. Denique, *essendi consecutione*, hoc est, quando unum generalius est altero : sic *substantia* dicitur prior *spiritu*.

Quot autem modis, unum dicitur altero prius ; totidem modis, unum dici potest, aut altero posterius, aut *simul* cum ipso.

De præcipuis entium partibus absolutis :

Præcipuæ partes entium absolutæ, sunt unitas, extensio, intentio, & duratio.

Unitas, ut jam dictum fuit, est forma,

seu modificatio constituens totum, in ratione totius; & duplex est, *numerica*, & *similitudinis*. Unitas numerica, seu indistinctionis, est forma totius immultiplicabilis: sic unitas naturæ divinæ, & unitas Petri, sunt unitates numericæ: quia natura divina non potest esse multiplex; & Petrus non potest esse multiplex homo.

Unitas similitudinis, aut indifferētis, est forma totius multiplicabilis: sic unitas naturæ corporeæ, est unitas similitudinis; quia natura corporea potest esse multiplex, seu potest multiplex esse corpus.

Extensio, est multitudo partium, simul existentium, & extrā se invicem positarum. Duplex est, indivisibilis & divisibilis: extensio indivisibilis, est ea, quæ pertinet ad substantiam indivisibilem; qualis est imēnsitas divina.

Extensio divisibilis, est ea, quæ pertinet ad substantiam divisibilem; qualis est extensio corporis. Extensionis generatim sumptæ, tres sunt dimensiones; longitudo, latitudo, & profunditas, de quibus dicetur in Elementis Geometriæ.

Intensio, est multitudo partium simul existentium, & intrā se invicem positarum: sic intenditur motus, quando novi gradus adduntur prioribus, in eodem numero nobili: sic etiam intenditur habitus,

quando novæ facilitates adduntur prioribus , jam existentibus.

Duratio , est multitudo partium , quæ fluunt aliæ post alias ; ita ut simul existere non possint. Triplex est , æternitas , æviternitas , & tempus. Æternitas , est duratio carens initio ; & duplex est , necessaria , qualis est duratio Dei ; & contingens , qualis est duratio decretorum Dei liberorum. Æviternitas , est duratio , quæ habuit quidem initium , sed finem non est habitura ; qualis futura est animarum nostrarum duratio. Tempus , est duratio habens initium & finem ; qualis est duratio floris.

De variis signis.

Signum , ut diximus , est id omne quod , ex impressione sui , excitat in nobis impressionem alterius. Signa considerata per ordinem , ad objecta significata , triplicis generis distingui possunt ; alia scilicet objectorum ipsorum ; alia cogitationum nostrarum ; alia denique , & objectorum , & cogitationum nostrarum manifestativa. Signa objectorum manifestativa , vel sunt arbitraria , vel naturalia , vel essentialia , quorum definitiones traditæ sunt.

Signa cogitationum nostrarum manifestativa , vocantur , *gestus*. Gestus autem

describi potest, motus sensilis, vel totius corporis, vel aliquarum tantum ejus partium, cum intentione aliquid significandi: & duplex est, simplex & mixtus: simplex dicitur, quando non habet vocem adjunctam; mixtus verò, quando vocem habet adjunctam: effectus gestus mixti, est impressiones excitare, per quas significatio vocum modò augetur, modò minuitur, modò penitus immutatur.

Signa cogitationum & objectorum manifestativa, sunt scriptura & voces.

Scriptura, est figura sensilis & permanens, ad cogitationes & voces significandas excogitata: & duplex est, vulgaris & hieroglyphica. Scriptura vulgaris, est ea, quâ utuntur homines, dum vel græcè, vel latinè, vel gallicè scribunt; scriptura hieroglyphica, est figura quædam sensilis, quæ ex impressione sui, excitat in nobis impressionem alterius: sic Ægyptii pingebant oculum, in extremitate baculi, ut supremam Dei intelligentiam significarent. Ad postremam hanc speciem, revocari possunt characteres nonnulli, quos adhibent Algebristæ, Astronomi, & Chymistæ.

Voces, seu termini, sunt signa arbitraria, quibus utuntur homines, ut & suas cogitationes & entia quævis significant.

Duo autem considerari solent à Philosophis circà terminos , nimirum eorum distributiones , & eorum affectiones , de quibus est dicendum.

De terminorum distributionibus.

Primò , distribuuntur in *positivos* & *negativos*. Positivi dicuntur illi , qui significant , aut substantias , aut modificationes : ut *homo* , *justitia* , &c. Termini negativi vocantur illi , qui significant absentias , aut substantiarum , aut modificationum : ut *non homo* , *non justitia* , &c. Usus autem invaluit apud Philosophos , ut termini qui significarent absentiam cujusvis entis , cum præfixâ particulâ , *non* , vocarentur *infinitantes* ; qui verò significarent absentiam modificationis , dicerentur , modò *privativi* , modò *negativi* : privativi , si agatur de subjecto , ad formam illam recipiendam idoneo ; *negativi* verò , si agatur de subjecto , ad formam illam recipiendam inepto : verbi gratiâ , *cacitas* , vocatur terminus privativus , respectu hominis ; & *negativus* , respectu lapidis.

2°. Distribuuntur in *concretos* & *abstractos*. Concreti , sunt illi , qui significant subjectum simul , & formam ; ut *justus* , *æternus* ; sensus enim est , *ens habens justitiam* , *ens habens æternitatem*. Abstracti ,

sunt illi , qui solas formas significant , ut *justitia* , *eternitas* , &c.

3°. Distribuantur in *absolutos* & *relativos*. Absoluti , sunt illi , qui significant entia , nec significant eorum relationes ; ut *homo* , *lapis* , &c. Relativi , sunt illi , qui significant entia , prout dicunt ordines ad alia : ut *Dominus* , *servus* , &c.

4°. In *univocos* & *equivocos*. Univoci , sunt illi , quorum significatio semper est eadem : ut *circulus* , *triangulus* , &c. Æquivoci , sunt illi , quorum significatio non semper est eadem : sic vox ista , *idem* , est æquivoca ; significat enim , modò *indistinctum* , modò *simile*.

5°. In *denominantes* , *denominativos* & *denominatos*. Denominantes , dicuntur illi , qui significant modificationes , à quibus subjecta denominantur , ut *justitia* , *bonitas* , &c. Denominativi , sunt illi , qui significant subjectum vagum , seu indeterminatum , cum formâ determinatâ : ut *justus* , *bonus* , &c. Denominati , sunt illi , qui significant subjecta , quibus tribuuntur denominativi , ut *Deus* , qui denominatur *justus* , *bonus*.

Denominatio autem , duplex distinguitur , intrinseca & extrinseca. Intrinseca denominatio , dicitur ea , quæ desumitur à formâ inhærente , subjecto denominato :

ut ubi Deus dicitur *æternus*. Denominatio extrinseca, dicitur ea, quæ desumitur à modificatione, quæ est extrà subjectum denominatum: ut ubi corpus dicitur *cognitum*.

6°. In *connexos* & *oppositos*. Connexi, vocantur illi, qui significant entia, quorum unum inferri potest ex alio: sic hi termini, *spiritus*, *substantia*, vocantur connexi; quia ex eo quòd aliquod singulare sit *spiritus*, rectè sequitur ipsum esse *substantiam*. Termini oppositi, dicuntur illi, qui significant entia inter se opposita: ut *extensio divisibilis*, & *extensio indivisibilis*. Termini connexi subdistribuantur à Philosophis, in *convertibiles* & *inconvertibiles*. Convertibiles, dicuntur illi, qui significant entia, quæ de se possunt mutuo affirmari; inconvertibiles verò, qui significant entia, quorum unum potest quidem affirmari de altero, sed non vice versâ. Ostendemus in concertationibus, circa judicium, nullos esse terminos convertibiles; hinc non valet allata subdistributio.

Termini oppositi duplicis generis distinguuntur, *disparatè* & *propriè* oppositi. Disparatè oppositi, dicuntur illi, qui significant entia, inter se sic opposita, ut simili modo quibusdam aliis opponantur:

quales sunt hi termini, *albedo*, *rubor*. Propriè oppositi, sunt illi, qui significant entia, inter se sic opposita, ut nullis aliis similiter opponantur: & rursus quadruplicis generis vulgò subdistinguuntur, *contradictorii*, *contrarii*, *privativi*, & *relativi*. Contradictorii, quorum unus significat aliquod ens, & alter ejus absentiam: ut *homo*, *non homo*. Contrarii, qui significant modificationes infociabiles, vel in eodem subjecto, *quod*; vel in eodem subjecto, *quo*: ut *necessitas existendi*, & *contingentia existendi*. Privativi, quorum unus significat formam, & alter formæ hujus absentiam, in subjecto ad eam recipiendam idoneo: ut *visio* & *cacitas*, respectu hominis. Relativi, qui significant entia, mutuant ordinem ad se invicem dicentia, ut *Pater* & *Filius*.

7°. Denique, termini distribuuntur in *simplices* & *complexos*. Simples, dicuntur illi, qui significant entia, sine ullâ additione: ut *Deus*, *homo*, &c. Complexi verò, qui significant entia, cum additione quâdam partis, vel essentialis, vel contingentis: ut *Deus omnipotens*, *homo pius*, &c.

De terminorum affectionibus.

: Septem numerantur terminorum affec-

tiones, scilicet *suppositio*, *status*, *ampliatio*; *distractio*, *restrictio*, *alienatio*, & *appellatio*.

Suppositio termini, est ejus acceptio, vel pro seipso, vel pro significato; unde duplex distinguitur, *materialis* & *formalis*. *Suppositio materialis*, est acceptio termini, prout est sonus dearticulatus: ut ubi dicitur, *rex*, est vox monosyllaba: *suppositio formalis*, est acceptio termini pro significato; ut ubi dicitur, *Rex profligavit hostes*.

Status termini, est ejus acceptio, pro tempore per propositionem aliquam significato; ut ubi dicitur, *sedens* disputat.

Ampliatio termini, est ejus acceptio, pro tempore quovis, sive præsentis, sive præteriti, sive futuro; ut ubi dicitur, *totum majus est sua parte*.

Distractio termini, est ejus acceptio, pro alio tempore, quàm pro eo, quod significatur per aliquam propositionem: ubi dicitur in Scripturâ Sacrà, *cæci vident*, *surdi audiunt*, *claudi ambulant*: hi namque termini, *cæci*, *surdi*, *claudi*, sunt accipiendi pro tempore præterito; non autem pro tempore præsentis, per propositiones illas significato; sensus enim est, qui fuerunt cæci, nunc vident; qui fuerunt surdi, nunc audiunt; qui fuerunt claudi, nunc ambulant.

Restriçtio termini, est termini universalis acceptio, pro aliquâ tantùm parte suorum inferiorum: ut ubi dicitur, *substantia corporea*: terminus enim, *substantia*, sumitur quibusdam tantùm suis inferioribus.

Alienatio termini, est ipsius translatio, à propriâ significatione, ad impropriam, seu, ut aiunt, metaphoricam: ut ubi dicitur, amor est animæ *motus*.

Appellatio termini, est applicatio significationis ejus, suprâ significationem alterius: & duplex est, *materialis* & *formalis*. Appellatio materialis, est applicatio significationis unius termini, suprâ subjectum alterius termini; ut ubi dicitur, hic Pictor, est Musicus; denominatio namque *Musici*, cadit in subjectum artis pictoriæ, non autem in ipsam artem pictoriam. Appellatio formalis, est applicatio significationis unius termini, suprâ formam alterius; ut ubi dicitur, hic Musicus est peritus; denominatio namque periti, cadit in subjectum, quatenùs habet musicam.

Regula circa entia intrâ nos posita.

Prima.

Potentia specificantur ab objectis, hoc

est, tot sunt potentia, vel similes, vel diversa, quot sunt objecta similia, vel diversa, circa quæ versari potest anima, sive agendo, sive patiando, seu recipiendo; idem dicendum est, de habitibus & actibus. Ratio est, quia potentia habitus & actus, non possunt à nobis aliter defini, quam per ordines ad objecta sua; ita ut ordines illi sint, velut eorum gradus specifici.

Secunda.

Ut aliqua nostra potentia dicatur *activa*, duo requiruntur. Primum, ut effectus per sensum intimum innotescat, adeoque sit animæ nostræ modificatio; probabitur enim alibi, animam nostram agere non posse, ut aiunt, ad extrà, seu producere non posse effectum, extrà se positum. Secundum, ut effectus desinat existere, statim atque non amplius ad ipsum attendit anima; ostendetur enim in Metaphysicâ, effectum desinere existere, statim atque causa desinit existentiam ipsi tribuere.

Tertia.

Illæ solæ modificationes animæ, per sensum intimum innotescunt; vel quas anima producit; vel ad quas convertitur; vel

à quibus vividè percellitur. Hinc 1°. Omnes actus animæ, per sensum intimum ipsi innotescunt, quia anima nostra modificationem aliquam producere non potest, quin ad eam attendat. Hinc 2°. Habitus non semper innotescunt per sensum intimum; quia nec semper ad eos attendit anima, nec ab ipsis vividè percellitur. Hinc 3°. Idææ non semper innotescunt per sensum intimum; quia nec semper ad eas attendit anima, nec ab ipsis semper vividè percellitur. Hinc denique, nec omnes sensus intimi, nec omnes sensationes, per sensum intimum innotescunt; quia sæpè contingit, ut anima nostra multis simul sensibus intimis, multisque simul sensationibus afficiatur; hoc autem in casu, soli sensus intimi vividiores, solæque sensationes vehementiores, attentionem animæ velut in se convertunt, & ad se quasi rapiunt.

Quarta,

Nullus habitus intenditur, seu crescit, nisi exerçantur actus similes iis, quorum occasione fuit primùm productus: quia secundùm leges ordinarias, soli actus sunt causæ occasionales habituum, aut productorum, aut auctorum: pariter nullus habitus remittitur, aut fit debilior, nisi exerçantur

exerceantur actus oppositi iis, quorum occasione fuit comparatus; sicut intelligetur ex dicendis in Morali.

Regula circa entia extrà nos posita.

Prima.

Per solas idæas philosophicè certi sumus, de *identitate*, *similitudine*, *diversitate*, *separabilitate*, aut *inseparabilitate* entium, ut in se sunt; sicut probabitur in Concentrationibus.

Secunda.

Quæcumque sunt diversa, eo ipso sunt multa: diversitas enim importat in idæâ suâ multitudinem.

Tertia.

Quæcumque sunt, vel familia, vel diversa; non idcirco sunt à se invicem separabilia: tum quia possunt esse modificationes eidem substantiæ essentielles: tum quia, ad separabilitatem propriè dictam, requiritur substantiarum multiplicitas.

Quarta.

Nullum genus includit in idæâ suâ, species sibi subjectas; quia est solummodò pars harum specierum; pariter nullam

genus includit in idæâ suâ , differentias specierum suarum constitutivas ; sicut probabitur in Concertationibus.

Quinta.

Genus quodlibet includitur , in idæâ cujuslibet speciei sibi subjectæ ; quia est pars communior essentiae , suarum specierum.

Sexta.

Genus supremum , & modificatio generatum sumpta , includuntur , tum in speciebus sibi subjectis , tum in differentiis harum specierum constitutivis ; quia nempe sunt genera specierum , & differentiarum sibi subjectarum ; adedque sunt earum partes essentielles.

Septima.

Ut aliqua pars essentiae propria , vocari possit differentia specifica ; tria requiruntur. Primum , ut reipsâ conveniat ei speciei , cui tribuitur ; secundum , ut speciem cui convenit , ab aliâ quâvis secernat : tertium , ut sit fons , & radix omnium illius speciei proprietatum.

Octava.

Entium essentiae , seu naturæ , cognosci

non possunt per differentias negativas; quia hæ differentiæ sunt entium absentia, quæ proinde nullam habent veritatem, seu connexionem.

Nona.

Species propriè dictæ, non possunt in se invicem transmutari, seu fieri similes; quia essentialiter à se invicem discrepant. At species impropriè dictæ, possunt in se invicem transmutari; quia contingenter tantum à se invicem differunt.

Regula circa signa.

Prima.

Ex præsentia signi arbitrarii, nunquam certò colligitur præsentia significati. Ex præsentia signi naturalis, certò colligitur, juxta leges ordinarias, præsentia significati. Ex præsentia signi essentialis, semper certò colligitur præsentia significati. Ratio horum omnium desumenda est ex signorum illorum naturâ.

Secunda.

Nullus, intra scribendum, utatur vocibus æquivocis, nisi prius declaraverit, quo sensu voces illas sit accepturus.

Tertia.

Si Scriptor aliquis usurpaverit vocem aliquam, commune quid significantem, & genuinum vocis illius sensum assequi velis; habenda erit ratio circumstantiarum omnium, in quibus Scriptor ille fuit constitutus: verbi gratiâ, si quis scripserit, Principem aliquem fuisse *vera religionis*, cultorem acerrimum; tunc perpendendum erit, cujusnam religionis, regionisque fuerit ille Scriptor: si enim fuerit Lutheranus, per has voces *vera religionis*, intellexit Lutheranam; si Judæus, Judaicam; si Christianus, Christianam.

Quarta.


Qui Scriptoris alicujus opera voluerit evolvere, ad sequentia potissimum attendat. 1°. Qualis fuerit Scriptoris scopus, & in quorum gratiam prodiderit scriptum: detegantur, si fieri potest, Scriptoris patria, religio, & sæculum: horum enim notitia plerumque confert ad operis intelligentiam. 2°. Diligenter perpendatur vocum significatio, an scilicet propria sit, an metaphorica, an popularis, an scientificæ. 3°. Levis error, gravi dissertatione non explodatur. 4°. Obscura exponantur per antecedentia & consequentia; ita ut in

dubiiis, benignior sensus eligatur. 5°. Denique, si agatur de opere scientifico; post iteratam lectionem, & maturam attentionem, fiat illius compendium.

Quinta.

Qui scriptis publicis quidpiam mandare desiderat, ad sequentia præsertim attendat. 1°. Subjectam materiem diu verset animo, ac per varias distributiones & subdistributiones, eam sub variis respectibus intueatur, priusquam ad opus se accingat. 2°. Brevis præmittatur totius operis quasi delineatio, ut Lectores-Scriptoris intentum statim assequantur. 3°. Nihil in lucem prodeat, nisi cæteri homines utilitatem exindè sint percepturi; hinc ab operibus inutilibus, & à fortiori ab omnibus obsœnis, & inhonestis sese omninò abstineant Scriptores. 4°. Longioribus digressionibus Lectorum mentes ab objecto proposito, non avertantur: brevitati namque simul & perspicuitati consulendum est. 5°. Importunam sui jactationem, aliorum contemptum, mordacemque similium operum censuram, vitare curet Author; maneatque, si redarguat, intrà limites urbanitatis & charitatis; & consequenter abstineat se à conviciis, vel Pagano indignis. 6°. In optimorum Authorum lec-

tionem sit à longo tempore versatus, ut illud scribendi genus eligat, quod proposito suo conveniens sit, & proportionatum. 7°. Denique opus absolutum, & omni curâ elaboratum, per annos aliquot fervet, in arcâ conclusum: postea verò, ipsum tanquam ab alio scriptum, evolvat, & stricto subiciat examini.



CONCERTATIONES

circà Apprehensionem.

HOC ordine procedemus in his Concertationibus.

1°. Differemus de ipsâ apprehensione. 2°. De speciebus distinctionis. 3°. De diversitatis & similitudinis signo. 4°. De universalibus in essendo, & in prædicando generatim. 5°. De iisdem universalibus speciatim. 6°. De divisionibus potentialibus, seu cathégoriis, tum generatim, tum speciatim. 7°. Denique de signis.

De apprehensione.

Circà apprehensionem duo possunt inquiri. 1°. An apprehensio quælibet sit simplex, an autem complexa? 2°. An apprehensio

CIRCA APPREHENSIONEM. Iste
hensio quævis sit ita vera, ut nulla possit
esse falsa. Ut solvantur hæ quæstiones,

Nota, 1^o. quamlibet apprehensionem,
sepectari posse, vel ratione sui, prout est
actus; vel ratione objecti, ad quod mens
attendit: priore modo considerata, voca-
tur *formalis*, posteriore verò, *objectiva*.

Nota, 2^o. apprehensionem objectivam,
feu objectum apprehensionis, duplex dis-
tingui posse, apprehensum & apprehen-
dendum. Objectum apprehensum, est id
ad quod mens reipsâ attendit. Objectum
apprehendendum, est illud ad quod, in
quibusdam circumstantiis, deberemus at-
tendere, ad quod tamen non attendimus:
verbi gratiâ, si dum oculis obijcitur auri-
calcum, apprehendamus aurum; tunc au-
rum est objectum apprehensum, & auri-
calcum erat objectum apprehendendum.
His notatis sint,

Conclusio prima.

Quælibet apprehensio formalis, dici
debet simplex in ratione actûs. Ille nam-
que actus dici debet simplex, in ratione
actûs, qui non componitur ex aliis actibus;
atqui nulla apprehensio formalis compo-
nitur ex, &c. Si enim componeretur ex,
&c. hi alii actus componentes, vel essent
ipsius genus, vel differentia, vel proprie-

tates, vel partes contingentes: atqui nullum horum dici potest; ut per se manifestum est; ergo, &c.

Conclusio secunda.

Objectum quodlibet apprehensum, dici debet compositum. Illud enim dici debet, &c. quod in se continet multa entia partialia: atqui quodlibet objectum continet in se. . . Quidquid enim continet genus differentiam & proprietates, continet in se multa entia partialia: atqui quodlibet objectum continet in se, &c. quandoquidem repugnat objectum carens essentialibus, seu partibus essentialibus; proindèque, &c.

Et certè quodlibet objectum apprehensum, est ens, seu possibile: porrò possibile dici debet compositum. Quidquid enim habet partes sociabiles, dici debet compositum: atqui possibile habet partes sociabiles, ut constat ex ejus definitione, ab omnibus recepta; proindèque, &c.

Objectiones.

Objicies. 1^o. Illud dici debet simplex, quod est unicum ens: atqui multiplex objectum, est unicum ens; ergo, &c.

Nego majorem. Quod enim est unicum ens, seu quod est immultiplicabile, suam

CIRCA APPREHENSIONEM. 153
nihilominùs habet essentiam : at quidquid
habet essentiam , dici non potest simplex ,
quandoquidem constat ex genere & diffe-
rentiâ ; proindèque quod est unicum ens ,
non idcirco simplex est.

Instabis. 1°. Ex conclusione præcedenti
quælibet apprehensio formalis , simplex
est ; ergo quædam entia , ratione sui , sunt
simplicia.

Distinguo antecedens. Quælibet appre-
hensio formalis simplex est , in ratione ac-
tûs , concedo. In ratione entis , nego ; &
nego consequentiam.

Instabis. 2°. Nisi daretur ens aliquod
simplex in ratione entis , infinita essent
entia partialia in objecto quovis : absur-
dum consequens ; ergo , &c.

Nego minorem. Illud enim non est ab-
surdum , quod evidenter cognoscitur , ut
verum ; at evidenter cognoscimus , infi-
nita numero entia partialia in objecto
quovis reipsâ contineri. Evidens enim est
objectum quodvis suam habere naturam ,
& consequenter suum genus , & suam dif-
ferentiam. Evidens pariter est , genus &
differentiam esse entia , quæ proindè suas
habent essentias , & sic consequenter. Quo-
niam igitur repugnat deveniri posse ad ens
aliquod partiale , quod suâ careat essen-
tiâ ; evidenter cognoscimus , in objecto

quovis infinita contineri entia partialia : proindeque hoc est absurdum.

Instabis denique. Absurdum est dicere , objectum aliquod esse finitum simul , & infinitum : atqui , si valeret nostra sententia , objecta creata , finita essent simul & infinita ; ergo , &c.

Distinguo majorem. Absurdum est , objectum aliquod esse finitum , ratione multitudinis partium simul ; & infinitum , ratione multitudinis , concedo. Esse finitum , ratione perfectionum simul , & infinitum , ratione multitudinis partium , nego. Distingue pariter minorem , &c. Repugnat igitur objectum aliquod esse finitum simul & infinitum , sub eodem respectu : verbi gratiâ , ratione multitudinis partium : at non repugnat objectum idem esse finitum sub uno respectu , & infinitum sub altero ; scilicet finitum , ratione perfectionum , & infinitum , ratione numeri partium.

Objicies. 2^o. Datur apprehensio objecti definiendi : atqui hæc apprehensio simplex est , ex parte illius objecti. Illa namque apprehensio simplex est , ex parte objecti , cujus objectum apprehenditur , ut simplex : atqui objectum definiendum apprehenditur , ut simplex , alioqui non inquireretur ejus definitio : ergo , &c.

Nego minorem prioris sillogismi ; quia

repugnat objectum carens partibus essentialibus. Ad probationem autem distinguo maiorem. Cujus objectum apprehenditur, ut simplex, id est, ut excludens partes quaslibet componentes, concedo. Ut simplex, id est, cujus partes essentielles nondum innotescunt, nego. Distingue pariter minorem, & nega consequentiam. Reverâ, quando apprehenditur objectum definiendum, apprehenditur ut simplex, id est, nondum apprehenduntur partes ejus essentielles; sed non apprehenditur ut simplex, id est, ut excludens partes essentielles; alioqui frustra quæreretur ejus definitio.

Conclusio tertia.

Quælibet apprehensio potest esse falsa per ordinem, ad objectum apprehendendum. Tunc enim apprehensio dicitur falsa per ordinem, ad objectum apprehendendum, quando loco unius objecti, apprehenditur aliud: atqui loco apprehendendi objecti aliud à nobis, &c. Ad hoc enim sufficit, quod unumquodque objectum in attributis quibusdam cum alio conveniat; hoc enim in casu propter horum attributorum similitudinem, unum apprehendi potest loco alterius: verbi gratiâ, dum nobis objiciuntur lups & auricalcum,

hæc objecta sunt apprehendenda, ut potest oculis præsentia; fieri tamen potest, experientiâ teste, ut loco lupi, canem, & loco auricalci, aurum apprehendamus; ergo loco objecti apprehendendi, potest aliud apprehendi: ergo, &c.

Ideò igitur tunc erramus; quia judicamus de entibus extrâ nos positis, per sola attributa communia, cum tunc judicare deberemus per attributa propria: aliæ rationes hujus erroris desumi poterunt, ex dicendis in Physicâ particulari, ubi de memoriâ & phantasiâ.

Conclusio quarta.

Quælibet apprehensio essentialiter est vera per ordinem, ad objectum apprehensum. Quod enim essentialem habet connexionem cum objecto apprehenso, essentialiter est verum per ordinem, ad objectum apprehensum: atqui apprehensio habet essentialem connexionem cum objecto apprehenso; nec enim intelligi potest apprehensio, quin intelligatur aliquid apprehensum; ut per se manifestum est; ergo, &c.

De distinctione.

Circâ distinctionem duo possunt hic inquiri. Primum, quomplex sit in veri-

CIRCA APPREHENSIONEM: 157
tate distinctionis species? Secundum, an
qualibet distinctionis species sit positiua,
feu independens à mente humanâ?

Prima conclusio.

Triplex tantum admittenda est distinc-
tionis species. Totuplex enim admittenda
est distinctionis species, quotuplex est en-
tium determinatorum diversa multitudo ::
atqui triplex tantum est entium determi-
natorum diversa multitudo. Cum enim
duplex tantum sit entis species, scilicet
substantia & modificatio: hæc species tri-
bus tantum modis inter se diversimodè
possunt combinari. Vel enim agitur de
substantiâ & substantiâ, vel de substantiâ
& modificatione, vel de modificatione &
modificatione: ergo triplex tantum est en-
tium determinatorum diversa multitudo;
ergo triplex tantum est distinctionis species.

Si agatur de substantiâ & substantiâ,
hæc distinctionis species vocabitur, *realis*,
ex eo quòd substantia vocari soleat res;
si agatur de substantiâ & modificatione,
hæc distinctionis species vocabitur, *moda-
lis*, ex eo quòd modificatio comparata
cum substantiâ, nonnunquam dicatur mo-
dus: si tandem agatur de modificatione &
modificatione, hæc distinctionis species
vocabitur, *formalis*, ex eo quòd modifi-

158 CONCERTATIONES
cationes quandoque dicantur formæ.

Quod attinet ad distinctionem realem, fatentur omnes Philosophi ipsam esse positivam, seu independentem à mente humanâ: at non omnes fatentur distinctionem modalem & distinctionem formalem, esse positivas. Sint itaque,

Conclusio secunda.

Distinctio modalis; positiva est. Distinctio enim, quæ reperitur inter species propriè dictas, & positivè diversas*, dici debet positiva: atqui distinctio modalis sic se habet. Distinctio namque modalis reperitur substantiam inter & modificationem: atqui substantia & modificatio, sunt species propriè dictæ, & positivè diversæ. 1°. Quidem sunt species propriè dictæ. Species enim, quæ ne divinitus quidem possunt in se invicem transmutari, seu fieri similes, sunt species propriè dictæ: atqui nec substantia fieri potest modificatio, nec modificatio fieri potest substantia, quandoquidem essentialiter à se invicem discrepant; & essentialiter sunt immutabiles, sicut ostendetur in Metaphysicâ. 2°. Substantia & modificatio, sunt species positivè diversæ. Nam ea sunt positivè diversæ, quæ diversis exhibentur idæis, & diversimodè definiuntur ab om-

CIRCA APPREHENSIONEM. 159
nibus Philosophis; idææ namque sunt motivum certissimum judiciorum nostrorum philosophicorum, ut postea probabitur: atqui substantia & modificatio diversis exhibentur idæis, & diversimodè definiuntur ab omnibus Philosophis; ergo sunt entia positivè diversa; proindèque, &c.

Conclusio tertia..

Distinctio formalis, positiva est. Illa namque distinctio positiva est, quæ reperitur inter ea, quæ, nemine cogitante, non sunt quid indistinctum: atqui distinctio formalis sic se habet. Distinctio namque formalis reperitur inter modificationes: atqui modificationes, nemine cogitante, non sunt quid indistinctum. Si enim intellectus & voluntas, verbi gratiâ, essent quid indistinctum, verum esset, hominem cognoscere per voluntatem, & amare per intellectum. Pariter, si virtus & scientia essent quid indistinctum in homine, homini dici posset pius per scientiam, & doctus per pietatem: atqui hæc absurda sunt, &c.: ergo, &c.

Dux posteriores conclusiones maximè sunt momenti; quia sunt fundamentum totius cursûs philosophici; quamobrem utramque rursus demonstrabimus, ubi de signo diversitatis & similitudinis entium:

Objectiones.

Objicies.. 1^o. Illa distinctio non est positiva, quæ dicta fuit à Philosophis modò virtualis, modò rationis: atqui distinctio, quæ reperitur tum inter substantiam & modificationem, tum inter modificationem & modificationem, dicta fuit modò virtualis, modò rationis; ergo non est positiva.

Distinguo majorem... Quæ dicta fuit, modò virtualis, modò rationis, eo sensu, quòd pendeat à virtute mentis, ut sit in entibus, concedo... Eo sensu, quòd solâ virtute mentis detegatur in entibus, aut solâ ratione deprehendi possit, nego. Distingue pariter minorem, &c.. Distinctio modalis & distinctio formalis, vocari potuerunt virtuales, eo sensu, quòd solâ virtute mentis detegi possint; non autem eo sensu, quòd pendeant à virtute mentis humanæ, ut sint in ipsis entibus: pariter vocari potuerunt distinctiones rationis, aut forsan ex eo quòd modificationes dici possint rationes; nullatenus autem eo sensu, quòd pendeant à ratione humanâ, ut existant in ipsis entibus.

Instabis. Nisi distinctio modalis & distinctio formalis, dictæ fuissent virtuales & rationis eo sensu, quòd in solo intellectu

CIRCA APPREHENSIONEM. 167
resideant, modificationes vocari possunt
entia: atqui modificationes vocari non
possunt entia. Modi namque entium, non
sunt entia: atqui modificationes nihil
aliud sunt, quàm entium modi; ergo non
sunt entia; proindèque, &c.

Nego minorem prioris sillogismi. Ens
enim, juxtà Adversarios, idem est, ac pos-
sibile; at modificationes sunt possibiles,
quandoquidem existunt: ergo sunt entia.
Ad probationem autem distinguo major-
em. Modi entium non sunt illa entia,
quorum sunt modi, concedo. Non sunt
entia secundum se, nego. Transeat minor,
distingue pariter consequens. Reverà en-
tium modi non sunt ea entia, quorum
sunt modi: verbi gratiâ, scientia Petri,
non est Petrus. At entium modi secundum
se, sunt entia; quia habent attributa socia-
bilia: dixi autem, ad minorem transeat,
solæ namque modificationes contingentes
vocantur, modi.

Objicies, 2^o. Quæ, nemine cogitante,
identificantur cum substantiâ, nec ab ipsâ,
nec inter se positivè distinguuntur: atqui
modificationes identificantur cum substan-
tiâ: verbi gratiâ, doctrina Petri nihil aliud
est, quàm Petrus, ut doctus; ergo, &c.

Nego minorem. Species enim essentialiter
diversæ à substantiâ, non identificantur.

feu non sunt quid idem cum substantiâ : atqui modificationes , sunt species entis essentialiter diversæ à substantiâ , siquidem includunt in idæis suis inhærentiam ; & substantia excludit ab idæâ suâ inhærentiam. Ad id autem quod additur , nego scientiam Petri esse Petrum , ut doctum ; alioqui quando diceretur , doctrina inhæret Petro , sensus esset , Petrus , ut doctus , inhæret Petro : quod est absurdum ; proindeque , &c.

Intabis. Attributa Divina , sunt modificationes substantiæ Divinæ : atqui attributa Divina identificantur cum substantiâ Divinâ ; quidquid enim est in Deo , Deus est , ut loquuntur Patres & Doctores ; ergo , &c.

Nego minorem. Si enim attributa Divina identificarentur cum substantiâ Divinâ , non deberent ab Adversariis diversimodè definiri , non deberent ab ipsis distribui in absoluta & relativa. Præterea quando diceretur , Deus est justus , Deus est æternus , &c. sensus esset , Deus est Deus , Deus est Deus ; quod nugatorium esset & absurdum. Ad id autem quod additur , quidquid in Deo est , Deus est , respondeo hoc quidem verum esse , eo sensu , quod soli Deo competat , saltem dum agitur de attributis specificis & propriis ;

non autem eo sensu, quòd quidquid in-
hæret Deo, sit ipsa substantia Divina, alio.
qui attributa Dei non dicerentur à Patri-
bus numero infinita, quia substantia Di-
vina unica est. Quando igitur afferuntur
hæ propositiones. . . *Deus est summa veri-
tas, Deus est summa bonitas*; sensus est,
summam veritatem & summam bonita-
tem, soli Deo convenire.

Objicies denique. Distinctio formalis,
positiva non est, si oriatur ab infirmitate
intellectûs humani, quòd varias distin-
guat modificationes in aliquâ substantiâ:
atqui reipsâ, hoc oritur ab infirmitate in-
tellectûs humani; in quantum propter suam
finitudinem, seu limitationem, cogitur
substantiam, quasi per partes, apprehen-
dere; cum non possit eam totam simul at-
tingere; ergo, &c.

Nego minorem. 1°. Namque, si hoc
oriatur ab infirmitate intellectûs humani,
ille intellectus dicendus esset firmior, qui
paucas, aut nullas ejusmodi modificatio-
nes detegeret: quod est absurdum. 2°. Si
hoc oriatur ab infirmitate intellectûs hu-
mani, huic infirmati mederi deberent Ad-
versarii; non autem eam fovere & augere,
afferendo diversas definitiones ejusmodi
modificationum. 3°. Oritur quidem ab
infirmitate intellectûs humani, quòd alie

quas tantum modificationes objectorum, & quidem successivè apprehendat; sed intellectus humanus dicendus non est infirmior, ex eo quod multas apprehendat; quia, quo plures apprehendit, eo plures habet cognitiones. 4°. Si modificationes ejusdem substantiæ reipsâ non sint distinctæ, cur asserunt Adversarii, reperiri fundamentum ejusmodi distinctionis? 5°. Pugnancia loquuntur Adversarii, dum asserunt, intellectum humanum cogi ad substantiam, quasi per partes apprehendendam, ex eo quod ipsam totam simul attingere non possit: enim verò, si substantia sit totum quoddam, necesse est ut habeat partes positivas. 6°. Denique nullo motivo firmo & laudabili nituntur Adversarii, dum contendunt nullam esse positivam distinctionem, inter ejusdem substantiæ modificationes: quod ut clariùs innotescat, sit,

De signo diversitatis, & similitudinis entium.

Qui docent distinctionem modalem & distinctionem formalem, non esse positivas, non parùm laborant, in assignando motivo distinctionis positivæ entium. Alii namque dicunt, separationem esse ejus-

CIRCA APPREHENSIONEM. 165
modi signum, & motivum; alii verò, separabilitatem; quia verò de fide est, tres esse personas Divinas positivè distinctas, quamvis sint à se invicem inseparabiles: ideò præter separabilitatem, hoc aliud addunt distinctionis positivæ signum, *quando unum est alterius principium*: sic opinantur Thomistæ.

Conclusio prima.

Diversitas & similitudo nostrarum idæarum, sunt signa certissima diversitatis & similitudinis entium, ut in se sunt. Ea namque sunt signa certissima diversitatis & similitudinis entium, ut in se sunt, quæ sunt unicum motivum, quo quis philosophicè judicare possit, de diversitate & similitudine entium, ut in se sunt: atqui idææ nostræ sunt ejusmodi unicum motivum: nam quinque tantum sunt motiva diversa judiciorum nostrorum de entibus, ut in se sunt; scilicet, *cupiditas, testimonium aliorum hominum, relatio nostrorum sensuum, fides Divina, & idæarum nostrarum intuitus*; ut constet ex eo, quòd nullum aliud ab Adversariis afferri potuerit: atqui quatuor priora dici non possunt motiva judiciorum philosophicorum, sicut fatentur Adversarii; ergo solæ idææ nostræ, sunt motiva judiciorum philoso-

phicorum; & consequenter, ea dicenda sunt in se positivè diversa, quæ diversis repræsentantur idæis; ea verò positivè similia, quæ similibus idæis exhibentur; ergo, &c.

Et certè quemadmodum ex diversitate tabellarum ritè depictarum, certò judicamus de diversitate objectorum, ut in se sunt, & ex earum similitudine, certò judicamus de objectorum similitudine, (si tamen sint multa;) sic ex diversitate & similitudinestrarum idæarum, certò judicare possumus de diversitate & similitudine entium, ut in se sunt; præsertim cum in hunc tantum finem, nobis à Deo fuerint concessæ; proindèque, &c.

Per hanc conclusionem, demonstrare juvat, duas postremas conclusiones superius positas, ubi de variis distinctionis speciebus & quidem hoc modo... Ea positivè distinguuntur, quæ sunt entia positivè diversa; diversitas enim positiva, connotat essentialiter distinctionem positivam: atqui substantia & modificatio (idem sit judicium de modificationibus) sunt entia positivè diversa. Ea namque sunt entia positivè diversa, quæ diversis exhibentur idæis, & diversimodè definiuntur ab Adversariis; fieri namque non potest, ut diversæ sint repræsentationes,

quin diversa sint repræsentata : nec definitiones possunt esse diversæ , quin diversa sint explicata : atqui *substantia & modificatio* diversis exhibentur idæis , quandoquidem dicuntur ab Adversariis , entia per mentem diversa ; & aliundè diversis definitionibus , ab ipsis explicantur ; proindeque , &c.

Objectiones.

Objicies. 1^o. Si diversitas idæarum notarum , certissimum esset motivum diversitatis entium , ut in se sunt ; ens idem non posset diversis idæis exhiberi : atqui tamen idem ens diversis idæis exhiberi potest : verbi gratiâ , Deus diversis repræsentatur idæis , scilicet modò , ut summè justus , modò , ut omnipotens , &c. ergo , &c.

Distinguo majorem. Ens idem non posset diversis idæis totalibus repræsentari , concedo. Diversis idæis partialibus , nego. Distingue pariter minorem , & nega consequentiam. Dictum fuit quid sint idææ totales* , & partiales. Reverâ , &c. ●

Instabis. Idem ens diversis idæis totalibus exhiberi potest , si unaquæque idæa sit totalis : atqui unaquæque idæa totalis est , quandoquidem in se continet alias idæas ; ergo , &c.

Distinguo majorem. Si unaquæque idæa

fit totalis, per ordinem ad totum, cujus est idæa partialis, concedo. Per ordinem, ad alias quas in se continet, nego. Distingue pariter minorem, & nega consequentiam. Itaque idæa, verbi gratiâ, æternitatis Divinæ, totalis quidem est, respectu aliarum partium essentialium, quas ipsa complectitur, nempe respectu sui generis, & suæ differentiæ; at partialis est, respectu ipsius Dei; est enim tantum ejus pars. Reverâ, &c.

Objicies. 2^o. Non magis diversitas idæarum est signum certum diversitatis entium, ut in se sunt; quàm distinctio & separatio idæarum, sunt signa certa distinctionis & separationis entium: atqui distinctio & separatio idæarum, non sunt signa certa distinctionis & separationis entium: nam, verbi gratiâ, ex eo quòd dentur centum idææ Dei, in centum hominibus, non sequitur centum esse Deos, aut separatos, aut distinctos; ergo, &c.

Nego majorem. Disparitas est, quia distinctio & separatio idæarum pendent à Deo, liberè multiplicante substantias spirituales, quibus distinctas, aut separatas, ejusdem entis concedit idæas: at verò, quoniam quælibet idæa essentialiter conformis est objecto repræsentato; ideò fieri non potest, ut diversæ sint repræsentationes

CIRCA APPREHENSIONEM. 169
nes ejusdem objecti , sub eodem respectu
considerati.

Objicies denique. Similitudo idæarum
dici non potest signum certissimum simili-
tudinis entium , ut in se sunt ; si idem ens,
sub eodem respectu consideratum , simili-
bus idæis repræsentari possit : atqui res sic
se habet. Nam in Petro , Paulo , cæterisque
naturæ humanæ individuis , similes sunt
Divinitatis idææ ; & tamen est eadem nu-
mero Divinitas ; ergo , &c.

Distinguo majorem. Si non præsuppo-
natur entium facta multiplicatio , con-
cedo. Si multiplicatio illa præsupponatur
facta , nego. Itaque , quando similitudo
idæarum , dicitur signum certissimum simi-
litudinis entium , ut in se sunt , præsup-
ponitur entium illorum multitudo. Cùm
enim entium multitudo pendeat à causâ ,
liberè agente , & nullum esse possit signum
philosophicè certum , illius multiplicatio-
nis factæ ; idèd præsupponi debet illa mul-
tiplicatio facta.

Conclusio secunda.

Separabilitas , nec est unicum , nec pri-
marium distinctionis positivæ signum ,
etiam dum agitur de entibus creatis.

1°. Quidem non est unicum distinctio-
nis positivæ signum. Si enim in entibus

Tomus I.

H

creatis reperiantur inseparabilia positivè distincta, profectò separabilitas non est unicum distinctionis positivæ signum, vel dum agitur de entibus creatis: atqui res sic se habet. Sint enim in exemplum, genus & differentia circuli, quæ agnoscuntur ab Adversariis, inseparabilia: atqui genus & differentia circuli, positivè distinguuntur, seu sunt entia positivè multa. Quæ enim sunt entia positivè diversa, sunt entia positivè multa; diversitas enim positiva, distinctionem positivam importat: atqui genus & differentia circuli, sunt diversa positivè entia. Quæ enim sunt diversa positivè vera, sunt diversa positivè entia; ens enim & verum, dicuntur ab Adversariis reciprocari posse; atqui genus & differentia circuli, sunt diversa positivè vera. Quæ enim sunt diversa positivè intelligibilia, sunt diversa positivè vera; verum enim & intelligibile, dicuntur pariter ab Adversariis reciprocabilia: atqui genus & differentia circuli, sunt diversa positivè intelligibilia. Quæ enim positivè diversimodè intelliguntur, sunt diversa positivè intelligibilia; ab actu enim ad posse, valet consequentia: atqui genus & differentia circuli positivè diversimodè intelliguntur, & quidem ab ipsis Adversariis, quando-

quidem ab iis diversimodè definiuntur; ergo genus & differentia circuli, sunt diversa positivè intelligibilia; ergo sunt diversa positivè vera; ergo sunt diversa positivè entia; ergo sunt entia positivè distincta; ergo cum sint à se invicem inseparabilia, separabilitas non est unicum distinctionis positivæ signum, vel dum agitur de entibus creatis.

2^o. Separabilitas non est primarium distinctionis positivæ signum. Si enim nemo philosophicè judicare possit de ipsâ entium separabilitate, nisi suarum idæarum inventu; profectò separabilitas non est primarium distinctionis positivæ signum: atqui res sic se habet. Eatenùs enim potest quis philosophicè judicare de entium mutuâ separabilitate, quatenùs in eorum idæis detegit *perseverantiam*, seu independen-
tiam à subjectis, quibus inhæreant; proindeque separabilitas non est primarium distinctionis positivæ signum; quamobrem, &c.

Dices. Dum agitur de entibus creatis, quæcumque sunt positivè distincta, per omnipotentiam Divinam, possunt à se invicem separari; ergo dum agitur de entibus creatis, sola separabilitas est signum certum distinctionis positivæ.

Distinguo antecedens. Si sint substantiæ

determinatæ, concedo. Si sint modificationes, nego, & nego consequentiam. Reverâ, ex entibus creatis, quæ sunt substantiæ determinatæ; possunt separari, separatimque conservari, quia sibi invicem non adhærent: at, quæ sunt modificationes, præsertim essentielles, ne divinitus quidem conservari possunt, seorsim à suis subjectis, nec proindè seorsim à se invicem, quia includunt in idæis suis inhærentiam.

*De universalibus in essendo & pradi-
cando generatim.*

Circà hæc universalia, quæritur à Philosophis, an existant extrà nos, independenter ab actione mentis humanæ, seu, ut aiunt, à parte rei? Ut quæstionem hanc solvamus.

Notandum est vocem hanc, *universale*, esse terminum concretum, qui sic resolvitur, *ens habens universalitatem*; unde duplex est difficultas. Prima, utrùm existant à parte rei, *universalia materialiter sumpta*, seu *entia habentia*? Secunda, utrùm existant à parte rei, *universalia formaliter sumpta*, seu *universalitates*? Agemus igitur primò, de universali materialiter sumpto. 2°. De universali formaliter sumpto,

De universali materialiter sumpto.

In hâc quæstione , duo perpendemus: Primum , quænam sint illa entia , quæ habent universalitatem ? Secundum , utrùm hæc entia , seu subiecta , existant à parte rei ?

Nota porrò , hoc esse vulgare effatum apud Peripateticos , *non datur scientia de singularibus* ; hinc dum inquirunt , quænam sint entia habentia universalitatem ; sensus est , quænam sint objecta scientiarum ? Hoc notato ,

Plato vulgò creditur admisisse idæas Divinas , tanquàm sola universalia materialiter sumpta ; tum ex eo , quòd solæ idææ Divinæ judicentur necessariae & immutabiles ; tum ex eo , quòd scientiarum objecta vulgò dicantur , *necessaria & immutabilia*.

Stoïci docuerunt idæas nostras formales , seu repræsentationes , esse scientiarum objecta ; & consequenter ipsas esse ea universalia materialiter sumpta , de quibus hîc agitur.

Nominales , idem cum Stoïcis opinantur ; admittunt tamen insuper , voces quasdam , tanquàm scientiarum objecta ; adeòque tanquàm universalia materialiter sumpta.

Thomistæ & Scotistæ docent entium naturas, quatenus aptas multis inesse, & de multis prædicari, ea esse universalia materialiter sumpta, quæ sint scientiarum objecta.

Dico autem 1°. Idæas Divinas non esse ea universalia in essendo & prædicando, quæ sint scientiarum objecta. Quæ enim nec insunt multis extrâ Deum positis, nec de iis prædicari possunt, non sunt ea universalia, quæ sint scientiarum objecta: atqui idææ Divinæ sic se habent; ut per se manifestum est; ergo, &c. Præterea, quando demonstrant Physici, verbi gratiâ, corpus esse divisibile, sensus non est, idæam Divinam corporis repræsentativam, esse divisibilem; proindèque, &c.

Dico 2°. Nec idæas nostras formales, nec ullas voces, esse ea universalia, quæ sint scientiarum objecta. Ea namque non sunt scientiarum objecta, de quibus non fiunt demonstrationes in quâlibet scientiâ: atqui, nec de idæis nostris formalibus, nec de ullis vocibus, fiunt demonstrationes in scientiis; nam, verbi gratiâ, quando Metaphysici demonstrant Deum esse necessariò æternum, nec sensus est idæam nostram formalem Dei repræsentativam, esse necessariò æternam; nec pariter vocem hanc, *Deus*, esse æternam; proindèque, &c.

Dices cum Nominalibus, universalia in essendo & prædicando, debent esse univoca: atqui solæ voces sunt univocæ. Univocum enim dicitur illud, quod multis convenit, secundum eandem significationem; ergo, &c.

Nego minorem. Quæcumque enim sunt similia, dici debent univoca; at multa entia sunt similia; proindèque, &c. Et distinguo hanc propositionem; univocum est illud, quod multis convenit, secundum eandem significationem, sive objectivam, sive formalem; hoc est, sive secundum simile significatum, sive secundum simile signum, concedo. Secundum eandem significationem solummodò formalem, nego. Itaque, quando vox aliqua dicitur univoca, hoc potissimum intelligendum est eò sensu, quòd significet entia similia. Ubi notabis, voces univocas, à Peripateticis vocari, *univoca univocantia*; ipsa verò entia similia significata, vocari *univoca univocata*.

Quod si Platonici & Stoïci per idæas intellexissent, objecta per eas repræsentata. Pariter si Nominales, per voces intellexissent, ipsa entia significata; omnes illi Philosophi in eadem fuissent sententiâ cum Thomistis & Scotistis.

Dico igitur 3°. naturas entium multis

communicabiles, ea esse universalia in essendo & prædicando, quæ sint scientiarum objecta. Quæ enim multis insunt, de multis prædicari possunt; & de quibus fiunt demonstrationes, dici debent ea universalia, quæ sint scientiarum objecta: atqui naturæ entium multis communicabiles, sic se habent; ut patet de naturâ corporeâ, de naturâ circuli, &c. proindeque, &c.

Colliges universalia materialiter sumpta, existere, ut aiunt, *à parte rei*, seu extrâ intellectum humanum: evidens enim est naturas entium aut existere, aut posse existere, independenter à mente humanâ.

Notandum autem est, 1°. Naturas universales dici quidem posse scientiarum objecta; at non ipsas solas esse ejusmodi objecta; dari namque potest scientia de singularibus; ut constabit ex dicendis.

Notandum 2°. Necessaria & immutabilia esse quidem scientiarum objecta; at non ipsa sola: dari namque potest scientia de contingentibus; sicut etiam alibi probabitur.

De universali formaliter sumpto.

Peripaterici quatuor postulant conditiones, ad universale formaliter sum-

CIRCA APPREHENSIONEM. 177.
tum , seu ad universalitatem , scilicet ,
unitatem , *aptitudinem* , *univocationem* , &
divisionem : consentiunt autem inter se ,
circa tres posteriores conditiones , id est ,
fatentur eas à parte rei , convenire natu-
ris : verum acriter inter se disputant , circa
unitatem. Thomistæ contendunt , ad uni-
versalitatem requiri unitatem numericam ,
seu indistinctionis ; unde cum hæc unitas
sociari non possit cum divisione & mul-
tiplicitate : docent consequenter , uni-
versale formaliter sumptum , existere non
posse à parte rei ; volunt tamen univer-
salitatem existere posse per mentem. Sco-
tistæ contendunt , ad universalitatem suf-
ficere unitatem similitudinis ; & proinde
docent universale formaliter sumptum ,
existere à parte rei.

Thomistæ & Scotistæ putant solutionem
hujus quæstionis pendere à solutione hujus
alterius ; an nempe gradus metaphysici
unius & ejusdem individui positivè distin-
guantur à se invicem. Si enim , inquiunt ,
gradus generici & specifici , positivè dis-
tinguantur à gradibus numericis , entium
naturæ poterunt esse , à parte rei , univer-
sales ; si verò positivè non distinguantur ,
impossibile est universalitatem existere à
parte rei. Has omnes quæstiones sic sol-
vimus.

Conclusio prima.

Gradus metaphysici ejusdem individui, sunt à se invicem inseparabiles. Modificationes enim, quæ seorsim & distributivè sumptæ, sunt inseparabiles à toto, cujus sunt partes, dici debent inseparabiles à se invicem, ut per se manifestum est: atqui gradus metaphysici ejusdem individui, sic se habent; sicut constare debet ex eorum definitione, ab omnibus Philosophis receptâ, quâ dicuntur attributa enti cui-dam essentialia, quorum alia sunt aliis generaliora.

Objectiones.

Objicies. 1^o. *Animalitas & rationalitas* Petri sunt gradus metaphysici ejusdem individui: atqui animalitas & rationalitas Petri, sunt à se invicem separabiles: moriente namque Petro, perit ejus animalitas; & remanet ejus rationalitas, quandoquidem remanet ejus anima rationalis; ergo, &c.

Transeat major. Nego minorem. Animalitas enim definitur ab Adversariis, principium sentiendi, seu potentia recipiendarum sensationum, occasione objectorum sensilium; rationalitas verò definitur principium, seu potentia ratiocinandi:

atqui potentia sentiendi, & potentia ratiocinandi, prout pertinent ad eandem animam rationalem, sunt à se invicem inseparabiles: potentia namque animæ, sunt ipsi essentielles. Hinc, moriente Petro, non magis perit potentia sentiendi, quàm potentia ratiocinandi. Dixi autem ad majorem, *transseat*: tum quia animalitas & rationalitas, prout à Philosophis definiuntur, non sunt gradus metaphysici Petri, sed solius animæ Petri; tum quia animalitas accipi potest pro speciali dispositione partium organicarum alicujus corporis, ob quam hoc corpus, variis motibus, variisque motuum determinationibus, dicitur aptum: hoc sensu, communis est corporibus humanis, & belluinis: evidens autem est animalitatem, hoc posteriore sensu sumptam, ne quidem esse gradum essentialem corporis, quandoquidem est corpori contingens.

Instabis probando minorem. Illi gradus sunt à se invicem separabiles, quorum unus identificatur cum animâ; alter verò cum corpore: atqui rationalitas identificatur cum animâ rationali, & animalitas cum corpore; ergo, &c.

1°. Nego minorem. Tum quia nulla modificatio identificatur cum substantiâ, cui inhæret; est enim species entis essen-

tialiter à substantiâ diversâ, tùm quia animalitas sumpta pro principio sentiendi, pertinet ad solam animam: corpus enim est incapax sentiendi. Quòd si animalitas sumatur pro speciali dispositione partium organicarum corporis, essentialiter discrepat à corpore.

2°. Contendo animalitatem, sumptam pro principio sentiendi, probari non posse gradum hominibus & brutis communem: quia probari non potest brutis inesse substantiam à materiâ diversam; sicut ostendetur in Physicâ particulari: quamobrem ubi bruta vocantur animalia, tunc animalitas accipitur pro speciali dispositione mechanicâ partium organicarum.

3°. Quamvis animalitas esset genus, respectu hominum & brutorum, & quamvis rationalitas esset homini propria, non idcirco hi gradus essent à se invicem separabiles; alioqui genus & differentia cujuslibet entis, possent à se invicem separari: quod ab Adversariis non admittitur.

Objicies. 2°. Spiritualitas & materialitas, sunt à se invicem separabiles; & tamen sunt gradus metaphysici ejusdem individui, nempe Petri; ergo, &c.

Nego secundam antecedentis partem. Nam spiritualitas pertinet ad solam animam Petri; & materialitas pertinet ad

CIRCA APPREHENSIONEM. 181
solum ipsius corpus: porro anima & corpus Petri, sunt tota valdè diversa; hinc Petrus, accuratè loquendo, nec spiritalis, nec materialis dici potest; sed dici debet totum constans ex substantiâ spiritali, & ex substantiâ materiali.

Nota igitur in Petro, verbi gratiâ, gradus metaphysicos triplicis generis distinguere posse; alios nempe pertinentes ad solam animam, quales sunt potentia sentiendi, spiritualitas, perfectitas, & possibilitas; alios pertinentes ad solum corpus, ut divisibilitas, perfectitas, &c. alios denique resultantes ex unione corporis & animæ; id est, qui positi hâc unione, ponuntur, & eâ sublatâ, tolluntur; quales sunt compositio ex corpore & animâ, personalitas, &c. Hinc si proponantur in exemplum gradus metaphysici, qui sint in homine; explorandum erit, an pertineant ad solam animam, an ad solum corpus, an ad totum resultans ex animâ & corpore?

Colliges gradus metaphysicos ejusdem individui, formaliter à se invicem distinguere; quia sunt modificationes diversæ: eodem autem modaliter distinguere à substantiâ, cui inhærent.

Secunda conclusio.

Nec divisio, nec divisibilitas requirun-

tur ad universalitatem in essendo & prædicando, generatim sumptam. Quod enim nec est essentialiter, sive universaliter, ut sic, id est, universaliter, ut universaliter; sive universaliter in essendo, & prædicando speciatim, non requiritur ad universalitatem in essendo, & prædicando generatim: atqui, nec divisio, nec divisibilitas, sunt essentielles universaliter, ut sic, nec universalibus in essendo, & prædicando speciatim.

1°. Quidem non sunt essentielles universaliter, ut sic. Si enim detur aliquod universale essentialiter immultiplicabile; profectò, nec divisio, nec divisibilitas, sunt essentielles universaliter, ut sic: atqui res sic se habet. Deus enim est universalis in causando, & est essentialiter immultiplicabilis; ergo, &c.

2°. Nec divisio, nec divisibilitas, sunt essentielles universalibus in essendo, & prædicando speciatim. Nam ad hoc sufficit, quod detur natura quædam, apta multis inesse, & de multis prædicari univocè, quæ tamen sit essentialiter immultiplicabilis: atqui datur ejusmodi natura, nempe Divina, quæ apta est inesse tribus personis Divinis, & de his est prædicabilis univocè, absque sui multiplicatione, sicut fides docet; proindeque, &c.

Conclusio tertia.

Ad universale increatum, tùm in essendo, tùm in prædicando, necessariò requiritur unitas numerica, seu indistinctionis. Nam ad universale increatum, ea requiritur unitas, quæ sociari possit cum immultiplicabilitate naturæ increatæ: atqui sola unitas numerica, seu indistinctionis, sociari potest cum immultiplicabilitate; ut patet ex ejus definitione; ergo, &c.

Conclusio quarta.

Ad universale creatum, tùm in essendo, tùm in prædicando, necessariò requiritur unitas similitudinis. Cùm enim universale creatum in essendo & prædicando, sit essentialiter multiplicabile, ut potè pendens à liberâ Dei voluntate, quantum ad existentiam, ad ipsum necessariò requiritur ea unitas, quæ sit compatibilis cum multiplicabilitate: atqui sola unitas similitudinis, compatibilis est cum multiplicabilitate; quandoquidem unitas numerica, quamlibet excludit multiplicabilitatem; ergo, &c.

Corollaria.

Primum. Universale, tùm in essendo, tùm in prædicando generatim, definiri

debet unum aptum , vel inesse multis , vel prædicari de multis univocè ; ita ut unitas generatim sumpta , conveniat utrique hæc universali generatim sumpto.

Secundum. Universale , tùm in essendo , tùm in prædicando increatum , definiri debet unum aptum , vel inesse multis , vel prædicari de multis univocè & indivisim , seu sine sui multiplicatione ; ita ut unitas numerica constituat utrumque hoc universale.

Tertium. Universale creatum , tùm in essendo , tùm in prædicando , definiri debet unum aptum , vel inesse multis , vel prædicari de multis univocè & divisim ; ita ut unitas similitudinis constituat utrumque hoc universale.

Conclusio quinta.

Universale creatum formaliter sumptum , seu universalitas creata , existit positivè , seu , ut aiunt , à parte rei. Ut enim universalitas creata existat à parte rei , sufficit , si unitas similitudinis sit unitas propriè dicta ; si ipsa sola constituere possit universale creatum ; si denique positivè , seu independenter à mente , conveniat naturis creatis ; de cæteris enim conditionibus , scilicet de aptitudine , univocatione & divisione , nobiscum consentiunt

CIRCA APPREHENSIONEM. 185
Adversarii : atqui unitas similitudinis sic
se habet.

1°. Quidem unitas similitudinis , est
propriè dicta unitas ; forma namque totius
propriè dicti , ut totum est , dici debet
unitas propriè dicta : atqui unitas simili-
tudinis , est forma totius propriè dicti ;
tam enim totum multiplicabile dici debet
propriè dictum totum , quàm totum im-
multiplicabile , quandoquidem sunt duæ
species propriè dictæ totius universum ;
ergo unitas similitudinis , est propriè dicta
unitas.

2°. Sola unitas similitudinis constituere
potest universale creatum. Universale nam-
que creatum , essentialiter est multiplica-
bile : atqui sola unitas similitudinis consti-
tuere potest id , quod essentialiter est mul-
tiplicabile. Nam duplex tantum est species
unitatis , nimirum unitas indistinctionis ,
seu numerica , & unitas similitudinis ;
quandoquidem nihil est unum determi-
natum , quod non sit , vel immultiplica-
bile , vel multiplicabile : atqui unitas in-
distinctionis constituere non potest id ,
quod est essentialiter multiplicabile , cum
excludat ab idæâ suâ multiplicabilitatem ;
ergo sola unitas similitudinis sociari po-
test cum multiplicabilitate ; ergo ipsa sola
constituere potest universale creatum.

3°. Denique, unitas similitudinis positivè, seu independenter à mente, convenit naturis creatis. Ad hoc enim sufficit, quod natura, verbi gratiâ, humana, independenter à nostrâ cogitatione, similis sit in suis individuis; & natura circuli similis sit in hoc, vel illo circulo: atqui res sic se habet. Tam enim natura humana similis est in suis individuis, independenter à mente nostrâ; quàm natura trianguli & natura circuli diversæ sunt, independenter à mente; ergo, &c. proindèque, &c.

Et certè, nemine cogitante, quinque sunt apud nos vocales, *a, e, i, o, u*; ergo, nemine cogitante, quælibet est una: præterea, nemine cogitante, quælibet ex his vocalibus, est multiplicabilis; imò valdè multiplicatur in omnibus libris; tum latinè, tum gallicè scriptis; ergo, nemine cogitante, existit aliquid unum; simul & multiplicabile; ergo nihil impedit quominus universale creatum formaliter sumptum, existat à parte rei.

Objectiones.

Obicies, 1°. Natura, quæ à parte rei una est, unitate indistinctionis, non est à parte rei una, simul & multiplicabilis: atqui quælibet natura creata, una est à parte

CIRCA APPREHENSIONEM. 187
rei, unitate indistinctionis. Natura namque inseparabilis, à gradu individuante, seu à gradu numerico, una est unitate indistinctionis: atqui natura, quælibet creata, inseparabilis est à gradu numerico; quandoquidem ex nobis, gradus metaphysici ejusdem totius, sunt à se invicem inseparabiles; ergo, &c.

Nego minorem prioris sillogismi. Natura namque similis in multis, dici non potest una, unitate indistinctionis: atqui natura creata similis est in multis, aut existentibus, aut merè possibilibus; proindeque, &c. Ad probationem autem nego majorem. Non magis enim natura inseparabilis à gradu numerico, dici potest una, unitate numerica; quàm natura inseparabilis à gradu specifico, dici potest specifica: atqui natura inseparabilis à gradu specifico, nimirum natura generica, dici non potest specifica, seu differentialis: ergo pariter natura inseparabilis à gradu numerico, non idcirco dici potest una, unitate numerica. Hinc natura, verbi gratiâ, Petri, est quidem una, unitate numericâ, quia Petrus non potest esse multiplex homo; sed natura humana, quæ est in Petro, seu quæ est pars Petri, dici non potest una, unitate numericâ, quia est essentialiter multiplicabilis, non qui-

dem in Petro, sed in aliis individuis.

Objicies. 2°. Tunc tantum natura dici potest universalis formaliter, quando præscindit à gradibus ipsam multiplicantibus: atqui per mentem tantum, natura præscindit à gradibus ipsam multiplicantibus. Nam ibi tantum natura præscindit, ubi reperiri potest præscisio: atqui in solo intellectu reperiri potest præscisio, quandoquidem est actus facultatis cognoscentis; ergo, &c.

Nego minorem prioris syllogismi. Ibi namque natura præscindit à gradibus ipsam multiplicantibus, ubi est inseparabilis ab ipsis, & eos non includit, tanquam partes suas essentielles: atqui natura creata à parte rei, est inseparabilis à gradibus ipsam multiplicantibus, & hos non includit, tanquam partes suas essentielles; sicut constat ex dictis, ubi exposuimus quid sit præscisio. Ad probationem autem distinguo majorem. Ubi reperitur præscisio formalis, vel activa, vel objectiva, seu passiva, concedo. Formalis tantum, nego. Distingue pariter minorem, & nega consequentiam. Præscisio formalis, seu activa, est actus intellectus apprehendens unum ens, & prout ab alio inseparabile, & prout ipsum non includens in idæâ suâ. Præscisio objectiva, seu pas-

CIRCA APPREHENSIONEM. 189
siva est, non inclusio unius in alio, à quo
tamen hoc est inseparabile: Reverâ, &c.

Objicies. 3^o. Si natura, verbi gratiâ,
spiritualis esset à parte rei una, unitate
similitudinis, Deus & anima rationalis
essent à parte rei, spiritus similes: atqui
Deus & anima rationalis, non sunt à parte
rei, spiritus similes; ergo, &c.

Distinguo majorem... Deus & anima
rationalis essent à parte rei, spiritus simi-
les, quantum ad attributa spiritui essen-
tialia, concedo, Quantum ad differentias,
naturam spiritualem contrahentes, nego,
Distingue pariter minorem, & nega con-
sequentiam. Porro Deus & anima ratio-
nalis, non sunt quidem spiritus, à parte
rei similes, quantum ad differentias, na-
turam spiritualem contrahentes; quia ne-
cessitas existendi, contrahens & determi-
nans naturam spiritualem, ut sit pars Dei,
valdè diversa est à gradu contrahente &
determinante naturam spiritualem, ut sit
pars animæ rationalis; sed Deus & anima
rationalis, sunt spiritus à parte rei similes,
quantum ad attributa naturæ spirituali es-
sentialia: quia sub hoc respectu, simili
modo concipiuntur & definiuntur.

Objicies denique. Ad universale crea-
rum formaliter sumptum, ea requiritur
unitas, quæ convenire possit scientiarum

objectis : atqui sola unitas indistinctionis , competere potest scientiarum objectis. Ad objectum enim cuiusvis scientiæ , requiritur , ut unicâ definitione possit definiri : atqui , nisi hoc objectum habeat unitatem indistinctionis , non poterit unicâ definitione definiri ; sed totuplex afferenda erit definitio , quotuplex erit objectum simile , seu multiplicatum ; ergo , &c.

Nego minorem prioris sillogismi , ob rationes allatas in probatione. Ad probationem autem hujus minoris , nego etiam minorem. Si enim natura creata singularis definiri non possit , ut singularis , si prætereâ naturæ singulares , in Adversariorum principiis , non sint scientiarum objecta ; profectò scientiæ cuiusvis objectum non debet habere unitatem indistinctionis : atqui res sic se habet : tùm quia probabitur postea , individua ejusdem naturæ non differre à se invicem : tùm quia docent Adversarii , non dari scientiam de singularibus , ut singularia sunt ; solæ igitur naturæ creatæ , prout similes , definiri possunt , & sub hoc respectu , sunt scientiarum objecta.

De universalibus in essendo & predicando speciatim.

Priusquàm solvantur quæstiones , quæ

CIRCA APPREHENSIONEM. 191
solent agitari circa universalia in essendo
& prædicando speciatim; duæ aliæ gene-
rales proponi solent. Prima, quænam sit
legitima horum universalium distributio?
Secunda, an *universale* sit genus, respectu
suorum inferiorum?

Conclusio prima.

Universalia in essendo & prædicando;
ritè distribuuntur primario, in essentialia
& contingentia. Illa namque distributio
dici debet primaria, quæ fit in inferiora,
proximè & immediatè subjecta: atqui
essentiale & *contingens*, immediatè subja-
cent universalibus, in essendo & prædi-
cando; ut constare debet ex eo, quòd
nulla possint assignari inferiora, ipsis im-
mediatius subjecta; ergo, &c.

Conclusio secunda.

Universalia in essendo & prædicando;
secundariò ritè distribuuntur, in genus,
differentiam, speciem, proprium & acci-
dens. Si enim quæcumque sunt univer-
salia, sive in essendo, sive in prædicando,
revocari possint ad has quinque species;
legitima est hæc secundaria distributio:
atqui res sic se habet. Quidquid enim vel
multis inest, vel de multis prædicari po-
test univocè, aut essentialiter, aut con-

ringenter inest, aut prædicatur. Si essentialiter; vel est pars communior essentia communis, & dicitur *genus*; vel est pars strictior eorum essentia communis, & dicitur *differentia*; vel est tota eorum communis essentia, & est *species*; vel est attributum fluens à gradu differentiali, & est *proprium*. Si contingenter, vocari potest *accidens*; proindeque, &c.

Objectiones,

Objicies. 1°. Tot sunt universalia in prædicando, quot sunt prædicata diversa: atqui longè plura sunt, quàm quinque prædicata diversa. Nam in Deo, verbi gratiâ, infinita sunt prædicata diversa; ergo, &c.

Distinguo majorem. Quot sunt prædicata diversa, quantum ad prædicandi modum, concedo. Diversa, quantum ad suas naturas, nego. Distingue pariter minorem, & nega consequentiam. Porro sunt quidem longè plura, quàm quinque prædicata diversa, quantum ad naturas suas; quia sunt infinitæ partes diversæ in objecto quovis: at plura non sunt, quàm quinque prædicata diversa, quantum ad modum prædicandi. Hinc omnes Dei perfectiones, quantumvis à se invicem diversæ, ratione suarum essentiarum, eodem tamen

tamen modo de Deo prædicantur, scilicet tanquàm ejus proprietates.

Objicies. 2^o. Posito quòd *species* non differat à genere, malè numerantur quinque universalialia in prædicando: atqui *species* non differt à genere. Quod enim est solummodò pars communior essentiae, non differt à genere: atqui *species* est solummodò pars communior essentiae: verbi gratiâ, natura humana, quæ est *species*, est tantummodò pars communior essentiae Petri; ergo, &c.

Nego minorem, ut constat ex diversis definitionibus generis & speciei. Ad probationem autem distinguo majorem. Quod est solummodò pars communior essentiae communis, non differt à genere, concedo. Essentiae singularis, nego. Distingue pariter minorem, & nega consequentiam. Essentia communis, dicitur ea, quæ multis est communicabilis; singularis verò, quæ multis est incommunicabilis. Reverâ, &c.

Objicies denique. Modò accidens non differat à genere, malè numerantur quinque universalialia, in prædicando: atqui accidens non differt à genere. Nam, verbi gratiâ, color est accidens: at color non differt à genere; prædicatur enim de albedine, nigredine, &c. tanquàm pars

194 CONCERTATIONES
communior harum specierum essentia; ergo, &c.

Nego minorem. Ad probationem autem distinguo majorem. Color est accidens, respectu suorum subje&torum, concedo. Respectu suorum inferiorum, verbi gratia, respectu suarum specierum, nego. Itaque, *color* spectari potest, vel per ordinem ad varia subje&ta, quibus inhaeret, tanquam eorum modificatio contingens; vel per ordinem ad sua inferiora, seu per ordinem ad varias coloris species. Revera, &c.

Conclusio tertia.

Universale, verum est genus, respectu generis, differentia, speciei, proprii, & accidentis. Illud enim est verum genus, respectu suorum inferiorum, quod de iis praedicari potest univocè, tanquam pars communior eorum essentia communis: atqui *universale* sic se habet, respectu quinque universalium mox enumeratorum. 1°. Quidem illis convenit univocè. Dum enim illa singula dicuntur *universalia*; sensus est, unumquodque ex illis esse quid aptum, aut inesse multis, aut praedicari de multis univocè; ergo, &c. 2°. Convenit illis, tanquam pars communior eorum essentia communis. Non tan-

tum enim unum quodque eorum, est unum aptum, &c. sed insuper habet differentiam, per quam à cæteris discrepat: scilicet, genus habet, quòd sit pars communior essentiae communis; differentia habet, quòd sit pars strictior ejusdem essentiae; species, quòd sit tota communis essentia; proprium, quòd sit attributum fluens à gradu differentiali; & accidens, quòd sit attributum contingens; ergo, &c. proindeque, &c.

Dices. Si *universale* esset genus, respectu quinque suprà dictorum universalium; genus, differentia, proprium & accidens, essent species: atqui non sunt species; ergo, &c.

Distinguo majorem. Essent species, per ordinem ad universale, ut sic, concedo. Per ordinem ad inferiora, de quibus sunt prædicabilia, nego. Distingue pariter minorem, & nega consequentiam. Quemadmodum igitur, *substantia* species est, respectu entis universim, & verum genus, respectu spiritûs & corporis; sic quatuor suprà dicta universalia, sunt species, respectu universalis, ut sic; sed non sunt species, respectu inferiorum, de quibus sunt prædicabilia; quia non sunt tota communis essentia horum inferiorum.

His generaliter præmissis, nunc agen-

196 C O N C E R T A T I O N E S
dum est de singulis speciatim universalibus. Sit itaque.

De genere.

Circà genus , quatuor inquiruntur à Philosophis. Primum , an *ens* sit genus , respectu suorum omnium inferiorum ? Secundum , an genus aliquod includat in idæâ suâ inferiora sibi subjecta ? Tertium , an genus includatur in suis inferioribus ? Quartum , an genus conservari possit totum in unicâ ipsius specie ? Ut solvantur hæc dubia , sint ,

Conclusio prima.

Ens est genus verum , respectu suorum omnium inferiorum. Quod enim univocè convenit omnibus suis inferioribus , tanquàm communior pars eorum essentiæ communis , dici debet verum genus , eorum respectu : atqui ens sic se habet. 1°. Quidem univocè convenit omnibus suis inferioribus. Nam substantia & modificatio , sunt entis inferiora : atqui ens univocè convenit substantiæ & modificationi. Ubi namque dicitur , *substantia est ens* ; sensus est , substantia habet attributa sociabilia : pariter ubi dicitur , *modificatio est ens* , sensus est ; modificatio habet attributa sociabilia ; ergo , &c. 2°. Ens conve-

CIRCA APPREHENSIONEM. 197
nit suis inferioribus, tanquam pars communior eorum essentiæ communis. Præterquam quod enim substantia & modificatio sunt possibiles, habent insuper differentias, quibus à se invicem discrepant; scilicet, substantia habet, *perseïtatem*; modificatio verò, *inalietatem*; ergo, &c. proindeque, &c.

Objectiones.

Objicies. 1^o. Quod includitur in differentiis sui distributivis, non est genus, respectu suorum inferiorum; atqui ens includitur in differentiis sui distributivis, hoc est, in perseïtate & in inalietate. Dici namque potest, perseïtas est ens, inalietas est ens; ergo, &c.

Nego majorem. Ut enim aliquod universale dicatur genus, respectu suorum inferiorum, nullatenus requiritur, ut in iis non includatur; sed requiritur tantum, ut ea non includat in idæâ suâ: nam, verbi gratiâ, quamvis genera includantur in suis speciebus, quarum sunt partes communes; non idcirco desinunt esse genera, respectu harum specierum: quamvis igitur ens includatur in idæis differentiarum sui distributarum, hoc non impedit quominus sit genus, respectu suorum omnium inferiorum.

Instabis. 1°. Exindè sequeretur, differentias entis distributivas, esse species simul & differentias: atqui hoc repugnat; ergo, &c.

Distinguo sequelam. Esse species simul & differentias, sub diverso respectu, concedo. Sub eodem respectu, nego. Distingue pariter minorem, & nega consequentiam. Absurdum quidem est, aliquid esse speciem simul & differentiam, sub eodem respectu; quia tunc esset simul tota essentia communis, & pars tantum hujus essentiae; sed absurdum non est, aliquid esse speciem simul & differentiam sub diverso respectu; verbi gratiâ, absurdum non est, perfectiorem esse differentiam, respectu substantiae, & speciem, respectu entis.

Instabis. 2°. Est de ratione differentiarum generis distributarum, ut una non possit esse species opposita ei speciei, quam constituit: atqui tamen in nostrâ sententiâ, una differentia generis distributiva, esset species opposita ei speciei, quam constituit; si quidem perfectior, quæ constituit substantiam, esset species opposita substantiae, seu esset modificatio; ergo, &c.

Distinguo majorem. Est de ratione differentiarum generis subalterni distributarum, concedo. Generis supremi, nego.

Reverâ, dum agitur de generibus subalternis, una differentia non potest esse species opposita ei speciei, quam constituit; quia differentia illa non est species illius generis, quod distribuitur: at dum agitur de differentiâ generis supremi distributiva, necesse est, ut una differentia sit species opposita ei speciei, quam constituit; quia necesse est, ut sit modificatio.

Objicies. 2°. Nullum genus includit in idæâ suâ speciem sibi subjectam, ut mox probabitur: atqui ens includit in idæâ suâ speciem sibi subjectam; nam modificatio, est species entis: atqui ens includit in idæâ suâ modificationem. Quod enim includit in idæâ suâ *possibilitatem*, includit in idæâ suâ modificationem: atqui ens includit in idæâ suâ possibilitatem, seu sociabilitatem attributorum, ut potè sibi essentialem; ergo, &c.

Nego minorem duorum priorum sillogismorum; quia pars non includit in idæâ suâ totum, cujus est pars. Ad probationem autem posterioris minoris, nego majorem. Quod enim includit in idæâ suâ aliquid indeterminatum, & omnibus speciebus commune, non includit in idæâ suâ modificationem, quæ est species entis determinata: atqui, quod includit in idæâ suâ possibilitatem, includit aliquid indeter-

minatum & omnibus speciebus commune ; ergo, quod includit in idæâ suâ possibilitatem, non includit in idæâ suâ modificationem ; ergo, &c.

Instabis. Quod includit in idæâ suâ ens in alio, includit in idæâ suâ modificationem : atqui, quod includit in idæâ suâ possibilitatem, includit in idæâ suâ ens in alio ; ergo, quod includit in idæâ suâ possibilitatem, includit in idæâ suâ modificationem.

Distinguo majorem. Quod includit in idæâ suâ ens in alio determinato, includit in idæâ suâ modificationem, concedo. Quod includit in idæâ suâ ens in alio indeterminato, & omnibus communi, nego. Distingue pariter minorem, & nega consequentiam. Reverâ, quod includit in idæâ suâ ens in alio determinato, includit in idæâ suâ modificationem ; quia quidquid inhæret alteri determinato, determinatum est, & consequenter est modificatio : at quod includit in idæâ suâ ens in alio indeterminato, non idcirco includit in idæâ suâ modificationem, seu ens determinatum : porro, quod includit in idæâ suâ possibilitatem, includit quidem ens in alio indeterminato, & omnibus communi ; quia ipsum ens, est quid indeterminatum ; sed quod includit in

idæâ suâ possibilitatem , non idcò includit in idæâ suâ ens in alio determinato ; proindeque , &c. Quemadmodum igitur ens , seu possibile , neque est substantia , neque modificatio ; sed est pars communis harum specierum ; sic possibilitas , neque est substantia , neque modificatio , sed est harum specierum pars communis.

Objicies denique. Illud non est genus , respectu suorum inferiorum , in quo hæc inferiora differunt : atqui entis inferiora differunt à se invicem , in ente generatim sumpto : differunt enim in suis differentiis , & differentiæ sunt entia ; ergo differunt in ente ; ergo , &c.

Nego minorem , & ad probationem respondeo , sillogismum non esse in formâ legitimâ : *ens* enim sumitur universalissimè , seu secundum totam suam extensionem in conclusione ; & sumitur particulariter in antecedente : quod fieri non debet , sicut constabit ex dicendis in tertiâ parte. Ut igitur legitima foret allati sillogismi dispositio , minor propositio sic fuisset enuntianda : atqui hæc differentiæ sunt ens quodlibet ; & tunc minor fuisset apertè falsa.

Quæres autem , an ens sit univocum , respectu entis positivi , & , ut aiunt , entis rationis ? Ut respondeam ,

Nota, nomine, *entis rationis*, intelligi; vel id cujus attributa reipsâ repugnant, & tamen per errorem judicantur sociabilia; vel id cujus attributa reipsâ sunt sociabilia, & tamen per errorem judicantur infociabilia. Hoc notato,

Respondeo ens esse univocum, respectu entis positivi & entis rationis; quia nimirum utrumque est possibile; positivum quidem, tum in intellectu creato, tum extrâ intellectum creatum; ens autem rationis, in solo intellectu creato errante.

At, inquires, ens rationis est, quid impossibile; ergo non est ens.

Distinguo antecedens. Est quid impossibile extrâ intellectum creatum, concedo. In intellectu creato errante, nego: & distingo consequens; ergo non est ens positivum, concedo; ergo non est ens rationis, nego.

Conclusio secundâ.

Nullum genus includit in idæâ suâ inferiora sibi subjecta; nam species & differentia sunt inferiora generis: atqui nullum genus includit in idæâ suâ species sibi subjectas, harumque differentias. 1°. Quidem non includit in idæâ suâ species sibi subjectas. Nulla namque pars includit in idæâ suâ totum, cujus est pars: at genus quod-

libet, est pars specierum sibi subjectarum, ut constat ex ipsius definitione; ergo, &c. 2.^o. Nullum genus includit in idæâ suâ differentias specierum suarum constitutivas. Pars enim communior essentiae specierum, non includit in idæâ suâ partes harum specierum proprias: at genus est pars communior specierum, & differentiae sunt partes earum propriae; ergo, &c. proindeque, &c..

Dices. Totum includit in idæâ suâ partes suas: atqui genus est totum quoddam, & ejus inferiora sunt ipsius partes; ergo, &c.

Distinguo majorem. Totum actuale; transeat, totum potentiale, nego. Distingue pariter minorem, & nega consequentiam. Totum actuale dicitur illud, quod coalescit ex partibus ipsum componentibus: sic homo est totum actuale, prout componitur ex animâ & corpore. Totum potentiale nihil aliud est, quàm universale quoddam, sic dictum, quia in propositione plerumque tantum potest, quantum possunt ejus inferiora simul sumpta, quando scilicet accipitur pro suis omnibus inferioribus: sic *substantia*, vocatur totum potentiale, ex eo quòd in hac propositione, *omnis substantia per se subsistit*; subiectum hoc, *omnis substantia*, tantum po-

test, quantum, si ipsius loco apponerentur ejus species, dicendo *omnis spiritus & omne corpus*, &c. Reverâ, &c. Dixi autem, *transseat*; quia totum actuale includit quidem in idæâ suâ partes sibi essentielles, non autem sibi contingentes.

Nota igitur, totum quodlibet potentiale, partem esse totius actualis; & totum actuale, partem esse potentialem: verbi gratiâ, substantia, quæ est totum potentiale, respectu spiritûs & corporis, est pars actualis utriusque; spiritus autem & corpus, quæ sunt partes potentiales substantiæ, sunt tota actualia, respectu substantiæ.

Conclusio tertia.

Genus supremum includitur in omnibus suis inferioribus. Quidquid enim est essentialiter prædicabile de suis omnibus inferioribus, includitur in illis; prædicata namque essentialia includuntur in idæis suorum subjectorum: atqui genus supremum, essentialiter est prædicabile de suis omnibus inferioribus; probatum enim fuit ipsum esse genus, respectu suorum omnium inferiorum; ergo, &c.

Conclusio quarta.

Modificatio includitur in omnibus suis

CIRCA APPREHENSIONEM. 205
inferioribus. Quod enim est pars essentiæ
suorum omnium inferiorum, in his omni-
bus includitur: atqui modificatio est pars
communior essentiæ suorum omnium in-
feriorum; inferiora namque modificatio-
nis essentialiter inter se conveniunt, in
eo quod sint modificationes; ergo, &c.

Conclusio quinta.

Cætera genera, ab ente & modificatione
diversa, non includuntur in differentiis
specierum suarum constitutivis. In iis
enim non includuntur, de quibus præ-
dicari non possunt: atqui cætera genera
prædicari non possunt de differentiis spe-
cierum suarum constitutivis; quia scilicet
ejusmodi differentiæ, non sunt species il-
lorum generum; ergo, &c.

Conclusio sexta.

Genus quodlibet conservatur totum in-
tensivè, in unicâ suâ specie; sed non con-
servatur totum extensivè, in unicâ illâ spe-
cie. Conservari namque totum intensivè,
est habere totam suam essentiam; conser-
vari verò totum extensivè, est habere to-
tam suam universalitatem: atqui genus
quodlibet totam suam habet essentiam in
unicâ suâ specie; quandoquidem essentia
est indivisibilis; non retinet autem totam

suam universalitatem, in unicâ illâ specie; potest enim de aliâ specie prædicari; proindeque, &c.

De differentiâ.

Circâ differentiam, quatuor inquiruntur. 1°. An differentia inferior, seu minùs generalis, includat in idæâ suâ superiorem, seu generaliore? 2°. An sufficiat unica differentia, ad constituendam speciem? 3°. An admittendæ sint differentia negativæ? 4°. An admittendæ sint differentia numericæ? Ut. his quæstionibus fiat satis, sint,

Conclusio prima.

Differentia quævis inferior, includit in idæâ suâ inalietatem. Quidquid enim essentialiter est ens in alio, includit in idæâ suâ inalietatem: atqui quælibet differentia inferior essentialiter, est ens in alio, cum sit essentialiter modificatio; ergo, &c.

Conclusio secunda.

Nulla differentia inferior includit in idæâ suâ differentias superiores, ab inalietate diversas. Ut enim differentia inferior includeret in idæâ suâ differentiam superiorem, ab inalietate diversam, deberet esse species generis subalterni, à modifi-

catione diversi: atqui differentia inferior non potest esse species generum subalternorum, à modificatione diversorum; ut patet ex eo, quòd ejusmodi genera prædicari non possint de differentiis inferioribus; ergo, &c.

Dices cum quibusdam Peripateticis: *Visivitas*, est differentia inferior, respectu *sensitivitatis*; & *fissipedalitas*, est differentia inferior, respectu *pedalitat*is: atqui visivitas includit in idæâ suâ sensitivitatem, cum intelligi non possit, absque sensitivitate; & fissipedalitas includit in idæâ suâ pedalitatem, ob eandem rationem; ergo, &c.

Nego minorem, ob rationes allatas in probatione. Visivitas quidem & fissipedalitas, includunt in idæis suis differentias superiores, si spectentur ut species; sed eas non includunt, si spectentur ut differentia. Difficultas igitur, orta fuit, ex eo quòd visivitas & fissipedalitas exprimantur iisdem terminis; siue sumantur pro speciebus, siue sumantur pro differentiis.

Conclusio tertia.

Ad constituendas species propriè dictas, sufficit unica differentia essentialis. In iis enim speciebus, sufficit unica differentia

essentialis, in quibus sufficit unicus gradus, determinans genus, distinguens speciem ab aliâ quâvis, & qui sit fons, & radix omnium ejus proprietatum; ut enim constituatur species propriè dicta, sufficiunt duæ partes essentielles, communior scilicet & strictior: atqui in speciebus propriè dictis, reipsâ sufficit unicus gradus, ut genus determinetur & contrahatur; ut una species discrepet ab aliis, & ut adsit fons & origo proprietatum: unicus enim gradus hæc omnia præstare potest; ergo, &c.

Dices. Anima rationalis, est species propriè dicta: atqui ad ipsam constituentem, non sufficit unica differentia; ut constare debet ex eo, quòd in ejus definitione duæ enuntientur differentie; definitur enim spiritus contingens, incompletus; ergo, &c.

Nego majorem (quæ est secunda propositio in objectionem). Si enim in definitione animæ rationalis, apponantur duo termini, pro ipsius differentiâ; hoc oritur, vel ex eo quòd desit vox significans contingentiam simul & rationem incompleti; vel potius ex eo quòd genuina animæ rationalis differentia ignoretur. Hanc genuinam differentiam inquiremus in Metaphysicâ.

Conclusio quarta.

Ad constituendam speciem improprie dictam, non sufficit unica differentia. Non sufficit enim unica differentia, ad eam speciem constituendam, quæ per modificationum contingentium congeriem, discrepat ab aliis speciebus: atqui species improprie dicta, per modificationum contingentium congeriem, à cæteris discrepat; ut patet, verbi gratiâ, de auto, quod non nisi, per multas simul modificationes contingentes, discrepat à cæteris corporibus, nimirum per pondus, ductilitatem, molecularum configurationem, situm, texturam, &c. proindeque, &c.

Conclusio quinta.

Quædam entia privativè tantum, à quibusdam aliis differunt. Entia enim, quæ in eo tantum ab aliis quibusdam discrepant, quod careant aliquâ modificatione, quæ aliis inest, privativè tantum ab ipsis differunt: atqui quædam entia sic se habent. Nam, verbi gratiâ, actus moraliter mali, in eo solo differunt ab actibus moraliter bonis, quod careant rectitudine debitâ; sicut probabitur in Moralibus; ergo, &c.

Dices. Quod habet gradum proprium, per quem discrepat, non privativè tan-

210 CONCERTATIONES

tum differt: atqui quodlibet ens habet gradum sibi proprium, per quem discrepat, quandoquidem habet essentiam sibi propriam; ergo nullum ens privativè tantum differt.

Distinguo majorem. Quod habet gradum proprium, per quem differt ab omnibus aliis entibus, concedo. A quibusdam tantum aliis, nego. Distingue pariter minorem, & nega consequentiam. Porro quodlibet ens habet quidem gradum, per quem differt à nonnullis aliis entibus, alioqui non esset ens; sed non semper habet gradum positivum, per quem discrepet à quibusdam aliis entibus: verbi gratiâ, actus moraliter mali, habent quidem gradum, quo differunt ab aliis modificationibus, quæ non sunt actus; sed non habent gradum positivum, quo differant ab actibus moraliter bonis; quia nihil habent positivum, quod non reperiatur in actibus bonis.

Notandum autem 1°. carentiam illam, vocari differentiam privativam, non quòd sit membrum differentiae generatim sumptæ, si quidem entis carentia non est ens; sed eo sensu, quòd entia per ejusmodi carentiam, ab aliis quibusdam discrepent.

Notandum 2°. entia dicenda non esse privativè tantum à quibusdam aliis dis-

CIRCA APPREHENSIONEM. 278
crepantia, nisi fiat attentio ad regulam
sequentem. Si ens habeat, aut proprietates,
aut relationes essentielles, quæ non
occurrunt in aliis quibuscumque entibus;
tunc non privativè, sed positivè discrepat:
si verò nullas ejusmodi habeat, aut
proprietates, aut relationes, & insuper
careat aliquâ modificatione, quæ sit in
aliis entibus; tunc privativè tantum ab iis
discrepat.

Conclusio sexta.

Gradus numerici dici non debent *differentia numerica*. Posito namque quòd individua ejusdem speciei, non differant à se invicem, gradus numerici dici non debent differentia; atqui individua ejusdem speciei, reipsâ non differunt à se invicem, saltem essentialiter. Quæ enim similibus idæis exhibentur, & simili modo definiuntur, non differunt à se invicem, saltem essentialiter: atqui individua ejusdem speciei, similibus exhibentur idæis, & simili modo, vel ab Adversariis definiuntur; ergo, &c.

De specie.

Circâ speciem, sequentes instituuntur quæstiones.

Quæres igitur 1°. An species sit univers-

salis , prout dicit ordinem ad genus , cui subjacet ? an autem , prout dicit ordinem , ad inferiora sibi subiecta ?

Respondeo speciem , prout dicit ordinem ad genus , non esse universalem , quia prædicari non potest de illo genere ; ipsam autem esse universalem , per ordinem ad sua inferiora , quia de his est prædicabilis.

Quæres 2^o. an species superet genus ; an verò superetur à genere ?

Respondeo 1^o. genus superari intensivè à specie. Quod enim pauciores habet gradus essentialis diversos , quàm species , intensivè superatur à specie : atqui genus pauciores habet gradus essentialis diversos , quàm species ; ut constare debet ex eo , quòd species contineat omnes gradus essentialis generis , & insuper gradum suum differentialem , omnesque suas proprietates ; ergo , &c. Atque hinc est , quòd ens universim minùs perfectum sit , quàm substantia : substantia , minùs quàm spiritus ; & spiritus , minùs quàm ipsius species.

Respondeo 2^o. speciem superari extensivè à genere. Quòd enim minùs est generale , quàm genus , extensivè superatur à genere : atqui species minùs generalis est , quàm ipsius genus , ut per se manifestum est ; proindeque , &c.

Quæres 3^o. an species conservari possit tota, in unico suo individuo?

Respondeo, speciem conservari posse totam intensivè, in unico suo individuo; quia attributa intensiva, seu essentialia speciei, sunt à se invicem inseparabilia: ipsam verò non conservari totam extensivè, in unico individuo; quia prædicari potest de aliis individuis.

Quæres 4^o. an detur aliqua species infima?

Respondeo, multas dari species infimas. Species enim infimæ, dicuntur illæ, quæ prædicabiles sunt de solo numero distinctis, seu de similibus individuis: atqui multæ dantur ejusmodi species. Nam, verbi gratiâ, circulus, prædicabilis est de solis individuis similibus, impossibiles enim sunt circuli specie diversi: pariter *numerus binarius*, prædicabilis est de solo numero distinctis: idem dicendum est de *ternario*, *quaternario*, &c. proindeque; &c.

Quæres denique, an natura humana sit species infima, hoc est, an impossibiles sint homines, à nobis specie propriè dictâ diversi, seu à nobis essentialiter discrepantes? ut respondeam,

Notandum est, diversitatem specificam, & propriè dictam, reperiri non posse

inter corpora ; quia per solam modificationum contingentium collectionem , à se invicem differunt : hinc licet existerent homines , quidam *quadrupedes* , *alati* , *squammati* , &c. non idcirco specie propriè dictâ differrent ab hominibus nunc existentibus. Tota igitur diversitas propriè dicta , si quæ sit possibilis , esset repetenda à partibus essentialibus animæ , seu à facultatibus. Hoc notato ,

Conclusio.

Ignorant Philosophi , an natura humana sit species infima. Qui enim ignorant , an possibiles vel impossibiles sint , animæ rationales , à nostris specie propriè dictâ diversæ ; ignorant , an natura humana sit species infima ; ut constat ex notato : atqui Philosophi id ignorant. 1°. Quidem , ignorant , an possibiles sint animæ rationales , à nostris specie propriè dictâ diversæ ; ut enim possibilitatem hanc assererent , deberent assignare gradum aliquem essentialem , per quem ejusmodi animæ differrent à nostris : atqui suprâ dictum assignare non possunt gradum , ut ipsi fatentur : ergo , &c. 2°. Ignorant , an impossibiles sint animæ rationales , à nostris specie propriè dictâ diversæ. Ut enim impossibilitatem hanc assererent ,

deberent esse certi, nostris animabus inesse facultates omnes creabiles: atqui non possunt esse certi, nostris animabus inesse facultates omnes creabiles; quando quidem nullo motivo nituntur, ut id asserant; ergo, &c. proindeque, &c.

Dices, ex nobis infinitæ sunt numero potentia, tum activæ, tum passivæ in animabus nostris; ergo impossibiles sunt animæ, quæ diversas alias habeant potentias.

Distinguo antecedens. Infinitæ sunt numero in animabus nostris potentia, tum activæ, tum passivæ, in quibusdam tantum generibus, concedo. In omni genere producibili in spiritu creato, nescio. Scilicet sunt quidem infinitæ numero potentia, tum activæ, tum passivæ, in animabus nostris, in certis quibusdam generibus, verbi gratiâ, in genere cognoscendi, volendi, recipiendi impressiones colorum, sonorum, &c. sed nescio, an animabus nostris insint omnia genera potentiarum creabilium.

De proprio.

Circâ proprium unum tantum hic inquiri potest, an nempe legitima sit distributio proprii, in quatuor modos, prout instituitur à Peripateticis?

Respondeo, distributionem illam non esse legitimam. Quæ enim dicuntur propria, primo, secundo, & tertio modo, in rei veritate sunt attributa contingentia; ut patet exemplis, quæ à Peripateticis afferuntur; hinc genuina proprii distributio, fieri debet, in primarium, & secundarium, quorum definitiones traditæ sunt.

De accidente.

Circà accidens, unicum tantùm hic inquiri potest, utrùm scilicet admittenda sint accidentia absoluta dicta, seu modificationes, quæ per miraculum conservari possint, seorsim à suis subiectis? hæc questio commodiùs solvetur in Physicâ generali.

De individuo.

Circà individuum, sequentes proponi solent quæstiones.

Quæres igitur 1°. an individuum materialiter sumptum, sit universale?

Respondeo, individuum materiale, 1°. *intentionaliter sumptum*, seu sumptum pro hoc numero individuo, non esse universale; quia, sub hoc respectu, de multis non est prædicabile: ipsum autem 2°. *intentionaliter sumptum*, esse universale; quia

quia , sub hoc respectu , de multis est prædicabile.

Quæres 2°. an individuum formaliter sumptum , sit universale ?

Respondeo individuum formale , *primò-intentionaliter sumptum* , non esse universale ; quia , sub hoc respectu , unitantum inest: ipsum verò , *sumptum secundò-intentionaliter* , esse quid universale ; quia multis inesse potest.

Quæres 3°. ad quodnam ex universalibus revocanda sint individuum materiale , & individuum formale , secundò-intentionaliter sumpta ?

Respondeo , ipsa esse revocanda ad genus ; quia multis specie diversis , vel inesse , vel de iis prædicari possunt , tanquam communiores eorum essentiaë partes.

Monitum. .

Postquam actum est de universalibus , & de individuo ; Peripatetici varias enumerant universalium proprietates , sed quæ nullius sunt momenti : quoniam tamen , inter se non consentiunt circa *prædicabilitatem* , quæ una est ex ejusmodi proprietatibus : aliis scilicet asserentibus universalia , dum prædicantur de suis inferioribus , suam amittere universalitatem ;

aliis autem docentibus universalia suam tunc retinere universalitatem; ideo, ut dirimatur hæc controversia, sit,

Conclusio.

Universalia remanent universalia, dum prædicantur de suis inferioribus. Quæ enim essentialiter sunt universalia, suam retinent universalitatem, in quâvis hypotefi: atqui universalia sunt essentialiter universalia. Universalia namque definiuntur ab omnibus, quæ habent aptitudinem, seu potentiam, ut vel multis insint; vel ut de multis prædicentur univocè: atqui potentiæ sunt essentielles subjectis, quibus insunt; proindeque, &c.

Objectiones.

Objicies. 1°. Tunc natura non remanet universalis, quando non remanet à suis inferioribus abstracta: atqui quando natura quædam universalis, prædicatur de aliquo suo inferiore, non remanet ab ipso abstracta. Quod enim apprehenditur simul cum alio, non abstrahit ab ipso: atqui dum natura universalis prædicatur de aliquo inferiore, simul cum ipso apprehenditur; ut per se patet; ergo, &c.

Nego minorem prioris sillogismi. Quod

enim est inseparabile à gradu contrahente, & ipsum non includit in idæâ suâ, præcindit, seu abstrahit ab hoc gradu: atqui natura quælibet universalis, inseparabilis est à gradu contrahente, quandoquidem & ipsa, & gradus contrahens sunt partes essentielles ejusdem totius; aliunde verò, non includit in idæâ suâ gradum contrahentem; quia nullum superius includit in idæâ suâ, inferiora sibi subiecta; proindeque, &c. Ad probationem autem, nego majorem. Ut enim unum abstrahat ab alio, non requiritur, ut apprehendatur sine alio; sed duæ conditiones superius allatæ, sufficiunt ad abstractionem.

Objicies. 2°. Quod sumitur particulariter, non remanet universale: atqui, dum universale prædicatur de suis inferioribus, sumitur particulariter, ut probatur in tertiâ parte; ergo, &c.

Nego majorem. Ut enim aliquid sit universale, sufficit, quòd sit unum aptum prædicari de multis univocè: porro, quamvis sumatur particulariter, seu pro parte suorum inferiorum, nihilominus remanet aptum de aliis prædicari; proindeque, &c. Discrimen igitur est, inter *esse universale*, & *sumi universaliter*. Nimirum *esse universale*, est esse unum aptum, &c.

sumi verò *universaliter*, est accipi pro suis omnibus inferioribus.

Objicies denique, modò subjectum attributi propositionis, identificetur cum subjecto propositionis; universale non remanet universale, dum prædicatur de aliquo suo inferiore; hoc enim in casu sola forma prædicati, suam retinet universalitatem, adeòque solum universale in essendo, remanet universale: atqui subjectum attributi identificatur cum subjecto propositionis, verbi gratiâ, in hâc propositione... *Petrus est homo*, subjectum attributi, scilicet *ens habens*, identificatur cum Petro; dici namque potest, *ens habens humanitatem*, est quid idem cum Petro; ergo, &c.

Negò minorem. Si enim subjectum attributi identificaretur cum subjecto propositionis; sensus propositionis mox allatæ, hic esset, *Petrus est Petrus cum humanitate*: quod est absurdum. De hâc difficultate fusiùs dicetur in Concertationibus circà judicium.

De Divisionibus potentialibus, seu de Cathegoriis.

Divisio potentialis, seu cathegoria, est distributio alicujus universalis, in sua in-

CIRCA APPREHENSIONEM. 228
feriora. Circà cathedrias, duo hîc in-
quiruntur à Philosophis. Primùm, quod
conditiones requirantur, ut aliquid col-
locari possit in cathedriâ; hoc est, ut
sit membrum distributionis alicujus uni-
versalis. Secundum, quod duplex admitten-
da sit cathedria.

Quod attinet ad priorem quæstionem,
docent Peripatetici, quinque præsertim
conditiones, ad ens cathedricum requi-
ri: prima est, ut sit ens positivum; se-
cunda, ut sit ens per se; tertia, ut sit ens
incomplexum: quarta, ut sit ens com-
pletum: quinta, ut sit ens univocum:
sextam addunt nonnulli, scilicet, ut sit
ens finitum logicè, hoc est, ut non
exprimatur termino infinitante.

Hæc parùm accuratè dicta sunt. Quod-
libet enim ens determinatum, contineri
potest in cathedriâ; quandoquidem est
species generis supremi, seu entis univer-
sum.

Quod attinet ad alteram quæstionem,
notandum est, decem cathedrias à Peri-
pateticis admitti, nempe distributiones
*substantiæ, quantitatis, qualitatis, relatio-
nis, actionis, passionis, ubi, quando, sibi
& habitus*; unde hîc inquitur, an reipsâ
decem admittendæ sint ejusmodi cathed-
riæ, seu distributiones?

animæ rationalis & corporum, dici debet verum genus, eorum respectu : atqui substantia, est pars communior illorum entium essentiae : est quidem pars illorum essentiae, quia Deus, anima rationalis & corpora, *perfectatem* in idæis suis includunt. Deinde *substantia*, est pars communior eorundem essentiae ; non tantum enim illa entia habent, quod sint *substantiae* ; sed insuper habent gradus essentialis, quibus à se invicem discrepant ; proindeque, &c.

Objectiones.

Objicies. 1°. Illud non est verum genus, respectu Dei, animæ rationalis & corporum, quod Deo propriè convenit ; impropriè verò, animæ rationali & corporibus : atqui *substantia* sic se habet. Convenit quidem propriè *Deo*, ut omnes faterentur ; convenit autem impropriè animæ rationali & corporibus. Substantia namque impropriè tantum convenit iis entibus, quæ per aliud subsistunt : atqui anima rationalis & corpora, per aliud subsistunt, nempe per Deum producentem & conservantem ; ergo, &c.

Nego minorem, quantum ad posteriorem partem. Ad probationem autem, distinguo majorem. Quæ subsistunt per aliud,

tanquàm per subjectum cui inhærent; seu cujus sunt modificationes, concedo. Per aliud, tanquàm per causam, à quâ recipiunt existentiam, nego. Distingue pariter minorem, &c. Itaque hæ voces, *per se subsistunt*, significant modò independentiam, à subjecto inhætionis; quo sensu, conveniunt animæ rationali & corporibus; modò independentiam à causâ; quo sensu, soli Deo conveniunt. Reverâ, &c.

- Objicies. 2°. Quod significat aliquid necessarium in Deo, & aliquid contingens, tùm in animâ rationali, tùm in corporibus, non est univocum, nec proinde genus illorum omnium entium respectu: atqui substantia sic se habet; ergo, &c.

Nego minorem. Quod enim in Deo abstrahit ab existendi necessitate, quodque in animâ rationali & corporibus abstrahit à contingentia, nec significat in Deo aliquid necessarium, nec quid contingens in animâ rationali & corporibus: atqui substantia sic se habet. Nullum enim superius, seu generalius, includit in idæâ suâ inferiora sibi subjecta; nec proinde horum inferiorum differentias, ut probatum fuit; ergo, &c.

Instabis. Substantia, respectu Dei, vel significat aliquid necessarium, vel aliquid

contingens : atqui non significat aliquid contingens ; ergo significat aliquid necessarium.

Nego maiorem. Quod enim nec necessitatem existendi , nec contingentiam , includit in idæâ suâ , neutram , ex ejusmodi modificationibus significat : atqui substantia , nec necessitatem existendi , nec contingentiam includit in idæâ suâ , quandoquidem est aliquid generalius ejusmodi modificationibus ; proindèque , &c.

Objicies. 3°. Si substantia esset genus , respectu Dei , Deus esset species : atqui Deus non potest dici species. Si enim dici posset species ; hæc species esset , vel subijcibilis , vel prædicabilis : atqui neutrum dici potest ; ergo Deus non est species ; ergo , &c.

Transseat major , nego minorem prioris sillogismi. Quidquid enim est tota essentia : multis communicabilis , dici debet vera species : atqui Deus est tota essentia , tribus personis Divinis communicabilis ; ergo , &c. Ad probationem autem , nego etiam minorem , quantum ad utramque partem. 1°. Namque Deus est species subijcibilis , quia agnoscit supra se varia genera , scilicet , *spiritum* , *substantiam* , &c. 2°. Est species prædicabilis , quia prædicatur de tribus personis Divinis , tan-

quàm tota earum essentia communis, & immultiplicabilis; proindeque, &c. Dixi autem, *transseat*, quia licet substantia sit genus, verbì gratiâ, respectu Petri, non ideo Petrus est species.

Instabis. Quod nihil agnoscit suprà se, non est species subijcibilis: atqui Deus nihil agnoscit suprà se. Deus enim est ens supremum; ergo, &c.

Distinguo majorem. Quod nihil agnoscit suprà se, *logicè*, ut aiunt, concedo... *physicè*, nego. Distingue pariter minorem, & nega consequentiam. Illud dicitur habere aliquid suprà se, *logicè*, quod datur aliquid generalius, seu universalius. Illud autem agnoscit aliquid suprà se *physicè*, quod suam recepit existentiam à causâ. Reverâ, &c. Ad id autem quod subjungitur, respondeo, Deum esse quidem, *ens supremum* *physicè*, quia est primaria causa physica omnium entium, extrà se positorum; sed ipsum non esse, *ens supremum* *logicè*, seu genus universalissimum, quia non est de omnibus prædicabilis.

Objicies. 4^{ta}. Substantia non est genus, respectu illius entis, quod excludit genera: atqui Deus excludit genera. Omne namque genus est perfectibile per aliud: atqui Deus excludit perfectibile per aliud,

cum sit infinitè perfectus; ergo, &c.

Nego minorem prioris sillogismi. Quod enim est, spiritus, substantia & ens, componitur ex multiplici genere: atqui Deus est reipsâ, spiritus, substantia, & ens; proindèque, &c. Ad probationem autem nego majorem. Cum enim differentia generibus adjunctæ, nunquam sint ipsis intrinsecæ, non possunt illa genera perficere. Ad id autem quod additur, respondeo, Deum excludere quidem perfectibile per aliud contingens; non autem per aliud essentialiter; verbi gratiâ, si potentia cognoscendi perficiatur in Deo per cognitiones, hæ cognitiones debent esse necessariò conjunctæ cum potentiâ cognoscendi.

Instabis. Quod includit in idæâ suâ quaslibet perfectiones, nihil habet perfectibile per aliud, etiam inseparabile: atqui, quidquid est in Deo, includit in idæâ suâ quaslibet perfectiones; ergo nihil est in Deo perfectibile per aliud, etiam inseparabile.

1^o. Nego majorem. Eo enim ipso, quo aliquid includit in idæâ suâ quaslibet perfectiones; eo ipso, per has essentialiter perficitur, & consequenter est perfectibile.

2^o. Nego minorem. Sunt enim in Deo gradus generici: atqui gradus generici

non includunt in idæis suis quaslibet perfectiones; sed ab iis abstrahunt; sicut fuit probatum. Ubi notabis, unamquamque Dei perfectionem esse quidem infinitam in suo genere; at non idcirco quaslibet perfectiones includi in idæâ suâ; nam, verbi gratiâ, cognitio Dei, quæ infinita est in genere cognitionis, non includit in idæâ suâ amorem, omnipotentiam, &c.

Objicies denique. Substantia non est genus, respectu entis simplicissimi: atqui Deus est ens simplicissimum; ergo, &c.

Nego minorem. Tùm quia ens simplicissimum repugnat: dum enim dicitur *ens*, assignatur genus; & cum dicitur *simplicissimum*, affertur differentia. Tùm quia Deus componitur ex infinitis perfectionibus, ut omnes fatentur; ergo, &c. Deus quidem non componitur physicè; quia excludit à se partes substantiales; sed infinitè componitur metaphysicè; quia habet infinitas partes metaphysicas.

Colliges Deum contineri in cathategoriâ substantiæ; quia vera est substantiæ species.

Dices tamen. Sanctus Augustinus seipsum arguit, quòd Deum collocasset in cathategoriâ substantiæ; ergo non est in eâ collocandus.

Distinguo antecedens. Eo sensu, quòd

crediderit Deum subistere modificationibus contingentibus sui perfectivis, concedo. Eo sensu, quòd crediderit Deum per se subsistere, seu nulli inhærere, nego.

De quantitate.

Circà quantitatem, unum tantum hic inquiritur, an scilicet numerus existat à parte rei, seu independentè à mente humanâ. Ut solvatur hæc quæstio,

Nota numerum sumi, vel materialiter, vel formaliter. Numerus, materialiter sumptus, nihil aliud est, præter ipsa objecta, quæ numerari possunt. Numerus autem formaliter sumptus, est collectio unitatum, adeoque totorum, quæ numerantur.

Fatentur omnes numerum, materialiter sumptum, existere à parte rei; quia, nemine cogitante, existunt entia, quæ habent singula suam unitatem, & consequenter, quæ numerari possunt; sed multi contendunt numerum, formaliter sumptum, seu collectionem unitatum, non existere à parte rei. Contrà eos sit,

Conclusio.

Numerus, formaliter sumptus, existit à parte rei. Numerus enim, formaliter sumptus, est certa quædam & determinata

congeries unitatum : atqui congeries illa existit à parte rei. Ibi namque existit unitatum determinata congeries, ubi existunt multa tota, in ratione simili convenientia, & collecta : atqui existunt à parte rei, multa ejusmodi tota : nam, verbi gratiâ, si sint in exercitu centum millia hominum, omnes ejusmodi homines in ratione simili conveniunt ; in eo nempe, quod sub eodem Duce militent, & in hâc ratione sunt collecti ; ergo existit à parte rei, certa, determinataque congeries unitatum ; ergo, &c.

Dices. Numerus, formaliter sumptus, est unitatum collectio : atqui unitatum collectio non existit à parte rei ; collectio namque est actus colligentis ; ergo, &c.

Distinguo majorem. Est unitatum collectio passiva, concedo. Collectio activa, nego. Distingue pariter minorem, & nega consequentiam ; proindèque, &c.

Quæres autem, an numerus sit quantitatis species ?

Respondeo numerum, formaliter sumptum, non esse speciem quantitatis. Quod enim non minùs patet, quàm quantitas, non est ejus species : atqui numerus, formaliter sumptus, non minùs patet, quàm ipsa quantitas. Quod enim convenit omnibus quantitatis speciebus, non minùs

CIRCA APPREHENSIONEM. 2; U
patet, quàm quantitas: atqui numerus,
formaliter sumptus, convenit omnibus
quantitatis speciebus; convenit enim cui-
libet multitudini, ut per se patet; ergo,
&c.

De relatione.

Circà relationem, multæ moventur
quæstiones. Primà, circà ipsius naturam.
Secunda, circà ipsius existentiam. Tertia,
circà ejus subjectum. Quarta, circà ipsius
fundamentum. Quinta, circà terminum.
Sexta denique, circà ejus species.

De naturâ relationis.

Relatio, ut diximus, est ordo unius ad
aliud. Ambigitur autem quid sit ille ordo.
Alii quippè docent, ipsum nihil aliud esse,
præter denominationem externam, à ter-
mino desumptam. Alii volunt, ordinem
illum esse aggregatum quoddam ex sub-
jecto, fundamentis, & termino. Alii de-
nique contendunt, ipsum esse veram mo-
dificationem subjecto superadditam. Præ-
tereà, dum agitur de relatione contin-
genti, dubitatur à quânam causâ physicâ
producatur illa modificatio.

Dico autem 1.^o. relationem non esse
denominationem extrinsecam, à termino
desumptam. Quod enim est quid intrin-

secum subiecto, dici non debet denominatio extrinseca: atqui relatio, est quid intrinsecum subiecto: verbi gratiâ, dependentia entis creati, est quid intrinsecum enti creato; paternitas, est quid intrinsecum Patri, &c. ergo, &c.

Dico 2.^o. relationem non esse aggregatum quoddam ex subiecto, fundamentis, & termino. Quod enim inest subiecto, non idem est, ac id quod non inest subiecto: atqui relatio, seu ordo inest subiecto; verbi gratiâ, dependentia inest enti creato; aliundè verò, aggregatum ex subiecto, fundamentis & termino, dici non potest inesse subiecto, ut per se manifestum est; ergo, &c.

Dico igitur 3.^o. relationem esse modificationem subiecti. Quod enim exprimitur termino abstracto, & definitur ab omnibus, tanquàm ens in alio, dici debet subiecti modificatio: atqui relatio sic se habet; ergo, &c.

Dico denique, dum agitur de relationibus contingentibus, causam productivam fundamentorum proximorum, esse quoque causam productivam relationum. Causa namque productiva cuiusdam entis, est etiam causa productiva modificationum huic enti essentialium; verbi gratiâ, causa productiva corporis, est causa pro-

ductiva modificationum corpori essentialium : atqui relatio, est modificatio essentialis fundamento proximo ; ut constare debet ex eo , quòd fundamentum proximum nec esse , nec concipi possit , absque relatione ; ergo , &c.

De existentia relationis.

Fatentur omnes dari relationes , saltem per mentem ; sed contendunt multi relationem non existere positivè , seu à parte rei. Contrà eos sit ,

Conclusio.

Relationes existunt positivè , seu à parte rei. Relationes enim sunt entium quorundam ordines ad alia entia : atqui tales ordines existunt à parte rei. Diversitates enim & similitudines , sunt ordines : atqui diversitates & similitudines , existunt à parte rei. Ibi namque diversitates & similitudines existunt, ubi existunt diversa & similia ; abstracta namque existunt , ubi existunt ; concreta, hoc est , formæ existunt , ubi existunt earum subjecta : atqui existunt à parte rei entia diversa , & entia similia : verbi gratiâ , namine cogitante , circulus & quadratum , sunt figuræ diversæ , & duo circuli sunt figuræ similes ; proindeque , &c.

Dices. Relatio est comparatio : atqui comparatio existit tantum in mente , cum sit actus comparantis ; ergo , &c.

1°. Nego maiorem. Quod enim antecedit comparisonem , non est comparatio : atqui relatio antecedit comparisonem. Prius enim est entia esse , vel à se invicem diversa , vel inter se similia ; quam per comparisonem detegantur vel similia , vel diversa.

2°. Distinguo maiorem. Relatio , est comparatio passiva , transeat , ob rationem mox allatam. Relatio , est comparatio activè sumpta , nego. Distingue pariter minorem , & nega consequentiam.

De subiecto relationis.

Unica difficultas occurrit solvenda circa subiectum relationis , an scilicet Deus esse possit subiectum relationis contingentis ? Fatentur quidem omnes Philosophi & Theologi , Deum esse subiectum relationum essentialium ; sed eorum nonnulli contendunt , Deum esse non posse subiectum relationum contingentium. Contrà eos sit ,

Conclusio.

Deus est subiectum relationum contingentium. Ille namque dici debet subiec-

CIRCA APPREHENSIONEM. 235
tum relationum contingentium, qui dicit
ordines, quos potuit non dicere: atqui
Deus dicit ordines, quos potuit non di-
cere. Deus enim, ut Creator, dicit ordi-
nes ad entia creata; ut Redemptor, dicit
ordines ad homines redemptos: atqui Deus
potuit hos ordines non dicere. Qui enim
liberè creavit & liberè redemit, potuit
illos ordines non dicere: atqui Deus li-
berè creavit & liberè redemit, ut fatentur
Adversarii; ergo dicit ordines, quos potuit
non dicere: ergo reipsâ est subiectum re-
lationum contingentium.

Objectiones.

Objicies. 1^o. Qui novas modificationes
recipere non potest, non est subiectum
relationum contingentium: atqui Deus
non potest novas recipere modificationes;
ergo, &c.

Distinguo maiorem. Qui non potest re-
cipere novas modificationes, subiecti sui
nullatenus perfectivas, concedo. Subiecti
sui perfectivas, nego. Distingue pariter
minorem, & nega consequentiam. Mo-
dificationes subiecti sui perfectivæ dicun-
tur illæ, quibus existentibus in subiecto,
subiectum intelligitur perfectius & excel-
lentius, & quibus absentibus, à subiecto,
subiectum intelligitur minùs perfectum.

tales sunt virtus & scientia, respectu hominis. Modificationes subjecti sui, nullatenus perfectivæ, dicuntur illæ, quibus sive præsentibus, sive absentibus, subjectum nec perfectius, nec minus perfectum intelligitur; tales sunt relationes similitudinis, aut diversitatis, inter duos parietes. Porro Deus non potest quidem novas recipere modificationes sui perfectivas; quia perfectiones omnes sunt Deo essentielles; sed Deus recipere potest novas modificationes sui nullatenus perfectivas. Evidens autem est, relationes Creatoris & Redemptoris esse modificationes Dei nullatenus perfectivas; ex quo namque creavit & redemit, factus non est in se perfectior & excellentior.

Instabis. 1°. Qui est immutabilis, recipere non potest, novas modificationes, etiam sui nullatenus perfectivas: atqui Deus est immutabilis; ergo, &c.

Distinguo majorem. Qui est immutabilis, eâ mutatione, quæ nec perfectionem, nec imperfectionem denotat, concedo. Eâ mutatione, quæ denotat imperfectionem, nego. Distingue pariter minorem, & nega consequentiam. Itaque duplex est mutatio, altera, quæ denotat imperfectionem; quod multis modis contingere potest, sicut intelligetur ex dicendis in Me-

aphysicâ , ubi de immutabilitate Dei ; altera verò , quæ neque perfectionem , neque imperfectionem denotat , ut ubi paries fit alteri similis , aut ab eo diversus. Reverâ , &c.

Instabis. 2^o. In Deo nulla est vicissitudinis obumbratio , ut loquitur Jacobus Apostolus ; ergo Deus non est mutabilis , etiam eâ mutatione , quæ nullam denotat imperfectionem.

Nego consequentiam. Ut enim nulla sit in Deo vicissitudinis obumbratio , sufficit , quòd Deus sit essentialiter immutabilis , ratione modificationum perfectivarum ; nullatenùs autem requiritur , ut sit immutabilis , ratione modificationum minimè perfectivarum ; quia mutatio , ratione harum modificationum , ne quidem est umbra mutationis , ratione modificationum perfectivarum.

Objicies. 2^o. Subjectum modificationum contingentium componitur physicè : atqui Deus non componitur physicè : ergo , &c.

Nego majorem. Ut enim totum dicatur physicè compositum , non sufficit , si recipiat modificationes contingentes ; sed requiritur insuper , ut habeat partes , quæ sint substantiæ. Porro subjectum relationum contingentium , carere potest partibus , quæ sint substantiæ , sicut constat

238 CONCERTATIONES
de animâ rationali ; proindèque , &c.

Instabis. Illud physicè componitur, quod constat partibus separabilibus : atqui, quod est subjectum relationum contingentium , constat partibus separabilibus ; ergo , &c.

Distinguo majorem. Quod constat partibus, propriè separabilibus, hoc est, quæ possunt seorsim à se invicem existere, & consequenter sunt substantiæ, concedo. Quod constat ex partibus, impropriè separabilibus, id est, sine quibus totum existere possit, nego. Distingue pariter minorem, & nega consequentiam. Solutio intelligitur, ex dictis, de separabilitate.

Objicies denique. Deus non potest esse subjectum perfectionum contingentium : atqui relationes contingentes, sunt perfectiones contingentes ; ergo, &c.

Nego minorem. Modificationes enim non sunt perfectiones, quibus existentibus in subjecto, subjectum non intelligitur perfectiùs : at relationes contingentes sic se habent, ut constat ex dictis ; proindèque, &c.

Instabis. Modificatio perfecta, dici debet perfectio : atqui quælibet relatio contingens perfecta est : omne namque ens est in se perfectum ; ergo, &c.

Nego majorem. Ut enim aliqua modificatio dicatur perfectio, non satis est, si

fit in se perfecta : imò non sufficit , si alias recipiat modificationes sui perfectivas ; sed requiritur , ut subjecti sui sit perfectiva : perfectio namque , ut potè ens relativum , non desumitur à perfecto , sed à perfectivo. Porrò non omnes modificationes , subjectorum suorum sunt perfectivæ , ut constat rùm de relationibus majoris aut minoris distantiae , rùm de molestis animarum nostrarum impressionibus , verbi gratiâ , de dolore , fame , siti , &c.

De fundamento relationis.

Unum tantùm hîc inquitur , utrùm scilicet una relatio possit esse fundamentum alterius , id est , an una relatio possit esse ratio , propter quam , ipsius subjectum referatur ad terminum , distinctum à termino prioris relationis ?

Conclusio.

Una relatio potest esse fundamentum alterius relationis. Nam ratio , propter quam unum ens refertur ad aliud , dicitur fundamentum relationis : atqui una relatio potest esse ejusmodi ratio : nam , verbi gratiâ , filiatio in uno homine potest esse ratio , propter quam dicatur similis alteri filio : proindèque , &c.

Dices. Si una relatio esset alterius fun-

damentum ; daretur relatio relationis : atqui hoc dici non potest ; ergo , &c.

Distinguo maiorem. Daretur relatio relationis , in diverso genere , concedo. In eodem genere , nego. Forſan igitur non datur relatio relationis , in eodem genere ; verbi gratiâ , non datur filiatio filiationis , quia una filiatio non poteſt eſſe fundamentum alterius filiationis ; ſed dari poteſt relatio relationis , in diverso genere , quia filiatio poteſt eſſe fundamentum ſimilitudinis , cum alio filio. Dixi autem , forſan , quia reipsâ datur relatio relationis , in eodem genere : nam , verbi gratiâ , dantur ſimilitudinum ſimilitudines , in infinitum.

De termino relationis.

Circâ terminum relationis , tria potiſſimum inquiruntur. Primum , an terminus ſit de eſſentiâ relationis ? Secundum , an totuplex ſit relatio in aliquo ſubjecto , quotuplex eſt terminus , ad quem refertur ? Tertium , an terminus relationis ſit quid relativum , an verò quid abſolutum ? Ut ſolvantur hæc dubia , ſint ,

Concluſio prima.

Terminus , non eſt de eſſentiâ relationis. Quod enim eſt extrâ relationem , non eſt de

de ipsius essentiâ , ut per se patet : atqui terminus est extrâ relationem : verbi gratiâ , Filius est extrâ paternitatem , seu non est pars paternitatis , ut etiam per se manifestum est ; ergo , &c. Et certè substantia non est pars essentialis modificationis : at terminus est sæpè substantia , & relatio semper est modificatio ; ergo terminus non est de essentiâ relationis ; proindeque , &c.

Dices. Illud est de essentiâ relationis , sine quo relatio nec esse , nec concipi potest : atqui , sine termino , nec esse , nec concipi potest relatio ; ergo , &c.

Distinguo majorem. Sine quo , tanquàm parte componente , concedo. Sine quo , præsupposito & connotato , nego. Distingue pariter minorem , & nega consequentiam. Porro relatio , nec esse quidem , nec concipi potest sine termino , tanquàm aliquo præsupposito & connotato , quia relatio præsupponit & connotat aliquid , ad quod ipsius subjectum referatur ; sed terminus nunquam potest esse pars componens relationem , quia semper est extrâ relationem , & est quandoque substantia.

Instabis. Quidquid ponitur in definitione relationis , est ipsi intrinsecum : atqui terminus ponitur , &c. ergo , &c.

Distinguo majorem. Quidquid ponitur in definitione relationis, tanquam ejus differentia constitutiva, concedo. Tanquam aliquid præsuppositum & connotatum, nego. Distingue pariter minorem, &c. Hoc igitur est discrimen inter definitionem entis absoluti, & definitionem entis relativi, quod in priore nihil sit apponendum, quod non sit pars ejus essentialis; in posteriore verò, debeat exprimi præsuppositum aliquid & connotatum: Entia namque relativa non possunt aliter cognosci, quàm per ordines ad terminos.

Conclusio secunda.

In subjecto quovis totuplex est relatio, quotuplex est terminus, ad quem refertur. Quæ enim sunt vel diversa, vel similia, prout termini sunt vel diversi, vel similes, quæque definiuntur per ordines ad terminos; tot sunt numero, quot sunt ejusmodi termini: atqui relationes sunt vel diversæ, vel similes, prout earum termini sunt vel diversi, vel similes; quandoquidem, juxta Philosophos, relationes specificantur à terminis; aliundè verò relationes definiuntur, per ordines ad terminos, ut iidem fatentur; ergo, &c. Ubi porò dicunt Philosophi, relationes specificari à terminis;

hoc intelligendum est non eo sensu, quòd termini sint relationum differentia specificæ; sed eo tantùm sensu, quòd relationes sint, aut diversæ, aut similes, prout eorum termini sunt vel diversi, vel similes.

Objicies. Si totuplex esset relatio in subjecto, quot sunt termini, ad quos refertur, tot essent in eodem homine paternitatès, quot haberet liberos: atqui hoc dici non potest. Tam enim sufficit unica paternitas, ut homo referatur ad omnes suos liberos; quàm sufficit unica albedo in pariete, ut ad omnes parietes albos referatur: atqui sufficit unica albedo; ergo pariter sufficit unica paternitas; proindeque, &c. ergo, &c.

Nego minorem prioris sillogismi. Nam, juxtà omnes Philosophos, correlationes sunt simul naturâ, hoc est, quo momento existit relatio in subjecto, eodem momento existit relatio in termino: at, si esset unica paternitas in homine, sex, verbi gratiâ, liberos habente; tunc correlationes non essent simul naturâ, quia existeret paternitas ante sextam filiationem. Ad probationem autem, nego majorem: quia paternitas comparari non debet cum albedine, sed cum similitudine; undè quemadmodum non est unica similitudo in pa-

riete, versùs multos parietes; sic non est unica paternitas in homine, versùs multos liberos.

Instabis. Si multæ essent paternitates in eodem homine, idem homo dici posset multiplex pater: absurdum consequens, ergo, &c.

Nego sequelam. Nam idem homo foret quidem multoties pater, sed non esset multiplex pater; nec enim subjectum multiplicatur, pro multitudine modificationum.

Corollaria.

Primum. Genus diversas dicit relationes, ad diversas species sibi subjectas; quia hæc species sunt termini diversi.

Secundum. Species diversas dicit relationes ad genus, & ad individua sibi subjecta; quia genus & individua, sunt termini diversi.

Tertium. Species omnes ejusdem generis, similes habent relationes ad sua genera; quia hæc genera sunt termini similes.

Quartum. Species infima similes tantum dicit relationes ad sua individua; quia hæc individua sunt inter se necessario similia.

Conclusio tertia.

Terminus pro illo instanti originis, quo

ponitur, ut exurgat relatio in subiecto, est quid absolutum. Nisi namque terminus esset absolutus, pro illo instanti originis, relatio quam haberet per illud instans, prior esset relatione subiecti: atqui terminus non potest habere relationem, quæ sit prior relatione subiecti: alioqui correlationes non essent simul naturæ & cognitione; ergo, &c.

Objectiones.

Objicies. 1^o. Si terminus esset absolutus pro instanti, quo ponitur, ut exurgat relatio in subiecto; filius pro illo instanti non haberet filiationem: atqui filius pro quovis instanti habere debet filiationem, alioqui non esset filius; ergo, &c.

Distinguo maiorem. Filius pro aliquo instanti, non haberet filiationem, quæ foret ipsius ordo ad patrem, concedo. Non haberet filiationem ipsius constitutivam in ratione personæ, nego. Distingue pariter minorem, &c. Itaque filiatio, prout constitutiva filii, in ratione personæ, pro quovis instanti convenit filio; at filiatio, prout est constitutiva filii, per ordinem ad patrem, non convenit filio pro quovis instanti; quia filius constitui debet in ratione entis absoluti, seu in ratione personæ, priusquam constituatur in ratione

entis relativi: prius enim est, esse constitutum, secundum se, quam esse relativum ad aliud.

Instabis. Si filiatio, prout constituit filium, in ratione personæ, prior esset filiatione constitutiva filii, ut filii, aliquid dici posset alio prius, dum agitur de personis Divinis: atqui dum agitur de personis Divinis, nihil est alio prius; ergo, &c.

Distinguo majorem. Aliquid dici posset altero prius origine, seu, ut aiunt, pro instanti à quo, concedo. Alio prius naturâ, seu pro instanti in quo, nego. Distingue pariter minorem, & nega consequentiam. Tunc unum dicitur altero prius pro instanti à quo, quando vel est ejus origo, vel principium, vel ratio cur sit aliud, vel conditio, sine quâ non esset aliud. Tunc unum est prius altero, pro instanti in quo, quando vel est antiquius ipso, vel est ejus causa physica. Reverâ, &c.

Quæ dicta sunt de filiatione spectatâ, vel sub duplici respectu, vel sub duplici officio, intelligenda sunt, proportionem servatâ, tum de Paternitate, tum de Spiratione, sive activâ, sive passivâ.

Objicies. 2^o. Paternitas, est terminus similitudinis alterius patris: atqui pater-

nititas illa, est quid relativum, imò est vera relatio; ergo, &c.

Distinguo minorem. Paternitas illa, est quid relativum, respectu filii, concedo. Respectu alterius Patris, nego. Distingue pariter consequens. Reverà, &c.

Conclusio quarta.

Terminus relativus, est pro omnibus instantibus, quibus subjectum est relativum. Nisi namque terminus esset relativus, pro omnibus illis instantibus, correlationes non essent simul naturâ & cognitione: atqui tamen, juxtà omnes Philosophos, correlationes sunt simul naturâ & cognitione; proindèque, &c.

Colliges terminum relationis esse absolutum, pro eo solo instanti originis, quo poni debet, ut exurgat relatio in subjecto.

De speciebus relationis.

Relatio distribuitur in essentialem & contingentem, circà quam distributionem multa hîc inquiruntur.

Quæres igitur 1^o. an relatio, ut sic, seu generatim sumpta, essentialis sit, an contingens?

Respondeo, ipsam sic sumptam, neque essentialem, neque contingentem esse; quia scilicet nullum genus includit in idæâ

suâ differentias , specierum suarum constitutivas.

Quæres 2^o. an quælibet relationis species collocari possit in categoriâ ?

Respondeo , quamlibet relationis speciem collocari posse in categoriâ , seu , ut aiunt , categoricam esse. Quod enim est vera species, tùm generis supremi, tùm relationis universum sumptæ , collocari potest in categoriâ relationis : atqui quælibet relationis species sic se habet ; proindeque , &c.

Quæres 3^o. an aliqua relatio essentialis dici possit gradus specificus sui subjecti ?

Respondeo , nullam relationem essentialem dici posse gradum subjecti sui specificum ; quia prius est , ens esse constitutum in se , quàm esse constitutum in ordine ad aliud.

Quæres denique , an ad existentiam relationis in subjecto , requiratur existentia termini ?

Respondeo 1^o. ad existentiam relationis essentialis in subjecto, non requiri existentiam termini , sed ejus possibilitatem sufficere ; quia nempe relatio essentialis habet pro termino possibilitatem termini : verbi gratiâ , omnipotentia Divina dixit ab æterno relationem ad possibilitatem , seu producibilitatem entium.

Respondeo 2°. ad existentiam relationis contingentis, cujus passio est fundamentum proximum, non requiri pariter existentiam termini; quia scilicet eo ipso, quo subjectum recipit fundamentum proximum, jam dicit ordines ad possibilia: verbi gratiâ, quando paries recipit albedinem, quæ est fundamentum proximum similitudinis, jam dicit ordines ad parietes albos possibiles.

Respondeo 3°. ad existentiam relationis contingentis, cujus actio est fundamentum proximum, requiri existentiam termini; quia scilicet actio non potest existere, quin existat aliquod productum.

De actione.

Actio definitur à nonnullis, complementum, seu perfectio potentia. Verùm lègitima non est hæc definitio: tum quia quædam actiones non perficiunt agens; quales sunt creatio, conservatio, redemptio: tum quia quidam actus, nedum perficiant subjectum, ipsum reddunt deterius; quales sunt actus moraliter mali, in homine.

Actio igitur definiri debet, exercitium potentia activæ.

Terminus actionis, seu id quod produ-

citur, est vel substantia, vel modificatio; undè duplex distinguitur actio, creatio, &eductio. Creatio, est productio substantiæ; eductio verò, productio modificationis.

Quærent hîc Logici, an actio positivè distinguatur ab agente?

Responsio facilis est in nostris principiis; nam actio positivè modaliter distinguitur, à substantiâ agente; positivè verò, formaliter, à potentiâ agente.

De signis.

Circà signa, duo præsertim hîc inquirentur. 1°. An voces sint signa arbitraria? 2°. An voces primariò significant idæas nostras formales, an autem entia, per idæas formales repræsentata?

Conclusio prima.

Voces sunt signa arbitraria. Quæ enim diversa sunt apud diversos populos, & quorum significatio fuit dependens à libero hominum instituto, dici debent signa arbitraria: atqui voces sic se habent, experientiâ teste; ergo, &c.

Dices. 1°. Nisi voces essent signa naturalia; tam insipiens, quàm sapiens potuisset nomina rebus imponere: atqui, juxtà

Philosophos, solius sapientis est, nomina rebus imponere.

1°. Nego sequelam. Signorum enim naturalium significatio non pendet ab homine, vel sapiente. 2°. Nego minorem. Quilibet enim homo, sive sapiens, sive insapiens, potuit sonum articulatum adhibere, ut objectum quodvis primum significaret. Quod si nomina sint complexa, & ex vocibus usu receptis fuerint conflata, ita ut per complexionem hanc, vel natura, vel proprietas entis significetur; tunc solius est sapientis, ejusmodi nomina rebus imponere.

Dices 2°. Loquela hominibus est naturalis; ergo voces quædam naturaliter significant.

Nego consequentiam. Ex eo namque quod loquela sit hominibus naturalis, sequitur quidem naturale esse hominibus, cogitationes suas signis quibusdam manifestare posse; sed nullatenus sequitur signa, quibus utuntur, esse naturalia.

Dices denique, *pipire* (quæ vox pullorum significat clamorem) naturaliter significat; ergo voces quædam naturaliter significant.

Nego antecedens: quia non eadem est allata vox, apud omnes populos: clamor quidem pullorum; est signum naturale;

L vj;

sed vox, quâ homines utuntur, ad clamorem illum significandum, non est signum naturale.


Conclusio. secunda.

Voces primariò significant entia ipsa, vel per idæas repræsentata, vel per aliud medium cognita. Voces enim primariò significant ea, in quorum notitiam, primùm devenimus, auditis vocibus; & ad quæ significanda, fuerunt primùm destinatæ: atqui, auditis vocibus, statim devenimus in notitiam ipsorum entium; & rarò contingit, ut tunc attendamus ad cogitationes loquentium: aliundè verò, voces fuerunt primùm destinatæ, ad ipsa entia significanda, ut constare debet ex eo quòd, ad instituendam societatem civilem, objecta fuerint appellanda & significanda; proindèque, &c.

Dices. Humana societas consistit in manifestatione cogitationum; ergo voces excogitatæ fuerunt ad ipsas manifestandas.

Distinguo antecedens. Consistit in manifestatione cogitationum objectivarum, concedo. In manifestatione cogitationum formalium, nego.





S E C U N D A P A R S

L O G I C Æ.

De judicio.

JU D I C I U M definiri debet actus intel-
lectûs, dicentis habitudinem prædicati
ad subjectum; hinc in oratione judicii
manifestativâ, seu in propositione, qua-
tuor sunt distinguenda; subjectum, præ-
dicatum, verbum, & habitudo prædicati
ad subjectum, de quibus dictum fuit. Pro-
positio distribui potest in simplicem, com-
plexam & compositam, in absolutam &
modalem. De singulis his speciebus, est
dicendum; ita ut quæcumque dicturi su-
mus de propositione, intelligenda sint de
judicio.

De propositione simplici.

Propositio simplex est ea, cujus unicum
est subjectum, & unicum prædicatum;
ita ut nihil fuerit additum, nihilque sub-
audiatur addendum, sive subjecto, sive
prædicato; qualis est hæc propositio...
Deus est omnipotens. Ut natura propositionis

simplicis evolvatur, examinabimus ejus materiam, formam, quantitatem, qualitatem, conversionem, ejus oppositionem cum aliâ, & ipsius cum aliâ æquipollentiam. Tùm trademus regulas quasdam circâ propositiones simplices.

De materiâ propositionis simplicis.

Propositio spectata, ratione materiæ, seu ratione objecti, circâ quod versatur, duplex tantùm esse potest, necessaria, & contingens. Propositio in materiâ necessariâ, dici debet ea, in quâ habitudo prædicati ad subiectum, includitur in idæâ totali subiecti. Propositio in materiâ contingenti, dici debet ea, in quâ habitudo prædicati ad subiectum, nec includitur in idæâ subiecti, nec ab eâ excluditur.

Habitudo nihil aliud est, quàm ordo, seu relatio prædicati ad subiectum; & duplex est in unâquâque materiâ, scilicet, inseparabilitas, & incompatibilitas, in materiâ necessariâ; conjunctio verò, & separatio, in materiâ contingenti.

Tunc habitudo vocatur *inseparabilitas*, quando prædicatum includitur in idæâ totali subiecti: ut in hâc propositione, *Deus est omnipotens*. Tunc autem vocatur *incompatibilitas*, quando prædicatum est insociabile cum partibus essentialibus sub-

jecti; ut in hâc propositione, *lapis non est intelligens*. Tunc habitudo dicitur *conjunctio*, quando prædicatum, nec includitur in idæâ subjecti, nec ab eâ excluditur; sed adest motivum aliquod, certò denotans unionem prædicati cum subjecto; ut ubi dicitur, *corpora sunt existentia*. Tunc habitudo vocatur *separatio*, quando prædicatum non excluditur ab idæâ subjecti; sed adest motivum, certò denotans ejus separationem à subjecto.

De formâ propositionis.

Forma propositionis, est ejus terminorum dispositio. Parùm autem interest, an hoc, vel illo modo disponantur; undè terminorum dispositio locum tantum habet, dum agitur de propositionibus syllogismum componentibus.

Observant hîc Peripatetici, propositionem, ratione formæ spectatam, triplicis esse generis, de primo, de secundo, & de tertio adjacente. Propositio dicitur ab ipsis, de primo adjacente, quando subjectum prædicatum & verbum, unicâ voce significantur; ut ubi dicitur, *lego*. Propositio dicitur de secundo adjacente, quando prædicatum & verbum, unicâ voce exprimuntur; ut ubi dicitur, *Petrus legit*. Denique dicitur de tertio adjacente, quando

236 S E C U N D A P A R S
subjectum prædicatum & verbum, distinctis vocibus exprimuntur; ut ubi dicitur, *Petrus est legens*.

Hæc satis ineptè dicta sunt, sed nullius sunt momenti.

De quantitate propositionis.

Propositio spectata, ratione quantitatis, quadruplex est, universalis, particularis, indefinita, & singularis; undè propositionis quantitas nihil aliud est, quàm extensio ipsius subjecti.

Propositio universalis, est ea, cujus subjectum est aliquod universale, sumptum universaliter, id est, sumptum pro omnibus suis inferioribus: hæc voces, *omnis, quilibet, nullus*, subjecto præfixæ, denotant subjectum universaliter accipi.

Nota tamen vocem hanc, *omnis*, præfixam subjecto, non semper esse signum universalitatis propositionis: est enim quandoque signum singularitatis; quod ut dignoscas, sint duæ regulæ sequentes.

Prima. Quoties prædicatum propositionis dici potest, de unoquoque inferiore subjecti; toties supradicta vox, præfixa subjecto, significat propositionem esse universalem; verbi gratiâ, si dicatur... Omne corpus est divisibile, quoniam prædicatum dici potest de corpore quovis singu-

Iari ; ideò supradicta vox significat sub-
jectum propositionis universaliter sumi,
& consequenter propositionem esse uni-
versalem.

Secunda. Quoties prædicatum propo-
sitionis dici non potest , de unoquoque sub-
jecti inferiore ; toties vox *omnis* significat
propositionem esse singularem : verbi gra-
tiâ , si dicatur , omnes Apostoli erant duo-
decim , quoniam prædicatum dici non
potest de unoquoque Apostolo ; ideò vox
supradicta , significat propositionem esse
singularem : sensus enim est... Collectio
Apostolorum est numerus duodenarius.

Daobus modis , propositio potest esse
universalis , moraliter & metaphysicè.
Tunc propositio dicitur moraliter univer-
salis , quando significat prædicatum , ut
plurimum , esse conjunctum cum subiecto ,
si sit affirmans ; aut , ut plurimum , esse
separatum à subiecto , si sit negans : tales
sunt hæ propositiones. Omnes Europæani
sunt generosi... Mulieres non sunt doctæ.
Tunc autem propositio dicitur universalis
metaphysicè , quando nulla est omnino
exceptio. Hinc propositiones , moraliter
universales , reperiri tantum possunt in
materiâ contingentis ; & universales me-
taphysicè , in solâ materiâ necessariâ.

Propositio particularis, est ea, cujus sub-

jectum est terminus universalis, sed sumptus pro quibusdam tantum suis inferioribus: quod designatur per has, aut similes voces subjecto præfixas, *aliqui*, *quidam*, *nonnulli*; tales sunt hæ propositiones, *quidam homines sunt Philosophi*. . . *Quidam homines non sunt Philosophi*.

Propositio indefinita dicitur ea, cujus subjectum est terminus universalis, cui nullum præfixum fuit signum, aut universalitatis, aut particularitatis; quales sunt hæ propositiones. . . *Substantia per se subsistit*. . . *Homo non est doctus*, &c.

Propositio singularis, est ea, cujus subjectum est aliquod individuum determinatum; qualis est hæ propositio. . . *Alexander vicir Darium*. *Docent Philosophi*, propositiones singulares revocari ad universales; indefinitas verò, modò ad universales, modò ad particulares; undè habent tantum rationem universalium & particularium. Hanc Philosophorum opinionem ad examen revocabimus, in Concertationibus circa judicium.

De qualitate propositionis.

Propositio spectata, ratione qualitatis, distribui debet. 1^o. In affirmantem & negantem. 2^o. In veram & falsam. 3^o. In æertam & incertam. 4^o. In evidentem &

inevidentem, quarum omnium specierum definitiones traditæ sunt.

Certitudo triplex distingui debet; nimirum, ratione objecti, ratione motivi, & ratione subjecti.

Certitudo, ratione objecti, est ipsius immutabilitas, quantum ad partes ipsum componentes.

Certitudo motivi, est infaillibilis ejus connexio, cum eo quod cognoscitur; & subdividitur in Metaphysicam, Physicam & Moralem. Metaphysica vocatur, quando motivum essentialem habet connexionem cum objecto cognito. Physica dicitur, quando, juxta leges ordinarias, infaillibilem habet connexionem cum objecto cognito. Denique vocatur Moralis, quando connexionem habet, ita probabilem, ut vir prudens ex illo motivo judicare possit.

Certitudo subjecti, est personæ cognoscentis imperturbabilitas, orta ex motivo firmo & laudabili.

De conversionibus propositionum.

Conversio propositionis definiri debet, mutatio prædicati in subjectum, & subjecti in prædicatum, servatâ semper qualitate: verbi gratiâ, hæc propositio... Nullum corpus est spiritus, sic converti-

ur; nullus spiritus est corpus: qualitas autem servari dicitur, quando affirmans, in affirmantem; negans, in negantem; vera, in veram, &c. convertitur. Propositio, quæ convertenda proponitur, vocatur *conversa*; quæ verò resultat ex terminorum transpositione, vocatur *convertens*.

Triplex admittitur conversionis species, simplex, per accidens, & per contrapositionem.

Conversio simplex, dicitur ea, in quâ servatur eadem quantitas, id est, in quâ universalis in universalem, & particularis in particularem convertitur; verbi gratiâ, nullus homo est lapis... nullus lapis est homo... aliqui homines sunt docti; aliqui docti sunt homines.

Conversio per accidens, dicitur ea, in quâ mutatur propositionis quantitas: ut omnis spiritus est substantia; aliqua substantia est spiritus.

Conversio per contrapositionem, vocatur ea, in quâ termini positivi mutantur in infinitantes: ut aliqui homines non sunt docti; aliqui non docti, non sunt, non homines.

Ut autem intelligas, quænam propositiones converti possint simpliciter; quænam per accidens, & quænam per contra-

positionem; sequentes proponunt versiculos.

Feci simpliciter convertitur : Eva per accid.
Asto , per contrap ; sic fit conversio tota.

In his versiculis, considerandæ sunt tres hæ voces, *feci*, *eva*, *asto* : & in his vocibus, considerandæ sunt quatuor vocales, *a*, *e*, *i*, *o*. Vocalis, *a*, designat propositionem universalem affirmantem : vocalis, *e*, universalem negantem : vocalis, *i*, particularem affirmantem ; & vocalis, *o*, denotat particularem negantem, juxta hos alios versiculos.

Asserit, a, negat, e ; verum generaliter amba.
Asserit, i, negat, o ; sed particulariter amba.

His præsuppositis, priores versiculos sic explicant. *Feci simpliciter convertitur*, id est, propositiones designatæ per vocales, *e* & *i*, scilicet universales negantes, & particulares affirmantes convertendæ sunt simpliciter : verbi gratiâ, nulla virtus est turpis, nullum turpe est virtus... Quidam homines sunt docti, quidam docti sunt homines.

Eva per accid, id est, propositiones designatæ per vocales, *e* & *a*, nimirum universales negantes, & universales affirmantes, convertendæ sunt per accidens,

hoc modo... Nulli homines sunt lapides, quidam lapides non sunt homines... Omnis homo est substantia, aliqua substantia est homo.

Ast per contrap, id est, propositiones designatæ per vocales, *a* & *v*, scilicet, universales affirmantes, & particulares negantes, convertendæ sunt per contrapositionem, hoc modo... Omnis virtus est honesta, omne non honestum est non virtus... Aliquis homo non est Philosophus; aliquis non Philosophus, non est, non homo.

Ex his omnibus colligitur, 1°. universales negantes converti posse, vel simpliciter, vel per accidens. 2°. Universales affirmantes converti posse, vel per accidens, vel per contrapositionem. 3°. Particulares affirmantes, converti tantum posse simpliciter. 4°. Particulares negantes, solummodò converti posse, per contrapositionem.

Probabimus in Concertationibus, universales negantes in materiâ necessariâ, converti posse simpliciter, non autem per accidens. Deinde, cæteras propositiones nullatenus converti posse.

De propositionum oppositione.

Oppositio propositionum, definiri solet

duarum propositionum , eodem subjecto , eodemque prædicato constantium pugna , vel secundum quantitatem tantum , vel secundum qualitatem tantum , vel secundum quantitatem & qualitatem simul.

Quatuor vulgò numerantur oppositionis species : contradictoria , contraria , subcontraria , & subalterna.

Oppositio contradictoria , dicitur ea , quæ reperitur inter duas propositiones , quæ pugnant inter se , secundum quantitatem & qualitatem simul ; ut omnis homo est justus... Aliquis homo non est justus.

Oppositio contraria , vocatur ea , quæ occurrit inter duas propositiones universales , quarum una affirmat , & altera negat : ut inter has , omnis homo est justus... nullus homo est justus.

Oppositio subcontraria , dicitur ea , quæ reperitur inter duas propositiones particulares , quarum una affirmat , & altera negat : ut inter has... Aliquis homo est justus... aliquis homo non est justus.

Oppositio subalterna , vocatur ea , quæ reperitur inter duas propositiones , quæ vel sunt ambæ affirmantes , vel ambæ negantes ; sed quarum una est universalis , & altera particularis : ut , omnis homo est mortalis , aliquis homo est mortalis...

Nullus homo est sapiens , aliquis homo non est sapiens.

Circà has oppositionis species , observant Peripatetici , 1°. Oppositionem contradictoriam , omnium esse maximam ; & earum unam semper esse veram , & alteram falsam , sive in materiâ necessariâ , sive in materiâ contingenti. 2°. Contrariarum , unam esse veram , & alteram falsam , in materiâ necessariâ ; & utramque posse esse falsam , in materiâ contingenti. 3°. Subcontrariarum , unam esse veram , & alteram falsam , in materiâ necessariâ ; & utramque esse posse veram , in materiâ contingenti. 4°. denique. Subalternarum , unam esse posse veram , & alteram falsam , in materiâ contingenti ; & utramque esse vel veram , vel falsam , in materiâ necessariâ.

Hæc omnia falsa esse ; probabitur in Concertationibus. Interim circà propositionum oppositiones , sic est statuendum.

1°. Nulla est propositionum oppositio , nisi penès veritatem & falsitatem. 2°. Dux tantum est propositionum oppositio , contradictoria & contraria ; sed quæ longè aliter definiendæ sunt , quàm fuerunt à Peripateticis definitæ.

Oppositio contradictoria , dici debet ea , quæ reperitur inter duas propositiones , quarum

quarum una affirmat de subiecto, quod altera negat de eodem subiecto, sub eodem respectu considerato; hinc sequentes propositiones sunt contradictoriæ. Petrus cras è vivis excedet... Petrus cras è vivis non excedet.

Oppositio contraria, dici debet ea, quæ reperitur inter propositiones, quarum una affirmat de subiecto prædicatum, & altera affirmat de eodem subiecto prædicatum aliud, cum priori insociabile: sic hæc duæ propositiones opponuntur contrariè.... Mundus est existens necessariò... Mundus est existens contingenter.

De propositionum æquipollentiâ.

Propositionum æquipollentia, definitur à Peripateticis, duarum propositionum oppositarum reductio ad eundem valorem. Hæc autem reductio perfici debet, inquirunt, ope particulæ, *non*, vel præfixæ, vel postpositæ subiecto alterutrius oppositarum. Ut autem intelligatur quandam hæc particula sit præfigenda, quandam autem sit postponenda subiecto, sequentem proponunt versiculum.

Pracontradic : post contrar ; præpostque subaltern.

Hoc est, ut contradictoriæ fiant æqui-
Tomus I. M

pollentes, particulâ, *non*, præfigenda est alterutrius subjecto. Ut contrariæ & subcontrariæ fiant æquipollentes, eadem particula postponenda est alterutrius subjecto. Denique, ut æquipolleant subalternæ, eadem particula præfigenda est, & postponenda alterutrius subjecto.

Ratio est, inquiunt, quia particula, *non*, malignantis est naturæ; in quantum, si reperiatur in propositione simplici, destruit quidquid ipsam sequitur; id est, si præfigatur subjecto, destruit quantitatem & qualitatem propositionis; si verò postponatur subjecto, solam propositionis qualitatem destruit.

Quandoquidem autem errarunt Peripatetici, circa propositionum oppositiones, consequens fuit, ut errarent circa earum æquipollentiam; imò non satis exploratam habuerunt naturam particulæ negativæ; sicut intelligetur ex dicendis.

Regula circa propositiones simplices.

Prima. Ut propositio affirmans, in materiâ necessariâ, vera sit, requiritur, ut attributum includatur in idæâ totali subjecti, & ut sit pars ejus essentialis. Ut autem asseratur vera, prædicatum deprehendi debet, inclusum in illâ idæâ. Prætereâ, ut propositio negans vera sit in

eâdem materiâ , requiritur , ut prædicatum excludatur ab idæâ totali subjecti , seu ut sit infociabile cum aliquâ parte essentiali hujus subjecti ; & ut asseratur vera , prædicatum illud debet deprehendi incompatible , cum aliquâ parte essentiali cognitâ subjecti.

Secunda. Ut propositio affirmans in materiâ contingenti , vera sit , requiritur , ut attributum reipsâ sit conjunctum cum subjecto : ut autem asseratur philosophicè vera , prædicatum illud , per motivum ab idæis diversum , & evidentè cognitum , deprehendi debet reipsâ , cum subjecto conjunctum. Præterea , ut propositio negans vera sit in eâdem materiâ , prædicatum debet reipsâ deprehendi separatum à subjecto : & ut dicatur philosophicè vera , requiritur ut adsit motivum , ab idæis diversum , & per sensum intimum notum , habens connexionem infaillibilem cum illâ separatione.

Tertia. Quoties subjecto propositionis indefinitæ , enuntiantis vel inseparabilitatem , vel unionem , præfigitur signum universalitatis ; toties veritas ejus permanet eadem , quia talis indefinita revocatur ad universalem. Quod si propositio indefinita enuntiet incompatibilitatem , servabitur etiam ejus veritas , licet subjecto

præfigatur universalitatis signum ; at si propositio illa separationem enunciet , cave , ne ipsius subjecto signum universalitatis præfigas : ob præfixum enim tale signum , propositio evadit falsa , quia signum illud exceptionem omnem excludit. Hinc vera est hæc indefinita... Mulieres non sunt doctæ ; falsa verò hæc... Nullæ mulieres sunt doctæ.

Quarta. Propositio, quæ nititur cupiditate , tanquam motivo , haberi debet saltem ut temeraria ; & proindè rejicienda est à viro sapiente , donec laudabile motivum affulgeat.

Quinta. Propositio, quæ nititur sensuum nostrorum testimonio , certissima est , si enunciet solummodò quid nobis videatur de entibus ; at si enunciet quænam sint naturæ , & proprietates objectorum sensibilium , incerta est & plerumque falsa ; sicut intelligetur ex dicendis in Physicâ.

Sexta. Propositio , quæ nititur aliorum hominum unanimi testimonio , præsertim si diversæ sint nationis , certissima est , si factum aliquod narret.

Septima. Propositio , quæ nititur auctoritate Dei revelantis , certissima est , & ad effusionem usque sanguinis propugnanda ; dummodò tamen auctoritate Ecclesiæ constet , ipsam à Deo fuisse reipsâ revelatam.

Octava. Propositio, quæ nititur idæarum nostrarum intuitu, certissima est: probatum enim fuit, intuitum illum, unicum esse motivum cognitionum philosophicarum.

Nona. Ut propositio universalis, aut indefinita affirmans, & in materiâ contingenti, vera sit, prædicatum convenire debet, ut plurimum subjecto. Præterea, ut indefinita negans in materiâ contingenti, vera sit, prædicatum debet esse, ut plurimum, separatum à subjecto.

Decima. Ut propositio particularis, sive negans, sive affirmans, vera sit, debet esse in materiâ contingenti, quia in materiâ necessariâ nulla est exceptio; & particularitatis signum denotat exceptionem, ut ostendetur postea. Hinc omnis propositio particularis, sive affirmans, sive negans in materiâ necessariâ, semper est falsa.

Undecima. Propositio affirmans, in materiâ necessariâ, cujus subjectum generalius est, quàm prædicatum, semper est falsa; quia in hâc materiâ, prædicatum affirmantis includi debet in idæâ totali subjecti: porro minùs generale non potest includi in generaliore, quandoquidem generalius est pars actualis minùs generalis.

Duodecima. Propositio affirmans in materiâ contingenti, cujus subjectum est pars contingens, & prædicatum est totum recipiens partem hanc contingentem, semper est falsa, quia totum tribui non potest parti suæ contingenti.

De propositionibus complexis.

Propositio complexa, dicitur ea, cujus unicum est subjectum, & unicum prædicatum; sed ita ut aliquid fuerit additum aut subjecto, aut prædicato, aut verbo. Hinc quadruplex distingui potest: complexa de subjecto tantum; complexa de prædicato tantum; complexa de verbo tantum; & complexa, vel de his omnibus, vel de multis simul.

Ut harum propositionum natura cognoscatur, quasdam præmittemus observationes, circa has complexiones speciatim sumptas: tùm quasdam regulas subjungemus, circa has propositiones.

Notandum igitur 1°. quamlibet additionem factam, vel subjecto, vel prædicato, triplicem esse, explicativam, restrictivam, & repugnantem.

Tunc additio vocatur explicativa, quando terminus additus vel subjecto, vel prædicato, significat aut ipsius genus, aut

differentiam, aut speciem, aut proprium, aut accidens minimè commune.

Tunc additio vocatur restrictiva, quando terminus additus alteri termino universali, hunc restringit, seu determinat, ad aliquam tantum ipsius inferiora; ut ubi dicitur, substantia spiritualis. Tunc additio dicitur repugnans, quando terminus additus alteri, significat aliquid cum ipso infociabile: ut ubi dicitur, circulus quadrilaterus.

In his autem omnibus casibus, pronomen, *qui*, *qua*, *quod*, vel exprimitur, vel est subaudiendum; ita ut sit subjectum propositionis accessoriæ, aut, ut aiunt, incidentis.

Notandum 2°. additionem explicativam, esse vel veram, vel falsam. Si sit vera, tunc solius propositionis principalis veritas supererit examinanda; si verò sit falsa, tunc propositio principalis rejici poterit, vel ex eo solo quòd falsum supponat; unde si propositio principalis insuper sit falsa, propositio totalis ex duplici capite negari poterit, & quia falsum supponit, & quia falsum enunciat: verbi gratiâ, hæc propositio... Deus qui contingens est, creavit alterum Deum, negari debet, & quia falsum supponit, nempe Deum esse contingentem; & quia falsum enuntiat, nempe quòd creaverit

alterum Deum: hæc alia propositio, Deus qui contingens est, creavit animas rationales, neganda erit, ex eo solo quòd falsum supponat. In omni igitur propositione complexâ, vel de subiecto, vel de prædicato, duæ sunt propositiones: una principalis, cujus vel subiecto, vel prædicato, fuit aliquid additum, & incidens, seu accessoria, cujus pronomen suprâ dictum est subiectum. Propositio autem principalis, est ea, quæ solitariè sumpta, perfectum & integrum habet sensum; accessoria verò, quæ solitariè sumpta, perfectum & integrum non habet sensum.

Notandum 3°. veritatem propositionis principalis, in quâ reperitur additio restrictiva, pendere à connexionione, vel repugnantia prædicati cum subiecto; hinc si propositio sit affirmans, & ex idæarum intuitu, deprehendatur connexio prædicatum inter & subiectum restrictum; propositio principalis erit necessariò vera; ut in hac propositione, substantia corporea sectilis est in infinitum. Pariter, si propositio sit negans, & ex idæarum intuitu, prædicatum deprehendatur infociabile cum subiecto restricto; tunc propositio erit etiam necessariò vera, ut in hac propositione. . . . Substantia corporea non est cognitionis capax. Quod si propositio,

enunciet prædicatum aliquod convenire , aut non convenire subjecto , independenter à restrictione subjecti ; tunc rejici poterit , ex eo quòd apposita fuerit restrictio : verbi gratiâ , rejici poterunt sequentes propositiones. . . Substantia corporea per se subsistit. . . Substantia corporea non est modificatio. . . Homines justi componuntur ex corpore & animâ. . . Homines docti non sunt lapides.

Notandum 4°. omnia signa reduplicationis , subjecto postposita , totidem esse additiones restrictivas huic subjecto factas ; ut ubi dicitur , homo quatenus homo , homo ut homo , homo ut sic , &c. Sensus enim est , homo , secundum suam essentiam spectatus ; hinc vera est ista propositio , homo ut homo , componitur ex corpore & animâ ; falsa verò hæc. . . homo ut homo , est doctus.

Notandum 5°. quasdam esse propositiones simplices , quantum ad voces , quæ tamen complexæ sunt , quantum ad sensum : quod duobus potissimum modis accidit : quando subjectum est indeterminatum ; mens enim aliquid ei semper addit , quo fiat determinatum : ut ubi dicitur. . . *Rex profligavit hostes.* Mens enim addit aliquem Principem determinatum.

2°. Quando in sillogismo terminus , verbi

gratiâ, medius, adjunctam habet complexionem in majori propositione, nec eandem habet expressam in minore: tunc enim mens eandem substituere debet complexionem in minore; sicut jam constat ex dictis.

Notandum denique, complexionem de verbo, modò nihil aliud esse, præter narrationem alicujus opinionis, ut ubi dicitur... Peripatetici docuerunt, aërem esse levem; modò complexionem illam afferri in confirmationem propositionis principalis; ut ubi dicitur... Lex jubet honorare Reges, nimirum ut confirmetur propositio principalis, *Reges sunt honorandi*, additur hæc alia... Lex est ita jubens. Discrimen illud detegi tantum potest, ex antecedentibus & consequentibus.

Leges circa propositiones complexas.

Prima. Quando propositio accessoria nihil confert ad veritatem propositionis principalis; tunc perpendendum est, an propositio principalis sit in materiâ necessariâ, an autem in materiâ contingenti? Si sit in materiâ necessariâ, ita ut vera sit, & accessoria sit falsa; tunc tota propositio rejici poterit, ex eo quòd supponat falsum: sic rejicienda est hæc tota propositio... Mundus qui necessariò existit, est

rerum corporearum ordinata compages. Si propositio sit in materiâ contingenti, ita ut principalis sit vera, & accessoria sit falsa; tunc tota propositio poterit admitti, præsertim si accessoria levis sit momenti: sic admitti poterit hæc propositio... Alexander, Amintæ filius, vicit Darium: quamvis enim Alexander magnus, sit solum Amintæ nepos; quia tamen hæc complexio nihil omninò confert ad veritatem propositionis principalis; ideo rejicienda non erit tota propositio. Hanc posteriorem legis partem servabis, præsertim in colloquiis familiaribus: interim ipse cavebis, ne propositiones incidentes adjungas, quæ nihil omninò conferunt ad veritatem principalem.

Secunda. Quoties veritas propositionis principalis, pendet à veritate propositionis accessoriæ; toties diligenter erit perpendenda veritas hujus accessoriæ; ut ubi dicitur... Titius, Sempronii nepos, legitimus est ejus hæres.

Tertia. Si ex communi usu, tituli quidam adjuncti fuerint personis, in dignitate constitutis, eosdem ipsis tribuere debes, quamvis certus sis, eos ipsis non competere: verbi gratiâ, quoniam Episcopi vocabantur antiquitus, *sanctissimi*; ideo hæc additio tribui poterat cuilibet.

M vj;

Episcopo , etiam nefariè viventi. Ratio generalis est , quia denominationes illæ non tam significant quales sint personæ , quàm quales esse debeant ; uno verbo , pertinent ad dignitates , potius quàm ad personas.

Quarta. Pronomen , *hic* , *hec* , *hoc* ; tenens locum subjecti , in aliquâ propositione , semper significat subjectum complexum ; undè , donec tota propositio fuerit enunciata , nunquam certò dignosci potest , quænam additio sit subjecto faciendâ ; & quoniam mens nostra cunctationis est impatiens , indè fit ut circâ hanc additionem , ut plurimùm , erremus. Errorem igitur vitabimus , si cohibeamus assensum nostrum , donec tota propositio fuerit prolata , & donec ad omnes circumstantias attenderimus : verbi gratiâ , si quis tenens nummum , colore fulvo tinctum , dicat... Hoc est nummus aureus falsus , qui præcipitanter agunt , addunt , *quod est aurum* ; & postea deprehendunt , præcipitanter factam fuisse hanc additionem.

Quinta. Quælibet vox , significans universale , sumptum pro aliquo tantùm inferiore indeterminato , semper significat complexionem ; ut ubi dicitur... Aliquis Romanorum Imperator leges omnes in ordinem disposuit ; sensus enim est , ali-

quis Romanorum Imperator , qui fuit Iustinianus, &c.

Nota porrò propositionem explicativam , quamdam esse definitionis speciem ; undè hîc , per modum appendicis , agemus de definitione.

De definitione.

Definitio generatim , est oratio quidpiam explicans ; & duplex est , nominis & entis.

De definitione nominis.

Definitio nominis , est oratio , quâ quis declarat , quo sensu , vocem aliquam sic accepturus. Circâ hanc definitionis speciem , sequentes servandæ sunt leges.

Prima. Si novum aliquod ens detegatur , significari poterit , vel voce quâdam novâ , vel voce composuâ , ex aliis jam usu receptis.

Secunda. Ex vocibus vulgaribus & obviis , illæ solæ sunt definiendæ , quæ laborant æquivocatione.

Tertia. Voces omnes , quæ scientiarum & artium sunt propriæ , definiendæ sunt : earum quippè significatio , non est omnibus nota.

Quarta. Definitio nominis nunquam est impugnanda , nisi Scriptor vocem ali-

quam accipiat, secundum significationem
diversam ab eâ, quam determinavit.

De definitione entis.

Definitio entis, est oratio naturam
ipsius explicans; hinc, si non sit legitima:
hæc explicatio, poterit impugnari: du-
plex est entis definitio, imperfecta, &
perfecta.

Definitio entis imperfecta, quæ voca-
tur aliter, *descriptio*, est ea, quâ entis na-
tura explicatur, vel per proprietates, ut
si homo definiatur, substantia virtutis &
doctrinæ capax; vel per accidentium mi-
nimè communium congeriem, ut ubi cor-
pora singularia describuntur; vel per cau-
sas, ut si homo definiatur, substantia ad
similitudinem Dei, & propter ipsius glo-
riam producta; vel per negationem, ut
si anima describatur, substantia carens
partibus, quæ sint substantiæ. Hæc entis
imperfecta definitio duas habet leges.

Prima. Sic se habet., Nihil poni debet
in entis descriptione, pro ipsius differen-
tiâ, quod non conferat ad illud ens, ab
alio quovis distinguendum.

Secunda. Nullum attributum exprimat
in descriptione, nisi facile deprehendatur
conveniens descripto, aut saltem, nisi
probetur ipsi conveniens.

Definitio entis perfecta, est oratio naturam ejus explicans per partes essentielles, quarum una sit communis, quæ dicitur *genus*; & altera propria, quæ vocatur *differentia*.

Quatuor vulgò traduntur leges, de conficiendâ perfectâ entis definitione.

Prima. Definitio debet esse clarior definito, quia nempe quævis explicatio, debet esse clarior explicato; hinc 1^o. à definitione perfectâ, exulare debent voces obsoletæ, seu inusitatæ, obscuræ, æquivocæ, & metaphoricæ; hinc 2^o. definitum ingredi non debet definitionem, quia remaneret obscuritas.

Secunda. Definitio reciprocari debet cum definito, id est, definitio & definitum debent de se invicem prædicari posse: hæc lex falsa est; ut constabit ex dicendis.

Tertia. Definitio debet esse adæquata, ita ut, nec sit manca, nec redundans: manca foret, si deesset pars essentialis, quæ sit vel genus, vel differentia; esset autem redundans, si præter genus & differentiam, contineret proprietates.

Quarta. Definitio constare debet genere proximo, & differentiâ specificâ. Nomine generis proximi, intelligitur generum omnium definiti, minimè universale; nomine verò differentiæ specificæ, intelli-

gitur attributum, à quo fluunt omnes definiti proprietates.

Hæc ultima lex sufficit, ad definitionem entis: eo enim ipso, quod definitum explicatur per genus proximum, & differentiam specificam, sufficienter explicatur ejus natura.

De propositionibus compositis.

Propositiones compositæ, vocantur illæ, quæ possunt in multas alias principales resolvi; & duplicis generis distinguuntur, clarè compositæ, quarum compositio & resolutio statim apparent; & exponibiles, quæ per alias voces exponi debent, ut earum compositio innotescat.

Sex numerantur propositiones clarè compositæ, scilicet copulativæ, disjunctivæ, conditionales, causales, relativæ, & discretivæ: quatuor autem numerantur exponibiles, exceptivæ, exclusivæ, inceptivæ, & desitivæ. De singulis est dicendum.

De copulativis.

Propositiones copulativæ, sunt illæ, quæ continent, vel multa subjecta, vel multa prædicata, inter se juncta per has, aut similes particulas, &, atque, necnon,

&c. Ex hâc definitione sequitur, propositiones copulativas triplicis tantum esse generis, de subiecto tantum, de prædicato tantum, & de subiecto & prædicato simul. Præterea, ejusmodi propositiones sunt vel affirmantes, vel negantes.

Ut propositiones copulativæ affirmantes, ut veræ admittantur, requiritur veritas ex omni parte; ita ut, si vel unica pars sit falsa, tota propositio negari possit: verbi gratiâ, ut vera sit hæc propositio... Petrus & Paulus student & ambulant, requiritur ut Petrus reipsâ studeat, & ambulet; pariter, ut Paulus reipsâ studeat, & ambulet. Satiùs tamen erit verum à falso discernere, designando quænam propositionis partes admittantur, ut veræ; quænam autem rejiciantur, ut falsæ.

Ut propositiones copulativæ negantes admittantur, ut veræ, perpendendum est utrum negatio cadat in partes copulatas, ut in hâc propositione... Neque Petrus, neque Paulus student; an autem cadat in ipsum verbum, ut in istâ propositione... Petrus & Paulus non student. Hoc detecto, sint sequentes regulæ:

Prima. Quoties negatio cadit in partes copulatas; toties ad veritatem propositionis totalis, requiritur, ut singulæ partes sint veræ: verbi gratiâ, ut vera sit hæc

propositio totalis, neque Petrus, neque Paulus, neque Jacobus, sunt Philosophi; requiritur, ut unusquisque seorsim reipsa non sit Philosophus: utilius tamen erit verum à falso secernere.

Secunda. Quoties negatio cadit in verbum; toties ad veritatem propositionis totalis, sufficit veritas ex aliquâ parte: verbi gratiâ, ut vera sit hæc propositio... Petrus & Paulus non student; sufficit, si alteruter non studeat. Satius pariter erit, verum à falso secernere.

Qui voluerit contradicendo, copulativas affirmantes impugnare, vel debet assumere partem quam putat falsam, & ipsam negativè exprimere; vel si partes omnes falsas esse contendat, debet assumere propositionem copulativam negantem, in quâ negatio cadat in partes copulatas.

Qui voluerit copulativas negantes impugnare, vel debet assumere partem quam putat falsam, & ipsam affirmativè exprimere; vel si partes omnes falsas esse contendat, assumere debet copulativam affirmantem.

De disjunctivis.

Propositio disjunctiva, ea dicitur, cuius, vel subjectum tantum, vel prædicatum tantum, vel utrumque simul, est multi-

plex ; ita ut adsit particula significans oppositionem ; vel inter illa subjecta , vel inter illa prædicata : particulæ disjunctivæ , seu significantes illam oppositionem , sunt hæc vel similes , *vel* , *aut* , &c.

Ut propositiones disjunctivæ affirmantes , veræ sint in materiâ necessariâ , ea requiritur inter membra disjunctionis oppositio , quæ nullum admittat medium ; sic vera est hæc disjunctiva. . . Anima mea , vel necessariò , vel contingenter existit ; falsa verò hæc. . . Quidquid est de multis prædicabile , vel est genus , vel proprium ; quia sunt alia de multis diversimodè prædicabilia. Ut autem disjunctivæ negantes veræ sint in eâdem materiâ , requiritur , ut nulla sit oppositio inter membra. Hinc vera est ista. . . Deus non est , vel æternus , vel immensus.

Ut disjunctivæ affirmantes , veræ sint in materiâ contingenti , ea requiritur inter membra disjunctionis oppositio , quæ , ut plurimum , non admittat medium ; hinc vera est hæc propositio. . . Homines agunt , vel ex utilitate , vel ex metu. Ut autem disjunctiva negans , vera sit in eâdem materiâ , requiritur , ut nulla sit inter membra oppositio ; hinc vera est hæc propositio. . . . Petrus non est , vel pius , vel doctus.

De conditionalibus.

Propositio conditionalis, est ea, quæ constat ex duabus propositionibus, inter se conjunctis, per has, aut similes particulas conditionales, *scilicet, modò, dummodò, &c.* ita ut harum propositionum, una se habeat, velut antecedens, & altera, tanquàm consequens; ut si dicatur... Si corpus habeat partes, quæ sint totidem substantiæ, est divisibile.

Ut conditionalis affirmans, vera sit in materiâ quâvis, requiritur ut adsit connexio inter partes, seu inter consequens & antecedens; licet antecedens, & consequens sint falsa: verbi gratiâ, vera est hæc conditionalis affirmans... Si lapis polleat intellectus, est cognitionis capax.

Ut conditionales negantes, veræ sint in materiâ quâvis, sufficit, si nulla sit connexio inter antecedens & consequens.

Notandum autem est connexionem, seu consequentiam, esse vel immediatam, vel mediatam. Tunc connexio dicitur immediata, quando terminus aliquis communis est utrique parti: ut in istâ... Si corpus est substantia merè passiva, corpus non est amoris capax. Tunc connexio dicitur mediata, quando nullus terminus utrique parti communis est, ut in hac propo-

sitione... Si bonorum creatorum possessio fastidium tandem pariat, solus Deus est hominis beatitudo.

Qui conditionalem affirmantem impugnare voluerit, debet loco particulæ conditionalis, assumere has, aut similes particulas, *quamvis*, *licet*, &c. Deinde, initio partis alterius, apponere debet has, aut similes voces, *non idcirco*, *non ideò*, &c. verbi gratiâ, si quis impugnare velit hanc propositionem... Si homo sit Philosophus, beatè vivit; contradictionem suam sic exprimere debet... Quamvis homo sit Philosophus, non idcirco beatè vivit.

Qui conditionalem negantem impugnare voluerit, debet assumere conditionalem affirmantem, & ejus consequenti præfigere unam ex his, aut similibus vocibus, *reverâ*, *reipsâ*, &c. verbi gratiâ, si quis propositionem hanc impugnare velit... Non, si Deus est justus, puniet peccatores; sic redarguere debet... Si Deus est justus, reipsâ puniet peccatores.

De causalibus.

Propositio causalis, est ea, quæ componitur ex duabus propositionibus inter se junctis per particulas causales, *quia*, *quoniam*; & duplex est, affirmans, ut...

quia Deus necessariò existit , est omnipotens ; & negans , ut... non quia Pater æternus genuit filium , est Creator.

Ut causalis affirmans vera sit , duo requiruntur. Primum , ut utraque pars sit vera ; secundum , ut ea pars , in quam cadit particula causalis , sit reipsâ vel causa , vel principium , vel origo alterius. Primò quidem utraque pars debet esse vera , quia quod falsum esse , neque potest esse causa , neque effectus , neque principium , neque origo. 2^o. Requiritur , ut ea pars in quam cadit particula causalis , reipsâ sit vel causa , vel principium , vel origo alterius ; quia in hoc potissimùm consistit propositionis causalis veritas.

Ut causalis negans vera sit , requiritur ut ea pars , in quam cadit particula causalis , reipsâ non sit alterius vel causa , vel principium , vel origo ; modò tamen negatio cadat in particulam causalem.

Hoc autem est discrimen , causales inter & conditionales : quod ad veritatem conditionalium affirmantium , sufficiat inter partes connexio ; & ad veritatem negantium sufficiat , si nulla sit ejusmodi connexio : at verò , ut causales affirmantes veræ sint , requiritur , & ut utraque pars sit vera , & ut ea pars , in quam cadit particula causalis , reipsâ sit vel causa , vel

principium, vel origo alterius: deinde ut causalis negans vera sit, requiritur ut ea pars, in quam cadit particula causalis, reipsâ non sit alterius, vel causa, vel principium, vel origo.

Notandum autem est, propositionem causalem, tunc tantum esse negantem, quando negatio cadit in ipsam particulam causalem. Hinc si negatio cadat, aut in verbum, aut in alterutrius partis complexionem, non idcirco propositio totalis vocatur negans: verbi gratiâ, hæc propositio causalis, non est negans... Quia Petrus non studet, manebit ignarus.

Qui causalem affirmantem impugnare voluerit, præponere debet parti, quæ spectatur ut effectus; has aut similes voces, *non idcirco*, *non ideo*, &c. verbi gratiâ, si quis impugnare voluerit hanc causalem affirmantem... Quia talis Princeps natus fuit sub tali sydere, fuit infelix; sic redarguere debet... Quia talis Princeps natus fuit sub tali sydere, non idcirco fuit infelix. Eadem propositio ritè poterit impugnari, præfigendo particulam negativam ipsi particulæ causali, dicendo non quia talis Princeps, &c.

Qui causalem negantem impugnare voluerit, causalem affirmantem assumere debet.

De relativis.

Propositio relativa, dicitur ea, quæ exprimit, vel aliquem ordinem, vel aliquam comparisonem inter partes, ex quibus componitur: vocatur *relativa*, quando clarè exprimitur ordo; vocatur autem *comparativa*, quando non tam obvius est ordo: utraque duplex est, affirmans, & negans. Ut propositio affirmans sive relativa, sive comparativa, vera sit, requiritur, ut reipsâ quidam sit, ut plurimum, inter partes ordo: verbi gratiâ, ut vera sit hæc propositio indefinita, talis est vita, qualis fuit institutio; requiritur ut homines, ut plurimum, vivant, prout fuerunt in ætate juvenili instituti.

Ut propositio negans, sive relativa, sive comparativa, sit vera, requiritur, ut nullus sit, ut plurimum, ordo inter partes: verbi gratiâ, ut vera sit hæc propositio... Liberi non sunt tales, quales fuerunt eorum parentes; requiritur, ut liberorum vivendi ratio, ut plurimum, discrepet à vivendi ratione parentum.

Difficultas autem est, utrùm ad veritatem affirmantium comparatarum requiratur veritas utriusque partis in gradu positivo; verbi gratiâ, utrùm ad veritatem hujus propositionis, ex Scripturâ Sacrà de-

cerptæ,

cerptæ; *melius est habitare cum dracone, quàm cum muliere litigiosâ*; requiratur ut veræ sint hæ propositiones... *Bonum est habitare cum dracone, bonum est habitare cum muliere litigiosâ.*

Respondeo 1°. Si agatur de comparatione bonitatis, ut in exemplo mox allato, non requiri veritatem utriusque partis, in gradu positivo; quia scilicet minus malum comparatè ad majus, dici potest bonum quoddam; undè vera est allata propositio. Sensus enim est, minus est malum habitare cum dracone, quàm cum muliere litigiosâ.

Respondeo 2°. Si agatur de aliâ quâvis comparatione, requiri veritatem utriusque partis, in gradu positivo; hinc falsæ sunt sequentes propositiones... *Angelus candidior est nive, Angelus candidior est Cacodæmone.*

Propositiones relativæ & comparativæ duobus modis impugnari possunt: verbi gratiâ, hæc Epicureorum propositio... *Dolor est malorum omnium maximus*; impugnari potest dicendo, dolor est quidem malum quoddam, sed non est omnium maximum, vel dolor non est malum propriè dictum.

De discretivis.

Propositiones discretivæ, dicuntur illæ,
Tomus I. N

quæ componuntur ex propositionibus inter se quodammodo oppositis; ita ut hæc oppositio significetur per has, aut similes voces, *sed*, *at*, *attamen*, &c. ut.. Petrus ingenio quidem pollet, *sed* piger est.

Veritas harum propositionum pendet, tum à veritate partium simul sumptarum, tum ab oppositione quâdam, quæ reperiri debet inter has partes. Hinc vera est sequens propositio.. Titius nobilis est, *sed* non vivit, ut nobilem decet. Quod si nulla sit oppositio inter partes, tunc propositio totalis evadit ridicula; qualis esset sequens.. Judas Iscariotes fuit corpore magnus; attamen Christum Dominum Judæis tradidit.

Ut propositio discretiva possit impugnari, eligendus est unus ex modis sequentibus: verbi gratiâ, si velim propositionem hanc impugnare.. Felicitas hominis, non à virtute, *sed* à scientiâ pendet; sic redarguere poterò, 1^o.. Felicitas hominis, non à scientiâ, *sed* à virtute pendet. 2^o.. Felicitas hominis, & à virtute, & à scientiâ pendet. 3^o.. Felicitas hominis, nec à virtute, nec à scientiâ pendet.

De exclusivis.

Propositiones exclusivæ, sunt illæ, quæ enunciant attributum quoddam, vel con-

venire, vel non convenire soli cuidam subiecto; hinc aliæ sunt affirmantes, & aliæ negantes. Affirmantes, sunt illæ, in quibus nulla negatio cadit in particulam exclusivam, quales sunt sequentes... Solus Deus est omnipotens, solus Deus non mutatur, ratione perfectionum. Exclusivæ negantes, sunt illæ, in quibus negatio cadit in particulam exclusivam: ut non solus Deus est spiritus.

Propositio exclusiva affirmans, resolvitur in duas principales, quarum una est affirmans, & altera negans: verbi gratiâ, hæc propositio... Solus Deus est omnipotens, sic resolvitur... Deus est omnipotens... Nullus spiritus, à Deo diversus, est omnipotens.

Propositio exclusiva negans, resolvitur in duas affirmantes: verbi gratiâ, hæc propositio... non solus Deus est spiritus, sic resolvitur... Deus est spiritus... alia substantiæ species, à Deo diversa, est spiritus.

Ut affirmantes veræ sint, requiritur, ut resolutione factâ, prædicatum conveniat uni subiecto, & removeatur ab altero: ut autem negativæ veræ sint, requiritur, ut resolutione factâ, prædicatum utrique subiecto conveniat.

Exclusivæ affirmantes tribus modis im-

pugnari possunt : verbi gratiâ , hæc propositio... soli Philosophi sunt felices , sic impugnari potest. 1°. Ne quidem Philosophi sunt felices. 2°. Non soli Philosophi sunt felices. 3°. Soli Philosophi non sunt felices.

Exclusivæ negantes tribus etiam modis impugnari possunt : verbi gratiâ , hæc propositio... non soli Philosophi sunt sapientes , sic impugnari potest. 1°. Soli Philosophi sunt sapientes. 2°. Soli Philosophi non sunt sapientes. 3°. Neque Philosophi , neque cæteri homines , sunt sapientes.

Notandum autem 1°. quasdam propositiones exclusivas esse , quantum ad sensum , quæ non apparent exclusivæ , quantum ad voces : tales sunt sequentes propositiones. .. qui gloriatur , in Domino gloriatur. .. unicus est Deus. .. unica est fides. Sensus enim est , in solo Deo gloriandum est... sola aliqua species spiritûs , est Deus... sola fides divina , est vera fides.

Notandum 2°. omnes propositiones particulares exclusivas esse , quantum ad sensum : verbi gratiâ , hæc propositio... quidam homines sunt docti , sic resolvitur , aut sic resolvi debet. .. quidam homines reipsâ sunt docti , cæteri verò non sunt docti.

De exceptivis.

Propositiones exceptivæ, dicuntur illæ, in quibus attributa, vel affirmantur, vel negantur de subjectis communibus, ita ut quædam ex ejusmodi subjectis excipiantur: verbi gratiâ, omnes homines, præter veros Christianos, sunt infelices. Apparet autem, 1°. ipsas esse revocandas ad exclusivas; suprà dicta namque propositio huic æquivalet. . . . Soli veri Christiani sunt felices. Apparet autem, 2°. propositiones exceptivas locum tantum habere posse in materiâ contingenti, quia in materiâ necessariâ nulla est exceptio.

De inceptivis & desitivis.

Propositiones inceptivæ, vocantur illæ, quæ significant initium alicujus entis; desitivæ verò, quæ significant entis alicujus finem: & sunt vel affirmantes, vel negantes.

Ut ejusmodi propositiones sint veræ, partes earum reipsâ dicere debent ordinem ad tempus, per propositiones significatum; hinc veræ sunt hæ propositiones. . . Post mortem Christi, Lex Mosaïca vim obligandi non habuit. . . Post mortem Christi, Lex Evangelica vim habuit.

De propositionibus absolutis, & modalibus.

Propositio absoluta, dicitur ea, quæ non exprimit modum, quo prædicatum convenit, aut non convenit subjecto: tales sunt omnes propositiones, de quibus huc usque dictum fuit; unde circa ipsas nihil superest hîc examinandum.

Propositio modalis, ea est, quæ exprimit modum, quo prædicatum convenit, aut non convenit subjecto; quales sunt hæ propositiones... Deus est necessariò justus... Quidam homines sunt contingenter justî.

In omni propositione modali, tria distinguuntur à Philosophis, scilicet *dictum*, *copula verbalis*, & *modus*. Quid sit copula verbalis dictum fuit alibi? *Dictum*, nihil aliud est, quàm subjectum & prædicatum, simul sumpta. Modus est vox significans, quo modo prædicatum conveniat, aut non conveniat subjecto.

Modus est, vel nomen, ut in hac propositione... Necessè est, Deum esse justum; vel est adverbium, ut Deus est necessariò justus. Propositio modalis de nomine, in eo solo differt à modali de adverbio, quod in modali de nomine, possibi-

litate enunciante, partes *dicti* significantur inter se junctæ; in modali autem de adverbio, significantur, à se invicem separatae. Hinc vera est hæc propositio... Loquens est, possibiliter tacens; falsa verò ista... Loquentem esse tacentem, est possibile.

Propositio modalis, vel est affirmans, vel negans. Tunc est affirmans, quando modus affirmatur; negans verò, quando modus negatur: hinc affirmans est hæc propositio... necesse est, spiritum non esse corpus; hæc autem est negans... non est necesse, hominem esse Philosophum.

Veritas & falsitas modalium, pendent potissimum, à veritate & falsitate modorum; hinc vera est hæc propositio... Deus est necessario justus; ista verò falsa... Deus est contingenter justus.

Quatuor numerantur à Philosophis diversi modi; *possibile*, *impossibile*, *necessarium*, & *contingens*. Circà hos modos, observandum est, 1°. *possibile*, nec esse necessarium, nec contingens; quia abstrahit, modò à necessario, modò à contingenti. 2°. Non *necessarium*, idem non esse ac contingens, quia impossibile est etiam non *necessarium*. 3°. Non *contingens* idem significare ac *necessarium*, quia impossibile dici non potest, non contingens.

Longè plures sunt alii modi, quàm quatuor superiùs designati : omnia namque adverbia, imò multæ additiones factæ, vel subjecto, vel prædicato, vocari possunt totidem modi. Diligenter autem attendendum est, in quam propositionis partem eadant illi modi : prout enim in has, aut illas voces incidunt, sensus omninò diversos efficiunt ; sicut duplici exemplo sequenti patebit. Sint, verbi gratiâ, hæ propositiones... *agens liberum, potest agere simul, & non agere...* *agens liberum, simul potest agere, & non agere* ; prior namque propositio falsa est, quia vox ista *simul* cadit in actum & non actum, qui simul esse nequeunt ; posterior autem est vera, quia vox eadem cadit in potentias agendi & non agendi, quæ simul existunt.

Sint rursùs hæ propositiones... *homo necessariò potest esse doctus...* *homo potest esse necessariò doctus* : prior vera est, quia hoc adverbium, *necessariò*, cadit in potentiam, quæ reipsâ necessaria est ; posterior autem est falsa, quia idem adverbium cadit in doctrinam, quæ necessaria non est, sed contingens. Inter modos numerari potest particula, *non*, prout enim cadit in voces diversas, diversa significat : verbi gratiâ, valdè diversæ sunt hæ pro-

positiones... non solus Deus est spiritus... solus Deus non est spiritus... sensus enim prioris est... Deus est spiritus, & aliæ species sunt etiam spiritus : quod est ex omni parte verum. Sensus autem posterioris est... Deus non est spiritus, & omnes cæteræ species sunt spiritus : quod est ex omni parte falsum. Frequens exercitatio cæteros propositionum modos edocebit.



CONCERTATIONES

circà Iudicium.

HŌc ordine procedemus in his Concertationibus. 1°. Differemus de iudicio universim. 2°. De materiâ propositionis. 3°. De ipsius formâ. 4°. De propositionum quantitate. 5°. De earum qualitate. 6°. De propositionum conversionibus. 7°. Denique de propositionum oppositione.

De iudicio universim.

Duplex occurrit difficultas, circà iudicium universim. Prima, quomodò sit definiendum? Secunda, an sit actus simplex: ut solvantur, sint,

N v

Conclusio prima.

Judicium universum, definiri debet actus intellectûs, quo dicitur habitudo prædicati ad subjectum. Judicium enim definiri debet eâ definitione, quâ positâ, distinguitur tum ab apprehensione, tum à discursu: atqui, positâ suprâ dictâ definitione, judicium differt ab apprehensione & discursu: scilicet, aliud est attendere ad objecta; aliud autem eorum habitudines, seu relationes detegere, & dicere. Pariter aliud est, habitudinem illam dicere; aliud verò detegere, & dicere connexionem nius judicii, cum alio, vel cum aliis; proindèque, &c.

Quæres autem, cur judicium non definiatur, actus intellectûs, quo unum affirmatur, aut negatur de alio?

Respondeo judicium non esse definiendum, eâ ratione, quæ est potius distributio judicii universum sumpti, quàm ipsius naturæ explicatio: porro allata oratio sic se habet; proindèque, &c.

Docent Cartesiani, judicium esse actum voluntatis, non autem actum intellectûs; imò contendunt, intellectum esse potentiam merè passivam. Opinionem hanc refellimus in Metaphysicâ.

Conclusio secunda.

Judicium, est quid simplex in ratione actûs. Illud enim dicitur simplex, in ratione actûs, quod non componitur ex aliis actibus: atqui judicium non, &c. Si enim judicium, ex aliis actibus componeretur, certè ex apprehensionibus subjecti & prædicati: atqui judicium non, &c. Quod enim supponit illas apprehensiones jam existentes, ex his non componitur: atqui judicium ipsas præsupponit. Prius enim est apprehendere objecta, quàm illorum habitudines detegere, & dicere.

Dices 1°. Quod non potest existere, sine apprehensionibus subjecti & prædicati, componitur ex illis: atqui judicium sic se habet; ergo, &c.

Distinguo majorem. Quod non potest existere sine apprehensionibus, tanquàm partibus suis essentialibus, concedo. Tanquàm aliquibus prærequisitis, nego. Distingue pariter minorem, & nega consequentiam. Reverâ, &c.

Dices 2°. Tale est judicium, quale est ejus signum: atqui signum judicii, nempe propositio, est quid compositum; ergo, &c.

1°. Nego majorem. Signum enim est

semper quid diversum à significato ; sicut colligitur ex signi definitione.

2^o. Nego minorem. Signum enim judicii , ut actûs , est hæc sola vocula , *est* ; hinc propositio est quidem signum judicii , tum formaliter , tum objectivè sumpti ; sed sola vocula , *est* , dici potest signum judicii formaliter sumpti.

Quæres autem , an judicium , objectivè sumptum , sit quid compositum ?

Respondeo , judicium , objectivè sumptum , esse quid compositum. Probatum enim fuit , objectum quodlibet , ex infinitis partibus essentialibus esse compositum.

De materiâ propositionis.

Certum est apud omnes , propositionem quamlibet , ratione materiæ , seu objecti spectatam , duplicis tantum esse generis , necessariam nimirum & contingentem ; quia necessarium inter & contingens , nihil determinatum mediat. Difficultas autem est , quotuplex sit habitudo prædicati ad subjectum , in utràque hâc materiâ.

Recentiores nonnulli docent , habitudinem illam quintuplicem esse in materiâ necessariâ , scilicet *inseparabilitatem* , ut in hâc propositione... Deus est omnipotens ; *incompatibilitatem* , ut... Deus non est con-

tingenter existens; *præcisionem*, ut... substantia præscindit, vel à spiritu, vel à corpore; *compatibilitatem*, ut... Deus potuit creare mundum: denique, *separabilitatem*, ut... Deus potuit non creare mundum. Deinde volunt, duplicem tantum esse habitudinem in materiâ contingenti, nempe, *unionem*, ut... corpora existunt; & *separationem*, ut... Judas-Ischariotes non est salvus.

Conclusio.

Duplex tantum est habitudo, prædicati ad subjectum, in materiâ quâvis. Totuplex enim est illa habitudo; quotuplex est modus diversus, quo prædicatum se habere potest ad subjectum: atqui duplex tantum est modus ille diversus, in materiâ quâvis. Quodlibet enim prædicatum enuncietur, vel cum subjecto conjunctum, vel ab ipso separatum; impossibilis enim est propositio, in quâ prædicatum nec enuncietur cum subjecto conjunctum, nec ab eo separatum, hoc est, impossibilis est propositio, quæ neque sit affirmans, neque negans; proindeque, &c.

Dices: In hac propositione... Substantia non est spiritalis, neque enuncietur conjunctio, neque separatio; sed enuncietur *præcisio*; ergo plures sunt, quàm duæ

De relativis.

Propositio relativa, dicitur ea, quæ exprimit, vel aliquem ordinem, vel aliquam comparisonem inter partes, ex quibus componitur: vocatur *relativa*, quando clarè exprimitur ordo; vocatur autem *comparativa*, quando non tam obvius est ordo: utraque duplex est, affirmans, & negans. Ut propositio affirmans sive relativa, sive comparativa, vera sit, requiritur, ut reipsâ quidam sit, ut plurimum, inter partes ordo: verbi gratiâ, ut vera sit hæc propositio indefinita, talis est vita, qualis fuit institutio; requiritur ut homines, ut plurimum, vivant, prout fuerunt in ætate juvenili instituti.

Ut propositio negans, sive relativa, sive comparativa, sit vera, requiritur, ut nullus sit, ut plurimum, ordo inter partes: verbi gratiâ, ut vera sit hæc propositio... Liberi non sunt tales, quales fuerunt eorum parentes; requiritur, ut liberorum vivendi ratio, ut plurimum, discrepet à vivendi ratione parentum.

Difficultas autem est, utrùm ad veritatem affirmantium comparatarum requiratur veritas utriusque partis in gradu positivo: verbi gratiâ, utrùm ad veritatem hujus propositionis, ex Scripturâ Sacrà decerpæ,

cerptæ; *melius est habitare cum dracone, quam cum muliere litigiosâ*; requiratur ut veræ sint hæc propositiones... *Bonum est habitare cum dracone, bonum est habitare cum muliere litigiosâ.*

Respondeo 1°. Si agatur de comparatione bonitatis, ut in exemplo mox allato, non requiri veritatem utriusque partis, in gradu positivo; quia scilicet minus malum comparatè ad majus, dici potest bonum quoddam; undè vera est allata propositio. Sensus enim est, minus est malum habitare cum dracone, quam cum muliere litigiosâ.

Respondeo 2°. Si agatur de aliâ quâvis comparatione, requiri veritatem utriusque partis, in gradu positivo; hinc falsæ sunt sequentes propositiones... *Angelus candidior est nive, Angelus candidior est Cacodæmone.*

Propositiones relativæ & comparativæ duobus modis impugnari possunt: verbi gratiâ, hæc Epicureorum propositio... *Dolor est malorum omnium maximus*; impugnari potest dicendo, dolor est quidem malum quoddam, sed non est omnium maximum, vel dolor non est malum propriè dictum.

De discretivis.

Propositiones discretivæ, dicuntur illæ,
Tomus I. N

quæ componuntur ex propositionibus inter se quodammodò oppositis ; ita ut hæc oppositio significetur per has , aut similes voces , *sed* , *at* , *attamen* , &c. ut... Petrus ingenio quidem pollet , *sed* piger est.

Veritas harum propositionum pendet , tum à veritate partium simul sumptarum , tum ab oppositione quâdam , quæ reperiri debet inter has partes. Hinc vera est sequens propositio. . . Titius nobilis est , *sed* non vivit , ut nobilem decet. Quod si nulla sit oppositio inter partes , tunc propositio totalis evadit ridicula ; qualis esset sequens. . . Judas Iscariotes fuit corpore magnus ; attamen Christum Dominum Judæis tradidit.

Ut propositio discretiva possit impugnari , eligendus est unus ex modis sequentibus : verbi gratiâ , si velim propositionem hanc impugnare... Felicitas hominis , non à virtute , *sed* à scientiâ pendet ; sic redarguere poterò , 1^o... Felicitas hominis , non à scientiâ , *sed* à virtute pendet. 2^o... Felicitas hominis , & à virtute , & à scientiâ pendet. 3^o... Felicitas hominis , nec à virtute , nec à scientiâ pendet.

De exclusivis.

Propositiones exclusivæ , sunt illæ , quæ enunciant attributum quoddam , vel con-

venire, vel non convenire soli cuidam subiecto; hinc aliæ sunt affirmantes, & aliæ negantes. Affirmantes, sunt illæ, in quibus nulla negatio cadit in particulam exclusivam, quales sunt sequentes... Solus Deus est omnipotens, solus Deus non mutatur, ratione perfectionum. Exclusivæ negantes, sunt illæ, in quibus negatio cadit in particulam exclusivam: ut non solus Deus est spiritus.

Propositio exclusiva affirmans, resolvitur in duas principales, quarum una est affirmans, & altera negans: verbi gratiâ, hæc propositio... Solus Deus est omnipotens, sic resolvitur... Deus est omnipotens... Nullus spiritus, à Deo diversus, est omnipotens.

Propositio exclusiva negans, resolvitur in duas affirmantes: verbi gratiâ, hæc propositio... non solus Deus est spiritus, sic resolvitur... Deus est spiritus... alia substantiæ species, à Deo diversa, est spiritus.

Ut affirmantes veræ sint, requiritur, ut resolutione factâ, prædicatum conveniat uni subiecto, & removeatur ab altero: ut autem negativæ veræ sint, requiritur, ut resolutione factâ, prædicatum utrique subiecto conveniat.

Exclusivæ affirmantes tribus modis im-

N ij

pugnari possunt : verbi gratiâ , hæc propositio... soli Philosophi sunt felices , sic impugnari potest. 1°. Ne quidem Philosophi sunt felices. 2°. Non soli Philosophi sunt felices. 3°. Soli Philosophi non sunt felices.

Exclusivæ negantes tribus etiam modis impugnari possunt : verbi gratiâ , hæc propositio... non soli Philosophi sunt sapientes , sic impugnari potest. 1°. Soli Philosophi sunt sapientes. 2°. Soli Philosophi non sunt sapientes. 3°. Neque Philosophi , neque cæteri homines , sunt sapientes.

Notandum autem 1°. quasdam propositiones exclusivas esse , quantum ad sensum , quæ non apparent exclusivæ , quantum ad voces : tales sunt sequentes propositiones. . . qui gloriatur , in Domino gloriatur. . . unicus est Deus. . . unica est fides. Sensus enim est , in solo Deo gloriandum est... sola aliqua species spiritûs , est Deus... sola fides divina , est vera fides.

Notandum 2°. omnes propositiones particulares exclusivas esse , quantum ad sensum : verbi gratiâ , hæc propositio... quidam homines sunt docti , sic resolvitur , aut sic resolvi debet. . . quidam homines reipsâ sunt docti , cæteri verò non sunt docti. .

De exceptivis.

Propositiones exceptivæ, dicuntur illæ, in quibus attributa, vel affirmantur, vel negantur de subjectis communibus, ita ut quædam ex ejusmodi subjectis excipiantur: verbi gratiâ, omnes homines, præter veros Christianos, sunt infelices. Apparet autem, 1°. ipsas esse revocandas ad exclusivas; suprà dicta namque propositio huic æquivalet. . . . Soli veri Christiani sunt felices. Apparet autem, 2°. propositiones exceptivas locum tantum habere posse in materiâ contingenti, quia in materiâ necessariâ nulla est exceptio.

De inceptivis & desitivis.

Propositiones inceptivæ, vocantur illæ, quæ significant initium alicujus entis; desitivæ verò, quæ significant entis alicujus finem: & sunt vel affirmantes, vel negantes.

Ut ejusmodi propositiones sint veræ, partes earum reipsâ dicere debent ordinem ad tempus, per propositiones significatum; hinc veræ sunt hæ propositiones. . . Post mortem Christi, Lex Mosaïca vim obligandi non habuit. . . Post mortem Christi, Lex Evangelica vim habuit.

De propositionibus absolutis, & modalibus.

Propositio absoluta, dicitur ea, quæ non exprimit modum, quo prædicatum convenit, aut non convenit subjecto: tales sunt omnes propositiones, de quibus huc usque dictum fuit; undè circa ipsas nihil superest hîc examinandum.

Propositio modalis, ea est, quæ exprimit modum, quo prædicatum convenit, aut non convenit subjecto; quales sunt hæ propositiones... Deus est necessariò justus... Quidam homines sunt contingenter iusti.

In omni propositione modali, tria distinguuntur à Philosophis, scilicet *dictum*, *copula verbalis*, & *modus*. Quid sit copula verbalis dictum fuit alibi? *Dictum*, nihil aliud est, quàm subjectum & prædicatum, simul sumpta. Modus est vox significans, quo modo prædicatum conveniat, aut non conveniat subjecto.

Modus est, vel nomen, ut in hac propositione... Necessè est, Deum esse justum; vel est adverbium, ut Deus est necessariò justus. Propositio modalis de nomine, in eo solo differt à modali de adverbio, quod in modali de nomine, possibi-

litteratam enunciante , partes *dicti* significentur inter se junctæ ; in modali autem de adverbio, significantur, à se invicem separatae. Hinc vera est hæc propositio... Loquens est , possibiliter tacens ; falsa verò ista... Loquentem esse tacentem , est possibile.

Propositio modalis, vel est affirmans, vel negans. Tunc est affirmans, quando modus affirmatur ; negans verò, quando modus negatur : hinc affirmans est hæc propositio... necesse est ; spiritum non esse corpus ; hæc autem est negans... non est necesse , hominem esse Philosophum.

Veritas & falsitas modalium, pendent potissimum, à veritate & falsitate modorum ; hinc vera est hæc propositio... Deus est necessariò justus ; ista verò falsa... Deus est contingenter justus.

Quatuor numerantur à Philosophis diversi modi ; *possibile* , *impossibile* , *necessarium* , & *contingens*. Circà hos modos, observandum est , 1°. *possibile* , nec esse necessarium, nec contingens ; quia abstrahit, modò à necessario, modò à contingenti. 2°. Non *necessarium* , idem non esse ac contingens , quia impossibile est etiam non *necessarium*. 3°. Non *contingens* idem significare ac *necessarium* , quia impossibile dici non potest , non contingens.

Longè plures sunt alii modi, quàm quatuor superiùs designati : omnia namque adverbia, imò multæ additiones factæ, vel subjecto, vel prædicato, vocari possunt totidem modi. Diligenter autem attendendum est, in quam propositionis partem cadant illi modi : prout enim in has, aut illas voces incidunt, sensus omninò diversos efficiunt ; sicut duplici exemplo sequenti patebit. Sint, verbi gratiâ, hæ propositiones... agens liberum, potest agere *simul*, & non agere... agens liberum, *simul* potest agere, & non agere ; prior namque propositio falsa est, quia vox ista *simul* cadit in actum & non actum, qui simul esse nequeunt ; posterior autem est vera, quia vox eadem* cadit in potentias agendi & non agendi, quæ simul existunt.

Sint rursùs hæ propositiones... homo necessariò potest esse doctus... homo potest esse necessariò doctus : prior vera est, quia hoc adverbium, *necessariò*, cadit in potentiam, quæ reipsâ necessaria est ; posterior autem est falsa, quia idem adverbium cadit in doctrinam, quæ necessaria non est, sed contingens. Inter modos numerari potest particula, *non*, prout enim cadit in voces diversas, diversa significat : verbi gratiâ, valdè diversæ sunt hæ pro-

positiones... non solus Deus est spiritus... solus Deus non est spiritus... sensus enim prioris est... Deus est spiritus, & aliæ species sunt etiam spiritus : quod est ex omni parte verum. Sensus autem posterioris est... Deus non est spiritus, & omnes cæteræ species sunt spiritus : quod est ex omni parte falsum. Frequens exercitatio cæteros propositionum modos edocebit.



CONCERTATIONES

circa Iudicium.

HOC ordine procedemus in his Concertationibus. 1°. Differemus de iudicio universim. 2°. De materiâ propositionis. 3°. De ipsius formâ. 4°. De propositionum quantitate. 5°. De earum qualitate. 6°. De propositionum conversionibus. 7°. Denique de propositionum oppositione.

De iudicio universim.

Duplex occurrit difficultas, circa iudicium universim. Prima, quomodo sit definiendum? Secunda, an sit actus simplex: ut solvantur, sint,

N. v.

Conclusio prima.

Judicium universum, definiri debet actus intellectûs, quo dicitur habitudo prædicari ad subjectum. Judicium enim definiri debet eâ definitione, quâ positâ, distinguitur tum ab apprehensione, tum à discursu: atqui, positâ suprâ dictâ definitione, judicium differt ab apprehensione & discursu: scilicet, aliud est attendere ad objecta; aliud autem eorum habitudines, seu relationes detegere, & dicere. Pariter aliud est, habitudinem illam dicere; aliud verò detegere, & dicere connexionem nius judicii, cum alio, vel cum aliis; proindèque, &c.

Quæres autem, cur judicium non definiatur, actus intellectûs, quo unum affirmatur, aut negatur de alio?

Respondeo judicium non esse definendum, eâ ratione, quæ est porius distributio judicii universum sumpti, quàm ipsius naturæ explicatio: porrò allata oratio sic se habet; proindèque, &c.

Docent Cartesiani, judicium esse actum voluntatis, non autem actum intellectûs; imò contendunt, intellectum esse potentiam merè passivam. Opinionem hanc refellemus in Metaphysicâ.

Conclusio secunda.

Judicium, est quid simplex in ratione actûs. Illud enim dicitur simplex, in ratione actûs, quod non componitur ex aliis actibus: atqui judicium non, &c. Si enim judicium, ex aliis actibus componeretur, certè ex apprehensionibus subjecti & prædicati: atqui judicium non, &c. Quod enim supponit illas apprehensiones jam existentes, ex his non componitur: atqui judicium ipsas præsupponit. Prius enim est apprehendere objecta, quàm illorum habitudines detegere, & dicere.

Dices 1°. Quod non potest existere, sine apprehensionibus subjecti & prædicati, componitur ex illis: atqui judicium sic se habet; ergo, &c.

Distinguo majorem. Quod non potest existere sine apprehensionibus, tanquàm partibus suis essentialibus, concedo. Tanquàm aliquibus prærequisitis, nego. Distingue pariter minorem, & nega consequentiam. Reverâ, &c.

Dices 2°. Tale est judicium, quale est ejus signum: atqui signum judicii, nempe propositio, est quid compositum; ergo, &c.

1°. Nego majorem. Signum enim est

semper quid diversum à significato ; sicut colligitur ex signi definitione.

2^o. Nego minorem. Signum enim judicii , ut actus , est hæc sola vocula , *est* ; hinc propositio est quidem signum judicii , tum formaliter , tum objectivè sumpti ; sed sola vocula , *est* , dici potest signum judicii formaliter sumpti.

Quæres autem , an judicium , objectivè sumptum , sit quid compositum ?

Respondeo , judicium , objectivè sumptum , esse quid compositum. Probatum enim fuit , objectum quodlibet , ex infinitis partibus essentialibus esse compositum.

De materiâ propositionis.

Certum est apud omnes , propositionem quamlibet , ratione materiæ , seu objecti spectatam , duplicis tantum esse generis , necessariam nimirum & contingentem ; quia necessarium inter & contingens , nihil determinatum mediat. Difficultas autem est , quotuplex sit habitudo prædicati ad subjectum , in utràque hâc materiâ.

Recentiores nonnulli docent , habitudinem illam quintuplicem esse in materiâ necessariâ , scilicet *inseparabilitatem* , ut in hâc propositione... Deus est omnipotens ; *incompatibilitatem* , ut... Deus non est con-

tingenter existens; *præcisionem*, ut... substantia præscindit, vel à spiritu, vel à corpore; *compatibilitatem*, ut... Deus potuit creare mundum: denique, *separabilitatem*, ut... Deus potuit non creare mundum. Deinde volunt, duplicem tantum esse habitudinem in materiâ contingenti, nempe, *unionem*, ut... corpora existunt; & *separationem*, ut... Judas Iscariotes non est salvus.

Conclusio.

Duplex tantum est habitudo, prædicati ad subjectum, in materiâ quâvis. Totuplex enim est illa habitudo; quotuplex est modus diversus, quo prædicatum se habere potest ad subjectum: atqui duplex tantum est modus ille diversus, in materiâ quâvis. Quodlibet enim prædicatum enunciat, vel cum subjecto conjunctum, vel ab ipso separatum; impossibilis enim est propositio, in quâ prædicatum nec enuncietur cum subjecto conjunctum, nec ab eo separatum, hoc est, impossibilis est propositio, quæ neque sit affirmans, neque negans; proindèque, &c.

Dices. In hac propositione... Substantia non est spiritalis, neque enunciat, conjunctio, neque separatio; sed enunciat, *præcisio*; ergo plures sunt, quàm duæ

habitudines prædicati, ad subjectum.

1°. Nego antecedens: vel enim sensus allatæ propositionis est... substantia præscindit à spiritualitate; vel sensus est... spiritualitas non est conjuncta cum substantiâ; vel denique hîc sensus est... substantia non includit in idæâ suâ spiritualitatem: porro in his omnibus casibus enunciatur, vel conjunctio, vel separatio; proindèque, &c.

2°. Si sensus allatæ propositionis hîc sit... substantia universim præscindit à spiritualitate, & præscindit à corporeitate; tunc falsa est, & debuisset sic exprimi... substantia præscindit, vel à spiritualitate, vel à corporeitate: hinc, nisi constet aliundè, substantiam esse conjunctam cum spiritualitate, non poterit verè dici præscindens à spiritualitate. Ratio generalis est, quia, ut genus præscindat ab aliquo, è suis inferioribus, debet esse inseparabile ab hoc inferiore.

Instabis. Si sensus allatæ propositionis hîc sit... substantia conjuncta cum spiritualitate, præscindit à spiritualitate; tunc spiritualitas est forma prædicati; & hæc forma, nec enunciatur cum subjecto conjuncta, nec ab eo separata: atqui reipsâ sensus allatæ propositionis est ejusmodi; ergo, &c.

Nego sequelam. Forma namque prædicati propositionis sic enunciatae, est *præcisio* à spiritualitate; & tunc hæc forma per propositionem illam, enunciatum cum subiecto restricto conjuncta.

Nota porro, particulam, *non*, à Philosophis recentioribus usurpari, pro signo præcisionis; quamvis nunquam fuerit antea pro tali signo sumpta.

Colliges præcisionem, compatibilitatem & separabilitatem, revocari ad eam habitudinem, quæ dicta fuit à nobis *inseparabilitas*. 1°. Namque quando dicitur... substantia præscindit in rei veritate, præcisio includitur in idæâ substantiæ. 2°. Quando dicitur... Deus potuit creare mundum, potentia creandi includitur in idæâ Dei. 3°. Denique quando dicitur... Deus potuit mundum non creare, prædicatum inseparabile est à subiecto.

In materiâ igitur necessariâ, duæ habitudines vocabuntur in posterum, *inseparabilitas* & *incompatibilitas*; in materiâ verò contingenti, *unio*, seu *conjunctio*, & *separatio*.

De formâ propositionis.

Circà formam propositionis, duo possunt inquiri. Primum, quodplex sit in rei veritate verbum? Secundum, an præ-

dicatum propositionis identificetur cum ejus subjecto? posterior quæstio duas alias complectitur; an scilicet, forma prædicati identificetur cum subjecto propositionis; & an subjectum prædicati identificetur cum subjecto propositionis?

Conclusio prima.

Sola vocula, *est*, aut quælibet æquivalens, sufficit ad rationem verbi. Quoties enim unicum ens est significandum, toties unica vox sufficit ad ipsum significandum: atqui unicum ens est significandum per verbum; nimirum actus intellectus, quo dicitur habitudo prædicati ad subjectum; proindeque, &c.

At, inquires, si sola vocula, *est*, sufficeret ad rationem verbi, dici posset... homines *est* mortales: atqui hoc dici non potest; ergo, &c.

Distinguo majorem. Dici posset philosophicè, concedo: Grammaticaliter, nego. Distingue pariter minorem, & nega consequentiam.

Itaque Grammatici, brevitaris causâ, multa entia significarunt, unicâ voce: modò namque subjectum, prædicatum, verbum & tempus, unicâ voce significant: ut ubi dicunt, *orabo*; sensus enim est, *ego est in posterum orans*: ob eandem rationem,

varias excogitarunt conjugationes, variorumque modos: at quantumvis involuta sit vocula, *est*, semper intelligenda est in omnibus iis vocibus, quæ vocantur à Grammaticis, verba; unde ipsa sola sufficit apud Philosophos, ad rationem verbi.

Colliges 1°. descriptiones verbi, tum à multis Philosophis, tum ab omnibus Grammaticis traditas, quibus nempe verbum dicitur significare, cum tempore, numero, personâ, &c. vitiosas esse; quia verbum solummodò significat specialem intellectûs actum.

Colliges 2°. voces omnes, à Grammaticis assignatas, tanquàm totidem verba, in rei veritate, totidem esse vel propositiones, vel propositionum partes.

Colliges 3°. verbum esse definiendum... vocem, quâ significatur actus intellectûs dicentis, habitudinem prædicati, ad subiectum.

Conclusio secunda.

Forma prædicati, nunquam identificatur cum subiecto propositionis. Subiectum enim propositionis, est vel substantia, vel modificatio. Si sit substantia, forma prædicati, ut potè species opposita substantiæ, non identificatur cum illo subiecto, ut per se patet. Si modificatio sit subiec-

tum propositionis, vel est diversa, vel distincta, vel indistincta à formâ prædicati: si primum, nulla potest esse identificatio; diversitas enim importat multitudinem: si secundum, nulla pariter esse potest identificatio; quia quæcumque sunt distincta, ne divinitus quidem possunt fieri indistincta: si tertium, jam nulla est propositio; quia tunc nulla est habitudo, seu relatio prædicati ad subjectum; quamobrem in nullâ propositione, forma prædicati identificatur cum subjecto propositionis.

Conclusio tertia.

Subjectum attributi, nunquam identificatur cum subjecto propositionis. Subjectum enim attributi, est *ens habens*: atqui hoc ens habens, nunquam identificatur cum subjecto propositionis. Quod enim remanet aptum, prædicari de aliis subjectis, non identificatur cum illo subjecto: atqui illud ens habens, sic se habet; alioqui quando dicitur, Petrus est ens habens humanitatem, *ens habens* non magis esset universale, quàm ipse Petrus: & præterea sensus esset, Petrus est Petrus cum humanitate: quod est absurdum; proindèque, &c.

Et certè quoties enunciatur incompa-

tibilitas alicujus attributi, cum subjecto propositionis, ut in hac propositione. . . spiritus non est corpus; non sola corporeitas, sed ipsum corporeitatis subjectum removetur à spiritu; sensus enim est. . . spiritus nulla est substantia, per corporeitatem contracta; ergo, &c.

Objectiones.

Obicies. 1°. Si subjectum attributi foret quid distinctum à subjecto propositionis, duplex esset subjectum in propositione simplici: atqui, ex nobis, duplex non est subjectum, in propositione simplici; ergo, &c.

Distinguo majorem. Duplex esset subjectum, in propositione simplici, quorum unum enunciaretur, vel cum altero conjunctum, vel ab eo separatum, concedo. Duplex esset subjectum ipsius propositionis simplicis; ita ut de utroque enunciaretur aliqua habitudo, nego. Distingue pariter minorem, & nega consequentiam. Porro duplex quidem non est subjectum, in propositione simplici, de quo enuncietur aliqua habitudo; sed in propositione simplici, duo sunt subjecta, quorum unum dicitur, vel cum altero conjunctum, vel ab eo separatum. Ubi namque duo sunt termini concreti, aut saltem concretorum

vices gerentes, ibi duplex est subjectum : at in propositione simplici, vel sunt duo termini concreti, ut in hâc propositione... Deus est omnipotens; vel saltem qui concretorum vices gerunt, ut in istâ... justitia est virtus; proindèque, &c.

Nota igitur modificationem, quæ vel est subjectum propositionis, ut... virtus est amabilis, vel est prædicatum, ut... justitia est virtus; eatenus dicit concreti vices gerentem, quatenus tunc spectatur, ut aliam modificationem recipiens.

Objicies. 2°. Subjectum attributi identificatur cum subjecto propositionis; modò nulla propositio sit falsa, ex eo præcisè quòd adsit illa identificatio: atqui res sic se habet. Dum enim dicitur, omnis homo est mortalis, fatentur omnes quemlibet hominem esse ens habens: pariter ubi dicitur, circulus non est quadrilaterus, omnes fatentur, circulum esse ens habens, quamvis negent quadrilateralitatem ipsi competere; ergo, &c.

Nego minorem. Ea namque propositio censeri debet falsa, quæ enunciat aliquid identificari cum subjecto propositionis, quod reipsâ non identificatur cum ipso: porrò, &c. Ad primum autem exemplum, respondeo hominem esse quidem *ens habens*; sed ita ut hoc ens habens, vagum sit,

& indeterminatum, quod proinde non est subjectum propositionis, determinatum. Ad secundum exemplum respondeo, omnes fateri subjectum prædicari, conjunctum esse cum subjecto propositionis, quando prædicatum enunciatur reipsâ conjunctum; sed non omnes fatentur, subjectum attributi, conjunctum esse cum subjecto propositionis, quando prædicatum ab ipso removeretur, ut in allatâ propositione. Præterea, licet subjectum attributi semper esset reipsâ conjunctum cum subjecto propositionis; non idcirco identificaretur cum illo subjecto, quia ad conjunctionem requiruntur duo.

Instabis. Dicitur potest... ens habens Petreïtatem, & ens habens humanitatem, sunt quid idem; ergo in hac propositione... Petrus est homo, subjectum attributi identificatur cum subjecto propositionis.

Nego antecedens. Nam ens habens Petreïtatem, est quid determinatum, & singulare; & ens habens humanitatem, est quid indeterminatum, & universale.

De quantitate propositionis.

Circâ propositionum quantitatem, inquitur hîc, an singulares & indefinitæ, revocentur ad universales; an autem ad particulares?

Conclusio prima.

Propositio singularis revocatur ad universalem, ejusdem qualitatis, id est, affirmans, ad affirmantem, & negans, ad negantem. Propositio namque, cujus subjectum nullatenus restringitur, revocari debet ad eam propositionem, cujus subjectum pariter non restringitur; sunt enim eadem leges, pro subjectis nullatenus restrictis: atqui subjectum propositionis singularis, non restringitur, quandoquidem caret universalitate, quæ possit restringi; aliundè verò, subjectum propositionis universalis, non restringitur, cum in hoc differat à particulari; proindèque, &c.

Dices. Propositio singularis revocari debet ad eam propositionem, à quâ minùs discrepat: atqui propositio singularis minùs discrepat à particulari, quàm ab universali; ergo, &c.

Nego minorem. Propositio namque singularis, ex unico tantum capite differt ab universali, in eo nempe quòd subjectum propositionis singularis, multis sit incommunicabile; subjectum autem propositionis universalis, multis sit communicabile: at propositio singularis, ex duplici capite differt à particulari: 1^o. In eo quòd sub-

jectum propositionis singularis, multis sit incommunicabile; non item subjectum propositionis particularis. 2^a. In eo quòd subjectum propositionis singularis non restringatur; restringatur autem subjectum propositionis particularis.

Ubi porrò dicimus, propositionem singularem revocari ad universalem; hoc intelligendum est, eo tantum sensu, quòd singularis sequatur leges præscriptas pro universali.

Conclusio secunda.

Propositio indefinita in materiâ necessariâ, revocari debet ad universalem metaphysicè. Illa namque propositio revocatur ad universalem metaphysicè, ad cuius veritatem requiritur, ut prædicatum sit, vel essentialiter conjunctum cum subjecto, distributivè sumpto, si sit affirmans; vel essentialiter separatum ab illo subjecto, si sit negans: atqui ad veritatem propositionis indefinitæ in materiâ necessariâ, requiritur, ut prædicatum sic se habeat, ad subjectum; alioqui non esset in materiâ necessariâ; proindeque, &c.

Dices. Hæc propositio... substantia præscindit à spiritualitate & corporeitate, indefinita est, & in materiâ necessariâ: atqui revocari non potest ad universalem

metaphysicè ? dici namque non potest. . . omnis substantia præscindit à spiritualitate & corporeitate ; ergo , &c.

Respondeo 1^o. propositionem mox allatam , strictè loquendo , falsam esse. Nam substantia, ut substantia , non præscindit à spiritualitate & corporeitate simul : nec enim est inseparabilis ab utrâque simul illâ formâ. Ut igitur hæ & aliæ similes propositiones sint veræ , duplici propositione debent exprimi hoc modo. . . substantia , per spiritualitatem contracta , præscindit à spiritualitate. . . substantia , per corporeitatem contracta , præscindit à corporeitate. Quod si sic exprimantur.

Respondeo 2^o. negando minorem. Verè namque dici potest. . . omnis substantia , per spiritualitatem contracta , præscindit à spiritualitate. . . omnis substantia , per corporeitatem contracta , præscindit à corporeitate.

Instabis. Si quælibet substantia , per corporeitatem contracta , præscinderet à corporeitate ; corpus dici posset præscindens à corporeitate , quandoquidem corpus nihil aliud est , quàm substantia , per corporeitatem contracta : atqui corpus non præscindit à corporeitate. Hanc enim formam includit in idæâ suâ ; ergo , &c.

Nego sequelam. Ex eo namque quòd
pars

pars communior essentiae corporis abstracta à corporeitate; non idcirco tota corporis essentia præscindit à corporeitate. Ad id autem quod additur, respondeo corpus non esse substantiam contractam per corporeitatem; sed esse totum resultans, & ex ratione substantiae sic contractae, & ex corporeitate contrahente.

Conclusio tertia.

Propositio indefinita in materiâ contingenti, revocatur ad universalem moraliter; dummodo tamen non sit pars alicujus narrationis. Illa namque propositio revocatur ad universalem moraliter, ad cujus veritatem requiritur, ut prædicatum, vel ut plurimum, jungatur cum subiecto, si sit affirmans; vel ut plurimum, separetur à subiecto, si sit negans: atqui ad veritatem propositionis indefinitae in materiâ contingenti, hoc requiritur, sicut constare debet ex eo; quòd hujus conditionis defectu, falsae sint propositiones sequentes... homo est doctus... homo in hac vitâ non est miser; proindèque, &c.

Dixi autem, *dummodo*; *tamen*, &c. quia, in hoc casu, revocatur ad particularem, qualis est sequens indefinita, quae pars est narrationis passionis Christi Domini. *Milites plectentes coronam, imposuerunt*

eunt capiti ejus; sensus enim est... quidam milites, &c.

- Colliges propositionem quamlibet, in rei veritate, esse vel universalem, vel particularem, aut ad alterutram revocari. Hinc Philosophi merito habuerunt tantum rationem universalium & particularium, dum agitur de syllogismis.

Quæres autem, ad quam propositionem revocentur indefinitæ, quarum attributa fundantur in collectione inferiorum subiecti; qualis est ista... Apostoli erant duodecim.

Respondeo, ipsas revocari ad universales, quia propositiones illæ sunt singulares; sensus enim est... hæc numero collectio, scilicet Apostolorum, est numerus duodenarius.

De qualitate propositionis.

Circà qualitatem propositionum, sequentia hîc inquiruntur. Primum, an reipsâ dentur propositiones, quarum aliæ sint affirmantes, & aliæ negantes? Contendunt enim nonnulli, quilibet propositiones esse affirmantes. Secundum, an quælibet propositio sit vel vera, vel falsa, ita ut nulla sit indifferens, ad veritatem & falsitatem? Tertium, an duarum propositionum singularium & contradicentium,

de futuro contingenti, una semper sit vera, & altera falsa? Quartum, an propositio in materiâ contingenti, de verâ, fieri possit falsa, aut vice-versâ? Ut solvantur hæc dubia, sint,

Conclusio prima.

Dantur propositiones, quarum aliæ sint affirmantes, & aliæ negantes. Nomine namque propositionis affirmantis, intelligitur ea, quæ enunciat vel inseparabilitatem, vel unionem prædicati; nomine verò propositionis negantis, intelligitur ea, quæ enunciat vel incompatibilitatem, vel separationem prædicati: atquæ dantur ejusmodi propositiones, ut constet ex dictis; ergo, &c. Quod si nomine propositionis affirmantis, intelligatur ea, quæ enunciat aliquam habitudinem prædicati ad subjectum; tunc quælibet propositio dici potest affirmans: verum hæc acceptio erit, contrà usum receptum, à quo non recedemus.

Conclusio secunda.

Quælibet propositio est, vel vera, vel falsa, in materiâ quâvis; nam propositio quælibet enunciat de subjecto, habitudinem aliquam: atqui non potest habitudinem aliquam enunciare, quin sit, aut

vera, aut falsa. Nimirum habitudo enunciata, vel convenit, vel non convenit subiecto, quia inter convenire & non convenire, nullum datur medium. Si conveniat, propositio vera est; si non conveniat, propositio falsa est; ergo quælibet propositio est, vel vera, vel falsa.

Objectiones.

Objicies. 1°. Hæc propositio... *Ego taceo*, 1°. dici non potest vera. Qui enim eam pronunciat, reipsâ non tacet. 2°. Dici non potest falsa: fieri namque potest, ut qui eam pronunciat, vel nihil antea dixerit, vel immediatè post, nihil sit dicturus; ergo neque vera est, neque falsa.

Respondeo, propositionem illam dicere ordinem, vel ad tempus præteritum, vel ad tempus futurum, quod ex circumstantiis dignoscitur. Si dicat ordinem ad præteritum, vera est; si qui eam pronunciat, nihil immediatè antea dixerit; falsa verò, si immediatè antea fuerit locutus. Si dicat ordinem ad futurum, tunc est promissoria, & sensus est... in posterum silebo; undè vera est, si immediatè post sileat; falsa verò, si non sileat. Idem dicendum est de aliis similibus.

Objicies. 2°. Hæ propositiones sacramentales... *Ego te baptizo*... *Hoc est Cor-*

pro meum, &c. admittuntur ut veræ, & tamen non sunt veræ. Propositiones enim de contingenti, quæ non supponunt objecta sua, dici non possunt veræ: atqui propositiones allatæ versantur in materiâ contingenti; & objecta sua non supponunt, ut per se patet; ergo, &c.

Nego secundam antecedentis partem, & ad probationem distinguo maiorem. Propositiones de contingenti, quæ non supponunt objecta sua, dici non possunt veræ; si sint speculativæ, concedo. Si sint practicæ, nego. Distingue pariter minorem, & nega consequentiam. Propositiones illæ dicuntur speculativæ, quæ non efficiunt objecta sua, adeoque ipsa præsupponunt; qualis est ista... *Petrus est doctus*. Propositiones practicæ, sunt illæ, quarum objecta producuntur, statim atque à certis personis enunciantur, & quarum proinde veritas pender ab objectorum illorum effectione... quales sunt propositiones sacramentales. Reverâ, &c.

Conclusio tertia.

Propositionum singularium, contradicentium de futuro contingenti, per ordinem à se invicem spectatarum, seu virtute contradictionis, una est vera, & altera falsa. Sint enim in exemplum, hæ propo-

318 CONCERTATIONES

sitiones... Hoc numero peccatum Petri est futurum... idem numero peccatum Petri non est futurum: atqui necesse est, ut harum propositionum, una vera sit, & altera falsa. Illarum enim propositionum, una est vera, & altera falsa, quæ nec possunt esse ambæ veræ, nec ambæ falsæ, nec indifferentes, ad veritatem & falsitatem: atqui propositiones mox allatæ, nec possunt esse ambæ veræ, nec ambæ falsæ; quia futuritio & infuturitio, nec simul possunt esse cum peccato Petri conjunctæ, nec simul ab eo separatæ, ut per se patet: non possunt etiam esse indifferentes ad veritatem & falsitatem; quia (ex conclusione præcedenti) propositio quævis est, vel vera, vel falsa; proindèque, &c.

Objectiones.

Obicies. 1^o. Illæ propositiones sunt ambæ falsæ, quæ enunciant de subiecto, quod illi non convenit: atqui ambæ propositiones superiùs allatæ, sic se habent. Nam una enunciat futuritionem, & altera enunciat infuturitioem, de peccato Petri: atqui neque futuritio, neque infuturitio conveniunt peccato Petri. Illæ namque formæ non conveniunt ei, quod abstrahit ab utrâque: atqui peccatum Petri

abstrahit à futuritione & infuturitione; nec enim has formas includit in idæâ suâ; ergo, &c.

Nego minorem primi & secundi sillogismi. Ad probationem autem nego etiam minorem; quia in materiâ contingenti, locus non est abstractioni, quandoquidem non adest inseparabilitas.

At, inquires, allatæ propositiones spectari possunt in ordine metaphysico: porro in hoc ordine, sunt ambæ falsæ; ergo saltem in aliquo ordine, sunt falsæ.

Nego maiorem. Non possunt enim in eo ordine considerari; in quo non possunt esse: at propositiones illæ non possunt esse in ordine metaphysico, seu in materiâ necessariâ; quia sunt essentialiter in materiâ contingenti.

Objicies. 2^o. Illarum propositionum una non est vera, & altera falsa, quarum objectum non est determinatum: atqui propositionum suprâ dictarum objectum, non est determinatum. Quod enim est contingenter & liberè, vel futurum, vel infuturum, non est determinatum: atqui objectum illarum propositionum, sic se habet; ergo, &c.

Nego minorem. Quod enim est, vel futurum, vel infuturum, ita ut nihil mediet, est determinatum: atqui propositio-

num illarum objectum est ita, vel futurum, vel infuturum, ut nullum detur medium, cum nulla sit præcisio. Ad probationem autem, nego etiam minorem. Quod enim est necessariò, vel futurum, vel infuturum, non est contingenter & liberè, vel futurum, vel infuturum: atqui propositionum illarum objectum est necessariò, vel futurum, vel infuturum, cum nullum sit medium. Uno verbo, peccatum, verbi gratiâ, Petri, si sit futurum, contingenter est futurum; & si sit infuturum, contingenter est infuturum; at subdisjunctione est necessariò, vel futurum, vel infuturum.

Objicies. 3^o. Si ex allatis propositionibus, una esset vera, & altera falsa, cognosceret Deus, utra sit vera, utra sit falsa: atqui hoc dici non potest. Si enim Deus cognosceret, utra sit vera, utra sit falsa; quæ foret vera, necessariò vera esset, quia falli non potest cognitio Divina; aliundè verò, si una sit, necessariò vera, tollitur libertas creata; ergo signum est, unam non esse veram, & alteram falsam.

1^o. Vitiosum est hoc ratiocinium: quatenus procedit, à minùs noto, ad magis notum. Procedit enim, à connexionem scientiæ Divinæ, cum actibus liberè futuris spirituum creatorum, ad cognitionem veri-

tatis & falsitatis duarum propositionum contradictoriarum : porro connexio illa, est quid longè minùs notum, quàm veritas & falsitas contradictoriarum; proindèque, &c.

2°. Nego sequelam. Nam ex suppositione factâ in nostrâ conclusione, non sequitur Deum cognoscere, utra vera sit, utra falsa; quia hoc non inquirimus; sed ex conclusione nostrâ sequitur, Deum ab æterno cognovisse, propositionum illarum unam esse veram, & alteram falsam, virtute contradictionis.

3°. Nego minorem prioris sillogismi; quia scilicet omnia nuda sunt, & aperta oculis Dei. Ad probationem autem nego sequelam. Deus enim cognoscit entia, ut in se sunt: at una ex allatis propositionibus seorsim sumpta, contingenter est vera; proindèque, licet Deus cognoscat quænam sit vera, non idcirco necessariò vera est. Ad id autem quod subjungitur, nullam nempè tunc futuram esse libertatem creatam, respondeo, præviam Dei cognitionem, nullam importare necessitatem, in actus liberos causarum secundatum. Sed de his in Metaphysicâ.

Obicies denique. Si suprâ dictarum propositionum, una esset vera, & altera falsa; quæ vera foret, dici posset æternæ verit-

322 CONCERTATIONES

tatis : atqui hoc dici non potest ; ergo , &c.

Nego sequelam. Usus enim invaluit , ut illæ solæ propositiones vocarentur *æterna veritatis* , quæ sunt in materiâ necessariâ ; proindeque , &c.

Conclusio quarta.

Propositio in materiâ contingenti , significans tempus præsens , potest esse , modò vera , modò falsa. Propositio enim , quæ enunciat de subjecto , quod illi modò convenit , modò non convenit ; dici debet modò vera , modò falsa : atqui propositio in materiâ contingenti , & de tempore præsenti , sic se habet. Sit enim , verbi gratiâ , Pater aliquis credulus , qui per horam integram , identidem hoc ferat iudicium... Filius meus est in scholâ ; aliundè verò , per primam horæ dimidiam , filius absens sit à scholâ ; per alteram autem dimidiam , præsens sit in scholâ. In hac suppositione , propositio Patris falsa est , per primam horæ dimidiam ; & vera , per alteram ; ergo , &c.

Dixi autem , si significet tempus præsens ; quia si sit de præterito , quæ semel est vera , nunquam fit falsa , aut vice versâ : pariter , si sit de futuro , quæ vera est , nunquam erit falsa , aut vice versâ.

De propositionum conversionibus.

Circà propositionum conversiones, hîc inquiri potest: 1°. an, ut docent Philosophi, propositio quælibet generalis negans, ritè converti possit, aut simpliciter, aut per accidens, ad libitum? 2°. An quælibet propositio particularis affirmans, ritè convertatur simpliciter? 3°. An quælibet propositio generalis affirmans, converti possit, aut per accidens, aut per contra-positionem, ad libitum? 4°. Denique, an particularis negans, ritè convertatur per contra-positionem? His omnibus quæstionibus sic respondemus.

Conclusio prima.

Propositio universalis negans in materiâ necessariâ, converti potest simpliciter. Tunc enim propositio converti potest simpliciter, quando sicut prædicatum totaliter à subjecto, sic subjectum totaliter removetur à prædicato: atqui in propositione generali negante, & in materiâ necessariâ, prædicatum totaliter removetur à subjecto, & subjectum totaliter removetur à prædicato; quia nempe incompatibilitas est reciproca, seu mutua; ergo, &c. Hinc dici potest. . . *Nullus spiritus est corpus. . . Nullum corpus est spiritus.*

Dices. Hæ propositiones... Substantiâ non est spiritus. . . Substantia non est corpus, revocantur ad universales negantes : atqui converti non possunt simpliciter, nec enim dici potest. . . Nullus spiritus est substantia. . . Nullum corpus est substantia; ergo, &c.

Respondeo, utramque illam propositionem esse falsam, si particula, *non*, sit exclusiva; quia substantia nec includit, nec excludit, sive spiritualitatem, sive corporeitatem : quod si particula, *non*, sit præcisionis signum; tunc utraque illa propositio est affirmans.

Conclusio secunda:

Propositio universalis negans in materiâ necessariâ, non potest converti per accidens. Tunc enim propositio converti non debet per accidens, quando prædicatum conversæ restringi non debet, dum fit subjectum convertentis : atqui prædicatum propositionis universalis negantis, in materiâ necessariâ, restringi non debet, dum fit subjectum convertentis. Tunc enim subjectum propositionis restringi non debet, quando prædicatum enunciatur in sociabile cum omnibus hujus subjecti inferioribus : atqui in materiâ necessariâ, prædicatum propositionis negantis, enun-

ciatur infociabile, cum omnibus subiecti inferioribus; quandoquidem incompatibilitas est reciproca; ergo subiectum restringi non debet; ergo converti non debet per accidens.

Conclusio tertia.

Propositio particularis affirmans nullatenus converti potest; vel enim ejusmodi propositio versatur in materiâ necessariâ, vel in materiâ contingenti: atqui in neutro casu, converti potest. Primum quidem si sit in materiâ necessariâ, nullatenus converti potest: nam ad hoc sufficit, quod in materiâ necessariâ, semper sit falsa: atqui res sic se habet. Illa namque propositio falsa est, quæ enunciat prædicatam essentialiter subiecto, convenire solummodo quibusdam subiecti inferioribus: at in propositione particulari affirmante, & in materiâ necessariâ, prædicatum essentialiter conveniens subiecto, enunciatur convenire quibusdam tantum subiecti inferioribus, cum signum particularitatis exceptionem denotet; ergo falsum enunciat; ergo, &c. 2.^o Si sit in materiâ contingenti, non potest pariter converti. In hac namque materiâ, prædicatum est pars contingens subiecti: at ubi prædicatum est pars contingens subiecti, non potest fieri

conversio. Si enim tunc fieret conversio, totum affirmari posset, de parte suâ contingenti: atqui totum de nullâ suâ parte potest affirmari; ut per se manifestum est; proindèque propositio particularis affirmans, nullatenus converti potest.

At, inquires, dici potest... Aliqua substantia est spiritus, ea nempe, quæ conjungitur cum spiritualitate; ergo, &c.

Nego antecedens. Cùm enim aliqua substantia sit pars communior essentiæ spiritus; si dici posset, aliqua substantia est spiritus; sensus esset, aliqua pars est totum, cujus est pars: quod est absurdum.

Conclusio quarta.

Propositio universalis affirmans, nullatenus converti potest. Nam in omni propositione universali affirmante, prædicatum est, vel genus, vel differentia, vel proprium, vel aliquid contingens; species enim prædicari tantum potest de individuis: atqui in omnibus his casibus, nullatenus fieri potest conversio. Cùm enim in omnibus his casibus, prædicatum sit vel pars essentialis, vel pars contingens subjecti; si fieret conversio, totum affirmaretur de suâ parte, vel essentiali, vel contingenti: atqui hoc est impossibile, ut per se patet; ergo propositio univer-

Talis affirmans, nullatenus converti potest.

Dices. Hæc propositio... Omnis circulus est figura rotunda, potest simpliciter converti, hoc modo... Omnis figura rotunda, est circulus; ergo saltem, ubi prædicatum propositionis universalis affirmantis, est definitio subjecti, fieri potest conversio.

Nego antecedens. Ideò namque dici potest... Circulus est figura rotunda; quia circulus includit in idæâ suâ, & figuram & rotunditatem, tanquàm partes suas essentielles. Jam verò, si figura & rotunditas sint partes circuli, circulus non potest in his includi, seu non potest esse pars suarum partium; ut per se manifestum est. Hinc si fieret hæc conversio, figura rotunda est circulus, prædicatum includi deberet in idæâ subjecti, hoc est, totum includeretur in suis partibus: quod est absurdum; proindèque, &c.

Colliges falsam esse regulam, à Philosophis traditam, de definitionibus entium, per quam asserunt, definitum & definitionem reciprocari, seu de se invicem mutuo affirmari debere.

Conclusio quinta.

Rejicienda est ea conversionis species, quæ vocatur *per contra-positionem*. Ea nam

328 CONCERTATIONES

que conversionis species est rejicienda; in quâ propositio determinatum habens sensum, mutatur in aliam, quæ nullum habet sensum determinatum: atqui hoc contingit in conversione per contra-positionem. Quoties enim termini positivi, quorum significatio determinata est, mutantur in infinitantes; toties post mutationem, nullus est sensus determinatus: verbi gratiâ, ubi dicitur *homo*, mens attendit ad objectum determinatum: ubi verò dicitur, *non homo*, mens non amplius attendit ad objectum determinatum; proindeque, &c.

De oppositione propositionum.

Circâ propositionum oppositiones, hic inquiri potest, quid sit sentiendum de Peripateticorum opinione, superius expositâ?

Dico autem 1^o rejiciendam esse eam oppositionis speciem, quæ dicta fuit *subalterna*. Tùm quia, juxta Peripateticos, ambæ illæ propositiones sunt, aut veræ, aut falsæ, saltem in materiâ necessariâ: porro, quis credat eas propositiones inter se opponi, quæ sunt ambæ veræ, & habent idem subjectum & idem prædicatum. Tùm quia, juxta eosdem, particularis includitur in universali ejusdem qualitatis, *i. in* *et*

& o in e: porro, si particularis sic includatur, pugnare non potest cum includente. Tum denique, quia propositiones subalternæ reipsâ non possunt esse simul veræ in materiâ quâvis: enim verò, in materiâ necessariâ, particularis semper est falsa; in materiâ verò contingenti, si particularis sit vera, generalis est falsa, & vice versâ.

Dico 2^o. falsum esse, *subcontrariâs* esse posse simul veras, in materiâ contingenti. Vel enim affirmatio & negatio, sunt de eodem subjecto, & sub eodem respectu; vel non. Si primùm, non possunt esse simul veræ; quia fieri non potest, ut idem simul conveniat & non conveniat eidem subjecto. Si secundùm, jam nulla est oppositio, sicut constat ex oppositionis definitione, vel à Peripateticis traditâ. Quod si propositiones subcontrariæ versentur circa materiam necessariam, tunc sunt ambæ falsæ; quia in hâc materiâ, subjecta restringi non debent.

Dico 3^o. quo jure, duæ sunt oppositionis species, ratione qualitaris, contrarias, scilicet & subcontrarias; eodem jure, duas admittendas fuisse species, ratione quantitatis; quia nempe subalternæ, vel sunt ambæ affirmantes, vel ambæ negantes.

Dico 4°. oppositionem, quam vocant *contradictoriam*, & quæ dicitur ab ipsis omnium maxima, non esse reipsâ maiorem contrariâ. Si quis enim, præsentibus centum nummis, dicat... Hi omnes nummi pertinent ad Paulum: tùm alter dicat... Nulli ex his nummis pertinent ad Paulum; profectò hæc propositio magis erit opposita priori, quàm quæ vulgò dicitur contradictoria prioris; aliqui ex his nummis, ad Paulum non pertinent.

Dico 5°. falsum esse contradictorias, quales vulgò admittuntur, non posse simul esse falsas in materiâ necessariâ. Nam hæc propositiones admittuntur, ut contradictoriæ... Omne corpus est intelligens... Aliquod corpus non est intelligens: at reipsâ sunt ambæ falsæ: prior quidem, ut per se patet; posterior autem, propter restrictionem, subjecto malè appositam.

Dico denique, duplicem tantùm admittendam esse propositionum oppositionem, scilicet contradictoriam, & contrariam, sed prout fuerunt à nobis definitæ.

Colliges, æquipollentiam propositionum, in rei veritate oppositarum, facilem esse; efficiendo scilicet, ut ambæ sint affirmantes, aut ambæ negantes, si reipsâ sint contradictoriæ; vel ut ambæ de eodem

subiecto enuncient prædicata sociabilia,
si sint reipsâ contrariæ.



TERTIA PARS LOGICÆ.

De discursu.

Discursus, est actus intellectûs, quo, mediante tertiâ idæâ, detegitur & dicitur habitudo, inter duas alias idæas; seu est actus, quo detegitur connexio unius propositionis, vel cum aliâ, vel cum aliis. Circâ hanc intellectûs operationem, observandum est, sextuplicem vulgò numerari discursûs speciem, nimirum inductionem, exemplum, dilemma, gradationem, enthimema & syllogismum.

Inductio, est argumentatio, in quâ, ex multis propositionibus singularibus, infertur conclusio generalis, hoc modo.

*Prudentia est amabilis,
Fortitudo est amabilis,
Iustitia est amabilis,
Temperantia est amabilis,
Ergo omnis virtus est amabilis.*

Hæc argumentationis species, vitiosa

est in Philosophiâ : vel enim fit in materiâ necessariâ , vel in materiâ contingentî. Si fiat in materiâ necessariâ , inutilis est , & plerumque impossibilis ; est quidem inutilis , quia eo ipso , quo prædicatum aliquod essentialiter convenit , aut non convenit uni individuo ; seu singulari , essentialiter quoque convenit , aut non convenit aliis omnibus individuis : est etiam plerumque impossibilis ; quia possibile non est singulare omnium possibilem enumeratio. Si fiat in materiâ contingentî ; quæcumque fiat singulare enumeratio , nunquam exindè poterit ritè deduci conclusio generalis , philosophicè certa ; proindèque , &c.

Exemplum , est argumentatio , in quâ , vel ex unâ , vel ex multis propositionibus , eruitur conclusio , propter aliquam similitudinem , hoc modo.

Primi Christiani passi sunt pro Christo.

Ergo debemus etiam pati pro Christo.

Hæc argumentationis species admitti poterit , si duæ sequentes adsint conditiones. Prima , si fiat processus à magis noto , ad minùs notum. Secunda , si perfecta sit similitudo partium , quæ comparantur inter se.

Dilemma , est argumentatio , multis constans partibus ; ex quibus omnibus ,

contrà Adversarium concluditur : ut si quis contrà Cartesium docentem , mundum nec esse finitum , nec infinitum ; sic argumentaretur.

Vel mundus habet terminos , vel non :

Si habeat , est finitus ; si non habeat , est infinitus.

Ergo mundus est , vel finitus , vel infinitus.

Hæc argumentationis species admitti potest , dummodò tres adsint conditiones sequentes. Prima , si inter partes ea sit oppositio , quæ medium quodlibet excludat. Secunda , si conclusiones necessario sequantur ex partibus sibi correspondentibus. Tertia , si dilemma contrà disputantem , retorqueri non possit.

Sorites, seu gradatio , est argumentatio, multis constans propositionibus , ita dispositis , ut prædicatum primæ sit subiectum secundæ ; prædicatum secundæ , sit subiectum tertiæ ; & sic deinceps , donec pro conclusione , prædicatum ultimæ tribuatur subiecto primæ : vocatur aliter , *argumentatio , à primo , ad ultimum* , hoc modo.

Anima rationalis , est spiritus.

Spiritus , est substantia.

Substantia , est ens ;

Ergo anima rationalis , est ens.

Hæc argumentationis species nihil aliud

est, in rei veritate, quàm sillogismorum congeries; undè admitti potest, dummodò tamen fiat processus à minùs generalibus, ad generaliora. Si enim fieret processus à generalioribus; ad minùs generalia, tunc vitiosa foret argumentatio, quia minùs generalia prædicari non possunt de generalioribus; ut constat ex dictis.

Enthimema, est argumentatio, in quâ, ex unicâ propositione, deducitur altera, hoc modo.

Omne honestum, est laudandum;

Ergo omnis virtus, est laudanda.

Hæc argumentationis species in eo tantùm differt à sillogismo, quòd alterutra præmissarum non exprimitur; undè vocari solet, *sillogismus mutilatus*. In disputationibus publicis, excepto primo ratiocinio, vitanda est, quoad fieri potest, hæc argumentationis species; quia difficultas plerumque posita est in eâ propositione, quæ non exprimitur: quàmobrem si quis, inter disputandum, enthimematibus utatur, substituendi erunt sillogismi, juxtà præcepta, quæ tradentur postea.

Sillogismus, est argumentatio, in quâ, ex duabus propositionibus, certâ ratione dispositis, tertia necessariò sequitur, hoc modo.

Omne honestum , est laudandum ;

Omnis virtus , est honesta ;

Ergo omnis virtus est laudanda.

Hæc argumentationis species , est omnium perfectissima ; undè Philosophi de ipsâ fusè differunt ; sit igitur ,

De sillogismo.

Hoc ordine , dicemus de sillogismo :
 1°. Materiam ejus examinabimus. 2°. Formam ejus exponemus, juxtà veterum & recentiorum opiniones. 3°. Trademus principia & regulas , tùm generales , tùm particulares , quibus Philosophi totam vim sillogisticam inniti contendunt. 4°. Quasdam artificiosas sillogismorum reductiones , à Peripateticis excogitatas , proponemus. 5°. Tradentur regulæ , de enthymematibus ad sillogismos reducendis. 6°. Varias sillogismorum species referemus , & examinabimus. 7°. Totam sillogismorum doctrinam , à Philosophis traditam , ad examen revocabimus. 8°. Varias subjungemus observationes , circà sillogismos compositos. 9°. Denique præcipuos errorum fontes , circà hanc intellectûs operationem indicabimus , cum regulis ut vitentur.

De materiâ sillogismi.

Materia sillogismi , est id ex quo com-

ponitur sillogismus; & duplex est, remota & proxima. Termini, sunt materia remota; & propositiones, sunt materia proxima; sicut dictum fuit in brevi nostrâ discurrendi methodo.

Ideò autem, 1°. prædicatum conclusionis dictum fuit *majus extremum*; quia potest magis patere, seu universalius esse, quàm subjectum, & nunquàm minùs. Ideò 2°. subjectum conclusionis vocatum fuit *minus extremum*, quia potest minùs patere, quàm prædicatum, & nunquam magis. Ideò 3°. terminus, qui nunquam ingreditur conclusionem, dictum fuit modò *medium*, modò *terminus medius*, quia significat tertiam idæam notiozem, quâ mediante, detegitur habitudo inter majus extremum, & minùs extremum.

De formâ sillogismi.

Forma sillogismi, ut dictum fuit, est artificiosa ipsius materiæ dispositio; undè, quoniam duplex est sillogismi materia, duplex quoque est sillogismi forma; scilicet *figura* & *modus*.

De figurâ sillogismi.

Figura sillogismi, definiri potest terminorum artificiosa dispositio, apta ad ritè concludendum. Quoniam autem conclusio
semper

semper eadem permanet, id est, quoniam majus est extremum, semper est ejus prædicatum; & minus extremum, semper est ejus subjectum; exindè manifestum est, totuplicem esse sillogismi figuram diversam, quotuplex est modus diversus, quo medium disponi potest in præmissis, cum duobus extremis: porrò, quatuor sunt ejusmodi dispositiones diversæ; adeòque quatuor sunt sillogismorum figuræ diversæ.

In primâ figurâ, medium subjicitur in majore, & prædicatur in minore, ut in hoc sillogismo.

Quod habet partes substantiales, est divisibile.

Atqui corpus habet partes substantiales.

Ergo corpus est divisibile.

In secundâ figurâ, medium prædicatur in utrâque præmissâ, ut in sillogismo sequenti.

Nullum corpus, est spiritus;

Anima rationalis, est spiritus;

Ergo anima rationalis, non est corpus.

In tertiâ figurâ, medium subjicitur in utrâque præmissâ, ut,

Aliqui homines, non sunt docti;

Omnis homo, est miser;

Ergo aliquis miser, non est doctus.

In quartâ figurâ, medium prædicatur

Tomus I.

P

in majore , & subjicitur in minore : ut ;

Omnis spiritus , est agendi capax ;

Nullum agendi capax , divisibile est ;

Ergo nullum divisibile , est spiritus.

Ut hæ sillogismorum figuræ , memoriæ
faciliùs mandentur , sequens proponitur
versiculus.

Sub præd : tum præd , præd : tum sub , sub :
denique præd , sub.

Nonnulli contendunt , quartam figu-
ram à prima non differre ; horum opinio
refelletur in Concertationibus.

De modis sillogismorum.

Ex eo quòd omnes propositiones re-
vocentur ad quatuor , quæ designantur
per vocales , *a* , *e* , *i* , *o* ; & ex eo quòd
tres tantum sint propositiones in sillo-
gismo : exindè sequitur , totuplicem esse
sillogismorum modum , quotuplex est
diversa dispositio , quatuor illarum voca-
lium , ternatim sumptarum , sive sint simi-
les , sive sint diversæ. Jam verò , juxta
combinationum leges , quatuor illæ vo-
cales , ternatim sumptæ , sexaginta qua-
tuor modis diversis disponi possunt , sicut
apparet in sequenti Schemate.

AAA	EAA	IAA	OAA
AAE	EAE	IAE	OAE
AAI	EAI	IAI	OAI
AAO	EAO	IAO	OAO
AEA	EEA	IEA	OEA
AEE	EEE	IEE	OEE
AEI	EEI	IEI	OEI
AEO	EEO	IEO	OEO
AIA	EIA	IIA	OIA
AIE	EIE	IIE	OIE
AII	EII	III	OII
AIO	EIO	IIO	OIO
AOA	EOA	IOA	OOA
AOE	EOE	IOE	OOE
AOI	EOI	IOI	OOI
AOO	EOO	IOO	OOO

Ex his modis, quinquaginta quatuor inepti sunt, ad ritè concludendum, sicut ostendetur, exponendo leges generales; undè decem tantùm supersunt legitimi, qui pro diversis syllogismorum figuris, multiplicantur ad numerum usque undevigesimum: ejusmodi novem decim modi, vocibus artificiosis exprimuntur in quatuor sequentibus versiculis.

Pij

*Barbara, celarent, darii, ferio: baralipon,
Celantes, dabitur, fapesmo, frifefomorum.
Cefare, cameftres, feftino, baroco. Darapti,
Felapton, difamis, datifi, bocardo, ferifon.*

In fententiâ eorum, qui tres tantum admittunt fillogifmorum figuras, novem priores voces pertinent ad primam figuram: quatuor fequentes, ad fecundam; & ſex reliquæ, ad tertiam. Volunt autem, ex novem modis, ad primam figuram pertinentibus, quatuor priores eſſe directos & perfectos; quinque verò poſteriores, indirectos & imperfectos.

Modus ab illis Philoſophis vocatur *directus*, in quo conclusio deducitur ex præmiſſis, ſecundum expectationem Audientium.

Modus autem vocatur *indirectus*, in quo conclusio deducitur ex præmiſſis, contra expectationem Audientium.

Modus ab iſdem dicitur *perfectus*, in quo termini conclusionis eandem habent ſedem in præmiſſis, ac in conclusione; *imperfectus* verò, in quo, vel unus conclusiois terminus aliam habet ſedem in præmiſſis, ac in conclusione. Ex his apparet in horum Philoſophorum ſententiâ, quinque poſteriores modos primæ figuræ,

esse simul indirectos & imperfectos ; deinde modos secundæ & tertiæ figuræ esse quidem directos , sed imperfectos ; unde juxtâ ipsos , soli quatuor priores modi , primæ figuræ , sunt simul directi & perfecti.

In sententiâ eorum , qui quatuor admittunt sillogismorum figuras , quatuor priores voces pertinent ad primam figuram ; quinque sequentes ad quartam , dummodò tamen sic enuncientur *bamalipon, calentes, dibatis, fesapo, fresisolorum* : quatuor sequentes , ad secundam ; & quatuor reliquæ , ad tertiam.

Si quis igitur conficere voluerit sillogismum in aliquo , ex supradictis modis , observare debet , 1°. tres esse vocales in unâquâque voce supradictorum versiculorum ; ita ut si plures occurrant , metri tantum causâ fuerint additæ. 2°. Ex tribus illis prioribus vocalibus , primam esse signum majoris propositionis ; secundam esse signum minoris , & tertiam esse signum conclusionis. 3°. Ad quam sillogismorum figuram pertineat modus , in quo sillogismus proponitur conficiendus , ut nempe medium , juxtâ figuram illam disponatur in præmissis. Si igitur hæc tria servantur , conficietur sillogismus : verbi gratiâ , in *celarent* , hoc modo.

CE. *Nullum corpus , est intelligens ;*
 LA. *Omnis planta , est corpus ;*
 RENT. . *Ergo nulla planta , est intelligens.*

De principiis & regulis sillogismorum.

Principia sillogismorum , sunt propositiones , quæ spectantur tanquàm bases & fundamenta , quibus nititur vis. concludendi. Quatuor numerantur ejusmodi principia.

Primum sic se habet. *Propositio particularis includitur in universali ejusdem qualitatis , i in a , & o in e.*

Secundum. *Propositio suam desumit universalitatem , aut particularitatem , à subjecto.*

Tertium. *Prædicatum propositionis affirmantis , semper sumitur particulariter.*

Quartum. *Attributum propositionis negantis , semper sumitur universaliter.*

Ex his quatuor principiis , putant deduci posse regulas sillogismorum , quarum aliæ dicuntur *generales* ; aliæ verò , *particulares*.

Regulæ generales.

Regulæ generales , vocantur illæ , quæ servandæ sunt in sillogismis . cujuslibet

figuræ , & modi. Hæ regulæ possunt ad sex sequentes revocari.

Quamvis autem veterum & recentiorum Philosophorum opiniones hîc solummodò referamus : quia tamen ejusmodi regulæ , sunt velut corollaria nostræ discurrendi methodi ; idèd leges has demonstrabimus , consequenter ad nostra principia.

Prima Lex.

In omni sillogismo , medium semel saltem distribui debet in præmissis , hoc est , semel saltem sumi debet pro suis omnibus inferioribus.

Demonstratio.

Omne medium inservire debet , ad detegendam habitudinem majoris extremi , cum minori extremo : atqui ad id inservire non poterit , nisi semel saltem in præmissis distribuatur. Nisi namque semel distribuatur , accipi poterit pro diversis suis speciebus , aut pro diversis specierum individuis : porrò , si sic accipiatur , non poterit inservire ad supradictam habitudinem detegendam : quia tunc æquivalet duobus diversis mediis , cum habitudine detegendâ minimè connexis ; proindèque , &c.

Ut autem dignoscas, an medium in alterutrâ præmissarum distribuatur; perpendendum est, an sit subiectum; an autem prædicatum propositionis. Si sit subiectum, distribuitur, quando propositio est universalis, (per secundum principium); si verò sit prædicatum, distribuitur, quando propositio est negans, (per quartum principium).

Secunda Lex.

Termini non accipiantur generalius in conclusione, quàm in præmissis.

Demonstratio.

Si termini generalius sumantur in conclusione, quàm in præmissis; comparari fuerunt cum termino medio aliter, ac se habent in conclusione; & consequenter legitima non erit eorum comparatio, cum termino medio.

Corollaria.

Primum. Plures esse debent termini, universaliter sumpti in præmissis, quàm in conclusione. Nam termini, qui sumuntur universaliter in conclusione, debent quoque universaliter sumi in præmissis, (per hanc secundam legem); aliundè verò, medium semel saltem accipi debet univer-

saliter in præmissis, per primam legem; ergo, &c.

Secundum. Si conclusio sit negans, majus extremum sumi debet universaliter in majore. Nam si conclusio sit negans, ejus prædicatum, nempe majus extremum, sumitur universaliter, (per quartum principium); ergo idem majus extremum sumi debet universaliter in majore, per hanc secundam legem.

Tertium. Si conclusio sit negans, propositio major non potest esse particularis affirmans. Nam majus extremum sumitur universaliter in conclusione negante, per quartum principium; ergo deberet sumi universaliter in majore, per hanc secundam legem: at non poterit universaliter sumi in majori particulari affirmante, per secundum & tertium principia; proindeque, &c.

Quartum. Quando minus extremum sumitur particulariter in minore, conclusio debet esse particularis; alioqui sumeretur universaliter in conclusione, quàm in minore: quod est contra secundam hanc legem.

Quintum. Si propositio minor sit universalis negans, conclusio poterit esse universalis. Si enim minor sit universalis negans, minus extremum in eâ sumitur uni-

346 TERTIA PARS
universaliter , per secundum & quartum
principia ; ergo poterit universaliter sumi
in conclusione ; ergo conclusio poterit esse
universalis.

Tertia Lex.

Ex duabus præmissis negantibus , nihil
ritè concluditur.

Demonstratio.

Quando major & minor sunt negantes ,
majus & minus extrema separantur à me-
dio : at quando majus & minus extrema
separantur à medio , nec sequitur , quòd
sint à se invicem separata , quia possunt
esse conjuncta ; nec sequitur , quòd sint
inter se conjuncta , quia possunt esse à se
invicem separata ; proindeque , &c.

Quarta Lex.

Ex duabus præmissis affirmantibus , non
sequitur conclusio negans.

Demonstratio.

Quando major & minor affirmant ;
signum est , duo extrema esse cum medio
conjuncta : porro , ex eo quòd sint cum
medio conjuncta , sequi debet , ipsa esse
inter se conjuncta ; ergo conclusio non
debet esse negans.

Quinta Lex.

Conclusio sequi debet, debiliorem præmissarum partem. Hanc legem ut intelligas,

Nota, propositionem negantem vocari à Philosophis, *deteriorem & debiliorem* affirmante: deindè propositionem particularem ab iisdem vocari, *deteriorem & debiliorem* universali. Sensus igitur legis est... Quoties una præmissa negans est; toties conclusio negare debet... Et quoties una præmissa particularis est; toties conclusio debet esse particularis.

Demonstratio prioris partis.

Quoties una præmissa negat; toties altera præmissa debet esse affirmans, per tertiam legem; jam verò si una sit negans, & affirmet altera; signum est unum conclusionis extremum, separatum esse à medio, & alterum esse cum eodem conjunctum: at ex eo quòd unum sit à medio separatum, & alterum cum ipso sit conjunctum, necessariò sequitur, ipsa esse à se invicem separata; ergo conclusio tunc debet esse negans.

Demonstratio posterioris partis.

Quando una præmissa particularis est;

P vj

conclusio debet esse particularis. Nisi namque conclusio tunc esset particularis, vel esset universalis affirmans, vel universalis negans; atqui neutrum dici potest.

Primo quidem, si una præmissa sit particularis, conclusio non potest esse universalis affirmans. Si enim conclusio tunc esset universalis affirmans, non plures essent termini, universaliter sumpti, in præmissis, quàm in conclusione; si quidem duæ præmissæ deberent in hac hypothesis, esse affirmantes; & consequenter earum prædicata sumerentur particulariter, per tertium principium; aliundè verò, una præmissa supponitur particularis; adeoque superesset unica sedes, nimirum subjectum alterius propositionis, in quâ reperiri posset terminus, universaliter sumptus; ergo non essent plures termini, universaliter sumpti in præmissis, quàm in conclusione, quod est contra primum corollarium; ergo, &c.

2^o. Si una præmissa sit particularis, conclusio non potest esse universalis negans. Si enim tunc esset universalis negans, duo termini conclusionis sumerentur universaliter, per secundum & quartum principia. Præterea, duo tantum termini sumi possent universaliter in præmissis, quia cum ambæ præmissæ non pos-

sunt esse negantes, unum prædicatum sumetur particulariter, & aliud nempe subiectum præmissæ particularis sumetur particulariter; ergo non plures essent termini generaliter sumpti in præmissis, quam in conclusione: quod est contra primum corollarium; ergo si alterutra præmissa sit particularis, conclusio nec potest esse universalis affirmans, nec universalis negans; ergo debet esse particularis.

Sextum corollarium.

- 1^o: Si conclusio possit esse generalis, utique poterit esse particularis, per primum principium.
- 2^o: Si possit esse particularis, non idem poterit esse generalis.

Sexta Lex.

Ex duabus præmissis particularibus, nihil ritè concluditur.

Demonstratio.

Quando duæ præmissæ sunt particulares, vel ambæ sunt affirmantes, vel ambæ negantes; vel una affirmat, & altera negat: atqui in his omnibus casibus, nihil ritè concluditur. Non primò, si sint ambæ affirmantes: quia terminus medius in neu-

tiâ distribueretur. Non secundò, si sint ambæ negantes, per tertiam legem. Non tertio, si una sit affirmans, & altera negans: quia tunc non plures essent termini, universaliter sumpti in præmissis, quàm in conclusione; sicut attendenti patebit; ergo, &c.

Per has leges & earum corollaria, excluduntur quinquaginta quatuor modi; ita ut quidam per unicam tantum; alii verò, per multas ejusmodi leges excludantur: hinc supersunt tantum decem modi legitimi, quorum quatuor sunt affirmantes, & sex negantes.

S C H E M A.

<i>Affirmantes.</i>	A	A	A	<i>Negantes.</i>	A	E	E
	A	A	I		A	O	O
	A	I	I		E	A	E
	I	A	I		E	A	O
					O	I	O
					O	A	O

Regule speciales.

Hæ regulæ vocantur speciales, quia singularum sillogismi figurarum sunt propriae.

Pro primâ figurâ.

Duæ sunt leges , pro primâ figurâ , hoc versiculo comprehensæ.

Sit minor affirmans , nec major sit specialis.

Demonstratur prior lex . . . Si minor esset negans in primâ figurâ , conclusio foret quoque negans , per quintam legem generalem ; & major esset affirmans , per tertiam legem generalem : at in primâ figurâ , conclusio non potest esse negans , dum major est affirmans. Si enim conclusio foret negans , dum major est affirmans , majus extremum , quod in hâc figurâ prædicatur in majore , sumeretur particulare in hâc majore , per tertium principium ; & sumeretur universaliter in conclusione negante , per quartum principium : atqui hoc fieri non potest , per secundam legem generalem ; ergo minor debet esse affirmans.

Demonstratur lex posterior . . . Minor debet esse affirmans in hâc figurâ , per priorem hujus legis partem ; ergo terminus medius , qui est ejus prædicatum , sumitur particulariter in hâc minore , per tertium principium ; ergo sumi debet universaliter in majore , per primam legem generalem : est autem hujus majoris sub-

jectum ; ergo major debet esse generalis ,
per secundum principium..

Ex decem modis legitimis , quatuor
tantum pertinere possunt ad primam figu-
ram ; duo affirmantes , *a a a* , & *a i i* ;
duo negantes , *e a e* , & *e i o* ; cæteri nam-
que excluduntur per duas leges mox pro-
batas.

Pro secundâ figurâ.

Duæ sunt leges pro secundâ figurâ , se-
quenti versiculo comprehensæ.

Una negans præeat ; nec major sit specialis.

Demonstratur prior lex... In hâc figu-
râ , medium prædicatur in utrâque præ-
missâ , ut igitur semel saltim distribuatur ;
una præmissa debet esse negans.

Demonstratur posterior lex.... Una
præmissa debet esse negans , per partem
priorem ; ergo conclusio erit negans ; ergo
majus extremum sumitur universaliter in
conclusionem ; ergo sumi debet universa-
liter in majore , per secundam legem ge-
neralem ; ergo cum in hâc figurâ sit sub-
jectum majoris , major debet esse gene-
ralis.

Ex decem legitimis modis , quatuor
tantum pertinere possunt ad secundam
figuram , *e a e* : *a e e* : *e i o* : *a o o* :

cæteri namque excluduntur per has duas leges.

Pro tertiâ figurâ.

Dux sunt leges pro tertiâ figurâ , sequenti versiculo designatæ.

Sit minor affirmans ; conclusio particularis.

Demonstratur prior lex... Si minor esset negans , major esset affirmans ; & conclusio negans : atqui hoc fieri non potest ; quia majus extremum sumeretur particulariter in majore affirmante , & universaliter in conclusione negante ; quod est contrâ secundam legem generalem.

Demonstratur posterior lex... Minor debet esse affirmans , per præcedentem ; ergo minus extremum , quod est ejus prædicatum , sumitur particulariter in minore ; ergo sumi debet particulariter in conclusione ; ergo conclusio debet esse particularis.

Ex decem legitimis modis , sex pertinere possunt ad tertiam figuram , nimirum , *a a i : e a o : i a i : a i i : o a o : e i o* : cæteri excluduntur per duas hujus figuræ leges.

Pro quartâ figurâ.

Tres sunt leges pro quartâ figurâ.

354 TERTIA PARS
 sequentibus versiculis expressæ.

*Major ubi affirmat, generalis tunc minor est.
 Si minor affirmat, conclusio sit specialis.
 Si neget hac, major generalis postulat esse.*

Demonstratur prima lex... Si major sit affirmans; medium, quod est ejus prædicatum, sumitur particulariter; ergo sumi debet universaliter in minore, cujus est subjectum; ergo minor tunc debet esse generalis.

Demonstratur secunda lex... Si minor sit affirmans, minus extremum, quod est ejus prædicatum, in ipsâ sumitur particulariter; ergo conclusio debet esse particularis.

Demonstratur tertia lex... Si conclusio sit negans; majus extremum in ipsâ sumitur universaliter; ergo debet etiam universaliter accipi in majore, cujus est subjectum; ergo major tunc esse debet generalis.

Ex decem legitimis modis, quinque pertinere possunt ad quartam figuram, nimirum, *a a i: a e e: i a i: e a o: e i o:* ceteri excluduntur per leges hujus figuræ.

De syllogismorum reductionibus.

Philosophi, ut monuimus, admittunt

modos indirectos & imperfectos; hinc excogitarunt methodum, ejusmodi sillogismos reducendi, ad directos & perfectos; hancque reductionem vocant *ostensivam*. Præterea, quoniam nonnulli, concessis præmissis sillogismorum indirectorum & imperfectorum, negant conclusionem; ideò, ut homines illos ad incommodum adducant, aliam etiam inveniunt reductionis speciem, quam vocant *ad impossibile*.

De reductione ostensiva.

Reductio ostensiva, est revocatio sillogismi indirecti & imperfecti, ad directum & perfectum: quoniam autem soli quatuor primi modi primæ figuræ, directi sunt & perfecti; ideò cæteri omnes dicuntur, *reducibiles*. Ut autem hujus reductionis artificium intelligas,

Nota 1^o. quemlibet modum, aut indirectum, aut imperfectum, incipere ab aliquâ e consonantibus, à quibus incipiunt quatuor modi directi & perfecti: incipiunt enim ab unâ ex his quatuor consonantibus, B, C, D, F; hinc si quis modus, aut imperfectus, aut indirectus, incipiat à consonantibus, B, ut *baralypton*, signum est, ipsum esse reducendum

356 TERTIA PARS

ad *barbara* ; si incipiat à consonante , C ; ut *camestres* , signum est , ipsum esse reducendum ad *celarent* ; & sic de aliis.

Nota 2^o. in omnibus modis , sive indirectis , sive imperfectis , habendam esse rationem harum aliarum consonantium , S , P , M , C.

His notatis , duos proponunt sequentes versiculos , totum hujus reductionis artificium continentes.

S , vult simpliciter verti ; *P* , verò , per accid.
M , vult transponi ; *C* , per impossibile duci.

Sensus horum versiculorum hic est.
1^o. Si consonans , S , reperiat in aliquo modo , vel indirecto , vel imperfecto , tunc propositio designata per vocalem , quæ consonantem hanc immediate antecedit , convertenda erit simpliciter.

2^o. Si consonans , P , in iisdem modis reperiat , tunc propositio designata per vocalem immediate antecedentem , convertenda erit per accidens.

3^o. Si in aliquo ex illis modis , occurrat consonans , M , tunc transponendæ erunt præmissæ.

4^o. Denique , si in aliquibus ex illis modis , occurrat consonans , C , nimirum in *Baroca* & *Bocardo* , signum erit , modos

illos reduci non posse ostensivè, sed redu-
cendos esse ad impossibile.

Si igitur sillogismus sequens propona-
tur ostensivè reducendus.

FA... *Omnis spiritus, est substantia;*

PES.. *Nullum corpus, est spiritus;*

MO.. *Ergo aliqua substantia non est corpus.*

1°. Quia hic modus incipit à conso-
nante, F, signum est, ipsum esse redu-
cendum ad *ferio*.

2°. Quoniam consonans, P, sequitur
vocalem, A, quæ majorem designat; ideò
major erit convertenda per accidens, hoc
modo.

Aliqua substantia, est spiritus.

3°. Quia consonans, S, immediate
sequitur vocalem, E, quæ denotat mi-
norem propositionem; ideò minor erit
convertenda simpliciter hoc modo.

Nullus spiritus, est corpus.

4°. Quia consonans, M, reperitur in
hoc modo; signum est, præmissas esse
transponendas. His omnibus servatis, re-
sultabit sillogismus hic in

FE.. *Nullus spiritus, est corpus;*

RI.. *Aliqua substantia, est spiritus;*

O.. *Ergo aliqua substantia, non est corpus.*

De reductione ad impossibile.

Reductio ad impossibile, est argumentatio, quâ quis, negatâ conclusionem sillogismi, cujus præmissas concessit, concedere cogitur etiam conclusionem, quæ sit vel contradictoria, vel contraria alterutrius præmissæ jam concessæ; undè quoniam nec contradictoriæ, nec contrariæ possunt esse simul veræ; ideò per hanc argumentationis speciem, dicitur ad impossibile reductus.

Hæc reductio fit, assumendo contradictoriam conclusionis negatæ: atque ex ipsâ, & ex alterutrâ præmissâ jam concessâ, inferenda erit conclusio directâ, quæ semper erit, vel contradictoria, vel contraria alterutrius præmissæ jam concessæ: ideò autem assumitur contradictoria conclusionis negatæ, quia qui propositionem aliquam negat, censetur ejus contradictoriam concedere.

Ut autem dignoscas, quænam ex præmissis sit assumenda, ut ex ipsâ, & ex contradictoriâ conclusionis negatæ, deducatur conclusio, vel contradictoria, vel contraria præmissæ jam concessæ; variae traduntur regulæ pro tribus figuris, quas solas admittunt Peripatetici: ejusmodi regulæ versiculis exprimi solent.

Pro prima figura.

*Major sit minor , ut sit contradictio major ;
Demptio , celantes , in quo convertitur ordo.*

Sensus prioris versiculi hic est... Con-
dictoria conclusionis negatæ ponenda erit
loco majoris; & major, loco minoris;
tunc inferenda erit conclusio directa;
verbi gratiâ, sit sillogismus in

BA... *Omnis spiritus , est substantia ;*
RA... *Omnis anima rationalis, est spiritus ;*
LYP, . *Ergo aliqua substantia , est anima*
rationalis.

Si quis igitur, concessis hujus sillogis-
mi præmissis, neget conclusionem; serva-
tâ regulâ, per priorem versiculum præ-
scriptâ, sic erit argumentandum in

CE... *Nulla substantia, est anima rationalis;*
LA... *Omnis spiritus , est substantia ;*
RENT. *Ergo nullus spiritus , est anima ratio-*
nalis.

Sensus posterioris versiculi hic est. Si
sillogismus, cujus conclusio fuit negata,
existat in modo, *celantes*; tunc inverten-
dus erit ordo, id est, propositio, quæ
erat minor illius sillogismi, ponenda erit
loco majoris, in argumentatione novâ;

& contradictoria conclusionis negatæ ponenda erit loco minoris ; tunc inferenda erit conclusio directæ : verbi gratiâ , sic sillogismus in

CE... *Nulla virtus , est vituperabilis ;*

LAN.. *Omnis temperantia , est virtus ;*

TES.. *Ergo nullum vituperabile , est temperantia.*

Si quis igitur , concessis præmissis , neget conclusionem ; contra ipsum sic erit argumentandum in

DA. . *Omnis temperantia , est virtus ;*

RI... *Aliquod vituperabile est temperantia ;*

O... *Ergo aliquod vituperabile , est virtus.*

Pro secunda figura.

Servat majorem, variatque secunda minorem.

Sensus est... In reducendis sillogismis secundæ figuræ , major eadem permanere debet in argumentatione novâ ; & loco minoris , apponenda est contradictoria conclusionis negatæ : tunc inferenda erit conclusio directæ. Exempla hujus reductionis sunt inventu facilia.

Pro tertia figura.

Tertia majorem variat , servatque minorem.

Sensus est, .. in reducendis sillogismis
tertiæ

tertiæ figuræ , contradictoria conclusionis negatæ ponenda erit loco majoris , & retinenda erit eadem minor ; tunc inferenda erit conclusio directa.

Jam verò , ut intelligas , ad quam è quatuor modis directis ac perfectis , revocandus sit quilibet modus indirectus & imperfectus ; sequentem proponunt figuram.

PHÆ

. Baralypton ,

BI FER A XIS

Celantes , dabiis , fapesmo , frisesomorum.

. O BIT TER RAS SPHÆ

Casare , camestres , festino , baroco. Darapti ,

RAM QUE QUOT AN NIS.

Fclapton , disamis , datizi , bocardo , ferizon.

In hoc schemate , suprà singulos modos indirectos & imperfectos , collocandæ sunt singulæ syllabæ sequentis versiculi.

Phæbifer axis , obit terras , spheramque quot annis.

In syllabis hujus versiculi , habenda tantum est ratio quatuor vocalium , *a, e, i, o.* Sensus autem est , eos omnes modos , in quos cadit vocalis , *a* , revocandos esse ad

Tomus I.

Q

barbara ; eos , in quos cadit vocalis , *e* , ad
celarent ; eos , in quos cadit vocalis , *a* , ad
Darii ; & eos , in quos cadit vocalis , *o* ,
 ad *ferio*.

*De reductione entymematis ad
 sillogismum.*

Enthymema , sicut dictum fuit , est sil-
 logismus mutilatus , seu cujus una præ-
 missa non fuit enuntiata ; quamobrem ut
 ad sillogismum revocetur , enuntianda est
 ejusmodi propositio.

Ut autem dignoscas , quænam desit
 propositio , perpendendum , est 1.^o. quîs-
 ram conclusionis terminus reperiat in
 antecedente cum medio. 2.^o. Revocan-
 dum est in memoriam , majorem propo-
 sitionem componi ex majore extremo ,
 & ex medio ; minorem verò , ex minore
 extremo , & ex medio.

His præsuppositis , si prædicatum con-
 clusionis reperiat in antecedente , cum
 medio ; signum est , hoc antecedens esse
 majorem propositionem ; & proinde deesse
 minorem. Deinde , si subiectum conclu-
 sionis reperiat in antecedente cum me-
 dio ; signum est , hoc antecedens esse mi-
 norem , & proinde deesse majorem.

Facile autem erit , vel majorem , vel

minorem enuntiare : major quippè componitur ex prædicato conclusionis , & ex medio ; minor verò , componitur ex sub-
jecto conclusionis , & ex medio. Sit igitur
sequens enthymema reducendum ad sillo-
gismum.

*Omnis virtus , est amabilis ;
Ergo temperantia , est amabilis.*

1°. Quia hic terminus , *virtus* non re-
peritur in conclusione ; signum est , ipsum
esse medium. 2°. Quia prædicatum con-
clusionis reperitur in antecedente, cum hoc
medio ; idè hoc antecedens , est major
propositio ; adeòque deest minor. 3°. Quo-
niam minor propositio componitur ex
subjecto conclusionis & ex medio , facile
erit eam enuntiare hoc modo. . . atqui
temperantia est virtus ; tuncque sillogis-
mus erit integer. Sit rursus sequens enthy-
mema revocandum ad sillogismum.

*Omnis modificatio , est ens in alio ;
Ergo nulla modificatio est substantia.*

1°. Quia hæ voces , *ens in alio* , non re-
periuntur in conclusione ; idè tenent lo-
cum termini medii. 2°. Quia subjectum
conclusionis reperitur in antecedente, cum
medio ; idè hoc antecedens , est propo-
sitiio minor ; unde deest major , quæcum

componatur ex majore extremo & ex medio, facile erit eam sic exprimere... Nulum ens in alio, est substantia; & tunc sillogismus erit integer.

De sillogismorum speciebus,

1°. Si sillogismus spectetur, ratione propositionum, distribui potest in simplicem, complexum & compositum; in absolutum & modalem.

Simplex, dicitur ille, cujus omnes propositiones sunt simplices.

Complexus, cujus aliquæ propositiones sunt complexæ.

Compositus, cujus aliquæ propositiones sunt compositæ.

Absolutus, cujus propositiones non exprimunt modum, quo prædicata conveniunt, aut non conveniunt subjectis.

Modalis denique, cujus aliquæ propositiones modum illum exprimunt. De simplicibus huc usque dictum fuit. De cæteris, præsertimque de compositis, dicetur postea.

2°. Sillogismus, ratione qualitatis spectatus, distribui potest in affirmantem & negantem; in verum & falsum. Affirmans, dicitur ille, cujus conclusio affirmat; negans verò, cujus conclusio negat.

Sillogismus, dicitur verus, vel ratione materiæ, quando scilicet quælibet propositio enuntiat de subiecto, habitudinem ipsi convenientem; vel ratione formæ, quando propositiones & termini sic disponuntur, ut conclusio necessario sequatur ex præmissis: ex opposito, sillogismus dicitur falsus, vel ratione materiæ, vel ratione formæ.

3°. Sillogismus, ratione materiæ spectatus, distribuitur in demonstrativum, dialecticum & sophisticum.

Sillogismus demonstrativus, dicitur ille, cujus præmissæ versantur circa objecta necessaria, suntque evidentes, & in legitimâ formâ dispositæ. Triplex autem vulgò distinguitur demonstratio, à priori, quando, inquiunt, probatur effectus per causam; à posteriori, quando probatur causa per effectum; & à simultaneo, quando probatur aliquod ens, per attributa cognita & concessa, quæ ipsi soli convenire posse probantur.

Sillogismus dialecticus, aliter *topicus*, est ille, cujus propositiones sunt solummodo probabiles.

Sillogismus sophisticus, *fallaciam* vocant, est ille, qui vitiosus est, vel ratione materiæ tantum, vel ratione formæ tantum, vel ratione utriusque.

*Examen opinionis Philosophorum circa
sillogismos.*

1°. Quatuor sunt in rei veritate, sillogismorum figuræ; sicut probabitur in Con-
certationibus. Præterea, juxta combina-
tionum leges, admittendi sunt sexaginta
quatuor sillogismorum modi.

2°. Quod attinet ad principia, quibus
sillogismorum regulæ dicuntur innixa.
Dico, primum ex illis principiis, falsum
esse; nam si agatur de materiâ necessariâ,
propositio particularis semper est falsa,
adeoque contineri non potest in univer-
sali verâ: imò particulare non includitur
in universali, quia non est ejus inferius.
Deinde, si agatur de materiâ contingenti,
quoniam particularis & universalis non
possunt esse simul veræ; fieri non potest,
ut particularis includatur in universali.

Dico deinde, secundum principium
esse verum; sicut constat ex dictis de quan-
titate propositionum.

Dico pariter, tertium & quartum prin-
cipia, esse vera; ut probabitur in Con-
certationibus.

Dico denique, sillogismorum regulas
generales, supradictis principiis reipsâ
non inniti; quia principia illa, nec sunt

regularum motiva, nec regulas implicite continent.

3°. Sex regulæ generales, cum quinque prioribus corollariis, certissimæ sunt; imò sunt corollaria nostræ generalis argumentandi methodi. Quod attinet ad sextum corollarium, falsitatem ejus ostendemus in Concertationibus.

4°. Per leges generales & earum corollaria, ritè quidem excluduntur quinquaginta quatuor modi; sed exinde malè colligitur, decem superesse modos legitimos: nam si agatur de materiâ necessariâ, tres tantum possunt esse legitimi, nimirum, *a a a: e a e: a e e*: quia ceteri septem concludunt particulariter quod fieri non potest in hâc materiâ. Deinde si agatur de materiâ contingenti, omnes illi modi sunt illegitimi, in quibus reperitur vocalis, E; quia propositio universalis negans in materiâ necessariâ, semper est falsa.

5°. Quod attinet ad leges speciales, dico 1°. duos tantum esse posse modos legitimos in primâ figurâ, si agatur de materiâ necessariâ; quia alii duo particulariter concludunt: quod si sermo sit de materiâ contingenti, illi tantum sunt legitimi, in quibus non occurrit vocalis, E.

Dico 2°. duos tantum esse modos legi-

timos in secundâ figurâ, si agatur de materiâ necessariâ; quia alii duo particulariter concludunt: quod si agatur de materiâ contingenti, unicuique tantum esse potest modus legitimus in hac figurâ: quia in cæteris occurrit vocalis, E.

Dico 3.^o. nullos esse posse modos legitimos in tertiâ figurâ, si agatur de materiâ necessariâ: quia omnes concludunt particulariter. Quod si agatur de materiâ contingenti, illi soli sunt legitimi, in quibus non reperitur universalis negans.

Dico denique, unicum esse modum legitimum in quartâ figurâ; si agatur de materiâ necessariâ: quia cæteri concludunt particulariter. Quod si agatur de materiâ contingenti, duo tantum esse possunt legitimi; quia cæteris occurrit vocalis, E.

6.^o. Denique probabimus in Concertationibus, nullos esse modos indirectos, nullosque imperfectos; unde reductio ostensiva, & reductio ad impossibile, evadunt prorsus inutiles.

Annotationes circa sillogismos compositos.

1.^o. Ut sillogismus copulativus affirmans admittatur ut legimus, non tantum re-

quiritur , ut sit in legitimâ formâ ; sed insuper , ut singulæ propositiones simplices , in quas resolvuntur copulativæ , sint veræ : si enim vel unica , ex ejusmodi propositionibus simplicibus , deprehendatur falsa , totus sillogismus rejici poterit.

2°. In sillogismis copulativis negantibus , valet quidem consequentia , ab affirmatione unius membri , ad negationem alterius , ut in sillogismo sequente.

Nemo potest servire Deo & mammona :

Atqui avarus servit mammona ;

Ergo avarus non servit Deo.

Sed non valet consequentia , à negatione unius membri , ad affirmationem alterius ; verbi gratiâ , non valet sequens sillogismus.

Nemo potest servire Deo & mammona :

Atqui prodigus non servit mammona ;

Ergo prodigus servit Deo.

Ratio prioris partis est , quia cùm quædam sit oppositio inter membra , poni non potest unum , quin removeatur alterum. Ratio posterioris partis est ; tum quia duæ præmissæ fierent negantes ; tum quia conclusio non sequeretur deteriorem præmissarum partem.

3°. In sillogismis disjunctivis , valet consequentia ; tum ab affirmatione unius membri , ad negationem alterius ; tum à

negatione unius membri, ad affirmationem alterius, dummodò tamen membra sint inter se sic opposita, ut simul convenire non possint eidem subjecto: hinc ex duobus sillogismis sequentibus, valet prior; quia inter membra reperitur oppositio propriè dicta; non autem posterior, quia non est ejusmodi oppositio.

*Homo est, vel substantia, vel modificatio :
Atqui homo non est modificatio ;
Ergo homo est substantia.*

*Petrus est, vel doctus, vel pius :
Atqui Petrus non est doctus ;
Ergo Petrus est pius.*

4°. In sillogismis conditionalibus, valet consequentia; tum à positione antecedentis, ad positionem consequentis; tum à remotione consequentis, ad remotionem antecedentis; sed non valet consequentia, tum à positione consequentis, ad positionem antecedentis; tum à remotione antecedentis, ad remotionem consequentis: verbì gratiâ, ex sequentibus sillogismis, valent duo priores; sed non valent duo posteriores.

*Si justitia sit virtus, est amabilis :
Atqui justitia est virtus ;
Ergo justitia est amabilis.*

*Si lapis sit ens in alio , est modificatio :
Atqui lapis non est ens in alio ;
Ergo lapis non est modificatio.*

*Si lapis sit spiritus , est substantia :
Atqui lapis est substantia ;
Ergo lapis est spiritus.*

*Si lapis sit spiritus , est substantia :
Atqui lapis non est spiritus ;
Ergo lapis non est substantia.*

Ratio prioris partis est, quia quando reperitur connexio, consequens inter & antecedens, ita ut consequens affirmetur de antecedente; tunc consequens se habet, velut prædicatum propositionis affirmantis. Porro si ponatur antecedens, quod est velut totum quoddam, poni debet consequens, ut potè pars antecedentis. Pariter, dum removeretur hoc consequens, removeri debet antecedens: remotâ namque parte essentiali, removeri debet totum, cujus est pars.

Ratio posterioris partis est, quia ex eo quod ponatur consequens, quod potest esse universalius antecedente; non idèd ponitur antecedens, quod potest esse inferius, respectu consequentis. Præterea, quamvis removeatur antecedens, seu

unum ex inferioribus, non ideo remouetur consequens, seu superius.

5°. In sillogismis causalibus, eatenus valet consequentia, quatenus pars in quam cadit particula causalis, est reipsâ principium alterius.

6°. In omnibus sillogismis, quorum aliqua propositio est, vel exclusiua, vel exceptiua, sedulò perpendendum est, ex quânam parte deducatur conclusio; hinc resolvenda erit ejusmodi propositio composita, ut facilius appareat ex quânam parte concludatur.

Usu & exercitatione cætera fient manifesta. Interim, resolutis propositionibus compositis, per generalem nostram discurrendi methodum, judicare poteris de connexionione conclusionis cum præmissis.

*De variis errorum fontibus, circa
discursum.*

Præter varios errores, qui serpere possunt in sillogismos, ex eo quòd secundum Logicæ regulas, non fuerint confecti, innumeri sunt alii, qui se tenent, vel ex parte materiæ, vel ex parte circumstantiarum. Non agam hîc de erroribus prioris generis, quia facilè detegi poterunt ab iis, qui norunt principia nostræ argumen-

tandi methodi. Hic igitur indicabimus præcipuos errorum fontes, posterioris generis.

Fons primus, dicitur in scholis, *ignorantia elenchi*; id est, ignorantia illius, quod est in quæstione positum. In hunc errorem sæpissimè labuntur controversiarum agitantes, dum scilicet eas Adversariis suis affingunt opiniones, in quibus non fuerunt versati.

Remedium erit, si vocum significatio ritè perpendatur, juxta scriptoris mentem & scopum: deinde, si quæstionis ejusdem varii sensus sedulò distinguantur & secerantur; denique, si non ex uno, aut ex altero textu scriptoris; sed ex totâ operis æconomia, judicaveris de scriptoris opinione.

Fons secundus, vocatur, *petitio principii*. In hunc errorem incidunt, qui pro medio probationis, assumunt aliquid implicite supponens, quod est in quæstione positum: ut si quis probare vellet, belluis inesse substantias, à materiâ diversas, sic ratiocinaretur.

Quod sentit, habet substantiam à materiâ diversam:

Atqui belluæ sentiunt;

Ergo belluæ habent substantias, à materiâ diversas.

Nimirum quoniam sensatio, sumpta pro impressione excitatâ in animâ nostrâ, occasione motuum corporeorum, supponit existentiam animæ; exinde manifestum est eos supponere, bellais inesse substantias, à materiâ diversas, qui supponunt belluas sentire; adedque supponunt quod est in quæstione positum.

Errorrem hunc vitabis, si nihil assumes, pro medio probationis, nisi quod, vel est per se evidens, aut certum, vel fuerit antea ritè probatum.

Fons tertius, dicitur, *non causa, pro causâ*, id est, quando pro causâ cujusdam effectûs, assignatur aliquid, quod reipsâ non est ejus causa. Hunc in errorem impingunt, qui seditiones, bella, sterilitates, morbos, &c. vel cometis de novo apparentibus, vel speciali stellarum & planetarum dispositioni, tanquàm causis tribuunt. In eundem errorem incidunt, qui serenitatem, pluviam, incrementum, & decrementum medullæ in animalium ossibus, aliaque, id generis, Lunæ tribuunt.

Vitabitur hic error, 1°. si constet de existentia effectûs propositi. 2°. Si ritè perpendatur, num effectus ille potuerit oriri à multis causis diversis. 3°. Denique, si ex variis circumstantiis, inter se & cum effectû collocatis, judicemus effectum pro-

positum, ab hâc, potius quàm ab illâ causâ, prodiiisse.

Fons quartus, dicitur *fallacia accidentis*, id est, quando ex aliquo contingenter tantùm verò, deducitur conclusio generalis & absoluta: ut si ex eo quòd vir eloquens, pravos quosdam effectus produxerit, statim inferas, pravos effectus, ab omnibus viris eloquentibus semper produci; vel si quis, ex eo quòd quidam homines, ex certâ regione orti, superbi sint & ignari, statim inferat, omnes ejusdem regionis homines, esse superbos & ignaros.

Hunc errorem vitabis, si attributa contingentia secernantur ab essentialibus; deinde si ex attributis contingentibus, dignoscatur, quænam sint communia, quænam verò minimè communia.

Fons quintus, dicitur *fallacia compositionis*, hoc est, quando fit transitus à sensu diviso, ad sensum compositum: ut si quis ex eo quòd, sic legatur in Scripturâ Sacrà, *Deus justificat impios*; inferat impios, in statu impietatis manentes, justificari.

Fons sextus, dicitur *fallacia divisionis*, quando nimirum fit transitus à sensu composito, ad sensum divisum: ut si quis, ex hoc alio Scripturæ testimonio, *Avari non intrabunt in regnum cælorum*, inferat

Avaros, non amplius avaritiæ deditos, salvari non posse.

Vitabitur uterque posterior error, si notæ fuerint terminorum affectiones, in secundâ Logicæ parte traditæ.

Fons septimus est, quando motivum judiciorum nostrorum, est amor immoderatus, vel sui ipsius, vel parentum, vel amicorum, vel patriæ, &c. Hinc 1°. nonnulli discursus admittuntur, ut legitimi, vel ab omnibus alicujus imperii populis, vel à quibusdam hominum societatibus & ordinibus, vel à quibusdam familiis; quamvis à cæteris omnibus hominibus agnoscantur ut falsi. Hinc 2°. nonnulli discursus à nobis rejiciuntur, vel ex eo solo, quòd inveteratis nostris præjudiciis opponantur. Hinc 3°. qui quasdam opiniones ex hoc pravo motivo propugnant, Adversarios suos, tanquàm pertinaces; malæ fidei, ac etiam sensu communi destitutos, judicant.

Vitabitur hic error, 1°. si judicia & discursus perpendantur, nullâ habita ratione personarum, locorum & temporum. 2°. Si in disputationibus omittantur ea, quæ possunt ex utrâque parte congeri. 3°. Si nihil pronuntiemus, nisi firmo & laudabili motivo innixi.

Fons octavus est, quando diligentius

attendimus ad ea momenta , quæ sententiam aliquam labefactare possunt , quæ ad ea , quæ possunt eandem stabilire , & confirmare.

Vitabitur hic error , si antequàm sententiam nostram feramus , constanter & maturè conferantur inter se varia argumenta , quæ proferuntur ex utrâque parte , ac eorum motiva strictè perpendamus.

Fons nonus est , quando non studio veritatis detegendæ , sed solo contradicendi pruritu , movemur ad contradicendum.

Hunc errorem vitabis , si attendas hunc unicum esse debere disputationum scopum , ut ex ingeniorum , mutuo quasi conflictu , scintillans prodeat veritas.

Fons decimus est , quando judicamus de veritate , aut falsitate cujusdam rationis , vel ex autoritate minimè sufficienti , vel ex modo , quo proponitur. In hunc errorem incidunt , qui præbent assensum , eo ex solo , quòd propositiones quædam à viro in scientiis celebri , præsertim voce canorâ , verbisque elegantibus confidenter proferantur ; è contrâ suum denegant assensum , propositionibus prolati ab hominibus obscuri nominis , timidis , & balbutientibus.

Vitabitur hic error , si unamquamque propositionem , solutam & liberam ab or-

378 CONCERTATIONES
namentis, cæterisque ipsi extrinsecis, ta-
citus examini subjicias.



CONCERTATIONES

• circa Discursum.

Hoc ordine procedemus in his Con-
certationibus.

- 1°. Inquiremus, quid sit discursus?
- 2°. An, concessis præmissis sillogismi
legitimè dispositi, necessarius sit conclu-
sioni assensus?
- 3°. Quotuplex sit sillogismorum figura?
- 4°. An principia & regulæ sillogismorum,
prout à Philosophis proponantur, sint
certissima?
- 5°. An admittendi sint modi indirecti
& imperfecti; & consequenter, an ad-
mittendæ sint sillogismorum reductiones,
de quibus dictum fuit.
- 6°. Denique, quoniam scientia vulgò
dicitur, scæus demonstrationis; idèd spe-
ciatim differemus, de scientiâ universam.

Quid sit discursus.

Sensus hujus quæstionis est, utrùm dis-

curfus fit quid simplex, & an fit à judicio diversus?

Dico autem 1°. discursum, objectivè sumptum, esse quid compositum; quia repugnat objectum, carens partibus essentialibus.

Dico 2°. discursum sumptum pro signo; seu pro propositionibus, specialem hunc actum significantibus, esse quid compositum; quia discursus sic sumptus, componitur ex propositionibus & terminis.

Dico 3°. discursum, formaliter sumptum, seu prout est actus, esse quid simplex in ratione actûs; quia nullus actus componitur ex aliis actibus, ut multoties dictum fuit. Ubi notabis, multos quidem actus simul existere posse in animâ nostrâ; sed nullus eorum est pars alterius.

Dico denique discursum, formaliter sumptum, esse actum, à judicio diversum. Illi namque actus sunt diversi, qui diversimodè definiuntur ab omnibus Philosophis: atqui discursus & judicium diversimodè definiuntur ab omnibus Philosophis; proindèque, &c.

De necessitate assentiendi.

Ut intelligatur & solvatur hæc quæstio, nota 1°. duplicem distingui necessitatem, contrarietatis & contradictionis.

380 CONCERTATIONES

Necessitas contrarietatis, aut, ut aiunt nonnulli, *specificationis*, est determinatio potentiae, ad producendam certam actûs speciem, cum impossibilitate producendi actûs speciem oppositam, qualis esset determinatio ad amorem, cum impossibilitate odio habendi, aut vice versâ.

Necessitas contradictionis, aut, ut aiunt nonnulli, *exercitii*, est determinatio potentiae ad hunc numero actum, cum impossibilitate ipsum non producendi; qualis est in beatis, determinatio ad Deum hîc & nunc amandum.

Nota 2°. sequentes præsупponi conditiones, dum agitur de assensu dando alicui conclusioni.

Prima, ut intellectus noverit regulas, & praecepta, de sillogismis ritè conficiendis.

Secunda, ut intellectus assensum præbuerit præmissis, ipsumque non retractaverit.

Tertia, ut sillogismus reipsâ sit ritè confectus.

Quarta, ut adsit memoria assensûs præmissis dati.

Quinta denique, ut reipsâ fiat attentio, ad conclusionem propositam.

His notatis, sensus quæstionis est, utrùm præsuppositis his conditionibus, mox enumeratis, intellectus necessitetur.

ad assentiendum conclusioni, tùm necessitate contrarietatis, tùm necessitate contradictionis.

Conclusio.

Præsuppositis omnibus conditionibus superiùs enumeratis; intellectus, utrâque necessitate impellitur, ad assentiendum conclusioni.

Primò quidem ad hunc assensum necessitatur necessitate contrarietatis. Facultas enim, quæ unicam tantùm actûs speciem producere potest, necessitatur necessitate contrarietatis (per definitionem hujus necessitatis); atqui, præsuppositis suprâ dictis conditionibus, intellectus noster unicam tantùm actûs speciem producere potest, nimirùm assensum. Intellectus enim dissentiri non potest, vero cognito, ut vero: quia veritas non potest esse objectum dissensus: at, præsuppositis illis conditionibus, conclusio judicatur vera, quandoquidem necessariam habet connexionem, cum præmissis concessis; ergo, &c.

2º. Intellectus ad hunc assensum, necessitatur necessitate contradictionis. Facultas enim, quæ non est libera, positis omnibus ad agendum prærequisitis, non potest sese abstinere ab actû ponendo:

atqui intellectus, est facultas minimè libera, ut fatentur Philosophi, & ut constabit ex dicendis in Morali; aliundè verò, positis conditionibus suprà dictis, adsunt omnia prærequisita, ut intellectus agat; ergo, &c. proindèque, &c.

• *Objectiones.*

Objicies. 1°. Facultas, quæ difficultatem patitur in assentiendo, potest non assentire: atqui noster intellectus, etiam præsuppositis suprà dictis conditionibus, nonnunquam difficultatem patitur, in assentiendo conclusioni: scilicet, vel quando paucos exercuit actus similes, vel quando anima non vult huic assensum ponere; ergo, &c.

Nego majorem, & minorem. Majorem quidem; quia licet aliqua facultas difficultatem patiatur, inter agendum; si tamen non sit libera, & adsint omnes conditiones, ad agendum prærequisitæ, non potest se abstinere ab actu, ponendo. Minorem pariter; quia intellectus præsupponitur, habere notitiam regularum omnium sillogisticarum; adeoque tunc habet facilitatem assentiendi conclusionibus sillogismorum, ritè confectorum, præsertim cum tunc cognoscat, conclusionem

CIRCA DISCURSUM. § 83
implicitè contineri in alterutrâ præmissarum jam concessarum

Objicies. 2°. Si quæ ratio probaret intellectum nostrum, positis conditionibus suprà dictis, necessitari ad assentiendum conclusioni; maxime quia conclusio necessariam habet connexionem, cum præmissis: atqui hæc ratio nulla est. Quamvis enim voluntas bonum aliquod amet, non ideo necessitatur, ad amandum aliud bonum, cum priore necessario connexum; ergo à pari, intellectus non necessitatur ad assentiendum conclusioni, cum præmissis necessario connexæ; ergo, &c.

Nego minorem. Intellectus enim, concedendo præmissas, conclusionem implicitè concedit. Ad probationem autem, nego paritatem. Disparitas est, tum quia voluntas est facultas libera, non item intellectus: tum quia bona necessario connexa cum bono amato, non semper sunt ejus partes; at conclusio, pars est illius præmissæ, in quâ implicitè continetur; ergo, &c.

Dices iterum. Nonnulli concedunt præmissas sillogismorum, tum ratione formæ, tum ratione materiæ legitimorum; & tamen, experienciâ teste, negant conclusionem; ergo, &c.

Respondeo homines illos, aut ignorare

regulas sillogismorum, aut non recordari assensûs præmissis dati; aut assensum hunc retractasse; aut tandem, ipsos mentiri.

Quotuplex sit sillogismorum figura.

Peripatetici, ut dictum fuit, tres tantum figuras sillogismorum admittunt; contenduntque, quartam reipsâ non differre à primâ. Contrâ eos sit,

Conclusio.

Quatuor admittendæ sunt diversæ sillogismorum figuræ. Totuplex enim admittenda est diversa sillogismorum figura; quotuplex est diversa terminorum dispositio, apta ad ritè concludendum: atqui quadruplex est terminorum diversa dispositio, apta ad ritè concludendum. Tâmen terminus medius prædicari potest in majore & subjici in minore, ut fert quarta figura; quàm prædicatur in majore, in secundâ figurâ; & subjicitur in minore, in tertiâ figurâ; proindèque nihil impedit, quominùs admittatur quarta figura.

Objectiones.

Objicies. 1°. Si quæ figura posset admitti, ut quarta; ea certè, quam *Galenicam* vocant: atqui figura *Galenica* diversa non est à primâ, ut potè solâ præmissorum transpositione,

positione, ab ipsâ discrepans; ergo, &c.

Nego majorem. Nam figura *Galenica*, seu à Galeno Medico usurpatâ, reipsâ solâ præmissarum transpositione, differt à primâ Peripateticorum; adeoque cum præmissarum transpositio non sufficiat ad figurarum diversitatem, immeritò diceretur quarta figuræ species: at figura, quam admittimus ut quartam, longè diversa est tum à Galenicâ, tum à primâ Peripateticorum; in quantum terminus medius prædicatur in eâ propositione, quæ reipsâ major est, & subjicitur in eâ, quæ reipsâ minor est.

Instabis. 1°. Hic sillogismus est in quartâ figurâ, quam admittimus.

Omnis homo, est substantia:

Atqui substantia, est ens;

Ergo aliquod ens, est homo.

Atqui hæc figura, sicut & Galenica, non differt à primâ. Si enim secunda propositio reipsâ sit major, hæc figura non differt à primâ: atqui res sic se habet. Illa namque propositio dici debet major, quæ continet majus extremum, cum medio: atqui hæc propositio continet, &c. Nam majus extremum est terminus magis universalis: atqui secunda propositio continet terminum magis universalem, nimirum *ens*; ergo, &c.

Tomus I.

R

1°. Non admitto sillogismum mox propositum, quia subjectum conclusionis est aliquod superius, & prædicatum unum est ex ejus inferioribus: porro superius, ut potè pars inferioris, subiacere non potest inferiori, ut multoties monuimus.

2°. Negatis minoribus trium priorum sillogismorum, nego majorem postremi. Majus enim extremum in sillogismo, non dignoscitur, ex eo quòd magis pateat; alioqui, quando tres termini forent æquè patentes, majus extremum non posset amplius dignosci; sed ex eo constanter dignoscitur, quòd sit prædicatum conclusionis.

Instabis. 2°. Deberet afferri ratio, cur prædicatum conclusionis, semper sit majus extremum: at nulla potest ejusmodi legitima ratio proferri; ergo, &c.

Nego minorem. Idèd namque prædicatum conclusionis, dictum fuit majus extremum, quia potest magis patere, quàm subjectum, & nunquam minùs; sicut manifestum fiet, si attendas ad quinque universalialia, in prædicando.

Objicies. 2°. Conclusio sillogismi in eâ figurâ, quam vocamus quartam, indirecta est; ergo talis figura non differt in rei veritate, à primâ.

Nego antecedens. Cùm enim quælibet

conclusio præsupponatur existens in mente, antequàm assumantur præmissæ; nulla conclusio dici potest indirecta; sed de his postea.

De veritate principiorum & regularum.

Quatuor retulimus principia, quibus tanquàm fundamentis, niti dicuntur sillogismorum regulæ, tùm generales, tùm speciales.

Omnes Philosophi quatuor illa admittunt principia, tanquàm vera, exceptis nonnullis recentioribus, qui duo postrema multis in casibus, esse falsa contendunt; unde docent, quæcumque dicta fuerunt circa sillogismorum regulas, esse partim incerta, & partim falsa, si, inquit, juxtà dialecticæ subtilis leges, expendantur.

Quatuor hîc præstabimus. 1°. Probabimus primum principium esse falsum. 2°. Veritatem duorum postremorum astringemus. 3°. Regulas omnes, tùm generales, tùm speciales, à Philosophis traditæ, circa sillogismos simplices, cum quinque prioribus corollariis, certissimas esse propugnabimus. 4°. Sextum corollarium, ut falsum, rejiciemus.

Conclusio prima.

Propositio particularis non includitur in universali ejusdem qualitatis. Nam propositio falsa non includitur in propositione verâ, nec vera includitur in falsâ: atqui propositio particularis est falsa, quando universalis est vera, aut vice versâ: vel enim agitur de materiâ necessariâ, vel de materiâ contingenti: atqui propositio particularis falsa est in utrâque hâc materiâ, quando vera est universalis ejusdem qualitatis. Hoc quidem evidens est, dum agitur de materiâ necessariâ; quia in hâc materiâ, subjectum nunquam potest sumi pro aliquibus tantum suis inferioribus; quandoquidem nulla est exceptio in hâc materiâ. Id etiam certum esse debet in materiâ contingenti. Tunc enim prædicatum, vel convenit ut plurimum subjecto, vel ut plurimum removeretur à subjecto: atqui hoc in casu, falsum est, subjectum illud sumi posse particulariter: aliundè verò, si propositio particularis vera sit, in materiâ contingenti, non potest includi in generali ejusdem qualitatis, quia tunc generalis semper est falsa; proindèque, &c.

Dices. Propositiones universales continent implicite propositiones particulares,

ergo particulares includuntur in universalibus, ejusdem qualitatis.

Nego antecedens. Nam propositiones universales continent quidem implicite, propositiones omnes, quarum subjecta sunt inferiora subjecti propositionis generalis; sed non continent implicite propositiones, quarum subjecta, non sunt inferiora subjectorum propositionum universalium. Porro, subjecta propositionum particularium, non sunt inferiora subjectorum universalium, quandoquidem sunt eadem subjecta, particulariter sumpta.

Conclusio secunda.

Prædicatum propositionis affirmantis semper sumitur particulariter. Quoties enim propositio est affirmans, toties ipsius subjectum sumitur, aut universaliter, aut particulariter, aut est individuum quoddam determinatum: atqui in his omnibus casibus, prædicatum sumitur particulariter.

Primò quidem, si subjectum sumitur universaliter, prædicatum sumi debet particulariter. Ubi namque subjectum sumitur universaliter; accipitur pro omnibus suis inferioribus; ita ut quod enunciatur de illo subjecto, enunciari possit de unoquoque ejus inferiore: at tunc attributum

sumi debet particulariter ; alioqui tota prædicati extensio , singulis subjecti inferioribus conveniret ; quod est absurdum ; ergo , &c.

2°. Si subjectum sumatur particulariter , (quod accidere tantum potest in materiâ contingenti) , prædicatum sumi debet particulariter ; quia accidens nullum convenire potest , secundum suam totam extensionem , quibusdam tantum his subjectis ; ergo , &c.

3°. Denique , si subjectum sit aliquod individuum determinatum , evidens est , totam prædicati generalitatem , ipsi non posse tribui ; ergo , &c. proindeque , &c.

Objectiones.

Objicies. 1°. Hæc propositio est universalis affirmans... Omnis homo , est omne rationale : atqui prædicatum ejus sumitur universaliter , ut patet , ex eo quod ipsi præfixum sit universalitatis signum ; ergo , &c.

1°. Nego majorem. Quoties enim vox *omnis* , præfixa est prædicato , semper significat aliquid singulare ; unde sensus est propositionis allatæ... Collectio hominum , est collectio rationalium ; & tunc singularis est.

2°. Falsum est collectionem hominum ,

esse collectionem rationalium ; quia Angeli possunt ratiocinari.

Objicies. 2^o. Hæc propositio. . . Soli homines sunt omnes Medici, est affirmans : atqui hujus propositionis attributum sumitur universaliter ; ergo , &c.

Transseat major , nego minorem. Vox enim , *omnes* , præfixa prædicato , non est signum distributionis ; alioqui sensus esset, verbi gratiâ... Petrus est , omnes Medici... Paulus est , omnes Medici , &c. quod est absurdum. Dixi autem ad majorem , *transseat* ; quia propositio mox allata , exclusiva est affirmans ; adedque resolubilis est in duas propositiones , quarum una quidem affirmat , sed altera negat.

Objicies denique. Hæc propositio est affirmans. . . Animal ut sic , est sensitivum ut sic : atqui prædicatum hujus propositionis non sumitur particulariter ; alioqui sensus esset , animal ut sic , est aliquod sensitivum ut sic ; ergo , &c. -

1^o. Nego majorem , quia est de falso supponente. Supponit enim has voces , *animal ut sic* , *sensitivum ut sic* , propositionem aliquam efficere posse : at hoc falsum est ; sunt enim sinonimæ voces ; scilicet , *animal* , ut aiunt , significat id quod habet principium sentiendi ; & *sensitivum* , non potest aliud significare.

2°. Nego minorem. Dato namque quòd, voces allatæ diversa significarent, subjectum & prædicatum restringerentur : quælibet enim reduplicatio, est signum restrictionis, ut alibi fuit annotatum; hinc sensus esset... Animal, secundum suam essentiam spectatum, est sensitivum, secundum essentiam suam spectatum; quo in casu, prædicatum non sumeretur universaliter.

Conclusio tertia.

Attributum propositionis negantis semper sumitur universaliter. In propositione namque negante, vel enuntiatur incompatibilitas attributi cum subjecto, vel ejusdem à subjecto separatio: atqui in utroque casu, prædicatum propositionis, sumitur universaliter. Quod enim removeretur à subjecto, secundum totam suam essentiam, ab ipso removeretur, secundum totam suam universalitatem: atqui in propositionibus, vel incompatibilitatem, vel separationem enuntiantibus, prædicatum removeretur à subjecto, secundum totam suam essentiam, cum essentia sit indivisibilis; ergo removeretur etiam secundum totam suam universalitatem; ergo, &c.

Dices. Hæc propositio est negans... Lac non est aliquod album: atqui prædicatum sumitur particulariter, quandoquidem.

præfixum habet particularitatis signum ;
ergo , &c.

1°. Propositio mox allata , falsa est :
enuntiat enim de lacte , quod non sit
quoddam album ; & tamen est quoddam
album.

2°. Nego minorem. Si enim sub aliquo
sensu, vera sit allata propositio, hic unus
esse potest sensus... Lac nullum est quo-
rundam alborum , eorum scilicet , quæ
tribuuntur nivi , saccharo , parieti , &c.
quo in casu , prædicatum sumitur univer-
saliter.

At , inquires , *aliquod album* , est prædi-
catum allatæ propositionis ; ergo prædica-
tum illud sumitur particulariter.

Nego antecedens. Si enim allata pro-
positio sumatur in sensu vero , prædica-
tum debet esse , *nullum quorundam albo-
rum*.

Conclusio quarta.

Omnes regulæ , tum generales , tum
speciales sillogismorum , cum quinque
prioribus corollariis , certissimæ sunt. Ea
namque sunt certissima , quæ per legitimas
demonstrationes innotescunt vera : atqui
omnes regulæ , tum generales , tum spe-
ciales , &c. sic se habent ; sicut constat ex
probationibus , quarum ope , veritatem

R. v.

324 . CONCERTATIONES
legum illarum, & illorum corollariorum
demonstravimus; proindèque, &c.

Objectiones.

Objicies, 1°. Hic sillogismus est legitimus; licet major propositio sit particularis affirmans, & conclusio negans.

Soli aliqui homines, sunt omnes Medici ::

Atqui nullus equus, est homo ;

Ergo nullus equus, est Medicus.

ergo falsum est, secundum corollarium.

1°. Nego antecedens. Tunc enim sillogismus non est legitimus, quando ipsius termini, diverso planè sensu accipiuntur :: atqui in allato sillogismo, termini sumuntur, &c. scilicet terminus, *homo* collectivè sumitur in majore, & distributivè in minore :: deindè majus extremum collectivè sumitur in majore, & distributivè in conclusione; ergo, &c.

2°. Propositio major allati sillogismi, non est particularis, sed singularis; sensus enim est. . . Collectio quorundam hominum, est collectio omnium Medicorum.

Objicies 2°. contrà quartum corollarium. Sequentes sillogismi ritè concludunt, licet minus extremum sumatur particulariter in utrâque minore, & generaliter in utrâque conclusione.

Omnia animalia , sunt sensitiva :

Atqui omnia animalia , sunt homo & brutum ;

Ergo homo & brutum , sunt sensitiva.

Animal , non est rationale ;

Animal ut sic , est sensitivum ut sic ;

Ergo sensitivum ut sic , non est rationale.

Admisso quòd *animal* & *sensitivum* , diversa significant , & admisso quòd sint genera , respectu hominis , (quæ tamen falsò supponuntur.)

1°. Nego sillogismum utrumque ritè concludere. In priore namque medium , *omnia animalia* , sumitur distributivè in majore , & collectivè in minore ; in posteriore verò hæ voces , *sensitivum ut sic* , non designant conclusionem esse generalem , quia subjectum non sumitur pro suis omnibus inferioribus.

2°. In priore sillogismo , *homo* & *brutum* , sumuntur collectivè in minore , & distributivè in conclusione.

3°. In posteriore sillogismo , major & conclusio , sunt falsæ , si in his particula , *non* , sit signum præcisionis : falsum enim est , *animal ut genus* , abstrahere à rationalitate.

4°. Denique , in utroque sillogismo ,

R vj.

superiora subjiciuntur inferioribus : quod est impossibile.

Objicies 3^o. contrà quartam regulam generalem. Sequens sillogismus legitimus est , licet ambæ præmissæ sint affirmantes , & conclusio sit negans.

Omnes amici Dei , sunt Sancti :

Atqui omnes Sancti , sunt felices ;

Ergo qui non sunt felices , non sunt amici Dei.

ergo falsa est quarta regula generalis.

Nego antecedens. Ille namque sillogismus non est legitimus , in quo terminus conclusionis , non fuit cum medio comparatus : atqui terminus allatæ conclusionis , nempe minus extremum non fuit , &c. Nam minus extremum , est hic terminus complexus , *qui non sunt felices* ; evidens autem est , terminum hunc complexum , nullatenus reperiri in minore ; proindeque , &c.

At , inquires , hæc propositio... Omnes qui non sunt felices , non sunt amici Dei , eadem est , ac ista... Felices sunt amici Dei ; ergo indifferens est , conclusionem hoc , vel illo modo exprimere.

Nego antecedens. Nam propositio complexa & negans , non eadem est ac propositio simplex & affirmans : at propositio prior , complexa est & negans ; posterior

autem, simplex est & affirmans; proindeque non idem est utriusque subjectum; nec enim, qui non sunt felices, sunt iidem, ac felices.

Objicies 4^o. contrà primam partem legis quintæ generalis. Sequens sillogismus est legitimus, quamvis una præmissa neget, & conclusio sit affirmans.

Qui non sunt amici Dei, non sunt felices.

Atqui Sancti sunt felices;

Ergo Sancti, sunt amici Dei.

Nego propositionem. Hæ namque voces, *amici Dei*, tenent locum majoris extremi in conclusione: at aliæ voces, loco majoris extremi, ponuntur in majori propositione; hæc scilicet, *qui non sunt amici Dei*: porro nemo non videt, amicos Dei, & eos, qui non sunt amici Dei, non eodem esse; proindeque, &c.

Objicies 5^o. contrà posteriorem partem ejusdem legis quintæ. Valet sequens sillogismus, cujus conclusio est universalis, licet una præmissa sit particularis.

Aliquod alatum, est musca:

Atqui nulla musca, est avis;

Ergo nulla avis, est aliquod alatum.

Nego propositionem. Tum quia nullum superius potest esse subjectum, respectu minùs universalis, sicut accidit in primâ propositione hujus sillogismi. Tum quia

§98 CONCERTATIONES

falsum est, nullam avem esse aliquod alatum, quandoquidem quælibet avis, est aliquod alatum; tùm quia hæ voces, *nulum quorundam alatorum*, tenent locum majoris extremi in conclusione; in majori autem propositione, hæ voces, *aliquod alatum*, tenent locum majoris extremi in majori propositione; proindèque non idem est majus extremum in conclusione & in majore.

Objicies denique, contrà sextam regulam generalem: Duo sequentes sillogismi sunt legitimi, licet eorum præmissæ sint particulares.

Aliqui homines, sunt omnes Medici:
Atqui aliquis Physicus, est Medicus;
Ergo aliquis Physicus, est homo.

Aliquod lac, est dulce;
Aliquod album, est omne lac;
Ergo aliquod album, est dulce.

Nego propositionem. Nam quod attinet ad primum sillogismum, dico ipsum multiplici vitio laborare. 1°. Quia terminus, *Medici*, qui tenet locum medii, nec in majore, nec in minore distribuitur: non in majore, si quidem in ipsâ sumitur collectivè; non etiam in minore, quia est prædicatum affirmantis. 2°. Quia non idem est medium in majore & in minore,

ut constat ex modò dictis. 3°. Quia *mjaus* extremum, *homo*, sumitur particulariter in conclusione, & collectivè in majore. 4°. Denique, quia dici quidem potest... Aliquis homo, est Physicus; sed dici non potest. .. Aliquis Physicus, est homo; nec enim totum prædicari potest, de suâ parte contingenti.

Quod attinet ad alterum sillogismum, multiplici quoque vitio laborat. 1°. Quia medium sumitur particulariter in majore, & collectivè in minore, nec proindè distribuitur; imò non est idem terminus. 2°. Quia hic terminus, *aliquod album*, sumitur collectivè in minore, & particulariter in conclusione. 3°. Quia propositio major & conclusio sunt falsæ.

Multi alii similes sillogismi proponi possunt, contrà regulas speciales sillogismorum; sicut legere poteris in opere inscripto, *Philosophia ad usum scholæ accommodata*.

Ut autem eos facilè solvas, diligenter attendendum est, tum ad responsiones mox datas, tum ad tres regulas sequentes.

Prima. Quoties aliquod universale subjicitur in propositione, & unum ex ejus inferioribus de ipso prædicatur; toties illa propositio rejicienda est, ut falsa; quia

nullum superius subjici potest suis inferioribus, cum sit eorum pars.

Secunda. Quoties aliquis terminus collectivè sumitur, in unâ propositione syllogismi, & vel generaliter, vel particulariter sumitur in alterâ; toties haberi debet tanquàm duplex terminus: quia quando sumitur collectivè, ipsa collectio est terminus.

Tertia. Quoties syllogismus est compositus, & in syllogismos simplices resolutus, peccat ex aliquâ parte; toties ejusmodi syllogismus haberi debet, ut vitiosus: veritas enim totalis, pendet à veritatibus singularibus.

Quæres autem 1°. an sextum corollarium sit verum?

Respondéo 1°. priorem hujus corollarii partem esse falsam, tum in materiâ necessariâ, tum in materiâ contingenti. In materiâ quidem necessariâ, quia nulla propositio particularis potest esse vera in hâc materiâ. In materiâ pariter contingenti, quia propositio particularis falsa est, quando generalis est vera; & vice versâ.

Respondéo 2°. posteriorem ejusdem corollarii partem esse veram, si conclusio versetur in materiâ contingenti: quia, ex eo quòd prædicatum contingens conve-

niat, aut non conveniat subjecto, particulariter sumpto; nullatenus sequitur ipsum convenire, aut non convenire subjecto, universaliter sumpto; eandem autem posteriorem corollarii partem falsam esse in materiâ necessariâ, quia in hac materiâ nulla propositio particularis potest esse vera.

Quæres 2^o: utrùm modi à nobis rejecti in materiâ contingenti, ex eo quòd contineant vocalem, E, possint admitti, si propositiones non generaliter, sed indefinite tantùm exprimantur?

Respondeo, modos illos admitti posse; si propositiones exprimantur indefinite: quia sic expressæ, possunt esse veræ.

De syllogismorum reductionibus.

Circà syllogismorum reductiones, hîc inquiri potest, utrùm sint legitimæ? Ut hoc dubium solvatur, notandum est ejusmodi reductiones, idcirco potissimum fuisse excogitatas; quia Periparetici judicarunt, quosdam esse syllogismos indirectos & imperfectos; undè si hoc falsum sit, reductiones erunt prorsus inutiles. Sic igitur,

Conclusio.

Nulli sunt syllogismorum modi indi-

recti, nullique imperfecti. Modos enim indirectos vocant eos, in quibus conclusio deducitur ex præmissis, præter Audientium expectationem; modos autem imperfectos dicunt eos, in quibus termini aliter disponuntur in præmissis, quam in conclusione: atqui nulla conclusio deducitur ex præmissis, præter Audientium expectationem: & licet termini aliter disponantur in præmissis ac in conclusione, non idcirco sillogismi vocari debent imperfecti. Primò quidem, nulla conclusio deducitur ex præmissis, præter Audientium expectationem. Quoties enim conclusio præsupponitur existens, tum in Auditorum mente, tum in mente loquentis, priusquam assumantur præmissæ; toties conclusio dici non debet ex præmissis deducta, præter Auditorum expectationem: atqui res sic se habet, ut constat ex naturâ sillogismi; ergo, &c. Hinc præmissæ forsân indirectè probant conclusionem; sed non idcirco conclusio vocari debet indirecta. 2º. Quando termini non disponuntur in præmissis, sicut disponuntur in conclusione; non idcirco sillogismus dici debet imperfectus. Vel enim præmissæ conclusionem ritè probant, vel non. Si eam ritè probent, sillogismus dici non debet imperfectus; si autem eam

non ritè probent, aliæ sunt assumendæ,
& tunc non opus est reductione; ergo,
&c. proindèque, &c.

De scientia.

Circà scientiam discursivam, sequentiæ
potissimùm inquiruntur.

- 1°. Quomodo comparetur?
- 2°. An sit compatibilis cum errore?
- 3°. An sit sociabilis cum opinione?
- 4°. An stare possit cum fide divinâ?
- 5°. Denique, quænam sint ejus proprietates?

Quomodo comparetur scientia.

Docuit Plato, scientiam de novo non
comparari in hâc vitâ; sed ipsam, nihil
aliud esse, præter reminiscentiâ eorum,
quæ noverat ânima, priusquàm uniretur
corpori. Nimirùm credidit Plato, omnes
animas rationales, in primâ Genesi, fuisse
à Deo productas; disciplinâ quâvis in-
structas: quoniam verò, inquiebat, quæ-
dam ex illis peccaverunt; idcirco, in pœ-
nam peccati, detrusæ fuerunt in corpora,
tanquàm in carceres; sed ad tempus tan-
tùm, modò longius, modò brevius, pro
qualitate delicti: hoc autem in statu, co-
gnitionum suarum fiunt immemores; la-

bore tamen & exercitio paulatim earumdem recordantur.

Pythagoras voluit pariter, scientiam nihil aliud esse, præter reminiscentiam; sed aliud excogitavit sistema, à Platonico diversum. Docuit scilicet, animas rationales, in primâ rerum Genesi productas, & disciplinâ quâvis instructas, corporibus statim fuisse unitas; ita ut his corporibus destructis, migrarent in alia (migrationem hanc metempsychosim vocat): sic autem migrando, omnium fiunt immemores; sed paulatim revocant in memoriam, vel quæ primùm noverunt, vel quæ sibi fuerunt nota, dum informabant alia corpora: hoc sistema confirmabat Pythagoras, asserendo se planè recordari, quòd olim fuisset Euphorbus.

Conclusio prima.

Scientia, non est reminiscentia, ad sensum Platonis. Ut enim scientia foret ejusmodi reminiscentia, duo requirerentur; & ut anima extitisset in alio statu, in quo cognovisset quæcumque nunc cognoscit; & deberet esse conscia, eadem olim sibi fuisse nota; in utrâque enim hac conditione, consistit reminiscentia: atqui deest utraque. Primò quidem, anima non existit in alio statu; definitum enim fuit ab

Ecclesiâ, animas nostras *creari infundendo*, & *infundi creando*. Deinde anima nostra non est conscia, ea, quæ in hac vitâ primùm cognoscit, sibi fuisse quondam nota: verbi gratiâ, quando unusquisque nostrum primùm novit sillogismorum regulas, conscius non fuit, ipsas olim sibi fuisse notas; ut constat per intimum sensum; proindèque, &c.

Dices 1^o. Ridendus esset, qui quæreret hominem, antea sibi penitus ignotum; ergo à pari ridendus esset, qui veritatem antea sibi penitus ignotam, quæreret.

Nego consequentiam. Disparitas est; quia nihil est in nobis, per quod dignoscere possimus hominem, antea nullatenus visum: at dantur in nobis idææ objectorum extrâ nos, vel existentium, vel possibile, ad quas, si datâ causâ occasionali, convertamur, detegere possumus veritates antea penitus ignotas.

Dices 2^o. Testatur Plato, adolescentem interrogatum de Geometriâ, cui nunquam dederat operam, variis quæstionibus appositè respondisse; ergo signum est, adolescentem illum fuisse recordatum eorum, quæ noverat in alio statu.

Nego consequentiam. Exindè namque sequitur tantum, in illo juvene variarum figurarum extitisse idæas, adfuisse causas

occasionales, ad has potius quam ad illas attendendi, eumque, à quo interrogabatur, processisse à faciliioribus, ad paulò difficiliora.

Conclusio secunda.

Scientia non est reminiscencia, ad sensum Pythagoræ; tùm quia quisque conficius esse deberet, se olim cognovisse quæcumque nunc primùm cognoscit; tùm quia hæc opinio nullo nititur motivo probabili; tùm denique quia hæc opinio Conciliorum definitionibus adversatur.

Dices. Pythagoras bonâ fide testatur, se ritè recordari, quòd olim fuisset Euphorbus; ergo, &c.

Distinguo antecedens: quia inter dormiendum somniaverat, se fuisse Euphorbum, concedo. Se reipsâ personam illam sustinuisse, nego. Quemadmodùm igitur nonnulli intrâ dormiendum*, putant se videre mortuos, Dæmones, se per aera volitare, se Magorum & Sagorum choreis interfuisse; ita ut, vel expergefacti credant hæc omnia esse vera: sic Pythagoras aliquando somniaverat, se personam Euphorbi sustinuisse, adeoque bonâ fide testabatur, se hujus recordari.

Quæres igitur, quomodo scientia comparatur?

Respondeo, scientias hoc modo comparari. Animæ nostræ, vel à primo creationis suæ instanti, repræsentationibus objectorum fuerunt instructæ: deinde, rerum sensilium occasione, determinantur, ut attendant ad quasdam ex illis repræsentationibus: tùm ex sedulâ hâc attentione, nascuntur judicia & discursus, quæ, si nihil aliud enuntient, quàm quod deprehensum fuit in repræsentationibus, seu idæis, vocantur cognitiones evidentes, & consequenter scientificæ.

De scientia relativè ad errorem.

Quæritur hîc, an habitus & actus scientiæ, stare possint in intellectu humano, simul cum errore, tùm habituali, tùm actuali?

Certum autem est, 1^o. in eodem intellectu humano, reperiri posse scientiam simul & errorem, circa objecta diversa; nam, verbi gratiâ, potest quis circuli naturam scientificè cognoscere, & errare circa naturam motûs.

Certum est 2^o. scientiam & errorem, stare simul posse, circa idem objectum, sub diverso respectu consideratum: verbi gratiâ, potest quis omnipotentiam Dei scientificè cognoscere, & errare circa ipsius immensitatem.

Certum est 3^o. habitum scientiæ, & habitum erroris, stare simul posse circa idem objectum, sub eodem respectu consideratum, saltem per aliquod tempus: nam ubi quis intensum comparavit erroris habitum, & veritatem postea detegit; tunc paulatim acquirit habitum scientiæ, dum paulatim deletur habitus erroris: sicut enim habitus, juxta leges naturales, non comparantur in instanti, præsertim in gradu notabiliter intenso; sic in instanti non delentur; & consequenter habitus erroris, per aliquod tempus, permanere potest cum habitu scientiæ, circa idem objectum, sub eodem respectu consideratum.

Quæstio igitur superest, utrum actus scientiæ, & actus erroris, simul stare possint in eodem intellectu, circa idem objectum, sub eodem respectu consideratum.

Conclusio.

Actus scientiæ, & actus erroris, stare simul non possunt in eodem intellectu, circa idem objectum, sub eodem respectu consideratum. Nam ad hoc sufficit, quod nemo possit simul ferre judicium affirmans & judicium negans, de eodem subiecto, per ordinem ad idem numero prædicatum:

dicatum: atqui nemo potest illa duo iudicia simul ferre. Nemo quippè deprehendere potest, idem numero prædicatum convenire simul, & non convenire eidem subjecto: quod tamen eveniret, si actus scientiæ & actus erroris, essent simul; ergo, &c.

De scientia relativè ad opinionem.

Quæritur hîc, an scientia & opinio stare simul possint, in eodem intellectu humano, circâ idem objectum, sub eodem respectu consideratum?

Certum autem est, habitum scientiæ & habitum opinionis, stare simul posse circâ idem objectum, sub eodem respectu consideratum; ut constat ex suprâ dictis, de habitibus scientiæ & erroris; undè superest difficultas, circâ actus scientiæ & actus opinionis. Ut solvatur hæc quæstio,

Notandum 1º. actum scientiæ & actum opinionis, posse considerari, vel habitâ ratione objecti, vel habitâ ratione motivorum. Evidens autem est, idem motivum esse non posse evidens simul, & merè probabile; undè quæstio superest, utrùm quis ferre possit duò iudicia, de eodem & sub eodem respectu, quorum unum nitatur

motivo evidenti, & alterum, motivo solummodò probabili.

Notandum 2^o. hîc agi de duobus judiciis, vel idem affirmantibus, vel idem negantibus; undè hæc duo judicia in eo solo discrepant à se invicem, quòd diversis nitantur motivis. His notatis, sit,

Conclusio.

Actus scientiæ & actus opinionis, stare simul possunt, in eodem intellectu, circà idem objectum, sub eodem respectu consideratum. Ut enim actus illi simul stare possint, sufficit, si quis ferre possit duo judicia de eodem subjecto, sub eodem respectu considerato, quorum unum nitatur motivo evidenti, & alterum motivo solummodò probabili: atqui potest quis illa duo ferre judicia: nam, verbi gratiâ, potest quis judicare, Deum existere, & quia deprehendit existentiam inclusam in idæâ Dei, en motivum evidens; & quia idâasserunt omnes viri probi, en motivum probabile; ergo, &c.

Objectiones.

Objicies. 1^o. Actus certus, & actus incertus, sociari non possunt in eodem intellectu, circà idem objectum, sub eodem respectu consideratum: atqui actus scien-

tia certus est, & actus opinionis est incertus; ergo, &c.

1^o. Cum quibusdam Philosophis distinguo majorem. Actus certus, & actus incertus positivè, concedo. Actus certus, & actus incertus negativè, nego. Distingue pariter minorem, & nega consequentiam. Actus dicitur incertus positivè, qui veram in mente dubitationem parit; incertus autem negativè, qui dubitationem quidem non parit, sed eam non amovet. Reverâ, &c.

2^o. Cum quibusdam aliis, sic distinguo majorem. Actus certus & actus incertus, sociari simul non possunt, eo sensu, quòd eodem nitantur motivo, concedo. Si diversis nitantur motivis, nego. Concessâ minorem, distingue pariter consequens. Reverâ, &c.

3^o. Nego minorem, quantum ad secundam partem. Si enim actus opinionis esset incertus; quo plura essent motiva probabilia ejusdem judicii, eo magis incertum esset ejusmodi judicium: quod est absurdum.

Instabis 1^o. contrâ secundam responsionem. Mens non potest dubitare simul, & non dubitare de eodem, sub eodem respectu: atqui si actus certus & actus incertus, stare simul possint, etiam per di-

versa motiva ; mens dubitaret simul , & non dubitaret de eodem , & sub eodem respectu ; ergo , &c.

Nego minorem. Ubi namque actus opinionis , conjunctus est cum actu scientiæ , omnis dubitatio removeretur , non quidem per actum opinionis , sed per actum scientiæ.

Instabis. 2^o. Actus opinionis includit in idæâ suâ dubitationem ; ergo licet sit junctus cum actu scientiæ , nihilominus mens dubitabit.

Nego antecedens. Si enim actus opinionis , vel includeret , vel pareret dubitationem ; quo plura adessent motiva probabilia , eo magis mens dubitaret : quod est absurdum.

Instabis. 3^o. Saltem , præsentem motivo scientiæ , inutilis est actus opinionis. Ubi namque mens est ita certa , ut non possit fieri certior , tunc inutilis est actus probabilis : atqui , præsentem scientiâ , mens est ita certa , ut fieri non possit certior ; ergo , &c.

1^o. Hoc argumentum nihil contrà nos evincit ; nec enim contendimus , præsentem scientiâ , utilem esse actum opinionis ; sed ipsum esse sociabilem cum actu scientiæ.

2^o. Nego sequelam. Ad probationem

autem distinguo majorem. Ubi mens est ita certa, ut fieri non possit certior extensivè, concedo. Intensivè, nego. Distingue pariter minorem, & nega consequentiam. Reverâ, præsentē scientiâ, mens non potest fieri certior intensivè; quia actus scientiæ est summè certus: sed fieri potest certior extensivè, hoc est, mens alia potest habere certitudinis motiva.

Dices contrâ tertiam responsionem. Si actus opinionis esset certus, non differret ab actu scientiæ, ratione certitudinis: falsum consequens; ergo, &c.

Distinguo majorem. Si actus opinionis esset certus, certitudine metaphysicâ, non differret, &c. concedo. Si actus opinionis esset certus, certitudine tantummodò morali, non differret à scientiâ, nego. Concessâ minore, distingue pariter consequens. Solutio intelligitur ex dictis, de variis motivorum certitudinibus.

Instabis. Non magis actus scientiæ & actus opinionis, stare simul possunt, quàm actus scientiæ & actus erroris: atqui hoc posterius est impossibile, ut fuit probatum. ergo, &c.

Nego majorem. Disparitas est, quia actus erroris est essentialiter falsus; non autem actus opinionis. Præterea, actus scientiæ & actus erroris, nec idem affir-

mant, nec idem negant: at actus opinionis hîc supponitur idem affirmans, aut negans, ac actus scientiæ.

De scientiâ relativè ad fidem Divinam.

Quæritur hîc, an actus scientiæ & actus fidei Divinæ, sociari possint in eodem intellectu, circâ idem objectum, sub eodem respectu consideratum. Ut solvatur hæc quæstio,

Notandum est, fidem Divinam duobus modis accipi posse, latè scilicet, & strictè. Fides Divina, latè sumpta, est assensus datus alicui veritati, ex eo præcisè, quòd fuerit à Deo revelata, sive hæc veritas alio modo possit innotescere, sive non. Fides Divina, strictè sumpta, est assensus datus alicui veritati, sic à Deo revelatæ, ut per aliam viam nullatenus innotescere possit. Hoc notato,

Certum est, actum scientiæ & actum fidei, strictè sumptæ, stare simul non posse, circâ idem objectum. Hoc enim objectum supponitur impossibile cognitu, per aliam viam, quàm per revelationem Dei; superest igitur difficulas, circâ actum fidei, latè sumptæ.

Conclusio.

Actus scientiæ & actus fidei Divinæ,

katè sumptæ , stare simul possunt , circâ idem objectum ; sub eodem respectu consideratum. Scientia namque per ordinem ad fidem Divinam , est assensus datus veritati , à Deo revelatæ , ex motivo evidenti ; fides autem Divina , est assensus datus alicui veritati , ex motivo quidem certissimo , at inevidenti : atqui hi duo assensus stare simul possunt. Nam , verbi gratiâ , potest quis assensum præbere huic propositioni, *Deus est immutabilis* : & quia deprehendit immutabilitatem inclusam in idæâ Dei , en motivum evidens ; & quia hæc veritas fuit à Deo revelata , his verbis, *ego Deus , & non mutor* , en motivum certissimum , sed inevidens ; ergo , &c.

Objectiones.

Objicies. 1°. Evidentia & inevidentia , stare simul non possunt , circâ idem objectum , sub eodem respectu consideratum : atqui scientia importat evidentiam ; fides autem divina connotat inevidentiam ; ergo , &c.

Distinguo majorem. Evidentia & inevidentia stare simul non possunt , habitâ ratione ejusdem motivi ; hoc est , idem motivum non potest esse evidens simul & inevidens , concedo. Habitâ ratione di-

verforum motivorum ; id est , nemo potest assentiri eidem veritati , & ex motivo evidenti , & ex alio motivo inevidenti , nego. Concessâ minore , distingue pariter consequens. Reverâ , &c.

Instabis. Se habet scientia , respectu fidei Divinæ , sicut intuitiva Dei visio : atqui intuitiva Dei visio , stare non potest cum fide Divinâ , etiam habitâ ratione diversorum motivorum ; ergo , &c.

Respondeo 1°. vitiosam esse hanc argumentationem ; quatenus procedit à minus noto , ad magis notum : intuitiva quippè Dei visio , qualis est in Beatis , non potest à nobis cognosci in hac vitâ ; per solum enim sensum intimum innoscit.

Respondeo 2°. negando paritatem. Disparitas est , quia fides Divina est medium nobis concessum , ad obtinendam intuitivam Dei visionem ; undè obtento fine , mirum non est , si cessent media : at verò , fides Divina & scientia , possunt esse duo media , ad intuitivam Dei visionem obtinendam idonea.

Objicies. 2°. Fides non habet meritum , ubi humana ratio præbet experimentum , ut loquuntur quidam Patres ; ergo signum est , scientiam & fidem divinam , stare simul non posse.

1°. Nego consequentiam. Quamvis enim nullum esset fidei meritum, dum adjunctam habet scientiam; exindè non sequitur, fidem Divinam & scientiam, esse infociabiles.

2°. Distinguo antecedens. Fides non habet meritum, quod se teneat, ex parte motivi evidentis, concedo. Quod se teneat, ex parte motivi fidei Divinæ, nego. Reverâ, dum assensum præbemus alicui veritati, ex motivo evidenti, nullum quidem est meritum, quia tunc necessitatur ad assentiendum; sed dum assensum præbemus ex motivo inevidenti; quia possumus assensum præbere, vel non præbere ex hoc motivo: Ideò possumus mereri, assentiendo ex hoc motivo: & tunc captivandus est intellectus, ut assensum præbeat ex hoc motivo: & certè si meritum fidei Divinæ, vel tolleretur, vel imminueretur, ex eo quòd ejus objectum per aliud motivum cognosceretur, scientia noxia foret Christianis; & veritas veritati opponeretur: quæ sunt absurda; proindèque, &c.

At, inquires, nemo potest eidem veritati necessariò simul & liberè assentiri.

Distinguo propositionem. Ex eodem motivo, concedo. Ex diversis motivis, nego. Solutio intelligitur ex dictis.

S.v.

Objicies denique. Tam actus scientiæ, & actus fidei Divinæ sunt incompatibiles, quàm lux & tenebræ: atqui lux & tenebræ sunt incompatibiles; ergo, &c.

Nego majorem. Disparitas est, quia lux & tenebræ se habent, ut ens, & non ens; tenebræ namque sunt absentia luminis: at scientia & fides Divina, sunt duo entia positiva; nec enim fides Divina dici potest, absentia scientiæ, seu ignorantia.

Instabis. Evidentia & inevidentia, se habent ut lux & tenebræ; ergo scientia & fides Divina, se habent ut lux & tenebræ:

Nego consequentiam. Nam scientia habet quidem evidentiam sibi adjunctam; sed non est ipsa evidentia. Pariter, fides Divina conjungitur quidem cum inevidentiâ, sed non est ipsa inevidentia, seu carentia evidentiae.

De scientiæ proprietatibus.

Inter scientiæ proprietates, numerantur unitas, subordinatio, veritas, certitudo & evidentia. De veritate, certitudine & evidentia, jam passim dictum fuit, & alibi dicitur; quamobrem nonnulla hîc supersunt examinanda, circa sub-

ordinationem & unitatem scientiarum.

Quod attinet ad unitatem, certum est 1^o. scientiam quamlibet, spectatam per ordinem ad objecta increata, seu necessariò existentia, unam esse unitate numericâ: quia quodlibet objectum necessariò existens, essentialiter est immultiplicabile.

Certum est 2^o. scientiam spectatam per ordinem, ad objectum creatum commune, unam esse unitate similitudinis: quia quodlibet objectum creatum universale, essentialiter est multiplicabile.

Certum est 3^o. scientiam spectatam, ratione actuum intellectualium, unam esse unitate similitudinis: quia omnes actus intellectûs in multis attributis sunt similes.

Quæstio autem est, utrùm habitus scientiæ sit unicus; an verò complexio multorum habituum particularium?

Dico autem 1^o. scientiam, quæ versatur circa objecta similia, esse complexionem, seu congeriem multorum habituum similium. Cum enim actus, hoc in casu, sint similes, cùmque occasione cujusque actûs producat habitus partialis; necesse est, ut habitus totalis tunc sit complexio multorum habituum similium.

Dico 2^o. scientiam totalem, esse con-

geriem multorum habituum diversorum. Ubi namque diversæ sunt actiones, diversæque difficultates superandæ; ibi debet esse complexio multorum habituum diversorum: atqui in scientiâ totali, verbi gratiâ, in Logicâ, multæ sunt actiones diversæ, multæque occurrunt difficultates superandæ, sicut unusquisque per sensum intimum, conscius esse potest; proindeque, &c.

Quod attinet ad scientiarum subordinationem, duo hîc inquiruntur. Primum, quid sit hæc subordinatio? Secundum, quænam conditiones requirantur, ut una scientia dicatur alteri subordinata?

Ad primam quæstionem respondeo, subordinationem scientiæ, esse ipsius dependentiam ab aliâ. Hæc autem dependentia, in eo præsertim posita est, quod principia cognitionis mutuetur ab aliâ scientiâ. Ubi notabis eam scientiam, quæ pendet, vocari *subalternatam*; eam autem, à quâ pendet, vocari *subalternantem*.

Ad secundam quæstionem respondeo, duas, potissimum requiri conditiones, ut una scientia pendeat ab aliâ. Prima est, ut objectum subalternatæ contrahat, & determinet objectum alternantis; hoc est, ut sit unum ex ejus inferioribus. Secunda, ut subalternata, principia sua cognitionis

reipsâ mutuatur à subalternante ; hinc ars Medica , verbi gratiâ , subordinatur Physicæ , quia objectum artis Medicæ , scilicet corpus humanum , est unum ex inferioribus objecti Physicæ , seu unum ex corporibus universim ; & quia ars Medica principia sua mutuatur à Physicâ.



Q U A R T A P A R S L O G I C Æ.

De Methodo.

METHODUS , est actus intellectûs , quo multæ apprehensiones , multa iudicia , multique discursus , secundum certas regulas , ita disponuntur , ut aut veritates detectæ , cæteris hominibus manifestari possint ; aut ut veritates quædam ignotæ detegantur : hinc duplex est methodus , synthetica , & analytica.

Methodus synthetica , quæ vocatur aliter , modò compositionis , modò doctrinæ , definiri potest ea , per quam veritates quædam detectæ , congruo debitoque ordine

modò inventionis , modò resolutionis ,
definiri potest , modus veritatis alicujus ,
de novo detegendæ.

Circà hanc methodi speciem , nota
1^o. ipsam adhiberi non posse , ut scientia
quædam totalis de novo detegatur ; sed
solummodò ut veritatem partialem ali-
cujus scientiæ detegamus : verbi gratiâ ,
ut in Physicâ , causa gravitatis corporum
inveniatur.

Nota 2^o. quæstionem quamlibet , ver-
fari , vel circà voces , vel circà entia , per
voces significata. Quæstiones circà voces ,
eas appello , per quas , vel alicujus ænig-
matis solutionem assequi , vel scriptoris
mentem obtinere contendimus. Quæstio-
nes circà entia , sunt illæ , per quas , vel
alicujus entis naturam , per effectus , pro-
prietates , aut affectiones inquirimus ; vel
cognitâ quâdam causâ , impropriè dictâ ,
nonnullos ejus effectus , aut affectiones
quasdam , investigare conamur ; vel ex
notitiâ quarundam partium , & totius ,
assurgimus ad notitiam cæterarum par-
tium ; vel ex notitiâ partium omnium ,
devenimus ad notitiam totius ; vel deni-
que , cognitâ relatione inter duo entia ,
pervenimus ad notitiam similis relationis ,
inter alia duo entia.

His notatis , circà hanc methodum

sequentes leges, ut præcipuas, seligo.

Prima. Si quæstio sit de voce quâdam ænigmatica; perpendendum est, an in sensu proprio, an in metaphorico, an materialiter, an formaliter sit accipienda? deinde quisnam fuerit Authoris scopus, & tandem ad omnes circumstantias diligenter est circumspiciendum?

Secunda. Si agatur de sensu & doctrinâ cujusdam Authoris; examinandum est 1°. num aliis in locis, mentem suam clariùs aperuerit? 2°. Cavendum, ne ex uno, aut altero textu, de scriptoris doctrinâ judices; sed de eâ judicandum erit, ex totius operis æconomiâ. 3°. Versionibus, ut aiunt, seu translationibus, ex uno idiomate in aliud, non sic erit adhibenda fides; quin exemplar authenticum, seu propriâ scriptoris linguâ conscriptum consulatur. 4°. Denique, si in opere quodam occurrant variæ lectiones, ei præsertim erit adhærendum, quæ scriptoris scopo magis est accommodata, quæque benigniorem exhibet sensum.

Tertia. Si de entibus ipsis instituatur quæstio; ita ut eorum natura, & proprietates, vel per affectiones, vel per effectus, inquirantur. 1°. Perpendendum erit, quales sint ejusmodi affectiones & effectus; id est, affectiones illas & effectus illos,

sub diversis quasi faciebus inspicere debes. 2°. Videndum erit, num ab unicâ, num à multis simul causis, sive similibus, sive diversis, prodire potuerint? 3°. Examinandum erit, utrùm ex circumstantiis cognitis, ritè colligi possit, effectus illos, ab hâc potius, quàm ab aliâ causâ pendere? Si natura cujusdam entis fuerit nota, & ejus partes, sive essentielles, sive contingentes inquirantur; perpendendum erit, quænam sint hujus entis relationes, sive essentielles, sive contingentes, & quænam sint relationum contingentium fundamenta; deinde quænam attributa nascantur ex illis relationibus; & tandem quænam ex his attributis, sint vel communia, vel propria; quænam sint vel sociabilia, vel insociabilia; quænam sint inseparabilia, vel separabilia?

Quarta. Si cognitò toto, quærantur quædam ejus partes, aut cognitis partibus inquiratur totum; sicut contingit in quantitatum calculo; examinandum erit, 1°. utrùm agatur de partibus essentialibus, an de contingentibus, an de integrantibus, an de potentialibus, an de actualibus, an de similibus, an de diversis, an de aliquotis, seu æqualibus, an de aliquantis, seu de inæqualibus? 2°. Videndum, quænam sint partium illarum rela-

tiones, tùm inter se, tùm per ordinem ad totum?

Utrique supradictæ methodo, quædam sunt leges communes: verbi gratiâ, quòd utraque supponat aliquid jam cognitum; quòd in utrâque, clarè & nitidè proponendæ sint quæstiones, certa ab incertis diligenter fecernendo; quodque in utrâque procedendum sit à facilioribus, ad difficiliora; & à simplicibus, ad magis composita.

Cartesius, in suâ dissertatione de methodo, quatuor proposuit regulas, utriusque methodo communes, quæ cum sint valdè utiles, sunt hîc afferendæ.

Prima. Nihil, tanquam verum admitatur, nisi certò & evidenter cognoscatur ut verum; hoc est, inquit, intrâ judicandum, diligenter vitandæ sunt præcipitantia & anticipatio, seu præjudicium; nihilque concludendum, nisi quod tam clarè & distinctè pateat rationi, ut in dubium nullatenùs revocari possit.


Secunda. Quælibet difficultas, in tot partes distribuatur, quot sufficiunt, ad eam commodiùs solvendam.

Tertia. Cognitiones omnes, quæ impenduntur in detegendâ veritate, certo semper ordine promovendæ sunt; incipiendo scilicet à rebus simplicissimis, &

cognitu facillimis, ut paulatim, & quasi per gradus, ad difficiliorum & magis compositarum cognitionem fiat processus. In aliquem etiam ordinem ea sunt in mente disponenda, quæ ex naturâ suâ, sese mutuo non præcedunt.

Quarta. Sive in quærendis mediis, sive in difficultatum partibus percurrendis, ita fieri debet accurata partium enumeratio, & ad omnia sic circumspiciendum, ut adsit certitudo, nihil fuisse prætermisum.

Qui plura scire voluerit, circa utramque methodum, legat duos Libros gallicè scriptos, quorum prior inscribitur, *la Logique*, ou *l'Art de penser*; posterior verò, *Système de réflexion*, ou *Essai de Logique*, Authore CROUZAS.



C O N C E R T A T I O

circà Methodum.

UNICA quæstio proponitur à Philosophis, circà methodum, utrùm nempè sit genere diversa ab apprehensione, judicio & discursu; hoc est, an quemadmodum tres hi actus sunt genera-

operationum, à se invicem diversa; sic methodus quartum sit genus, à tribus prioribus diversum?

Conclusio.

Methodus, non est quarta mentis operatio, à tribus aliis genere diversa. Si enim ad ritè disponendum & ordinandum, sufficiant apprehensiones, judicia & discursus; methodus non est quarta mentis operatio, à tribus prioribus genere diversa: atqui res sic se habet. Ut enim quis ritè disponat & ordinet, sufficit, si singula objecta disponenda apprehendat, si judicet, & per discursum, si opus est, detegat, quorumnam objectorum notitia cæterorum cognitioni præire debeat; hoc enim posito, methodus intelligitur legitima: atqui per tres supradictas operationes, id præstare potest, ut per se patet; ergo, &c.

Et certè, si quis malè disponat & ordinet, arguitur meritò, quòd nec ritè judicaverit, nec ritè fuerit ratiocinatus, circa partium dispositionem; ergo signum est, methodum non esse operationem, à tribus aliis genere diversam.

Colliges, methodum nihil aliud esse, præter congeriem apprehensionum, judi-

riorum & discursuum; ita ut partes aliqujus scientiæ, ordine quodam artificioſo diſponendæ, operationum illarum ſint objectum.

Objectiones.

Objicies. 1°. Methodus, eſt actus intellectûs, à cæteris genere diverſus; modò quis ritè judicare & diſcurrere valeat, licet ineptè diſponat & ordinet: atqui poteſt quis, &c. ergo, &c.

Distinguo majorem... Modò quis ritè judicare & diſcurrere valeat, de ſcientiarum partibus ordinandis, licet &c. concedo. De aliis entibus, nego. Distingue pariter minorem, & nega conſequentiam. Reverâ, &c.

Objicies. 2°. Idèd ſecunda mentis operatio genere differt à primâ, quia nectit prædicatum cum ſubjecto; & idèd tertia differt à ſecundâ, quia nectit conſequens, vel cum antecedente, vel cum præmiſſis: atqui quarta mentis operatio nectit judicia & diſcurſus; ergo quò jure ſecunda & tertia operationes differunt à ſe invicem, eodem jure methodus ab aliis genere difcrepat.

1°. Nego majorem: quia ſecunda & tertia mentis operatio nihil in rei veritate nectunt; ſed per eas detegitur, quænam

objecta sint, vel inter se connexa, vel à se invicem separata.

2°. Dato quòd judicium & discursus nectant, distingo minorem. Methodus multa judicia, multosque discursus nectit, ita ut hic nexus genere non differat, à nexibus judiciorum & discursuum, concedo : ita ut ab iis genere discrepet, nego. Distingue pariter consequens. Reverâ, &c.

Objicies denique. Illa mentis operatio genere differt ab aliis, quæ habet præcepta sibi propria : atqui methodus habet, &c. ergo, &c.

Nego majorem. Si enim mentis operatio diversa foret ab aliis genere, ex eo quòd haberet præcepta sibi propria, definitio & divisio; sillogismi diversarum figurarum, &c. totidem essent mentis operationes, à se invicem genere discrepantes, si quidem habent præcepta sibi propria : at consequens ab Adversariis non admititur ; proindeque, &c.

Finis Logice.



Tomo I. errata Logicæ.

- P** Age 17. *lin. 2.* Deus Justus , *lege* , Deus est
Justus.
P. 24. *lin. ult.* mpositis , *lege* , compositis.
P. 40. *lin. 9.* sic *lege* , Si. *Idem lin. 13.*
P. 72. *lin. 13.* essentiam , *lege* , existentiam.
P. 134. *lin. ultim.* nobili , *lege* , mobili.
P. 160. *lin. 23.* *dele* , aut.
P. 161. *lin. 1.* possint , *lege* , possent.
P. 275. *lin. 14.* familiaribus , *lege* , familiaribus.
P. 284. *lin. 17.* intellectus , *lege* , intellectu.
P. 325. *lin. 25.* contrarias , *lege* , contrariæ ; &
lin. 26. subcontrarias , *lege* , subcontrariæ.
P. 337. *lin. 2.* *dele* , est.

